

祠
部
集
一



叢書集成
初編

主編者
王雲五

商務印書館發行



集 部 祠
(一)



3 0649 7737 8

撰 至 強

本館據聚珍版叢
書本排印初編各
叢書僅有此本

祠部集

提要

臣等謹案祠部集三十五卷。宋強至撰。至字幾聖。錢塘人。官至三司戶部判官。尚書祠部郎中。宋史不爲立傳。曾鞏序稱其爲韓琦所知。常引入幕府自助。今世所傳韓忠獻遺事。卽至所撰。其歷官本末見於集中者。大約登第後。謁選得泗掾。以薦令浦江。東陽。元城。諸邑。又嘗入爲京曹。從韓琦辟入陝西幕府。其上河北都運。元給事書。所云四歷州縣。三任部屬者。可以見其生平大概。至爲大賢所嘉契。其才品卓有可稱。而所作奏牘之文。曲折疏鬯。切中事情。尤爲有裨世用。杭州志稱韓琦出鎮時。上奏及他書。皆至屬稿。琦乞弗散青苗錢。神宗閱之曰。此必強至之文也。因出其疏。以示宰臣。新法幾罷。是固琦之忠誠惻怛。足以感動人主。而至之文章懇摯。亦有以助之。集中諸體詩。沈鬱頓挫。氣格頗高。在北宋諸家中。尤可別樹一幟。觀所作送邵秀才序稱。初爲鄉賦。舉首賦出。四方皆傳誦之。旣得第。恥以賦見稱。乃專力六經。發爲文章。有譽其賦者。輒頸漲面赤。惡其薄己。是其屏斥時好。力追古人。實有毅然以著作自命者。宜其根柢之深厚若此也。宋史藝文志。馬端臨經籍考。俱載祠部集四十卷。文淵閣書目。尙著於錄。其後遂湮沒不傳。近時厲鶚撰宋詩紀事。僅從高似孫蟹略。方回瀛奎律髓。採錄二詩。而其他均未之見。今從永樂大典各韻中。裒輯編綴。得詩文數百篇。雖原目

久佚。無由知其完闕。而準計卷佚。當尙存十之八九。謹分類排纂。釐爲三十五卷。而稍據其出處之迹。以爲詮次。庶知人論世者。猶得考見其崖略焉。

祠部集原序

幾聖諱至。姓強氏。餘杭人。幾聖字也。爲三司戶部判官。尙書祠部郎中。旣沒。其子浚明集其遺文爲四十卷。屬予序。幾聖少貧。能自謀。學爲進士。材拔出輩類。出輒收其科。其文詞大傳於時。及爲吏。未嘗不以其閒。益讀書爲文。尤工於詩。句出驚人。世皆推其能。然最爲相國韓魏公所知。魏公旣罷政事。鎮京兆。及徙鎮相。魏常引幾聖自助。魏公喜爲詩。每合屬士大夫賓客與游。多賦詩以自見。其屬而和之者。幾聖獨思致逸發。若不可追躡。魏公未嘗不歎得之晚也。其在幕府。魏公每上奏天子。以歲時慶賀。候問。及爲書記。通四方之好。幾聖爲屬藁草。必聲比字屬。曲當繩墨。然氣質渾渾。不見刻畫。遠近多稱誦之。及爲他文。若誌銘。序記。策問。學士大夫則簡古典則不少。貶以就俗。其所長兼人如此。魏公數薦之朝廷。以謂宜在館閣。然未及用。魏公旣薨之明年。幾聖亦以疾卒。幾聖之遺文。在魏公幕府爲最多。故序亦特反復見之。覽者可推而考之也。其行治官世已著於誌。幾聖之葬者。故此不著。元豐三年七月五日。亳州楞堂曾鞏序。

祠部集目錄

卷一

五言古詩三十四首

卷二

五言古詩二十七首

卷三

七言古詩四十二首 附錄二首

卷四

五言律詩七十九首

卷五

五言律詩一百三首

卷六

七言律詩九十三首

卷七

七言律詩八十二首 附錄二首

卷八

七言律詩八十八首

卷九

七言律詩七十一首

卷十

七言律詩七十一首

卷十一

五言排律詩二十六首

七言排律詩十六首

卷十二

五言絕句詩

六言絕句詩

七言絕句詩

卷十三

劄子七首

卷十四

表三十二首

卷十五

表三十首

卷十六

表三十首

看詳三首

卷十七

狀五十四首

卷十八

狀六十首

卷十九

狀四十二首

卷二十

蔚部集 目錄

狀五十七首

卷二十一

狀七十二首

卷二十二

啟三十一首

卷二十三

啟四十首

卷二十四

啟二十九首

卷二十五

書十二首

卷二十六

書十七首

卷二十七

書七十七首

卷二十八

書五十三首

卷二十九

書九十首

卷三十

書八十五首

卷三十一

書八十二首

卷三十二

書四十二首

卷三十三

策問十首

頌一首

銘一首

序九首

嗣部集 目錄

跋一首

記五首

舉詞三首

考詞十一首

牒詞六首

卷三十四

祝文七首

祭文十六首

行狀一首

卷三十五

墓誌銘十首

遺事記一首

祠部集卷一

五言古詩

宋 強

次劉才邵送魏彥成韻


國朝廣仁恩。法令去煩苛。三官貴持平。除用不輕可。矯矯魏詳刑。儒術富而夥。餘事及刑書。議論不偏頗。能令舞文吏。無計得掀簸。計其所平反。陰功已堆垛。神方介以福。豐稷報勤播。當卽趨要塗。鳴玉清以儼。誰云出處間。此事難預揣。秋風鄉思動。請郡向江左。猶冀款襟顏。已聞將轉舵。想見桐州民。延首候來舸。置酒樂佳辰。剩插黃花朵。

依韻答吳殿丞應之見寄

古人不可見。空名留竹素。幸而並世生。千里或相去。懷賢我何勞。蓄道公其富。老驥伏櫪鳴。使看駑駘步。浩歌掉簪紱。思極江山趣。西風動遊袂。撇在千巖路。賤子匹馬來。邂逅一相晤。既見豁所懷。私心願執御。論議攻不破。牢若金城固。作詩遺長髯。知異衆人遇。

向負春遊辭。以風雨開霽。既夕樂事未果。因書百言。聊以自戲。

常恨春日少。况遭風雨多。桃李冷不覺。案原本闕二字如濁河。廣陌斷游騎。寂不開行歌。方其正雨時。樂事空蹉



跽晴來又累朝。日暖風祥和。紅入桃李枝。綠轉池塘波。何曾到花下。把酒呼青蛾。屈指九十期。今已一半過。繫日乏長繩。欲却無神戈。花若解笑人。謂我前言何。

道旁松

何年澗底栽。移植俯官道。腹空蟻穴衆。枝瘦龍脊裏。斧斤須長材。霜雪豈終老。大有歲寒操。見盡桃李夭。雷君自陝及門謁。與書偕。聊成短篇。以答來貺。

一官偶來泗。舉動畏謗嘲。萬事不掛齒。終日口欲膠。所學未信時。尤欲密斂句。賢者或我顧。未免談屢交。雷侯將家子。而至自陝郊。踵門貺予書。享饋煩絃匏。始見氣頗勁。既語理不殺。愛子欲子薦。言畢徒喁喁。託蔭須高林。而乃依寸茅。盍行游鉅公。一言變魚蛟。

聞杭饑皇祐二年

客從吾鄉來。告我歲大歉。百金易斗粟。富者頭屢撼。餓殍相枕藉。億口盡虛頷。客言尙未竟。予淚已成點。避席駭相問。予衷不能掩。位卑俸給薄。用度抑難減。是以之官日。盡室來未敢。予行弟獨留。居常動予慊。歲凶吾產薄。慮其苦粗淡。所以聞客言。私懷轉興感。客遽前止予。君言固足貶。善自愛家爲。微俸誠亦忝。上有天子明。封章日可刻。先陳劭耕稼。次述抑聚斂。澄汰兵籍冗。惇尙土木儉。坐使四海富。寧患食不糗。胡爲所謀狹。而復自戚慘。再拜起謝客。予言愧塵玷。

上知郡都官

列郡二千石。所理我與共。臨淮守最賢。其口交一頰。彼邦困飛蝗。我境欲集鳳。彼民粒不充。我黍地無空。
去聲嚴乎如秋霜。巨猾弗得縱。斷乎如蒼蠅。吏法不敢弄。鈴齋晝觀書。朱轡春勸種。明堂購衆材。我公實梁
棟。行吐胸中奇。勳名光有宋。賤生何爲者。碌碌備僚從。天幸所與薄。半歲侍羈鞅。鸞雀勢力小。鵝鴈食口
衆。貧賤兩雖甘。漑懇輒披控。朝廷重爲邑。外臺薦方用。豈惟進寸蹠。抑可利微俸。私心覬公舉。如昔望郡
貢。媒衞士所醜。未罪已自訟。公如飛一章。舉族免飢凍。

呈屯田

溪水日夜落。稍稍露沙面。經旬更不雨。深處亦成澱。巨篙架空航。澀若泝淺淀。沉乃載百指。數纜安可繹。
念此歸思發。急踰強弩箭。公如惜滯留。願借長風便。

送藥王圓師

吳僧甚商賈。嗜利角毫芒。或以醫自業。利心劇虎狼。今時愚鄙人。平居恡私囊。寒餓來求仁。一毫不肯將。
不幸病且亟。呼醫計倉忙。惟醫所欲求。萬金弗較量。吳僧業醫者。十室九厚藏。張口待人哺。喋喋厭酒梁。
求其不爾徒。蕭叢揀蘭芳。圓師何許人。出家本衢梁。自圓之先師。三世爲醫王。圓尤得術精。一九起膏肓。
雖掛吳僧籍。亦吳其衣章。仁義薰厥心。愈彼不願償。人以財啗圓。惡如唾霑裳。晨齋未有餘。一餅蔬充腸。
行囊無長物。秋風藥裹香。昨因赴人急。警然來浦陽。始見已可愛。氣溫語端詳。再見結所好。佛外喜縑緗。
住久見益數。乃知數事長。作詩聊記師。豈曰爲行光。

題婺源胡氏脩然堂

歙山碧參差。歙水綠演漾。之子山水間。築室傲天壤。山空鳥飛鳴。水淨魚下上。觀魚悟至樂。聽鳥悅幽響。一椽泯悲懽。萬事齊俯仰。人境兩脩然。無復塵區想。故人石渠英。緣以命堂榜。作詩羨高懷。中服非外獎。孫莘老名嗟今急名人。疾足投世網。心撓跡因喧。求得道已枉。茲理會莫知。所趨岐已兩。予亦慕子徒。泉石久思往。何當伴琴觴。一鼓東南槩。

攜印謁新守宿至德上方翌日馬上十四韻

攜符拜州守。半舍度微徑。院距邑十五里有僧謁道傍。云我遊邑令。因徐指叢林。佛宇頗嚴淨。願驅大夫馬。一宿憇征鐘。我生嗜煙蘿。聞此愜幽興。乃留驗僧言。金碧果輝映。捨策游上方。塵襟覺疎瑩。山氣亂朝暮。谷響答鐘磬。清風中宵來。雲斂月垂鏡。微吟不知旦。坐席若初定。遂行登脩塗。回首謝巖磴。咨予秉微尚。碌碌奚足競。一月兩移府。未嘗謁府未暇救民病。徒爲章服裹。折腰損真性。

予連日奔走吏事蚤出暮還君然兄數賜臨問不果一見辱遺佳句謹依韻和酬

朝出雞聲新。暮歸馬蹄茶。思君不得往。一飯或三輟。自從伐木興。友道寢欲滅。夫子眷獨勤。聊解子心結。

橫溪回道中作

赤雲蔽層霄。早日作炎酷。解帶蔭廣廈。膚汗發如沐。世無廣寒宮。何地避蒸溽。嗟嗟尙未已。里胥報甚速。云有邑頑民。飲酒盜鼠腹。半酣張空拳。中者致殞蹄。甲令著定憲。繼踵當視覆。驅車不敢緩。冒暑走山曲。

敞蓋無丈陰。託庇何局促。因思古賢宰。民鮮犯鞭扑。子賤弗下堂。政務自清肅。願予今何人。爲治乃不淑。民旣冒重辟。己亦苦匍匐。胡不樹善治。泰然處華屋。

祠僊姑回馬上作

至和歲甲午。德音絕常軌。寬徭且宥罪。外復講羣祀。君言一朝發。人神共悅喜。今我官浦陽。距邑越十里。聞有僊姑祠。獨弗識何氏。按圖得本原。云是黃帝女。當年追僊遊。茲地條輕舉。于今數千載。廟貌尙留此。幾欲私謁款。吏事日勞止。邈會郡符降。奉行德音旨。以廟隸邑境。俾我卽祠所。詰朝叩庭下。牲體已夙庀。巋然重林間。楹桷極華美。姑一婦人焉。血食反無已。丹朱雖男兒。而又作堯子。生失四海位。沒同若敖鬼。丈夫不自立。始信徒爲爾。

久雨

雨師握天令。汲汲不停駕。疾驅鞭羣龍。俛首隨叱咤。乘怒作霖霖。不復息晝夜。羲和久埋輪。縮手喜閒暇。山川盛奔溢。若虞歷陽化。農民驗甲子。其應早在夏。農民謂甲子日夏當大旱。我疑上天漏。誰能補天罅。慰此農民心。無使憂早稼。

寄辟疆

憶昨枉君軒。始來就客邸。爾僕方息肩。顧我遽屈體。守闈前通名。倒屣出致禮。相見吐論議。所學愈根柢。徐爲出巨編。微若涉清濟。昏膜得箴刮。塵心逾易洗。我亦露狂簡。君曾不訶詆。于時園正花。長日甕盛醴。

插枝必滿頭。飲醜須露底。未幾踏歸鏡。相將灑別涕。戀戀有情照。數數辱書抵。自言困道途。僅能足鹽米。頻吟口燥吻。久騎肉消脾。首飛詩人蓬。腸苦孟郊薺。學舍勉棲託。亭會復傾俛。黃卷樂往聖。青襟列諸弟。愛子乏先容。何人堪密啓。努力著要策。隨詔獻文陛。

伯夷詩

昔紂爲不道。毒心無生靈。四海如在鼎。誰能救將烹。周武從天人。戎衣舉仁兵。伯夷獨何爲。乃諫不聽行。紂徒久厭主。一朝倒戈迎。天下旣宗周。大冊書武成。夷義愈爲恥。寧死弗苟生。周粟惡不食。雙目且餓瞑。紂無王者實。徒有王者名。雖曰臣伐君。紂德匹夫輕。吁夷豈不知。意在銷姦萌。

書感

擇己要有持。擇人要有別。淺夫脫所守。柔顏附炎熱。庸兒昧所擇。目前事苟悅。彼柔有時變。爾炎有時歇。歇者旣死灰。變者遂剛鐵。平時綢繆地。一朝等楚越。古人論淡交。君子保常節。作詩貽知言。不爲昧者說。

奉和純甫秋扇

粲粲機中練。作扇圓中規。盛夏天無風。廣宇猶蒸炊。汗流旣浹體。蚊齒仍毒肥。團扇當爾日。功利兩得施。一入君掌握。汗卻蚊攘披。秋風刮地來。涼氣襲空幃。功竟勢亦去。退藏乃其宜。聖人制器用。用舍各有時。弓所以在鳥。鳥盡弓胡爲。蹄所以在兔。兔獲蹄何之。葛屨乃履霜。刺譏見于詩。作扇本禦暑。暑退當棄道。奚必昧用舍。託怨班婕妤。

八月十六日夜與宗哲純甫翫月

結客城東樓。明月初出海。漸如水精盤。天寓無寸竅。清光如何買。厥價珠百琲。中秋一夕過。已覺人意改。冰輪縱遲遲。此夜復誰待。老蟾益自張。吐輝增十倍。把酒共月語。世態何足罪。自有昭昭輝。千古萬古在。冬日偶書。呈縣學李君擇之。

北風吹嚴雪。草木無媚姿。野田一穗盡。雀鼠猶苦飢。浦陽槩窮山。不與陰冬宜。今我雖旅宦。一身十口隨。有酒奉親壽。呼妻伴兒嬉。幽腸尙多感。惻結對此時。念子客千里。形影外更誰。空齋抱吟膝。敝案覆飲卮。我本依賴少。校子反有餘。何日富貴塗。引子並足馳。朝得位夔契。暮致君軒羲。收身結嘉客。量金買妖姬。人間有閒愁。安能到雙眉。

送純甫仙尉

秋晚送歸客。別酒風前酣。一揖不回顧。瞥然就征驂。挽裾問客故。捨我何其甘。客言有慈母。三歲淮之南。今將拜嘉慶。歸心劇風帆。薄親厚他人。倒置理豈堪。願予失所問。汗顏爲客慙。客生貴豪家。妙年穿青衫。初仕已絕足。不與羣鴛參。掾邑尙牽制。逸驥受轡銜。縱之使自馳。萬里日可貪。持此作親壽。行矣毋少淹。將別純甫。四十字奉呈。

我馬將北馳。子車亦南挽。車馬無留行。相去卽相遠。風林秋聲乾。落日孤峯晚。後會未可知。莫使別觴淺。將有東陽之行。宗哲爲具話別。以詩見招。因答來覲。

秋高山城幽。風動林葉吼。百感從中來。將分故人手。故人惜輕別。樽酒欲相厚。未飲已頽然。別恨濃於酒。

別筠陽

憶初來筠陽。風土習未穩。家人畏山氣。一日或數飯。愁來數去期。三載若天遠。居之既累月。吏人頗云簡。山水慣可觀。雞醃肥堪饌。却愁解印紱。奪此養疎懶。觴詠趣滋適。不覺滿銓限。門前迎新官。槌鼓鬧田阪。願予謝鄧侯。寧有邑人挽。水聲與山光。念此違心眼。

寄純甫

相從浦陽官。三十月盈缺。出必並轡游。居常對案啜。予褊子能恕。子短予還訐。久而見交心。中不容間舌。同諫乃於窮秋時。忽作遠道別。別腸如亂絲。一寸知幾結。別語如悲笳。一聲凡數咽。咽極繼以號。旁顧亦慘切。匹馬獨歸來。山城雨初歇。

依韻答貫中見貽

魚蝦泳大海。龍困汗池埋。鸞鳳氣塞吭。百鳥鳴其嗜。猶吾呂夫子。短褐包壯懷。舉腳踏青雲。失勢寸步乖。却視後來輩。厭已猶積柴。否屯豈我獨。升泰奚人皆。一別春四歸。聚首邈不諧。前日忽踵門。謁與行李偕。相迎把交臂。似合已擘釵。于時節清明。花淨無纖霾。共引不算觴。傾瀉猶長淮。歌詩互挑戰。舒慘出百骸。愁吟慘春暉。樂詠舒寒葦。男兒萬里心。無作伏櫪駟。天王下科詔。羅俊基泰階。盍行取好官。一爲光同儕。

野園移植小松

平生歲寒心。頗好歲寒色。一松如人長。慘淡窮山側。樵兒日過之。有意斧斤得。予心異爾意。野圃爲移植。醉聽疎聲眠。吟到細陰息。落落巖澗姿。相對永朝夕。如言千載後。其長可千尺。人生雖百年。相期渺無極。且結無情游。汝固予何易。豈待百年外。人松兩殊迹。人爲松下土。松化土上石。我生始踰壯。足以伴寒碧。公立煎茶之絕品。以待諸友。退皆作詩。因附衆篇之末。

造化于草木。所與有薄厚。茶生天地間。建溪獨爲首。南土衆富兒。一餅千金售。公立南須官。好去聲居衆富右。俸錢未到門。已入園夫手。買藏惟恐遲。祕之逾瓊玖。前日發箱篋。出以奉賓友。蒼玉碾底碎。浮雲盃面走。一飲睡魔竄。空腸作雷吼。茶品衆所知。茶德予能剖。烹須清冷泉。性若不容垢。味回始有甘。若言驗終久。吁茶特不幸。而出三代後。不及餘草木。盡掛詩人口。禹貢籍九州。瑣細登橘柚。古若有此茶。商紂不酣酒。

范鉞進士遺樓徹司馬庭石以質交樓作詩美之邀某同作。

樓君仕塗傑。范子儒林選。論交二人者。誠至不以勉。范也車將西。樓也酒以餞。胡然膠漆地。猶假外物顯。范子庭前石。千年立蒼蘚。移入樓君圃。重可載十輦。堅以示固交。此意豈云淺。怪不涉剜刻。險不至崖巘。坦然久要情。無向石間辯。其堅竟有泐。其重尙可轉。不若照以心。兩確乃吾善。永結忘形游。嵌巖君勿羨。和施耕進士憶竹。

夫子臥古屋。趣敵巖谷深。六籍環一身。口誦頭不簪。瘦碧久去眼。寂寞清風心。朝思蔭之醉。暮思繞以吟。

秋空碧新弄。無處停幽禽。安得青玉枝。來作半畝陰。終朝對几榻。歲寒結知音。於焉傲富貴。追蹤晉賢林。

京華對雪

嘉祐歲庚子。長安一尺雪。落地還成冰。后土凍欲裂。出門望天街。層城裹銀闕。健馬載高冠。傍人指夔高。拜表瑤墀歸。酒面風前熱。萬井莫回頭。窮閭正騷屑。曉突無青煙。饑唇閔彊舌。咄嗟路邊子。未死衣百結。亦有待次人。空囊磨歲月。愁吟徒爾爲。決漉天地闊。

與任道及順久二師賦小閣見月

醉領玉川子。夜入支公院。危閣邀共登。身在霜空半。缺月穿雲來。塵區未應見。長飄湧寸竅。天宇痕無線。坐久吹青燈。寒光可對面。飄飄釋苑秀。洒落儒林彥。相逢愛清景。險語寫幽玩。野令才素慳。斗爲吟毫健。詩成萬象索。孤影轉樓殿。遊履絕出門。高僧應作伴。

誠言

君子言欲艱。出口終身俱。衆人易由言。朝出暮已渝。言之于一身。譬若戶藉樞。爾樞苟不慎。彼戶將誰扶。不重一語言。是輕六尺軀。志言要有成。不成陷半途。恥言在克峻。不峻行卒汙。今吾觀衆人。一言異朝晡。爾志旣可見。爾恥復若無。行將小人歸。嗚呼爾非夫。

祠部集卷二

五言古詩

賀陳右司生辰

悠悠大塊間。萬類分相敵。偉哉拔俗人。真宰豈無力。六羅陷邪說。釋儒共一律。天未喪斯文。公生抱絕識。著書經古今。射策開曾臆。前輩幾欲盡。後來味所適。天將激頽波。公生秉孤直。數諫難居中。三已無慍色。海宇屬無虞。天工或曠職。天保佑皇帝。公生蘊奇德。培擁棟梁姿。一旦壯王國。禁網雖小寬。疲俗未全逸。惟天念我民。公生富才術。發揚雲雨勢。諸方待膏澤。天旣責公深。眉壽夫何惜。行看佩相印。不羨登仙籍。南山雅望重。北斗威聲赫。稟生固難朽。吐納自不息。惟昔軒冕徒。尤喜山林跡。留侯追赤松。志就亦何益。傳說爲列星。但已脫寰域。孰如我公貴。與國長無極。

送張升甫三十韻

歲餘容秦雍。處俗失大方。眼前紛朋游。外同異中腸。最得張子晚。一見合柔剛。拜我十年兄。本非以其長。直緣父兄舊。及此三紀強。子之先大夫。疇昔倅餘杭。子時以童子。進謁升公堂。仲兄齒予亞。同學隸州庠。行聯坐接席。無異彼雁行。此時君尙孩。縱記今亦忘。去住忽南北。中間異行藏。後予與君兄。鄉貢入帝鄉。見面初驚疑。偕問徐乃詳。同年忝進士。茲復同省郎。伊予論契好。始見今髮蒼。昨君解下邳。東去隨薦章。

歸來婦翁家。春風到秋霜。予居幸對舍。有酒呼隔墻。往還興頗熟。問外絕毫芒。乘月步橫橋。觀漁立回塘。詩句迭唱酬。稍稍積巾箱。自許先功名。知我尙激昂。放言遺形骸。不以我爲狂。古稱管鮑交。千載竊相望。辭我復云東。坐不安吾牀。泫水日向落。更久不可航。甬東拋田園。不治久欲荒。急省江南兄。數事皆不遑。慙慙挽征袖。強留盡一觴。何以將別意。時菊有清香。

送吳令常甫之武平

朝廷重一邑。悼昔容備員。自嚴薦舉法。頗號近得賢。仕者旣擇地。主恩那罄宣。遐封暨惡壤。十必九棄捐。武平杳何所。閩裔天南偏。林密毒虺藏。吐瘴蟠長烟。冬候氣亦暖。里俗衣不綿。舊令昨請代。闕榜張三銓。無人議一往。常甫獨不然。丈夫志四海。豈安廬室邊。畏避屬衰怯。我今幸壯年。所寄有民社。勇去無山川。吳天破新臘。雪片衝離筵。圍坐勸別盃。情厚禱亦虔。藥餌慎勿疎。善保食與眠。梅牙起驚濤。餞車散江壖。吏民前途奔。爭迎上瀧船。到修府中謁。首低小侯前。主人知才名。應以塵土憐。下車轉春首。訟未臨婚田。遠人喜新君。有訴恐不先。據案掃滯務。一決如流泉。呼兒伴兒戲。邑事樂靜便。地寬人物稀。林實雜海鮮。荔子委樹旁。毛魚不論錢。飲食信云美。那肯事宴筵。政休寧閒齋。空腸味陳編。他人保無過。歲滿猶目遷。矧君資性好。進業補未全。材長老松幹。氣強直弩弦。坐養青雲資。歸著要路鞭。君家新蔡後。清節能世傳。豈必因賞格。薦狀期聯翩。鄙人忝末契。相識由童顛。憂懷自足感。況復別緒纏。君其慰我私。北鴻附新篇。曾元恕累日不相見。以詩垂寄。依韻和答。

丈夫收功名。要在少壯時。今予四十強。才短良時遺。俛首入掾曹。所託真一枝。動靜繫他人。何異馬受磨。事業乖聖賢。飢寒愧妻兒。浩歌望青雲。致身分已遲。江湖久去眼。終日懷釣絲。元恕知我深。愛惡非衆隨。憐我事冗宦。役役猶兒嬉。十日不一見。敢以奔走辭。與子結永好。交情保無移。相從文酒歡。晚歲滄洲期。走筆成一篇。答徐君先輩見寄。

定交初何年。昔齒會稽學。君壯我尙少。道復先我覺。子時于衆人。百鳥一鸞鷲。學官程諸生。題品或義卓。衆方縮手願。君筆已一捉。落紙千餘言。渾如玉出璞。詞場或鼓行。無敢犯鋒稍。有時談遺經。聖賢在口角。憤疾異說妄。摘抉三傳駿。語氣清不休。旱天冽雷雹。南北俄乖張。同時去師幄。未幾會京國。君羽正濯濯。以文試有司。好古拙雕琢。一失太常第。聞子繼屯劔。翠鍛累在毛。龜剔爨由殼。古人亦憂患。千載名愈倬。予雖綴小官。夙志負山嶽。簿領但戕性。祿粟不周啄。再命作陋邑。舉動尤齷齪。旅巢子何所。距我幸非邈。寄詩冬爲期。當遂笑一握。待將得喪理。同付尊酒濁。

送元恕

我本生窮閭。才命兩乖塞。再試得一第。失足落銓格。去年赴選集。摩肩雜隸役。吏口駢名呼。摧沮氣填臆。僦居在間坊。門巷罕人迹。于時苦病吟。誰肯顧越鳥。高冠縱一臨。車馬有屈色。平生青雲志。帖帖若墮翼。羨君富詞才。時志復兩得。解褐拜初命。便綴審官籍。秋高馬足健。駕言往京國。諸父列禁嚴。南北羅第宅。往來伯叔間。此行穩棲息。君家世儒林。圖史況山積。燈火今可親。幽探勉餘力。京都號紛華。君志定非溺。

勿貽雙親念。此外慎眠食。

早行灑池道中

二年別咸秦。八月過嶠澗。碎石隱地起。險塗抱山轉。我馬無完蹄。我僕有重趼。林紅烈炬暴。澗白亂流淺。夙駕露濕衣。夕休獨臨饌。轍迹環九州。孔子未能免。咨予獨何人。安坐顏輒覩。區區適其宜。誓將策疲軟。乙巳十月七日過黃河中流。遇巨浪偶作。

清且絕大河。拍隄袞黃沙。巨舟忽搖簸。心悸眼亦花。咨予豈輕生。將身試魚蝦。忠信固所憑。此理懼或差。定息神魂寧。歸心眇天涯。故鄉念昔游。湖面帖碧紗。醉舫穿芰荷。坦腹如眠家。天水自照映。鷗鷺相交加。雖無風波憂。醜醜未足誇。豈如尋河源。安穩浮靈槎。脫略遠近觀。飄飄薄飛霞。低頭願濁流。卑險吾汝嗟。過潼關

巨方信天開。嶓嶰土山口。豈惟控內外。勢不漏飛走。一夫或當關。可敵萬夫守。山河此襟帶。怙險聖所否。明皇晚倦勤。意恃太平久。絕艷荒真妃。轉盼六宮醜。祿山假天性。恩叅不知厚。鐵騎長驅來。哥舒苦徒手。吾君暢道德。四海一父母。人心自固結。茲關復何有。

苦雨

關軸連歲旱。耕地千里赤。官家放租稅。猶有道邊瘠。羣國乞膏雨。童巫叫蜥蜴。神聽久寂莫。民意轉淒惻。天公忽瞑目。一怒乖龍殛。雨師偃其旁。驚起振厥職。不復計多寡。傾瀉信朝夕。入地知幾犂。以犁潤

地上但盈尺。洵如三峽注。那辨四簷滴。落勢曾未停。廬井反憂溺。始知天公難。不易人願適。舉頭告風伯。速吹濕雲垢。却還秋日光。迤邐照阡陌。俾民布新種。來歲飽麩麥。

幕中偶書

劉侯驅車東。幕府賓客稀。凭几獨蕭然。真與萬事違。巢燕無世情。閒堂時一歸。東風忽怒號。輒來撼窗扉。攪我靜中趣。聒聒無停威。塵沙亦侵人。猶喜勢力微。日暮風稍息。出戶聊振衣。行吟視庭木。枝空但花飛。幽思感晚春。浩歌送斜暉。翟公大書門。怨激恐已非。俗物喜去眼。杜子吾庶幾。

徙居

人生如寄客。况復真客宦。南舟與北車。來往若征雁。殘暑赴西雍。冉冉忽秋晏。三徙乃定居。始至寓法掾廳。又徙倅廳。什物旋營辦。騰移費負挈。猶恐僕夫訕。幕府文書稀。食息有餘閒。短才乏所補。公給浪蒙蒙。懼辜主人恩。從事不敢慢。南軒有佳趣。流渠瀉幽澗。潺潺無時休。弄水悅童叟。關中氣候晚。時菊始云綻。亦有終南雲。朝暮生願盼。浩歌一樽酒。常分任鷓鴣。

幕中書懷

宦游老歲月。春花漸空枝。坐耗鏡中顏。日饒鬢邊絲。流俗宜重輕。青雲勢參差。剛腸寡所合。出門復何之。趣向於今乖。考古聊自怡。黃卷有聖賢。目覽心與期。君子願萬世。小人較一時。不見九原骨。貴賤共狐狸。惟有賢愚名。縱久亦兩岐。退之賦二鳥。無乃爲物移。信已一推天。孟子真吾師。得喪付濁醪。身外非所知。

九日與諸君飲

寒暑當遞遷。日月會陽九。綠鬢驚秋風。黃花泛樽酒。行樂重此辰。登高命諸友。古人感塵世。宜開笑歌口。送粹中赴舉

朔風攪疎林。短日寒無暉。有客氣軒昂。束書赴禮闈。行橐雖云輕。滿抱藏珠璣。出以售春官。善價其可希。骨肉送出門。稚子猶牽衣。我爲舉別觴。一言庶不違。京師足紛華。慎勿事輕肥。白首有雙親。待子得官歸。石亢之出銅雀臺。硯相示信筆題其後。

銅雀遺荒基。寂寞千載下。黃埃朽壤間。所得或片瓦。硯材世共珍。購金不論把。浪好味所別。往往亂真假。

聞毀

憶初向關中。觸熱事西走。淋漓汗征衣。早夜犯星斗。驢然赴所知。辛苦復何有。主人喜賓至。相見勞杯酒。誓將効毫髮。聊以塞所厚。遇事因輒言。何嘗計從否。平生性坦率。間或忤交友。是非長安城。側身避讒口。彼姦乖其前。吾慮亦已後。二叔誣周公。三人感曾母。青蠅亂黑白。視潔以爲垢。聖賢且不免。予免焉能苟。浩歌動歸歎。至此信不偶。春風憶東南。巖花映溪柳。南山有屋廬。釀熟喚鄰叟。何時理扁舟。舊物入吾手。回頭謝猿狖。投北汝誰受。

壬子歲旱

熙寧歲壬子。春旱初可怪。不雨訖夏尾。天地一爐鞴。赤日裂厚土。黃埃沒經界。農夫望雲霓。腹折意未懈。

侍中守北門。撫俗先罷瘵。閔雨憂更深。徧禱劇齋戒。老宮與佛廟。三日一往拜。冠者勞於呪。褐者勞於唄。雨應寂不聞。煩鬱何由快。憑誰訴天公。請執乖龍械。

予初春被病中夏少間勉入省局偶成二十二韻

東風吹春來。移病聊少休。寒熱戰予軀。漸如錯春秋。侵尋日以劇。謁告牒屢投。性命吾自安。所負空食羞。交親每問訊。愛者或見憂。伏枕數晦朔。忽忽月四周。有叟肆囁嚅。咄哉我何尤。騰口狀予疾。張大實頗浮。背憎說休咎。唯恐予疾瘳。寧獨冀術勝。仍欲悅予仇。叟乎汝何愚。天命非爾謀。生死籍素定。理莫移恩讎。身世如寄客。日月速置郵。引照盍自傲。霜雪滿汝頭。胡然不知止。脅肩諂貴游。十進苟朝暮。利吻銛戈矛。予今偶不死。官意滋悠悠。卻來坐省局。心跡逾林邱。北扉對新篁。陰薄榦已修。薰風送瀟酒。不博千戶侯。富貴功名間。有待終無求。鸞鳳志寥廓。燕雀徒啾啾。

某蒙君章見寵示櫻桃佳篇輒依韻奉和

炎蒸有正色。下與地氣關。相結成含桃。使冠百果班。獨憂赤日曝。坐變紅成殷。多應絳闕種。上流落來塵寰。金盤瀉不定。四走如循環。睡龍失火齊。頷空皆血潛。以口比樊素。白傅誇嬾鬟。卻嗟荔子陋。遠在炎荒山。每歲貢天子。險路勞緣坂。豈如盛京洛。地廣生不慳。朝須暮可進。先御後匪頒。離樹旣不久。弗改猶童顏。吁嗟唐中宗。游樂芳林閑。芳林園名君臣失儀度。口摘省手攀。不聞薦先廟。書在史冊間。愈籍爭詩豪。勁句

嘗往還。予知青冥賜。難到山溪灣。韓退之和張水部敕賜櫻桃詩有傳賜出青冥之句林園幸自有。圓顙赫不黜。雖熱豈厭食。縱密寧忍刪。況此鮮嫩質。非並青梅頰。

羣牧司雨中池上作

累朝困炎威。一雨轉愁意。偶看碧蘆叢。宛在滄洲地。岸草閑自滋。庭葉紛以墜。移牀就幽窗。簷溜聒清睡。

送章傳道東歸三十八韻

一日或數篇。數日哦一軸。夫子之於詩。夜補晝不足。長吟天地間。萬象困題目。天徒飽其才。而特餒其腹。聲名三十載。半百事場屋。年年試春官。淡榜輒不錄。東風吹殘花。客淚迸京轂。回頭謝青雲。卻抱來時玉。河陽謁相公。每見輟飯沐。贖金實空囊。禮遇駭僮僕。遂游西諸侯。騎馬度函谷。長安尋素交。零落半邱木。惟有終南山。相看似舊綠。東李雅好客。既親意轉篤。授館如投家。晨杯繼宵燭。羸馬殘青芻。餞僮厭餘肉。予方坐幕府。陷嫉苦流俗。羣吠耳且盈。介立趣頗獨。得君倍歡然。坦不置邊幅。論情雖云晚。聞誼固已夙。二章初交鋒。懦氣令避縮。自笑不量力。強和旋取訥。從此遺形骸。留饌或脫粟。有酒時招邀。共醉小軒竹。議論到聖賢。道德富停蓄。豈比篇章流。烟雲繞心曲。飄飄走邊城。新禁察儒服。戎帥不敢延。進退勢俱觸。六月汗霑衣。幾作窮途哭。回來臥旅舍。所得不充欲。鄉思生秋蛩。輕裝遽云促。行當買淮田。晚歲謀退築。子材覺無庸。計慮亦既熟。無姿媚要權。與世背馳逐。祗合從漁樵。胡爲苟寸祿。淮吳幸相望。有鄰可容卜。浩歌老吾生。爭食任雞鶩。薄宦猶糜人。歸飛羨黃鵠。

予以病久不赴朝謁因灸三里穴罷信筆偶書

竊祿了無補。臥疴慙有日。空聽朝雞鳴。咀挂朝衣出。啓處不自安。灼艾加諸膝。庶幾起沈疴。犬馬委微質。立秋後病作此寫懷

臥病喜秋至。昏煩庶以平。清風不少濟。宿疴仍相嬰。涼葉猶未振。陰蛩已先鳴。四時順萬物。奚獨戕吾生。入山謁怡然上人。因成短篇。皆書卽時事。

行穿六松陰。鳥語逢人寂。林僧洗山鉢。正了寒堂食。揖我喜滿顏。吟窗半軒闕。鳳凰山不無情。天外送佳色。春風動花雨。枝上或涓滴。羨師得安住。我亦有閒適。出門懶鞍馬。把袂步幽石。石盡浮泥深。恰恰露雙屐。臨別心徘徊。野店更一息。

僧副普濟過予。詰其師名僧職之所自。則曰嘗活飢民百萬。朝廷論酬以得之。欽嘆不足。繼以詩云。佛子葦麻衆。槩能蠶食人。庸奴買師名。納貲不計緡。普濟釋苑秀。類同行佛均。往歲東陽饑。愁聲聒蒼旻。天民坐欲死。誰肯發一困。師勇營饘糜。全活百萬民。外臺上其事。朝廷嘉師仁。相府議優賞。美號寵厥身。汝往貳爾正。示勸出聖神。今時士大夫。體雖具纓紳。十九飽妻孥。何暇及困貧。視師固有激。抑可警其倫。

墨蟹

瑣瑣江湖中。忽在幽人壁。短螯利雙鉞。長跪生六戟。骨眼驚自然。熟視審精墨。初疑螳穴束。猶帶浮泥黑。橫行竟何從。躁心固已息。終朝牆壁間。頗有肥霜色。我來空持杯。左手莫汝食。誰奪造化功。生成歸筆力。

祠部集卷三

七言古詩

棲雲閣

越山東南號勝絕。古寺巖洞窮高深。山雲出爲洞口雨。或時散作巖下陰。不有神物此蟠據。安得氣類長相尋。寺僧愛雲恐雲遠。置閣雲上躡以臨。豈惟憂懷獨舒悅。更許遊客開塵襟。客來祇知寓暫賞。不道歸去還塵侵。寧如僧住得安穩。終日自共雲無心。

陸君置酒爲予唱陽關卽席有作

陽關何處草烟平。不識陽關空記名。古人驅車欲西過。吟成善寫離羣情。天涯此去故人絕。雖有樽酒同誰傾。古人幽怨幾時盡。至今愁殺陽關聲。陸君酒酣喜自唱。坐上客淚俄縱橫。杯盤咫尺意萬里。忽若身在關山行。耳傍宛聞車馬動。簾外已覺邊風生。乃知酒樽須故舊。爲君一飲無餘觥。

結交行

貴友高車照簪組。富友黃金輕糞土。二友方論富貴交。以漆傾膠入心腑。一朝金盡囊無餘。門前不見簪組車。貴人今車底似昔。早失黃金舊時客。由來結交要勢均。一輕一重難爲人。滔滔世上耳餘輩。寂寥管飽今埃壁。交情以勢不以義。今日雖同明日異。君子結交自有持。賤貧富貴不我移。

依韻和李評文思

我心炯炯君應識。萬事都慵獨吟癖。二年客眼看京華。可見無媒進無益。勢門所喜在佞豪。直語空拳無一擇。愛君挺拔生貴家。不學庸兒醉朱碧。兩提試筆賦翰林。落落金聲天上擲。改丞殿省頭不回。直把羣經重研撫。相逢憐我猶滯濡。四十金閨未通籍。勢門宜不容此身。賴有君家好投跡。書齋延坐開新編。光燄文章追祖白。更邀詩社同襟期。脫略形骸一疏戚。公侯必復君勿遲。志士由來輕尺璧。

贈賈麟

賈君貌古文章老。虬髯鋪胸犀插腦。戲誇才力驚衆人。談笑千篇筆端掃。酒酣座上披天真。剗去崖岸露懷抱。今年禮部更新書。續詔九州登俊造。宿儒晚秀趨術忙。肝愁胃苦搜辭藻。獨君所向異爾爲。長袖披陀踏幽草。君近遊徑出行窮兩徑躋巖巔。指點晴江辨秋島。却騎匹馬歸湖山。古寺相逢情愈好。空樽無物醉故人。輒出囊錢具梨棗。更長坐久然青燈。語雜譏諧欲顛倒。我方正色起問君。何乃終年事枯槁。齒牙未豁才有餘。一賦從容成腹藁。琢磨高論馳古今。足歷天衢騁王道。鴛羣沓沓猶爭先。驥驟胡然甘伏皂。君徒俛首不我答。我反慙顏汗如澡。丈夫貴富難近窺。一第定非論晚早。豈同祖誼名漢朝。位不公卿身已天。何時却掛吳淞帆。霜蟹初肥恰新稻。

前日以詩贈賈麟進士。繼蒙和答。而楊蟠從事亦次元韻。鄙思不休。輒復自和二篇。

賈生俊辯凌諸老。二十漢廷冠插腦。魁奇遠裔空傳家。慘淡壯年翻却掃。巧心用過金幾緡。憤淚頃乾玉

三抱五湖夢數歸何時。四海形單生不造。鄉宴無心聽鹿鳴。時平有口歌魚藻。每舒意氣拂劍光。懶把窮
通叩蒼草。江河飲肺吞阮劉。風月吟腸笑郊島。君才慎勿恃晚成。俗態田來尊少好。衆人競進皆振苗。獨
子甘貧猶嗜棗。囊裝未抵一羽輕。筆力堪支泰山倒。閒身自放壠上耕。愁面誰憐澤邊槁。幽尋騎馬衫覆
繭。冷臥乏氈牀露葉。無勞兒女憫滯材。豈竟乾坤厄吾道。從前平步封公侯。亦有逢辰出輿阜。光華聖旦
髮可晞。涵泳儒流身已深。收還事業幸未遲。揖取功名須及早。不然一世成虛生。雖曰百年實如天。公朝
富貴弗汝慳。仕路高車似麻稻。

其二

愛君氣幹霜松老。一見相投許肝腦。豈同世上秋葉交。不及歲寒如電掃。有才無命三十強。寂寞吟齋膝
長抱。愁來徧踏公卿門。綻褐不縫誰改造。文章直吐元化胚。天樸豈須施斧藻。長篇下筆縱立成。一字未
曾傷草草。辭源奔注吞衆人。有似驚潮沒孤島。善君取友論片能。不學常情求百好。琢磨六藝相與游。我
媿性靈昏樵棗。平湖滌淨時招邀。爛漫清尊爲君倒。客塗見月凡幾圓。勸馬聲飢奴色槁。路傍甲第欺儒
冠。奴厭腥肥馬餘糞。我疑造物偏膏粱。富貴何緣慳有道。貫糜巨室君空囊。朱紫摩肩君衣阜。大鵬寧合
安尋常。怒翼天池終刷澡。功名豈必收目前。兩鬢未銀猶得早。顏彭骨朽千萬年。漫與後人論壽夭。君其
努力攀青雲。盛醉春風釀香稻。

題惟晤師斑竹杖

蜀江濯錦含文漪。竹生江岸初綠滋。錦波一浸入竹肌。萬洗不落斑在皮。又聞淚點灑舜妃。遺跡漸染傳今時。搢不受爪滑可持。隱起高節無屈。江神雖寶莫自私。煙根忽逐霜刀離。截而爲杖得者誰。龐眉大士今一枝。煽爛頗與壞衲宜。朝躋山巔暮江湄。山備咒虎江蛟螭。爾杖未折莫汝危。足力自健無險巇。安用童子兩肩爲。當年常竹紋無奇。猶託變化神葛陂。况此已是斑龍兒。長恐一旦風雲隨。復整頭角還天逵。未必久爲師有之。

和禮之喜雪十二韻

水官司冬不舉職。天地常凜氣輒溫。頑風伺隙倒天令。掃蕩不使繁雲屯。陰崖邃谷殆窮臘。空有雪意乘朝昏。宿麥老枿亦借便。欲洩陽氣芽株根。往往百怪竊窺視。思以沴疫傷羣元。賴吾太守爲民切。百拜默與上帝言。臣因視民間農計。亟雪猶可望有年。知民所欲弗帝告。安用備位稱守藩。至誠一發動天聽。霄垠地堦俄瓊璠。泯然上下共一色。直疑元氣猶胚渾。狂風埋藏反失勢。卻授威柄還水官。旣云豐年在冬雪。豫擬癡腹盈朝餐。

送關景芬祕書赴山陽尉

餓冠初上童兒首。君已老成予輒友。肺肝相照二十年。今日不殊前日厚。紛紛共笑薄媚徒。對面論心回面否。吁君意氣非昔麤。猶著青衫從吏部。得官將尉古山陽。有蘊無施州縣後。山陽楚邑爲最雄。聒聒衆咻千萬口。階庭聽命趨上官。守閣使臺鞞日走。舟車冗客來百須。政逐從違成好醜。君才遇事有卷舒。公

道當官膽如斗。或時畏縮類懦夫。私請不容毫髮受。往行素守裨長官。肯到縣廳同木偶。頗聞彼俗殊東南。例重市門輕隴畝。鹽商茗販白刃隨。切與椎埋破淵藪。能聲自可博己知。懶趁庸兒媒左右。吳江日暮山川愁。踈樹烟頭排斂帚。北帆欲掛傾別觴。還有陰風吹散酒。醒難爲別醉幾何。人世無時好分手。知君此去忘故園。淮月楚雲惟我有。

送吳判官

雨乾青活淮上山。君領善課趨帝關。春風滿路馬足健。翩然征轡不可攀。吁君登科越一紀。中又困躓罹苦艱。蒼虬垂髯猛虎臥。青衫四十鬢欲斑。我疑君胸典籍府。千軸萬卷羅其間。聖經賢史及怪說。叩之不已如循環。有時啓口論時病。往往憤發涕欲潛。位卑道屈志未就。姑以大筆誅雄姦。就令君居太史局。猶足上下馬與班。剛然古膽貫白日。不爲權貴柔正顏。退之嘗患天地惠。偏向君子懷獨慳。高冠大笏盡知己。行矣得意東南還。

贈徐君強

浦陽窮僻山綦迴。徐子匹馬窮山來。十年不見安否外。怪子面黝身紅埃。自言壯圖醉無幾。獨有古膽剛不摧。日于篇章遣孤憤。袖出巨軸爲我開。密行細書幾千字。一一紙上皆瓊瑰。渾然天成有警句。直若未剖元氣胚。閒工磨琢弄纖巧。真宰手把天葩裁。詩人古亦少達者。非特徐子如寒灰。孟郊老獨張籍瞽。李杜落魄皆何哉。剔抉幽祕奪造化。雖甚寒餓天弗哀。又疑才命不俱得。旣奪之命止與才。子今所往但逢

塞絆驥兩足猶駑駘。浦陽山深尙春淺。桃李纔榮花正梅。子時過我值訟簡。花下一飲將百杯。酒酣慷慨起勸子。更厲頭角需風雷。縱令不偶竟窮死。猶愈空腹冠崔嵬。

邑舍東池。近日荷花盛開。輒書短篇奉邀宗哲、純甫、二同僚。

前時乘暇到池上。荷花未開荷葉小。彌旬風雨隔追賞。期會簿領復煩擾。今朝始得臨舊隄。花開已繁葉將老。古人最謂行樂急。癡兒漫欲官事了。錢楊與我近同趣。一樽今待共君倒。聯鑣且來趁花飲。莫待紅稀并綠稿。

七夕

七月七日暑氣徂。此夕何夕樂且娛。世傳牽牛會織女。雨洗雲路迎霞車。初因烏鵲致語錯。經歲一會成闕疎。牛女怒鵲置諸罪。拔毛髡腦如鉗奴。星精會合不可詰。我疑此說終誕虛。又言星能遣人巧。羅列瓜果當庭除。綵絲貫針望星拜。夜深乞巧勞僮愚。吾聞樸散形器作。人奪天巧天無餘。匠心女手劇淫巧。工與造化分錙銖。薦紳大夫一巧宦。坐取公相如指呼。間乘巧言惑主聽。能改茶棗成甘腴。織辭麗曲騁文巧。剗刻聖道無完塗。星如有巧更可乞。益恐薄俗難持扶。我願星精遣人拙。一變風化猶古初。

題蘊忠上人歛硯

山僧有硯名龍尾。此石來從歛溪水。通明直可照髮毛。瑩滑不容安手指。案上長疑片月生。匣中自有浮雲起。蒼然顏色涵秋波。不學端州誇嫩紫。溪匠琢爲寒瓦形。如從銅雀初飄零。只仍故狀不復改。獨有亂

點生繁星。高閣上人妙書劄。什襲藏來時一發。拂開輕霧磨煙煤。揮洒霜毫冰紙滑。咄嗟此硯何爲哉。世上別有潤色材。胡不往焉與徘徊。日濡大筆把詔裁。無久滯此空塵埃。

通判國博中齋詩

天下以中爲大本。天地得中能自生。古之聖賢一用中。政刑禮樂萬事平。於戲後世中道喪。政分寬猛刑重輕。禮非儉陋則奢僭。樂不專一須鏘鏗。其間萬事亦頗僻。或過不及誰與繩。今公奮然力追救。大署中字爲齋名。謂中之迹不可見。粲焉其道存六經。尙書洪範有皇極。春秋王道爲權衡。在易之爻貴二五。于詩無邪義甚明。子思著篇究根本。王通命說垂儀刑。夜探羣書味中理。雞鳴而作還奉行。出處語默皆時中。措諸萬事無側傾。有時賓至相與樂。詠歌亦作中和聲。簷前竹樹有中色。四序不改長青青。公今一州武守政。千里猶變中庸眈。異時朝廷贊天子。擴之四海中道成。某得攝齊升公齋。一聽中論退服膺。

還府推楊學士無爲編

蜀山秀色參天起。子雲文章摩玉壘。關右衣冠從古名。伯起光華擅楊氏。後來氣象幾寂寥。今日西州開學士。吁。雄述作擬聖人。踳踳三朝官不徙。震雖有時無雄文。而又晚齡纔得仕。豈知學士丁妙年。一日青雲趨萬里。高才大筆驅古今。奄有震雄兼二美。布衣平昔抱經綸。浩蕩著書窮日晷。幽居獨占無爲山。因以名編仍號子。學士既以無爲名。編復自號無爲子。鑿開元氣爭化工。剔出微情泣山鬼。先儒浮妄遭芟鋤。直與六經相表裏。青衫冗掾錯致身。四十磨肩雜胥史。日趨官府舊學荒。已分清流將絕齒。前時輒辱授此編。如以咸韶

震聳耳。夜侵燈燭盡。廢餐若涉江河。徐見埃。乃知無爲非不爲。道化自行而已矣。立朝本此足有施。堯舜吾君那出是。天球豈合藏窮家。再拜持編復齋几。

謝通判國博惠建茶

建溪春早地未暖。建俗巧計催春陽。茶傍萬口噪地烈。驚破芽英不得藏。猶嫌旂槍已老硬。獨愛烏嘴嫩未長。擷而焙之一朝就。更範圭璧爲圓方。南州尙珍北固重。自非富貴寧預嘗。浦陽賤官性怯酒。素許茶味爲最良。日分牒訴費齒舌。口吻鎮燥喉無漿。建溪奇品遠莫致。日夕夢想馳閩鄉。塵埃填心渴欲死。忽拜公賜喜可量。拆封碾破蒼玉片。雲脚浮動甌生光。愚知公賜豈徒爾。欲俾下吏蠲俗腸。滌除詩冗起清思。驅逐睡興窮縑紉。玉川不暇盡七椀。已覺兩腋清風翔。

予家畜狸花二貓。一日狸者獲鼠未食。而花者竊之以去。家人不知。以爲鼠自花獲也。因感而作二貓詩。

狸貓得鼠活未食。戲局之地或前後。貓欺鼠困縱不遂。豈防厥類怠其守。花貓狡計伺狸怠。帖耳偷銜背之走。家人莫究狸所得。只見花銜鼠在口。予因竊覘見本末。卻笑家人反能否。主人養貓不知用。謬薄狸能服花厚。花雖利鼠乃欺主。竊狸之功亦花醜。人間顛倒常大此。利害于貓復何有。

純甫以予去歲九日赴東陽。今年復趨府。作菊花問答見遺。因以戲答。

問籬菊。何事秋香欠春馥。淵明歲歲走征塗。冷落重陽誰采鬪。

籬菊答。自古人生有離合。不得淵明泛玉觴。還有子真攜酒榼。

附原唱

問籬菊。誰遣金英秋始縛。花枝依舊去年黃。人髮不如當日綠。
籬菊答。清香數日還飄颻。縱使人生鬢易華。猶見黃花開幾匝。

泉上人畫牡丹

芳樹不合生深堂。座上似已聞生香。乃知丹青逼造化。獨有真假爭毫芒。枝外霏微包雨露。筆跡淋漓濕
縑素。遊蜂蛺蝶頻往來。今日經營知汝誤。蜀川趙昌妙花樹。前後無人昌獨步。師今合昌成一人。畫手紛
紛那敢措。上人筆下如有神。一掃欲空西洛春。姚黃魏紫色憔悴。自覺筆假勝天真。天工栽花苦榮謝。畫
工運巧無冬夏。天工巧極誰論價。輸帛傾金只酬畫。將令世俗尊造化。呼僮捲障不復掛。

和樓志國范君武讀胡尉臨安所獲顏魯公書斷碑

書名唐世凡幾人。魯公運筆獨有神。當年一字百金直。異代儻獲宜爾珍。公嘗道直不容內。江湖出走刺
史輪。東南揮翰落幾郡。在處巨蹟刊堅珉。石堅字巨未應泐。旋復五代遺荒屯。州鎮尋兵寺觀火。缺碑毀
碣埋泥塵。乾坤豈亦愛字寶。不使久屈卒不伸。脗合陰假好事手。得此斷石溪山根。苔封土蝕初莫省。一
洗爛若開三辰。不由名氏驗體法。氣質渾厚知顏筋。點端屹如泰山立。畫勁森似長戟陳。寧同棗木浪傳
刻。少陵尤惡肥失真。蒼茫疑聞地靈泣。爲失此石后士貧。好事得之不自有。能廣墨本遺其倫。始從君武

愜傳玩。大句感發驚儒紳。寫公勳德無一欠。何必讀史勞吾脣。青衫志國繼高唱。首論書法辭逾新。末言公忠死賊刃。不覺憤淚霑巾。昔人謂書乃心畫。浮沈直撓皆相循。公心遠可此書鑒。體不姿媚一以淳。巖巖古氣自盤薄。宜汝希烈不得臣。雖云筆力奪元化。濟以忠誼重萬鈞。後來忠誼弗公學。磨鉛臨帖虛終身。李斯篆隸豈不好。彰彰姦迹流自秦。乃知一藝不獨善。所貴名節堅松筠。魯公之善以名貴。歷代共寶無沉堙。

送裴光世赴舉

光世出門頭懶回。身將西去犯斗魁。風雲自繫鵬鶴健。里道正爲驂騑開。憶初鄉賦選主司。數州側腦聽外臺。一朝吾鄉騰薦口。姓名喜得丁與裴。筆搖試席動千指。匠精反媿木盡材。六人旣拔里中傑。黑白自可銷怨猜。君名稍稍近人底。豈是天意激後來。主司南宮頃第一。又嘗禮部預揀才。裴如晦嘗充省闕點檢官。頗傷僻律變新進。怪僻一鼓波遂頹。旣而移書六人者。歷數文弊有可哀。且言文章貴體要。試格尤要合準裁。六人旣拜主司教。青雲捷路知力推。方今最曰場屋公。實藝可進那用媒。君胸二紀富珍蘊。每向紙上揮瓊瑰。掛名省壁定顯赫。續取科第仍崔嵬。明年躍馬游天街。請君飲乾臨別盃。

走筆送張伯起

男兒剛腸逾古鐵。每到傷離猶暫折。離緒不啻亂繭絲。纔攪衷腸便成結。憶昨送子秋風前。薄酒三行歌數闋。我歌多感酒易醺。子車爲我澀不發。今來與子舉別觴。還是去年分臂日。人生歲歲有離恨。爭遣綠

鬢不爲雪。安得共子並翼飛。四方上下無時別。

臨洛驛雨中作

朔野無花春意薄。斧聲惟見桑枝落。北人是日競條桑。手執懿筐共操作。客亭繫馬吟寒廳。細雨纏愁牢似縛。多情北燕能傍人。如設春心繞疎箔。故鄉桃李應滿園。爛漫香風隨處著。十年游宦辭江湖。塵土日侵雙鬢惡。天涯懷抱傾東南。悶對青燈舉幽酌。

丙午寒食。厚卿置酒壓沙寺。邀諸君觀梨花。蘇子由不至。以詩來。邀席客同作。予走筆依韻和之。種梨易長地舊淤。春風一掃無枯株。沙頭古寺枕城角。樓殿自與人迹疎。看花置酒三月破。點檢座客唯欠蘇。酒酣花底不知處。恍若身世游藥珠。銅臺割據古豪盛。樂事已去唯邱墟。直須及時結勝賞。莫局官事同羸駒。林僧迎我屢前揖。野鳥避客遙相呼。咸陽有花遠莫見。豈若此地來須臾。風前嗅雪不宜緩。春芳過眼猶奔車。繁枝向月合照映。亂片落地無掃除。樽邊酪酏不復計。馬上倒載聊拚扶。子由閉戶自懶出。花與雙眼知何辜。天姿必欲貴純白。紅杏可婢桃可奴。君詩險絕不容和。梁園騁思慙相如。

寒食安厚卿具酒饌。邀數君子遊壓沙寺觀梨花。獨蘇子由不至。詩來命座客同賦。予既次韻和之。明日上巳。安復置酒招予與蘇。又明日清明。予屈二君爲射飲之會。而蘇君仍用前韻作詩見及。予亦復和。

花前爛醉如泥淤。猶恐花過嗟空株。壓沙梨開百頃雪。春晚未賞計已疎。厚卿置酒趁寒食。蜂喧蝶鬧人

意蘇林間把盞誰我侑。鳥歌聲滑如溜珠。魏都風流重行樂。豔妝麗服明郊墟。我初聞招便勇往。恨不插翼傳駿駒。峨眉夫子趣獨異。靜坐幕府煩邀呼。車公不到座寂寞。大句落紙來須臾。樽邊弄筆輒強和。布鼓乃敢當雷車。主人明朝復命客。是日楔事修袂除。日涵花氣暖不散。酒力易著起要扶。清明予亦飲射圃。罰醵屢困辭不辜。杯盤一飽藉脫粟。那有白飯餘君奴。事見杜工部集梨花好在期共醉。功名身外終何如。

送用僧玘上人歸雪竇

釋子羣羣踏一轍。類能忍誘鼓師說。彼上人者劍外來。獨許清吟調風月。就我乞詩歸甬東。三叩賓階通刺謁。何時腰下解餅盂。巖竇應逢先臘雪。

小桃值風零落殆盡偶成鄙句奉呈諸君

小桃庭前祇一株。無數花開豔新繡。破蘂脈脈向人笑。鬧枝酣酣索春鬪。只見蜜蜂往來喧。不道雙燕共時候。醉吟繞花日幾遭。坐臥欲來花下就。東風昨夜忽顛狂。曉枝點檢不依舊。惜無錦障闊百步。遮藏免被風力驟。小兒地上拾亂片。猶愛殘香再三嗅。桃兮開落奈汝何。却取餘杯醉春晝。

近承楊子遣垂和池上短篇愛而有贈且摠予懷

楊子文格少已逾。自關以西鮮此流。逸興一發不言休。詩吟千篇酒百甌。始謂富貴力可求。行年四十差厥謀。相逢渭水初清秋。氣俊秋隼辭長蚪。歡然一見分輒投。往來自爾月屢周。忽聞屋角鳴春鳩。感時出門寫我憂。載酒興慶荒池頭。半酣繫馬聊登舟。紛紛涉水驚眠鷗。晚陽欲落孤煙收。開元盛事空林邱。流

年數百如同眸。陳迹隨感來吟搜。偶作短句詒同遊。楊子既見逮和酬。筆落紙上不暫留。詩珍玉案書銀鈎。詩人乃是天地讐。造化萬物遭剝蝕。天公報之甚操矛。少使稱途多窮愁。子嘗兩舉試此州。病坐試席出則瘳。筆力健可掣十牛。及與命鬪力弗侔。翻被命屈豈自由。嗟予所學淺以浮。不與造化爲怨仇。胡然天公亦我尤。剛腸勁貌寡媚柔。觸忤貴勢在轉喉。蒼顏常調祇自羞。使看平步趨公侯。子來我語徒啾啾。天高聽卑誠繆悠。不若且默真良籌。有酒一醉春風樓。

送李去病楊元老

君王赫怒超前古。威令風馳奮皇武。將士咸懷敵愾心。桓桓孰可當貔虎。岷峨橫抹西南坤。河池散關當北門。堅城高寨礙飛鳥。天兵百萬方雲屯。給軍自古資巴蜀。接軫連檣轉芻粟。正須將漕得其人。賦役平均軍食足。三分才具超常倫。不獨摛藻追淵雲。究宣德意可預見。抉剔姦蠹蘇疲民。使星入蜀今重應。芒寒色正相輝映。川合東西幾萬家。佇瞻玉節交相慶。行聞盡錄平戎功。給餉正與提兵同。紫泥封詔看西去。歸來聯騎朝王宮。

賣松翁

窮山老松幹百尺。縱有愛者勢難植。小松聳擢未及丈。何亦冷落守巖石。由來世眼習繁侈。競事妖紅與爛白。往往破產聚名卉。未見有一號松癖。城中有客賣桃李。美價高下隨意得。咄嗟彼叟何爲者。浪負松本窮九陌。行求善價吻欲燥。力弛還立朱門側。過之千百絕一顧。寧復肯許一錢直。音聲猶帶澗風澀。顏

色尙染嵐煙黑。松材雖良人未見。其奈桃李有春色。嗟哉子計信疎矣。豈宜肩入芳菲域。速培舊土養松幹。待棟明堂柱帝宅。予疑叟非鬻松者。無乃矯世所爲特。衆趨時好逞穠豔。何獨子子銜皴碧。羣雄馳騁尙譎詐。軻以仁義游六國。時乎釋老肆分籍。愈以原道破羣惑。叟乎叟乎予爾知。獨行矯世難爲力。

與盛毅同賦暮角行

城頭滾滾寒煙起。城裏無人冷如水。一聲暮角聒地來。聲中宛轉含餘哀。逡巡流入單于調。耳邊似近單于臺。坐客未終聽。對面淚雙迸。那復將軍絕塞眠。朔風吹落玉帳邊。狼烟未盡不待曉。恨不立起銘燕然。何人始製角中曲。幽怨到今傳不足。吁嗟畫角終無情。百年日日銷此聲。

冬雪行

幼年壯氣寒逾熱。更喜朱顏照飛雪。門前地厚堆玉塵。屐齒千回狂走折。今來過壯能幾秋。眼未見雪心先愁。病膚隱粟出門懶。敝袍盡日紅爐頭。此身知更十年後。雪屋能如今坐否。屨衾沒領定晝眠。那復吟邊開凍口。壯齡袞袞洪濤奔。百年浩蕩未易論。人間萬事亦顛倒。且對今雪空清樽。

送盛君方

秋風木葉飛澆微。日暮銅臺別杯醕。燕姬一曲聲未終。交臂方攜忽南掉。相公鎮魏從辟書。玉帳三年奉談笑。密謀直道裨主人。飽食庸兒或陰誚。君殊不顧但自若。爛爛誠心復誰照。相公還朝數論薦。援手無人在廊廟。薦章未報人事改。魏國門前客相弔。聖賢尙覲後世知。萬事那能目前料。方今擢才不待次。道

路紛紛走嚴召。朝廷必欲收眞才。豈有如君使常調。讀書適用非苟知。脫略空言直趨要。有餘利刃未一施。可惜青萍反居鞘。誰能出力終提攜。會看驚人露芒耀。君如弗偶好言命。予亦徐當卜耕釣。

送知府吳龍圖

國初以來治蜀者。處置盡自乖崖公。當時奏使便宜敕。不與天下州府同行之。已及八十載。姦宄消伏誰之功。因循至此漸抗敵。有未曉者時相攻。鞭笞小罪亦檢察。不許略出常科中。下民知之頗不懼。州縣往往藏羣兇。側身斂足未動者。實以累朝恩澤隆。公之初來蜀人喜慈愛。久著民情通。衆心歡然恥犯法。掾藥浮薄歸醇醴。盡將約束付僚吏。興起學校還文翁。二年美化極沾洽。遠近循服如偃風。上將歸公問誰代。當使間作如笙鏞。遂求元老得青社。其人廊廟之宗工。往年鎮撫有異績。大旆再來遣于東。公今與之合符去。到必奉詔參夔龍。大資舊德固無慮。剖判自出其心胸。所憂厥後嗣之者。忠定良法還如空。養頑活狡作淵藪。不免剪殄煩興戎。蒙之憤懣久填臆。言賤不得通九重。願公上殿起居罷。第一用此聞宸聰。

京師逢徐良溫叟明府

弱冠相逢今四十。當年壯氣虬龍蟄。交情獨在酒琖深。人事細論衣袖濕。詩書誤身浪自憐。公相滿眼誰可揖。蒼顏已變長安風。後會更應尤戢戢。

小疾中元恕相別往長安信筆成篇奉送

一春三月少見晴。濕雲不飛壓花老。君來別我西出關。病裏傷離似翁媪。和風吹面纔幾程。卽入風流洛

陽道司農水利無留行。洛城花開爲誰好。漢唐陳跡到可尋。猶有山川豁懷抱。憶昨行春從魏公。興慶池邊玉樽倒。公今已爲泉下游。往事憑君問煙草。官家諸路急使才。歸對明光切須早。

題可久上人房素屏

雕軒畫室吳僧居。花草禽魚屏面集。豈如蕭爽大士堂。雪山數尺平頭立。滿齋虛白已自生。隔坐紛華不容入。霜毫一掃都無痕。獨有淋漓粉光濕。丹青世上空紆紆。趣與師同百無十。常時吟客唯我來。共愛此屏微靜翁。目睛難駐手試捫。指下瑠璃無寸澀。願乘醉筆留幾行。爲寫高僧白雲什。

送王賓玉

相如昔乘使者車。縣令負弩當前驅。頗矜意氣誇里閭。檄詞爛漫肆欺誣。歸來不說民飢臞。餘佞便留封禪書。江山清絕冠天區。豈廿久被斯人汙。邇來柄靈軼古初。耆俊相繼馳亨衢。堂堂御史今名儒。志節慷慨忠義俱。才高識遠器有餘。不似文園淺丈夫。一朝持節歸成都。使星皎皎臨坤隅。輟從憲府恩意殊。霜威鷄擊正所須。姦胥所在密于荼。交券計斤良可吁。鋤凶芟穢忌踟蹰。元惡須行七日誅。惡除惠澤益霑濡。頓使枯瘠俱豐腴。坐茵未暖氍毹餽。詔歸還直承明廬。朝廷急賢恢遠圖。碧雞金馬不用渠。以人報國功難踰。諸生中有何武無。

謝三門提舉輦運宋叔達郎中寄古碑雜言

長安古名都。漢唐以來帝王宅。當時高冠大帶接跡公卿間。聲名大半文章伯。能書萬變軼出意象外。那

謁體法就常格。傑辭精翰在處勒。琬琰從此關西富。碑石咸陽原頭螭。蟠龜負莫知數。風雨剝剝塵土蝕。荒郊壞宇大者臥榛莽。小者老祠佛廟往往龕屋壁。憶初來長安。于此心頗溺。朝披夕購自忘勑。一紙不吝百金易。豈惟讀辭玩點畫。漢唐往事皆歷歷。始者累一以至百。今既累百至千。未免廣搜覓。古人載書兼兩懼。猜謗今我車載不足更囊積。中郎知我有碑癖。封寄數本跨數驛。中郎中郎雖欲遂。愚僻愚也字學不進格。文不長。翻愧嗜此苦無益。雖然古人亦或有所嗜。又恐一朝捨此。愚意無以適。碑乎。誓將蓄汝永吾好。不已聖猶賢博奕。

謝陳伯成學士

蓬萊仙人才偉英。三世實以文章稱。持盃玉虹吸澗壑。奮筆金虎虓邱陵。開懷未嘗有表暴。出語矧復無駘矜。超然古人考是否。蔑爾時俗論愛憎。識君始者兩俱少。獨我今也百不能。半載沈疴類瘦鶴。終朝癡臥如凍蠅。醫工診臂卽司命。藥債攪心逾惡朋。煩君數月一問訊。使我多感常填膺。感而有贈不須怪。近來交態猶春冰。

祠部集卷四

五言律詩

李花

地暖春纔半，蹊深氣已暄。風光何處好，雪浪此時翻。勻似金刀剪，裝成玉杖繁。天桃漫相歷，吏部竟誰言。

曉鐘

縹緲驚春夢，鏗轟送曉聲。敲烟出野寺，催月下山城。窗映東方白，燈留半壁明。隱然餘韻在，羣動已營營。

閏月晦日

乾坤一傳舍，日月兩征輪。邂逅逢餘閏，連綿送晚春。巢邊迎燕熟，枝上數花頻。漸暖茅簷日，吾將理葛巾。

落花

林間花自飛，物理不應悲。偶對飄殘地，休論豔發時。有情香水面，無數點河湄。蜂蝶含餘意，徘徊繞舊枝。

因訪楊公濟，遂同步野夫家。省其母，野夫時就試南宮。

馬繫揚雄宅，門過孟母鄰。升堂予獨拜，予拜其母同井子兼親。公濟所居與之密邇萬卷先生富，千金舊產貧。早將安穩

字去慰杏園春。

同楊公濟賦破山得開字。

無物終天地。青山豈免開。萬人鏡秀骨。一氣失全胚。漫貯崇朝雨。猶防浩劫灰。何年巨靈手。曾此擘崔嵬。

同楊公濟賦晚過西村

空影倒波面。晚陽留樹梢。人煙青近郭。鳥道暗長郊。世外空搔首。溪邊懶結茅。滄浪那敢羨。漁父定吾嘲。

苦雨

雨脚灑不斷。魚龍沸巨溟。浮泥溢平地。暴水入中庭。門巷絕尋訪。壺觴誰醉醒。頑雲速收斂。渴欲覩天晴。

蝻

幸藉炎蒸力。因遷腐草蹤。清宵能自照。暗室肯相容。雨巷幽光晦。風簾亂點重。臨書方汝賴。唯恐有鳴蝻。

種藥

百藥吾誰辨。農皇舊有經。傾金購善種。按譜驗真形。易地防根瘦。他時欲劑靈。天時縱不雨。灌溉賴園丁。

贈於潛張定國

蕭散潛川令。才高氣亦剛。學攻諸子短。能涉衆人長。日月銷書卷。功名撫劍鋒。他年有大用。莫漫比柴桑。

某近與和叔游景。愛之不足。因吟短篇以贈。

夫子南州傑。相逢出肺肝。平生潛聖閫。壯歲尙儒冠。鷗鷺霄垠擊。蛟龍井底蟠。恥將孤憤劍。容易向人彈。

贈李熊先輩二首

嶺峯閩人秀。夫君得最完。文章醇不雜。氣質渾無刊。場屋聞新詔。鄉閭正素冠。天應老賢業。頭角壯年蟠。

詔書一日至。多士競軒眉。獨有儒林傑。方纒風樹悲。飢腸惟飽學。正口絕柔辭。從古器大者。於中成就遲。與王仲密諸君泛湖

十月清霜後。孤舟顛氣間。酒邊頹白日。棹底倒青山。境勝歡髮泯。吟頻物象慳。吾儕一笑後。魚鳥伴誰閒。急棹赴吳門

寒日山尖落。孤烟樹杪屯。水流天欲動。舟急岸如奔。縹緲穿雲角。蒼茫望郭門。片心爭宿鳥。去去近黃昏。初入汴

山勢隨淮斷。河流帶地渾。嚴風疎樹影。落日露沙痕。客興雙蓬鬢。吟懷一酒尊。舟行那敢緩。霜意滿乾坤。新鷺

未見攀花宿。纔聞隔葉歌。可憐毛羽細。莫怪語言多。匹馬春風路。輕舟夜月波。數聲來入耳。最奈客愁何。穀下春日

楊柳長安陌。游車綿繡香。漫傾春日酒。誤入少年場。意氣青雲客。風流白面郎。致身愁獨晚。點檢鬢毛蒼。寒日前二日對雨

紅濕花枝軟。青涵柳色鮮。未開新禁火。自起欲晴煙。坐臥銷佳節。招尋憶舊年。故鄉游樂地。心折泛湖船。對雨寄楊公濟

江海歲云晏。雨冥風自淒。葉光羣木洗。翅濕幾禽低。靜榻敲寒枕。孤城隱暮墀。少陵車馬客。催踏草堂泥。

雨中呈丁評事

騷雅丁夫子。年來客路岐。故關春夢後。獨館雨留時。詩有龜兒掌。游須驥子隨。侍令詞君家千歲鶴。應解念歸遲。

歸鳥

日落羣山靜。天寒獨鳥歸。聲悲故巢遠。影入片雲微。蹤跡憐吾滯。青冥羨汝飛。莫爲雙翼誤。須避暗中機。

宿慧安院

積淖厭行路。解鞍欣曲肱。疾風穿敝屋。細雨濕青燈。聒夜有饑鼠。觀空無定僧。中宵塵累息。山水思填膺。

九日病中泊舟召伯堰

采采南山菊。遠應滿故園。予之小園實古南山全家泊孤埭。多病負清樽。木末秋聲老。天涯雨氣昏。鄉關吟望外。愁淚有雙痕。

某爲府曹。伏蒙吳先生以詩見寄。謹依韻奉酬。

瘦馬風埃裏。蕭疎分亦安。閒趨京兆尹。冷甚廣文官。錦繡頌詩句。松筠映歲寒。天邊師坐闕。南望只長歎。

同盛任道賦暮陰得寒字

野館臨空闊。江城起暮寒。年光去天末。雪意上雲端。自失歸禽影。能侵病客肝。莫將愁對景。入夜轉漫漫。

次韻禮之齋中述懷

僻坐治孤學。取書窺古人。高風凜如在。千載邈相親。欲滿詩書腹。寧規富貴身。獨君知己厚。無亦慮吾貧。
春雨一篇呈純甫賢僚縣庠諸彥

漠漠陰常結。垂垂勢未收。潤多宜土脈。落久驗溪流。與物知無間。於花似有讎。少年車馬客。惆悵爲君游。
三月大寒偶書短句

上天誰與問。四序曷相干。已季春成暮。當溫氣反寒。農心憂地凍。俗眼惜花殘。我豈殊民意。身爲父母官。
經春罕嘗見花。今出湖上。悉已離披。

飛花何太急。春在豈須忙。亂點不經眼。殘枝猶斷腸。愁看湖色淨。怯照鬢毛霜。回首壯游地。幽襟付淺觴。
山中遇雨

馬上涼秋雨。隨愁入亂山。垂垂衣袖重。點點鬢毛斑。猿鳥寒聲外。漁樵古畫間。片時全嶺暗。急趁暮鐘還。
純甫小池生雙蓮

造化有詭異。雙蓮共萼翻。凌波洛神豔。泣竹舜妃魂。得所雖欣地。猶孤尙笑根。聖朝不言瑞。圖獻恨無門。
和純甫獨往至德上方避暑

敵屋數楹隘。炎曦一線長。梅仙厭煩溽。蕭寺得清涼。山鳥聒幽耳。澗泉濁渴腸。茲遊君獨勝。河朔浪飛觴。
通判國博惠建茶且有對啜之戲因以奉謝

數餅建溪春。求逾尺璧珍。封從鄉國遠。惠與郡僚均。午榻忘搯臂。晨觴厭啓唇。拜嘉當對啜。相待况如賓。

書窗

一室微吟地。開窗更欲虛。入雲鶩紙破。照月愛樵疎。野色連朝夕。秋光滿屋廬。何如謝太守。遠岫獨相於。

寄題張殿直長春亭

甲第俯河湄。修亭面勢宜。琴檜長有樂。草木似無衰。境勝青山敵。心閒白日遲。祖良迷大隱。獨與赤松期。

寄題郭明府寺丞穎上西齋

退築謀何早。閒居興頗濃。渠流通穎派。窗列隔淮峯。玉麈談賓盛。牙籤載籍重。雨巾時墊角。一代慕林宗。

奉答雅均途中見寄二首

濁流非猛激。無以頓澄明。此邑先膏潤。今予力潔清。人皆疑矯行。君獨照真誠。一得途中什。譏謔衆口平。貧固誠吾分。廉斯亦士常。漫多愚執守。媿少子文章。雅均前篇頗憐予廉貧。復有論文有力之句。雖幸相逢近。猶嗟此別長。何時却南轡。重把論詩觴。

觀碁

鬪智不鬪力。一杯思解圍。防人甚勅敵。平地有危機。蝸角爭先後。狼心競是非。傍觀縮手者。往往見精微。

九日過後漫題堂前雙菊

花日金相照。條風翠競翻。誰言羞晚豔。自喜勝孤根。客士深培力。家人一旣恩。秋香真好在。未易負清樽。

和純甫紅葉

秋園無豔色。特地起西風。閒向煙林翠。時呈霜片紅。霞光青漢襯。燈炬碧紗籠。不解隨松柏。染裁煩化工。
再次韻和純甫紅葉之什

徒密嗤翠幄。有文殊紫屏。囚霜變顏色。點樹作丹青。廢苑掃還聚。疎林生易形。秋風無別豔。祝爾莫飄零。
挺山道中早行有感二首

晨興事行役。寸祿此時輕。撲面風霜緊。隔林雞犬鳴。遙天分淡色。殘月露微明。便欲投簪去。無田可力耕。
山驛孤燈盡。霜天片月低。還家人自喜。戀櫪馬頻嘶。野水分微白。巢禽驚穩棲。前村應曙色。依約數聲雞。

宿山寺

蒼莽窮山路。蕭森古寺門。夢清宵殿月。淚迸曉枝猿。人事隨羣動。山情阻細論。城中塵沒眼。愁思滿歸軒。
某承乏東陽。周親惠然顧訪。未幾告別。以詩餞之。

親戚富貴合。賤貧宜見疎。獨君從遠道。爲我枉高車。相得未逾月。薄言還故廬。風霜正淒暮。臨別尙躊躇。
晚登至德上方。偶書短篇。呈山主雲公。

城市隔半舍。院距邑十五里。好山寧在深。亂雲歸別塢。落日照疎林。能解外緣縛。始堅安住心。冠裳方我誘。漫作
愛山吟。

離東坡後寄題義師上方

山水東陽富。僧居更翠微。晴峰露秋骨。古樹減煙圍。啼鳥遠相應。孤蜂閒自歸。予生秉幽尙。夢想在禪扉。

劉叔茂及第後。往廣德拜親。過吳江新治。

今歲同升客。如君有幾人。青年登一第。白首具雙親。喜氣生軍壘。懽迎聚邑民。諸兄在天祿。勉去繼清塵。

惠山泉

封寄晉陵船。東南第一泉。出瓶雲液碎。落鼎月波圓。正味云誰別。繁聲只自憐。要須茶品對。合煮建溪先。

官滿將見舍弟

三歲別吾弟。今歸心始降。從茲得安寢。無夢過重江。預驗鵲音喜。行看鴈影雙。西湖猶可泛。酤酒市羊羶。

途中寄純甫

諸友分攜地。重陽欲近天。共誰搴菊藥。獨立憶梅仙。對飲乖今日。傷離似去年。佳山足吟賞。應自有新篇。

志遠法師挽辭

寂寞湖邊寺。荆溪目已暝。窗雲猶曉白。竹徑自寒青。野鳥悲吟動。門人感涕零。里無梁補闕。誰可法師銘。

庚子歲除禿下作

呼兒來秉燭。點檢鬢邊絲。志在驚時晚。年加願曉遲。京華猶旅食。世態益吾悲。四十明朝是。愁吟杜子詩。

久雨見月

千門却燈燭。久雨愛冰輪。愁眼開今夕。清光對故人。更長頻側帽。望極反霑巾。幾爲浮雲掩。行蹤類此身。

立春

宿凍歸何處。池塘漲暖波。日盤花面永。風入鳥聲和。俎菜堆生葉。圍裳剪薄羅。獨憐詩酒興。早較昨宵多。
依韻和粹中早春

寒威猶壓曉。淑氣已回春。不道朱顏舊。剛憐華歲新。震雷將出地。蟄戶莫存身。漸報鸛花信。眉頭日漸伸。
早春寄擇之

北陸寒威盡。東郊晝景添。風和引禽哢。冰暖出魚潛。草本回生意。乾坤待澤漸。寧知巖谷下。經歲嘆才淹。
正月三日郊外馬上作

長日牽人事。新年散馬蹄。和風吹凍柳。殘雪點春泥。意愜境自勝。興來杯屢攜。徘徊羨飛鳥。曉逐野雲低。
禁烟節同子玉徐先生野步

繫馬道邊樹。杖藜坡外岡。風來花自笑。露過草猶香。樂事論三月。吟懷驚八荒。時平那有感。雙淚肯浪浪。
春色

淺深花面染。來去柳邊浮。雨氣那能洗。年光亦共流。濃濃交綠野。拂拂上朱樓。轉恐紛華眼。蕭條不愛秋。
題劉有方御藥翠巖亭

購石黃金費。開軒翠玉叢。端居憐象魏。遠意自衡嵩。花弄疎簾日。禽呼靜榻風。移山寧有術。未易笑愚公。
升之元真觀讀書

白日無停運。青雲要早圖。寓居隣上士。述作擬潛夫。案冗書籤滿。窗明樹影孤。徘徊拂塵壁。一半舊題無。

送李厚祕校赴相州戶曹

迎婦金貂宅。之官銅雀臺。俱新是婚宦。有素獨詞才。簿領時能撥。圖書日可開。無勞歎州縣。自足脫塵埃。

醉臥

彭澤終朝飲。杯乾入醉鄉。眩頭遺野幘。坦腹委藜牀。吏部甕邊臥。山公馬上狂。何如此安穩。寢興爲吾長。

和叔以琴詩見貽。因成一篇奉答。

製就七絃器。斲殘千古桐。正聲希世出。羣耳此時聳。微暗列星隱。意存流水空。憑君莫輕撫。留取和薰風。

古劍

只因耕戰地。得此古龍泉。磨拭自今日。埋藏曾幾年。無將試蛟窟。宜待靜狼烟。寄語姦邪輩。當鋒莫向前。

壓書玉兔

白玉雙蹲兔。工深刻楮勞。長疑奔月窟。渾欲動霜毛。似喜書成穴。猶驚筆有毫。案間誰汝待。自覺守株高。

陽睢春日偶書二首

凍柳輕能舞。枯河暖亦流。東風應自好。遠客獨含愁。攬鏡傷吟鬢。無錢買釣舟。誰能終日興。大半在滄洲。

楊柳亡隋岸。風塵舊宋州。寄家盈百指。憶弟濕雙眸。旅宦那能定。人生本自浮。旋酤街北酒。準擬送春愁。

睢陽別包進甫

飲徧長安酒。春風送馬蹄。異鄉憐會合。明日復東西。行興看君速。歸期恨我稽。門前客星瀨。到日溜塵泥。

別希魯回馬上口占

兄佐諸侯慕愚居孝子廬奔馳他自得情味獨相於先送秋帆動還嗟友席廬平生感知淚今日爲漣如

大風

正月明朝盡東風半夜狂乾坤搖蓋軸草樹拔毫芒亂瓦飄無數寒沙走更忙聖時讒口絕天令莫乖常

寄盛子美俞元功二先輩二君得第後守選寓相國寺習試法

彼美吳州傑相從蕭寺居聊窮三尺律肯恃五車書前有殊尤等行當選擢初秋風吹客袂鄉思復何如

試法新立數等

寄公立

一朝揮別袂九日在征岐識我相思意如君獨坐時榴花須滿瓊菊蕊况盈枝目下重陽淚宜看杜牧詩

寄俞君度

夫子儼已甚平生心向存黃金空舊產白首寄他門獨酌醉應淺愁吟聲更吞飄零那復久知己有平原

員外陸先生常恤其貧

過洛州

朔野風煙古臨洛氣象存魏風沿土性漳水抱城根故壘盤荒草殘碑落近村太平民產富桑柘半郊原

祠部集卷五

五言律詩

北都春日

日出車馬道。風來城市塵。關河應自昔。花草不知春。雲靜鳥翻翼。冰消魚動鱗。太平無一事。把酒勸耕民。

出大名府北郭

驅車出近郭。野色感年華。洄靜水猶凍。地寒林未花。細風吹斷柳。殘雪隱虛沙。鄉思東南闊。歸飛羨暮鴉。

馬上口占

出郭塵埃少。驅車節物便。歸心忘澤國。病眼豁霜天。鳥雀飛荒圃。牛羊臥晚田。吟邊搖落意。疎木起孤烟。

二月過半猶未見花。昨日逢之。珍云已有小桃。因成短句。

不覺春過半。開花始見桃。年光雙鳥翼。世事一鴻毛。有興撫清景。將愁付濁醪。家林應爛漫。南望首空搔。

偶書呈公勝

朔吹朝遼暮。繁雲凝復開。不能成雪意。只解作寒媒。薄宦家千里。長吟酒一杯。西鄰鄭夫子。乘興幾時來。

走筆送楊正臣先輩還吳

客衣沾魏土。歸馬望吳雲。一紀困游宦。異鄉愁送君。驂騑行得路。鴻鴈去成羣。歸省元昆何日江天酒。重論別

後文。

居魏歲餘未嘗見江鄉。故人今無悔如雄過此。相見甚喜。席間率成短篇呈之。

經年大河北。終日故鄉心。入耳欣吳語。開懷慰越吟。天寒裘領薄。日暮酒盃深。早晚論邊策。長纓試請擒。

新秋夜月寄故人

客心宜靜夜。月色澹新秋。影落三湘水。詩傳八詠樓。何窮對酒望。幾處捲簾愁。若問相思意。隨君萬里遊。

依韻和留臺崔庫部局中自遣

儒林文雅作。蕭散欲揮金。老去安時態。秋來慰夙心。誰陪黃菊酒。自喜白頭吟。賓客霜臺少。詩成每獨斟。

自零口夜至渭南縣作

月黑征途暗。羸駒傍險行。村遙微認火。縣近忽聞更。落寞殊鄉意。喧啾小市聲。故園流水在。想像見冰清。

婦翁營宰此邑。作渠引水以激民田。今享其利。

送長安僉判鮮于子駿還闕

相望蜀父老。應嫌駟馬遲。三冬辭幕府。千里走京師。富貴那能滯。文章自有知。關山含雪意。別酒對秦姬。

長安春日

白入雙吟鬢。衰侵一病身。年光不貸老。春色似欺人。鳥破日邊霧。花飄風外塵。還將感時淚。對酒灑成秦。

題光化年西嶽碑

瘦硬光和字。崔魏太華碑。鐫模森骨立。點畫宛鱗差。內有通神筆。前無絕妙辭。芽齋千載後。玩古獨心知。

唐嶽賢廟題名

華嶽金天廟。唐賢石闕題。姓名留篆刻。冠劍落耕犁。字體諸家雜。函封數驛齋。幾行猶壯觀。丞相討淮西。
裴晉公征淮西與將佐題名石上。

斷碑

何代經兵火。終年委雪霜。文章誰黑白。首尾自參商。琬琰那淪翠。塵沙漸變黃。人生異墜石。撫汝重蒼茫。
依韻奉和經略司徒侍中上巳會興慶池

千載蘭亭後。風流宛目前。竹昏烟冉冉。花泣露漣漣。筆落詩推將。盃行酒有仙。水邊佳麗少。春草漫芊緜。
杜工部有三月三日天氣新。長安水邊多麗人之句。

小閣西山落日

天地垂垂暮。殘陽似有情。未催全嶺暗。猶放半山明。遠樹微茫見。孤烟慘澹生。流年從此老。對酒急須傾。

翻經臺

失道從僧指。窮高聽鳥呼。三山四迴抱。一徑百盤紆。人事空今昔。臺基儻有無。吟邊風氣夕。落日伴猿狐。

題華藏環峯閣

精藍已塵外。飛閣更雲端。只見蒼山合。寧知紫宙寬。客游追汗漫。詩思等巖岏。大士安禪後。何人此倚欄。

羽師院假山

累石作危峯。軒然曲沼中。山形在眉睫。人意自衡嵩。影駭魚蝦避。路疑猿鳥通。宦途尤巧險。匠手草盲工。

京兆府初赴同天節宴詩二首

四月薰風轉。三天瑞景舒。歌從歸啟後。壽起祝堯初。詩喜南山對。身甘北闕疎。九韶音未作。朝野自懽如。五帝今云六。君王合萬年。日長遲漏水。風細駐爐烟。想像聯朝佩。歡呼捧御筵。喜深恩更遠。不竭似秦川。

哭王仲密四首

相逢初北闕。並試復南宮。失意春風裏。謀歸汴水東。行藏他日異。笑語此生空。不掛青雲籍。聲名野史中。羣居三益友。再拜十年兄。一別長南北。相逢遂死生。淚流添渭水。心折注江城。聞訃悲尤劇。書成僕未行。予將遣僕持弔書南去而君書在焉忽聞其訃

場屋行遲暮。田廬臥寂寥。壯圖藏翰墨。高行落漁樵。會哭諸朋盛。銜哀一奠遙。繫舟江岸絕。愁望定山潮。多金空舊產。短褐盡平生。蒿里闕春色。桐江流哭聲。人憐天不與。婦少子猶嬰。如有山濤在。應忘顧後情。

依韻和酬鮮于子駿郎中見寄

昨在王公幕。同時輒仰攀。論情昆弟等。知己友朋間。渭北孤交臂。淮陽慰客顏。王公今牧陳復留兄居治下長卿看駟馬。父老望西還。

趙龍圖自西川攜鹿兒至秦相惠

軟毛金縷暗。細點雪花勻。林下遠思母。階前愁傍人。澗聲微可聽。野性漸能馴。公惠成愚好。他年伴幅巾。
長老鳳師新作四照亭。以其環顧洞徹。無纖翳礙目。故名云。從予乞詩。因卽其說以寄題。

大士安禪外。孤亭曠望中。物無形可遁。心與境俱通。日月光應倍。江山氣更雄。寧須面壁坐。到此卽觀空。

留題太平寺

鄉落少人烟。精廬獨巋然。香花真佛界。棟宇始唐年。鳥啄齋餘食。僧參夜半禪。清涼數畝地。已是隔塵緣。

留題東巖院

仁祠倚巖腹。無處入翳氛。古像棲深殿。高僧傲白雲。山花暖自發。谿溜遠猶聞。我正爲名縛。翻羞猿鳥羣。

數日前伏蒙吳先生留飲。旋辱尊什。喜某之來。謹依嚴韻奉獻。

昔荷齒牙論。今猶骨髓淪。報知虧國士。高第濫門人。牆仞欣重到。眉頭爲一伸。却嗟夫子疾。是日臥漳濱。

依韻奉和司徒侍中仲春釋奠

先聖祠逾重。尊儒世適丁。上公儀最熟。太學祭頻經。曉月衣冠淨。春風俎豆馨。魏人休請頌。在泮已言形。

梨花

舊愛樂天句。今逢帶雨春。花中都讓潔。月下倍生神。翫好張瑤席。攀仍贈玉人。莫開紅紫眼。此外盡非真。

雨夜舟中

岸鳴連夜雨。舟繫數家村。防盜頻敲柝。愁吟早閉門。呼兒陳小酌。憶弟勸歸魂。安得清風起。吹開波浪渾。

御河舟中

浮舟不用力。一水靜於山。沙鳥晴相喚。河雲晚更閒。微吟窮有象。清思入無間。河策誰云補。從公漫往還。

履

好在登高履。東西類此身。遊頻齒幾折。用久蠟還新。晚步憐今日。幽尋憶古人。莫隨珠履客。且伴白綸巾。

夜坐

城裏更籌急。牕邊竹影微。掩書雙淚迸。撫事寸心違。歲月辜華紱。風霜感彩衣。陶潛空自賦。何處有田歸。

韓魏公生日

三秋開爽氣。七月降元精。致主鈞樞徧。尊賢袞鉞輕。顯庸歸社稷。陰相在神明。漳水流無竭。年年伴壽觥。

九日

霜淨乾坤闊。登高極古臺。秋聲楓幾落。客眼菊三開。短髮頻看帽。寒吟間引盃。籬邊空意緒。難得白衣來。

庚戌歲除

薄宦三冬暮。殊方一紀餘。笑歌筋力倦。勳業鬢毛疎。道路紛乘傳。軒墀選曳裾。無庸看半百。搔首歲云除。

依韻和張文通中舍寄韓師元判官

從容須陞對。蕭灑待家居。近閣從戎筆。閒裁寄舊書。青衫逾一紀。黃卷尙三餘。聞說山齋好。何時遂曳裾。

送譚供奉

丹山靈鳳質。偶別帝梧飛。忽憶華林好。還收倦翼歸。綠深宮樹合。紅薄苑花稀。重到迴翔地。卑棲嘆昨非。

次韻仁叟禁中清曉

禁廬休夜直。瑞靄向朝敷。華闕辨雲氣。紫宸低斗樞。帝梧鳴彩鳳。宮漏息銅烏。日出將臨辰。天光冒海隅。

送陸覃校書赴選西上

朝飲送春酒。暮吟傷別詩。予愁鶯語亂。君興馬蹄遲。五府何時辟。三銓會早辭。回鞭晉陽道。不負細侯知。

次韻盧六員外避暑

城市苦歎暑。辱涼到水窮。環林得高蔭。解帶取微風。渴肺舉盃緩。汗膚兼酒紅。當年河朔會。舊事豈全空。

中秋京師對月

今夜皇州月。秋光共幾分。未全成皓魄。猶勝隔浮雲。白髮愁偏照。清樽喜獨醺。遙憐江國弟。北望首應勤。

悼承天月禪老

祖意生來達。詩心老去專。傳燈與誰子。絕筆在何篇。朝客散談席。野禽窺法筵。唯應軒北石。秋後自依然。

送蹇礪翁都官赴倅梁門

予與礪翁同年。誰士南宮同舍。復北都幕府交承。

共昔登龍客。仍今同舍郎。後先趨帥府。南北重離觴。塞角催秋月。邊烽落曉霜。軍城看趣召。能久賴王祥。

久雨初霽對酒偶作

彌月窮山雨。昏昏氣蔽天。南榮初見日。萬瓦已生煙。節物驚殘臘。懽期減去年。愁來搔短髮。對酒且陶然。

仲冬十六日登馬步

提撈巒險徑。喜隨雙炬紅。薄雲籠淡月。苦霧捲嚴風。馬害誰云屏。神休覲所蒙。晨門未開鑰。殘夢續齋宮。齋宮獨酌待曉入城。

青燈頻照面。黃卷懶低頭。危坐自醒醉。孤斟誰獻酬。簷前落星宿。城裏息更籌。上馬卽塵事。欲歸欣少留。贈杜諮祕校

唐代詩人傑。家居世杜陵。祖風今不墜。君學善相承。氣直橫秋鶻。文雄絕漢鵬。風騷如命將。壇復讓誰登。杜以詩和答依元韻贈之

子美沒已久。正風幾替陵。上天憂道喪。遠裔以詩承。鶻足輒追駿。鷗心聊慕鵬。微之重堂奧。努力願同登。送范令巽之赴陝縣

陝人西望眼。唯認馬蹄東。柳縣追陶令。棠郊謁召公。問農游手勸。聽訟下情通。千載萊蕪後。傳家有素風。送同年張正臣赴海陵幕

早年登甲選。從事又東藩。地與淮流絕。城連海氣昏。好山供健筆。暇日樂清樽。多著太平策。歸來奏帝閭。寒燼偶坐戲。呈任道

人事車輪轉。年光木葉催。交情論晚歲。生意共寒灰。未足勝寬褐。那能煖凍盃。知君尋氣類。不爲附炎來。依韻和仲靈禪師喜賈丞相趙翰林見稱輔教編之什

浩蕩藤州老。雄文鼓大編。聲名元自重。述作許誰傳。成誦慙空久。相逢偶未緣。承明內外相。交口譽師賢。
送覺上人還響

下山風月古。秀發在詩人。之于含清骨。禪師託後身。千篇收篋藁。一人繞鄉蘋。知己大丞相。無勞揖縉紳。
依韻和彭九及之歸養之什

江南春自好。蜀客亦思歸。淚與花俱落。心隨燕共飛。露章還子舍。孝理副宸闈。禁署風流後。謀漁未有磯。
送宣州太守沈司封

宣城從古勝。謝守擅風流。夫子名當世。君王付此州。訟鈴閒郡閣。吟筆動江樓。莫憶窗中句。能詩今隱侯。
送王天常太祝詩

雨洗春枝冷。巖愁曉更啼。感時雙淚落。送客片帆西。淮隰逢鶴羽。令弟秘校與京塵縱馬蹄。有才無殿課。安穩步通閨。

方殿省示惠遠祖先生詩集

先生名不死。三百幾年間。白首吟唐世。清風起越山。遺編流自久。異代許誰刪。遠裔傳能事。斯文氣欲還。
屬疾

壯懷衰獨早。樂事病全稀。靜聽聞花落。欹眠見燕歸。冠裳成外累。塵土汨真機。強起親曹事。遙慙舊隱扉。
予累日臥病。適張文通惠教。亦云服藥漫成小詩呈之。

功名心寸折。歲月鬢雙逢。病畏酒杯綠。愁憐花藥紅。杖藜成暇日。行樂步春風。唯有張公子。翛然此意同。

暮春被病感書

孤直難知己。才華反誤身。流年銷壯節。多病對殘春。酒到心如達。花空眼亦貧。賢愚通塞理。誰與問洪鈞。

聞升甫南池觀魚所獲無幾戲成小詩奉呈

巨鱗非尺澤。多目漫污池。網漏從今日。筌忘復幾時。饜人顏慘淡。漁子興參差。豈似任公捷。羣鯨一釣絲。

病起觀盆魚

戢戢駢頭戲。悠悠掉尾行。莫言盆盎窄。猶勝網羅橫。競觸浮萍亂。時吹細浪生。嗟予遭病縛。羨汝遂微情。

送王明叟赴秀州法掾

去去持丹筆。當官議是非。壯心低仕路。戀涕濕親衣。汲浪檣烏急。吳霜稻蟹肥。論文杯酒後。從此古人稀。

行叟權秋掾比回正老以詩寄之因次韻奉和

郡獄乏掾屬。君才盛府依。狂牢煩暫掌。鸞枳復卑飛。盡室輕裝去。新吟滿篋歸。風流傷別處。粉淚洒紅衣。

送石亢之節推赴廬州幕府

執政昔曾祖。滯才今令孫。三遷纔大幕。萬石已高門。阮瑀妙草檄。毛公深雅言。度支毛伯相從賓主樂。淮月共清樽。

送子立榮侍南歸

有客就征驂。風前別酒酣。慈顏依膝下。歸意滿江南。去路草初歇。到家梅正含。短書無惜寄。別後抵清談。

上何太宰生日二首

斗杓西揭柄。南呂已飛灰。芝室占熊夢。蓬山挺梓材。世欣金鷲見。人慶玉麟來。天意非難料。行看位上台。皇穹符寶運。嵩嶽降真賢。明月中秋後。黃花九月前。潭潭新紫府。壘壘舊青氈。遐想靈椿慶。春秋合幾年。

漁者

身世扁舟裏。飄飄可奈何。萬生勞白日。一笑屬滄波。闊網施能幾。閒機用未多。予顏自憔悴。莫作楚臣歌。

對雪六首

幾尺江東雪。同時戶北風。全家愁坐外。寄命苦吟中。已分書帷冷。偏憎酒盞空。漫將豐歲兆。去問白頭翁。草樹驚全失。山河望轉非。片時藏地險。底處極天圍。樓半輕相逐。簷前急自飛。乘風還有意。故去點人衣。飄洒三冬暮。蒼茫一氣凝。寒威斗自壯。空色曉逾澄。狂走尋岡兔。飢呼失樹鷹。年來交態淺。有興卽誰乘。影亂侵書幌。花輕輟酒盃。襟懷同落寞。氣象亦崔嵬。屢折參雲竹。偏凌照水梅。紅爐方爾附。未可論寒灰。色浮千里白。氣逼萬家寒。獨鳥飢猶啄。癡兒喜自團。向風初舞急。入夜轉聲乾。此味同誰冷。吟窗映素冠。朔風吹不盡。顛氣入無間。市井人喧息。江湖鳥翼頑。酒邊驚晚歲。吟外失羣山。溫室便高臥。明朝任塞關。

次韻答承天月長老

方外得師晚。相逢出古心。交成真合水。意在始知琴。官路塵泥久。禪扃歲月深。清風貽絕唱。一誦快煩襟。

塗中書四十言奉寄武陵則師

師有知人術。一言珍萬金。聖門防取貌。吾道素論心。越樹秋聲起。武陵歸思深。桃源千載事。此說更難尋。

書香嚴屋壁呈寺主隆師

莊嚴模淨域。金碧照晴霓。土木有時竭。樓臺無日低。林泉藏好處。巾屨得安棲。我媿陶彭澤。煩師數過溪。

詩送長老芝公歸靈洞

昔以醫名著。今茲祖意傳。衆生如不病。大士自安禪。貌等澗松古。性同山月圓。應防猿鳥憶。卻指舊林泉。

贈淨土嵩長老

林泉久安住。心境兩無塵。禪外牽餘想。詩中老此身。虛懷延海衆。雄辯服談賓。偉特如師少。相逢悟宿因。

贈霞長老

大士本宿植。妙年離世紛。定心馴海鳥。詩語淡秋雲。與物曾無著。收聲恐有聞。唯將諸祖意。晚歲導迷羣。

酬齊上人

不見湯師久。病眠時序深。忽驚朱夏過。真負碧雲吟。他日虎溪約。同時鳳闕心。未應論去住。杖屨且相尋。

景山無思二大師重和鄙詩復依前韻奉答

西北塵游倦。東南野興深。帳空愁鶴怨。山暝憶猿吟。大士真交臂。連篇契夙心。會須攜蠟屐。雲嶠陟干尋。

送臻上人還雲山

半歲風埃地。終朝雲水情。身兼飛錫健。眼向故山明。不改禪衣色。從來野麩輕。煩師伴猿鳥。兩耳厭車聲。

詩贈圓公大士

恐是逃名客。因爲出世流。人間雲不定。心外佛何求。醉喜形骸放。詩嫌偶對囚。我應遭竊笑。聲利乃身讎。

仲靈禪師以詩見邀。輒走筆依韻。附還使奉和。

世好元難合。便甘或棄辛。喜師同肺腑。偶爾異衣巾。文約常牽俗。詩情遠過人。相邀松下別。山意入秋新。

送李講主還維揚

定憶娑婆樹。雙垂滿地陰。院有雙樹。春風吹社燕。歸意逐淮禽。帆落橫江盡。門開小院深。先搥大法鼓。續震海潮音。師之來杭。實幹法鼓。

仁宗輓歌詞四首

未乾宮硯墨。猶暖御爐烟。雞唱空催曉。龍飛忽上天。攀髯三月暮。洒淚五雲邊。盛德無容報。塵埃萬壽篇。

飛帚飄宸翰。庶歌縱睿才。歌懽三閣燕。聲轉兩宮哀。人世金籙祕。天門玉鎖開。年年初夏月。寂寞壽山杯。

輕徭寬日力。橫費惜秋毫。臨諫天容睟。尊賢聖體勞。乾坤收化育。弓劍入悲號。十月西陵仗。愁雲隔綈袍。

聖運一千載。君臨四十春。寶圖先與子。妙斷獨如神。瑞表虛南極。哀聲動北辰。天鍾堯舜性。廟號訖稱仁。

石太保輓詞

許國三朝老。傳家萬石君。乞骸章未報。沒齒訃先聞。挽鐸搖秋露。銘旌卷暮雲。龍岡逢吉壤。馬鬣寄高墳。

王廣淵郎中輓詞

一門新茹痛。八座近云亡。凋謝仍賢者。風流失望郎。葬帷籠淡月。挽鐸訴清霜。祖烈繫誰紹。三槐老北堂。

王子直輓詞二首

流水身飄忽。青雲意闊疎。儒林看作傳。使者合求書。野月隨丹旆。山烟濕素車。寢門今日淚。一瀉爲無餘。
王氏仍淮水。賢人減潁川。風流今盡矣。天理舊茫然。親涕霑封篋。交情動絕絃。公卿誰不到。偏天賈生年。

晉陽郡君輓詞二首

畢承相之孫。諫議宋大夫之妻。

法度居無失。圖書動有稽。不偕君子老。空美大夫妻。淡月臨新兆。清風在舊閨。哭聲摧隴木。山鳥學人啼。
夫賢微子後。身貴畢公孫。獨棄斑衣養。空餘象服尊。悲風纏挽鐸。苦霧濕銘旛。誰謂靈香驗。何曾見返魂。

祠部集卷六

七言律詩

立春

北風已作東風客。昨日何如今日暄。造化有期尋萬木。陽和無迹走千門。土牛陌上摧花杖。玉燕釵頭綴綵旛。獨我題詩添意緒。又看殘臘委冰痕。

春日山中感懷

春色酣酣破宿蠶。春心袞袞瀉長淮。無情草樹相看久。得意親朋一笑乖。世俗冰霜誰暖眼。古人金石已枯骸。愁來獨對青山坐。唯有東風入舊懷。

贈楊尉純甫

君家茂族出關西。壯氣長於萬丈霓。羣鷲羨鵬舒海翼。衆鷺觀驥騁霜蹄。詩才多慕謫仙逸。宦緒猶嫌梅福低。千里霄程方策足。莫云今日是卑棲。

若師院詠筭

戢戢新芽迸舊林。纔生有節便虛心。已鄰佛界黃金地。更學仙家碧玉簪。失灌要須防倦僕。儉餐切莫聽飢禽。憑師養取成脩竹。截管終令作鳳吟。

席上次韻純甫牡丹

絕艷濃香一倍繁，青春歸去已珊瑚。障風護恐檀心損，和雨攀應玉手寒。今日我來頻舉爵，明年誰與共憑欄。盛傳京洛多名品，未得尋芳洗眼看。

寄湖掾楊浩然

新持手版茗溪掾，應恨浮名別故鄉。澤國幾瞻飛鴈序，令弟公濟在杭春風自入墜鯉堂。坐曹未改生平好，開卷能如往日忙。龍首主人監郡樂，定蒙賓禮考文章。

送春

年年不會春來處，疑自深紅嫩白間。今日却從何處去，明年依舊待君還。不堪眼見鶯花老，安得心同木石頑。身外韶華猶可再，其如綠鬢與朱顏。

經和靖林先生舊隱

獨行先生舊隱荒，大名寧受一棺藏。能詩秀骨應無朽，近塚閒花亦自香。卷軸門人收篋笥，歲時族子奉烝嘗。隱居不娶，詔族承祠。逸民未許先賢傳，猶說梁鴻有孟光。

贈陸元象文學

漢世最優文學掾，因君官稱復榮今。青春事業收名路，白首光華照士林。風月每邀花底醉，乾坤共老水邊吟。安車正好追先烈，子舍唯增二百金。陸賈五男，今君愛嗣六人。

依韻和陸丈瑞香花

花下詩翁已富情。愛花相詠句還成。纔開秀格能殊衆。到老清香不負名。世上流芳歸幾處。江南傳價入中京。乾坤定是憐馨德。那許風前趁落英。

競渡

書鷁追風千楫動。錦標翻日萬人呼。驕龍戰水爭先後。采蜃橫川半有無。波底魚蝦愁破窟。岸傍車馬看盈塗。競心猶出功名下。吟倚扁舟進一壺。

謝純甫惠筆

勁管毫尖匠製宜。故人珍贈我何爲。分殊定遠初投日。得似文通舊夢時。大手媿無才翰用。正心惟見友朋規。紛紛紙尾方勞暑。辜負詞林視草詞。

次韻和純甫秋陰悶書

乾坤泱泱作秋容。節物情懷兩莫窮。山雨欲來陰竟日。溪雲不斷氣浮空。賴存樽酒時傾綠。更有歌裙可醉紅。偶爾登臨愈興感。朱顏容易變衰翁。

再次前韻

曖曖秋旻氣象濃。對時覽物兩無窮。纔開又合烟光重。欲落還收雨意空。直恐客頭先老白。却思日脚帶斜紅。天真不擾無餘感。誰似前溪下釣翁。

純甫出近郊以梅花未開成篇見貽因次元韻奉酬。

朔吹鳴時萬葉黃。獨留瓊蘂擅幽芳。水邊野外開雖晚。臘後春前賞未忙。素艷若敷應雪妬。嫩心猶悶已風香。此花更是梅仙詠。消得花間飲百觴。

過練湖

湖畔難尋使者麾。湖光猶照旅人衣。氣蒸澤國能無潤。隄貯雲天別有圍。楊柳經霜相對老。鳧鷖飽食自山飛。繫舟索紙題詩句。更把閒愁付落暉。

題吳山伍子胥祠

江上胥山古水陰。祠堂氣象亦蕭森。江雲不散憂君色。山月猶明死國心。遷史簡編今斷缺。吳人牲酒日肥深。鄙懷異代悲忠烈。一拜威靈淚滿襟。

資國山口石橋

前日枯槎接斷溪。今朝白石跨完隄。牧兒靜立牛磨角。詩客閒驚馬駐蹄。澗雨漲來流淺瀨。山風掃過斷纖泥。十家豈乏相如輩。當有人從柱上題。

立春

魚尋細脉上輕澌。鳥趁微和哢好枝。多病強傾春日酒。苦吟還接暮冬詩。江南信息梅應蘂。京國風流柳未絲。最有佳人隨節序。斂頭綵勝競垂垂。

送朱郎中得謝歸淮南二首

一束衣冠四十春。公今收得自由身。朱顏出任看同輩。白髮歸榮有幾人。何處覓金分素里。只聞行路羨清塵。扁舟急解隋河纜。猶恐京埃汙葛巾。天香猶在入朝衣。早見都門解綬歸。晚歲高風增慷慨。今宵列宿動光輝。誰供白酒開談笑。自向滄洲洗是非。從此淮禽相看喜。沙邊不復背公飛。

次韻酬答胡一之

六科頓網索豪雄。巖穴賢羣爲一空。夫子獨沈窮巷底。故人多列要塗中。君之交游多在顯貴志行應在功名早。欲大難爲富貴充。年未平津學晁董。佇觀晝錦耀江東。

立春輦下作

雪意徘徊收臘尾。風光迤邐上花梢。強傾浮蟻嘗春酌。終似南禽憶舊巢。愁裏年華侵短髮。吟邊生意滿東郊。玉盤絲菜無消息。索寞空齋畏客嘲。

依韻和擇之惜春

何門織婦爲春魔。幾聽啼鴉暗輟梭。美釀入脣宜莫算。芳期屈指已無多。近風柳絮飄都盡。著雨花枝落半過。正好狂歌對餘景。休因節物嘆蹉跎。

寄陳介進士

聖門顏子最稱貧，猶有簞瓢奉一身。罕似飢腸游太學，獨將生意託洪鈞。常時閔笑遭流俗，今日依歸得主人。早夜從容諮道誼，切防事業去青春。

次韻和秋扇

形如圓月色欺霜，曾許佳人掩面藏。袁守揚風方慰愜，班姬中道忽悲涼。自知掌握初經用，豈願塵埃此暫傷。只恐來年清暑殿，別將紈素上君堂。

月卿大師以書抵予，言到自永嘉，今將還杭，因索詩送行，聊書短章，寒來請之勤。

京洛多年作意遊，瞥然歸思滿林邱。塵衣纔洗吳中水，吟錫還尋海畔州。還杭未幾，復游永嘉。獨夜揮絃泣山鬼，能幾句談妙動藩侯。溫守劉侯，延師講經。孤雲高跡真無定，又理輕裝買客舟。由永嘉赴婺，復將還杭。

菊

花濃新出黃金鑊，枝軟輕垂綠玉條。正色逢人何太晚，清香到酒亦終朝。籬邊此意同蕭瑟，霜後無言對寂寥。凡卉不為孤艷地，淵明真賞欲爭邀。

立春

殘臘新春判此朝，斗寒猶未動寅杓。白催曉色融冰片，綠轉風光入柳條。絲菜落盤隨玉手，縷花垂勝厭金翹。六年不見江梅影，長覺歸心似旆搖。

次韻丁評事春雨

溪樓燕子懶飛飛。一鼓輕雷驟作威。細溜林花紅抹淺。低蒙岸柳翠光微。偶穿縱步尋山屐。且解銷憂貰酒衣。華表有人還未得。更堪取次送春歸。

送王文玉歸浙

插旗打鼓放船回。二紀蓬萊一夢遊。回首誰能顧庭鷺。收心自可近江鷗。盤堆玉縷鱸初膾。盞溢金波酒旋籌。嘉興酒有金波者。摩詰定懷廊廟弟。新詩未免到皇州。維弟也。

依韻和達夫泛湖之作

雨意隨雲却上天。山頭已掃欲晴烟。柳條不盡空圍岸。荷葉猶新未礙船。時序百年催樂事。乾坤一笑入詩篇。主人著姓平原後。莫惜金樽醉綺筵。

賈麟自睦來杭復將如蘇戲贈短句

春風那解繫狂遊。朝醉桐江暮柳洲。大手千篇隨電掃。孤蹤四海學雲浮。榮名不落閒宵夢。退築聊爲晚歲謀。老橘殘鱸猶有興。片心還起洞庭舟。

題於潛張明雨愛拙堂

高酒潛川愛拙翁。堂閒雅興拙情同。宦塗恥用機心達。聖世寧爲直道窮。千載姦纖羞白骨。一時夷坦擅清風。邑人三歲觀賢化。巧詆銷萌訟餽空。

月夜與陳行父楊公濟吳常甫出詣蔡子難

月色無雲喜共看。葛衣藜杖到君邊。宦遊易作浮雲散。人事難同好月圓。菊露淒清吟可老。竹風幽酒坐疑仙。明年席上天南北。行父常甫各將赴治合破高齋此夜眠。

丈人生辰

纔過中元九日期。人間最重早秋時。當年毓秀凝天粹。此際生賢作吏師。候屬金行資義節。氣鍾庚宿究兵奇。願公大用齡盈百。歲歲長吟祝壽詩。

依韻和楊公濟喜嘉定帥王待制移成都

把詔心先劍外飛。一身與國繫安危。玉關落日辭金印。錦水春風轉繡旗。歷見本朝歸乘軸。多由全蜀出分麾。少陵漫爲知音喜。行到花溪已恐遲。

聞楊公濟冒寒訪契嵩上人

凍雲朝濕萬峯寒。鑿齒辛勤訪道安。世外更無吳水石。林中還有晉衣冠。襟期飄灑隨煙靄。詩句縱橫出肺肝。見說松門長不鎖。夜涼猶過別山看。

楊公濟歲暮惠酒

紺餅白酒下吟堂。洗盞傾蓋肯漫嘗。寒屋自融春日面。煖盃能轉少年腸。山妻相對驚愁破。稚子無端笑飲狂。百歲光陰空自遠。醉時苦短醒時長。

經春久雨未嘗尋芳。舟次黎驛始見桃李花。紅白成陣。愛而有題。

春風不散三冬雪，暖日猶明五月霞。病限漫開常見雨，客顏新破始逢花。故園何在情還劇，舊驛空存使轉賒。白白朱朱今頗驗，退之詩句亦天葩。

曉出

一聲殘角繞千門，霜氣涵空亂宿氛。車馬往來無僻地，星河收去有閒雲。予生慘淡身宜佚，人事崎嶇足反勤。漸喜太陽浮海面，羣鴉鳴噪尙紛紛。

依韻和酬楊公濟澄江見寄長句

子美幕中瞻暇日，喜傳幽事到京華。地偏浙水開孤壘，風散江雲覆萬家。日出魚蝦來早市，潮空鳧雁落晴沙。羨君吏隱能終歲，却恨吾遊未有涯。

九日至嘉禾

赴泗州理
掾途中作

登高時節異鄉中，回首家山隔亂峯。白酒莫辭今日醉，黃花不似故園逢。苦嗟節物經秋老，贏得情懷爲別濃。却愛紫微詩意好，笑歌開口強爲容。杜牧有塵世難逢開口笑之句

知郡都官示答盱眙周令詩有感而作

臨淮郡事素稱繁，太守才明此典藩。每歲欲甄羣吏狀，是人思出大賢門。孤生自恨方趨走，末跡無緣被薦論。異日願公持大柄，畢身猶足望洪恩。

送前水監王仲賢郎中赴闕

素節清名照水臺。夷塗行騁忽徘徊。驚人險句何妨露。向闕丹心未可灰。馬勒春風朝弁集。雞呼曉日禁門開。從來早賜清閒對。不信君王肯棄才。

病起偶書

病眠官舍趣方高。強起區區視冗曹。當世織機漫蝸角。除身萬事盡鴻毛。田園歸去古稱達。軒冕儻來人自勞。汨沒青衫踰壯歲。窮通一任大鈞陶。

感懷寄楊公濟

身世飄飄水上萍。時情暗淡草邊螢。百年日月空憂喜。一笑乾坤任醉醒。此外浮沈俱委命。相逢汝我卽忘形。尋山各有襄陽馬。莫遣題詩筆暫停。

冬盡日睢陽成事

天邊秋緒細如毛。眼底詩情付濁醪。張許忠魂空日月。河陽巡遠。鄒枚樂事委蓬蒿。積成鄉思心頻折。送盡年華首重搔。杜子南賓猶此日。主人恩意覺徒勞。

依韻和尹嗣復仲春會食船場

野色寬圍四繚牆。一穿林徑百憂忘。濃花細草青春半。語燕遊蜂白日長。寄興不知詩筆倦。惜時猶喜酒杯香。席間數點殘英墜。萬片隨風此濫觴。

次韻酬禮之見貽

屢歷天王設羅網。君時遺俊我登科。當時未識名猶熟。此日相逢分固多。摩戛青雲知志在。驚嗟素業恍時過。朱顏皓齒儉歡處。暫置功名任酒醅。

再次韻禮之見貽之什

傳家素業志雄軻。烏足區區羨決科。以道自尊今古少。不才而第葦麻多。聖門奧闢期君至。賓館清談許我過。文酒有時留劇飲。長教阿買到醕醅。予不善飲。

次韻禮之淮上吟

泗上風宜舊罕傳。邦人誰說貢鱗鮮。隔淮小市若古畫。接楚遠山疑宿烟。民舍卑窪多困水。農疇磽瘠少逢年。願予居里號繁勝。舉目只爲鄉思牽。

董役河上風霾繼日

春遲地冷日蕭騷。野曠林疎風怒號。舂鍤一聲赴蟻垤。旗幡四面落鴻毛。黃埃成穗坐遺積。綠髮欲絲歌漫勞。暫閉柴荆如避寇。江湖歸思入魚舠。

排岸判官以荷花爲祝書五十六字以謝

江國芙蓉夏最繁。臨隄每見尙盤桓。清淮況是稀疎有。紅萼爭教取次看。曉艷不隨生意絕。孤根寧減舊時安。主人知我江鄉客。弗忍池邊獨自觀。

九日上兵部

重陽無酒上高臺。冷對西風笑幾回。雖信佳辰從古重。不知今日爲誰來。忽聞天外清歌發。云是淮邊曲。宴開自歎弗如籬。下菊此時翻得伴吟杯。

謝徐屯田惠海味

儒腸多病怯肥羶。海產從來獨所便。淮甸風宜乖素嗜。江鄉水品憶經年。分甘已佩公情重。加飯寧須俗。臠度。箸不停。資大嚼。免教饑吻鎮流涎。

常尉攜酒饌就部役所見勞

酒蟻清香綠盞飛。河魴雪縷玉盤肥。三春花草殊南北。一笑乾坤外是非。膏血生民勞版築。筋骸薄宦走。都畿。陶潛此日方蕭瑟。那管籬邊遇白衣。

詠鴈

乾坤搖落滿風霜。候鴈來時道路長。玉塞哀音驚遠戍。滄洲寒影伴殘陽。燈前客鬢愁雙白。天外鄉書斷。一行。莫倚善飛江漢闊。暗中矰繳絕須防。

立春後連雨

春風自動故園枝。未見終朝不雨時。遮莫年光浮水嫩。定應春色上花遲。山川慘淡隨人意。車馬艱難誤。客期。萬瓦烟青猶足慰。始知井屋有晨炊。

春日感懷

壯年不覺登三紀。正月如今過一旬。人壽短長難定準。春期九十更逡巡。縱當簿領無餘暇。自合眉頭且強伸。况值山城公事簡。不謀笑飲是癡人。

獻知府張少卿

當年直氣吐虹霓。因使平津位晚躋。大筆驅馳爭化匠。纖機擺落得天倪。名隨婺女雙溪遠。詩壓休文入詠低。官是諸卿郡山水。志完寧獨在公圭。

邑齋偶書

作邑窮山奈拙何。簿書期會損天和。卻緣衆醉獨醒甚。翻覺同舟敵國多。豈願有人張巧舌。第憂無術拯頽波。偏親垂老妻孥小。獨媿淵明歸去歌。

寄題甘露寺文岳上人環翠閣

鐵甕城邊古道場。近來人說贊公房。江盤北固山形轉。雲抱南朝樹色蒼。世外青鴛誰結構。坐間紫鶴自迴翔。十年滯客空吟想。未識諸天在上方。

送呂貫中

陋邑相逢樂且敖。一枰纔了又丹醪。酒因校戶知君大。棊爲論饒覺我高。忽對溪山揮別袂。却憂棊酒寡同袍。勉哉各努當年力。無使功名見二毛。

寒食值雨

山城寒食已冷落，更值暴雨過園林。餘花似對晚春泣，好鳥時傍殘枝吟。況逢節物宜笑飲，莫待老大惜光陰。明朝雖晴未可出，溪水溢路浮泥深。

郡判鄭世表庫部奉使陝西

心馳關右氣軒軒，笑著征袍謝別樽。面對延和知遠器，力城東洛是名門。邊需前去勞多算，疆事歸來聽一言。洮隴居人瞻漢使，此行知不爲河源。

久雨不果行樂，偶書短篇自戲。

年來窮出少見日，十日陰雨一日晴。春色于人既無分，酒徒與我宜遠盟。林花及時亦自蕊，山鳥應節猶知鳴。況復吾生異花鳥，何爲對景如忘情。

粹中先輩以甘雨時降，兆爲豐歲，過形雅什，猥推涼德，輒次元韻，以答來貺。

字人無狀序宜愆，何意天心獨不然。甘澍未嘗差十日，豐儲應使足三年。井廬但覺塗歌溢，水旱寧憂牒訟煎。自是化工蘇百穀，誤褒多謝邑中賢。

元卿舟次丹陽，讀予與諸君前年送別聯句，因作以道南還愆期之意，遠垂寄示，輒依元韻和答。

歸舟南過練塘時，重閱前年送別詩。人世闔棺方始定，客程流梗固難期。君還里閭尋三雅，諸君尙在東自我尙出城守一枝。今予蜀處浦陽涵碧春來應倍好，何緣吟對舉清卮。

以詩還府推楊學士無爲編辱佳篇見答，謹次元韻和酬。

貪諷高吟日幾回。辭珍轉覺意逾瑰。子雲天祿慙餘地。工部花溪揜舊才。渴肺喜因秋水療。病眸驚對交光開。今朝那獨誇榮貺。更貯私囊耀後來。

秋日詠樓感懷二首

公踰四十歲方強。未怕秋風作鬢霜。人物此時仍富樂。襟懷無事可悲涼。嚴塗行取青氈物。末路寧同白首郎。滿目溪山宜曠望。醉提北斗挹霞漿。搖落秋旻一望長。浮空靄氣白如霜。樓頭待月郡城晚。水底有天江國涼。却恨人生如寄客。未容年少卽衰郎。除非爛醉酬清景。莫惜千金抄斗漿。

和人食橘

洞庭一夜落清霜。枝上新苞葉底黃。摘去金沙搏作顆。剖來玉露結成囊。嶺頭梅小酸無味。渭北梨纔冷欠香。合薦甘馨調鼎實。未宜登俎奉君嘗。

戲贈孫師尹

是非不到酒樽邊。樽散誰呼小謫仙。天上浮查空有路。人間種秫獨無田。花明綠野吟毫秃。月近青樓飲帽偏。姓字未勞金簡記。聖經方倚大儒傳。

程員夜見過

風雨衡門此夜開。羊曇喜報謝安來。病眸強對題詩燭。感淚頻添話舊盃。江上索居空歲月。渭陽故事未

塵埃不眠且聽寒更坐。日夕相過復幾回。

苦寒

南雪今年幾尺高。林飛壙走亦嗷嗷。閨閣易冷無烟火。巢穴雖空有羽毛。對客嬾能傾凍酒。令人自媿著溫袍。何當萬丈縫狐貉。寬作良裘覆汝曹。

謝知郡郎中惠酒

祿鍾不滿俸錢慳。伏臘纔周聚族艱。僅足晨羞供色養。未能日飲樂慈顏。醇醲獲奉偏親壽。珍重緣從太守頒。詩雅百壺跨寵贈。豈如公惠敵邱山。

梅

牆邊幾樹玉參差。照眼幽花冷自宜。香陣晚交風破蕊。粉花朝濕雪融枝。故人消息從誰寄。造物生成似我遲。且慰蹉跎盡詩興。江樓閒笛不須吹。

寄劉道秘書

夫子文章老更工。六經俱達一身窮。爲逃州縣時情薄。不問田園歲計空。別酒正思傾夜雪。書郵忽喜寄春風。遙知父子傳家樂。却笑當年論異同。子舍賢其尤得家學。

春盡

江花飄去不留春。海燕飛來獨語人。局促年光花過眼。飄飄生理燕謀身。壯懷已入雙蓬鬢。樂事還成一

窳塵。唯有濁醪存妙趣。不容憂喜擾吾真。

涵碧閣東陽山水佳處。予聞且久。獨未能往。近得進士與邑官唱和詩。讀之景物依然。如暫經目。因次元韻。附諸篇之末云。

山水相和碧色鮮。中間飛閣插雲端。水聲噴薄如孤瀉。山勢巉巖復對盤。唵恐昔人精魄笑。劉禹錫方到疑盛夏骨毛寒。流觴已往雙魚在。懷古探奇兩事干。

依韻答元卿

手把周詩媿暗投。爲論昔會覺難酬。巨盃旣醉行無算。大句相磨敵固求。別後溪山應故態。近來寤寐憶前遊。致身不早真吾恥。猶喜清驢尙黑頭。

某蒙太守盧公惠酒。因作詩以謝。公子仇香遠賜光和。復次韻叙事酬答。

予懷天地惠何慳。賴有仁侯念拙艱。塵土未嘗輕俗狀。風霜多爲霽巖顏。兵廚美釀纔嘉貺。子舍清唵繼寵頒。詩酒而今諧素嗜。更兼春雪滿羣山。

張君枉道顧予。因書短篇以答來貺。

煌煌肉食有高冠。附者如馳順坂丸。吾子與時誠異嚮。窮山爲我肯相看。更煩溢幅投瓊球。自媿無門借羽翰。努力壯年求祿仕。而今行路倍云難。

某前日以鄙詩敍謝。通判國博特垂寵和。謹復依韻上答。

夫子文章却異端。橫流遏盡見平湍。間於風雅能臻極。粹甚圭璋不假刊。累句輒嘗論盛美。賜篇還與作榮觀。起予自媿無商學。何敢言詩向杏壇。

送同年周濤赴吉幕

廬陵風物素稱繁。幕府雄誇列郡間。從事行才詩筆健。平時無警檄書閒。清唸良足償風月。山宴應頻醉鬢鬟。行矣功名及年少。未宜留意屬江山。

和通判國博和金華著作陪知府少卿遊北山韻

盛府年來訟館空。等閒深入亂雲中。驚禽引避前驅旆。寶剎幽尋數畝宮。飛蓋塞塗溪影雜。行歌聒地谷聲通。東陽屈指風流尹。前有休文後有公。

早秋喜雨

風吹旱葉作秋聲。涼氣微從兩脚生。赤地黃埃歸一洗。寸心遠目覺雙清。乾坤應救街前喝。黎庶如逃釜內烹。我喜南窗無俗物。葛衣飄灑體還輕。

東陽九日寄浦江同寮

重陽獨步上層巖。目斷吾疆尙載瞻。人世只能愁杜牧。菊花豈解憶陶潛。唸無舊友辭多感。飲爲佳辰量倍添。旅宦七迴逢此節。旋銷壯歲似磨鎌。

次韻國博九日

秋光未老已風酸。還似春來料峭寒。酒瑤莫辭今日醉。人心況是在時權。佳辰從古逾金重。遠岫登高見黛攢。且學牧之開口笑。休因菊粲淚闌干。白傳有眼看菊。案重陽淚之句。

東陽吳氏昆仲並薦詣闕

予昔嘗推二子能。試籍每出輒嗟驚。文章即日開鵬運。兄弟同時醉鹿鳴。樂善自憐心不負。知人獨喜眼偏明。來春早附登科錄。甲乙應聯舊姓名。

題公節醉鄉亭

莫向醉鄉尋畔域。古今容盡太平人。沈酣天地來同處。脫略衣冠去卜鄰。一境斷無車下土。四時惟有甕頭春。虛亭未敢從君飲。猶欠陶公漉酒巾。

冬末郡學感懷和韻

我向榮塗倒足行。折腰尚可代深耕。嗟君二紀差高第。猶爾三冬伴後生。壯志幾多成墜鶴。明年四十趁啼鶯。金章袞袞從韋布。窮達何時不遞更。

祠部集卷七

七言律詩

依韻和令綽兄弟春日出郊

春色纔從野外知。柳陰花氣煖霏霏。出林啼鳥逢人住。掠路游蜂傍馬飛。薄宦塵埃空自晒。長吟風物阻相依。弟酬兄唱饒才思。珠玉同攜滿袖歸。

依韻和張叔毅讀柳先生文

先生蕭瑟半塗休。一跌青雲不再收。名歷班行來衆毀。筆鏗造化起天讎。王章黨破誰爲地。柳播風殊願易州。廟食羅池今尙否。滿編遺韻掩鳴球。

呈陸革進士

魚沫遇窮能一煦。鶯聲得意亦相求。近來無復友朋義。獨善頗爲魚鳥羞。今日指心論皎皎。明朝掉臂逐悠悠。世間唯我交夫子。憂喜同懷二十秋。

遊華藏寺

我今作邑水雲鄉。一到猶疑換俗腸。況在塵區正紛汨。乍來法界得清涼。松筠鎖霧姿逾秀。樓閣摩霄勢欲翔。更卽高僧叩空理。功名富貴盡毫芒。

書吳江垂虹亭

千尺危橋跨浪雄。壓橋虛閣勢凌空。直疑有路通銀漢。又訝橫天臥玉虹。盡挹江山歸醉目。獨開懷抱向清風。却嗟景出天隨後。不得當年一詠工。

登陸氏書樓

塵上長愁舉眼低。轉身今喜近晴霓。天邊牛斗開吳墅。鳥外山川走越溪。擬解醉冠從此宿。恨無健筆爲君題。牙籤繞架藏書滿。知與青雲別作梯。

依韻和答陸革進士招飲池上詩

主人愛客掃林亭。天影波光相與明。蝶傍池邊飛舞慣。鳥從花上往來輕。滄浪傲世不復羨。鷓鴣妬春惟欲鳴。能趁繁枝開熟釀。先拚黃帽爲君傾。

送張叔毅北歸

公子姓張。天上有少年。如誼洛陽無。滿編秀氣同歸楚。後夜文星不照吳。雲密蛟龍開未試。霜寒鴻雁急相呼。賢昆學士有詩還促知君嬾愛平湖綠。白日聲名會早圖。

送范君武

謫仙放蕩來江東。醉吟三見江花紅。吳兒聚觀玉勒駿。越女一笑金錢空。筆端靈文落彩鳳。席上古氣舒長虹。飄然又趁白雲北。別語有盡情無窮。

依韻和鄭中立祕丞將替寫懷

幸邑優游不足爲。傳家事業復能持。政兼子產那專惠。學近康成最愛詩。百里耕桑增日課。三年閭井見風移。襟懷洒落恬榮進。清節從來畏衆知。

和知府王給事官舍北軒新竹

子猷雅愛此君深。清白傳家直至今。有似致身憐勁節。更應待物並虛心。閒來點筆書新粉。醉後移牀傍細陰。分到渭川青玉種。嚴公宅裏許同吟。杜甫有嚴公宅同詠竹詩

得叔毅書

故人消息苦難真。終日吳天望楚雲。黃鶴不知何處舉。新鶯應似此中聞。舊來飲量還能幾。別後詩才轉不羣。忽遣長髯馳短札。數行千里贈殷勤。

別林仁祖御史

論交鄉里各兒童。三紀相看兩鬢蓬。孤宦無資元附驥。故人得意近乘驄。秦儀面激殊今日。管鮑心知有古風。歸興嚴程何太急。片時車馬復西東。

晚鶯獻都官

自恨飛遷出谷遲。東君不是故相遺。園林縱許容羈迹。蜂蝶還應笑後時。休恃綿蠻能巧囀。還須冷落守空枝。春風著力年年在。未必羽翰今便衰。

附都官見答

每到年年二月時。選喬常向最高枝。春教綠綺調喉舌。天賜黃金作羽儀。無限園林皆占遍。幾多蜂蝶競相隨。除棲禁苑宮花外。更得飛鳴近鳳池。

再和都官見答

離幽便欲趁芳時。越分非能守一枝。多語羞隨禽反舌。逢辰強學鳳來儀。故林有約依前去。落絮無蹤逐處隨。若得東風聊借力。免教燕燕競差池。

附湯七秀才見和前作

占此青春未是遲。天工造化豈能遺。既教喉舌清能嘯。何事飛翔始得時。庭檻暫須隨乳燕。禁林終穩擇高枝。回看尙未遷喬者。羽翮摧殘更嘆衰。

湯七秀才見和再和

清吭臨風嘯較遲。春光相背去如遺。名園已失堪棲處。幽谷何如未出時。早恨狂蜂偷好景。更和微雨宿殘枝。齋庭健翼飛雖晚。一舉青雲笑我衰。

送施野夫赴舉

胸中六籍收高韻。手撫辭章應禮闈。不飲故人相別酒。恐沾壽母自縫衣。吳河擊棹開深凍。汴日迎鞭弄短暉。四十明年方得仕。平生未與古人違。

秋試甫期。輒成短篇。呈馬公節。裴進士光世。

妙譽相高聳一鄉。士林注目看軒翔。玉蹄駿欲騰先路。世光金距雄思擅舊場。公只待秋闈排甲乙。穩攜曉硯寫文章。如今老將雖無勇。憶拔螽弧尙激昂。

依韻和李持正晚晴出謁王子高馬上口占之作

謫仙醉跨玉鯨鱗。夷甫名談喜更聞。照眼暖花開野日。入懷晴氣散江雲。塵埃洗去人家好。空闊飛來鳥翼勤。莫望帝鄉頻感慨。世間隨處有珍羣。

次韻公勝曉起對雪

向曉寒威覺倍濃。雪霏紛糝冷兼風。亂裝瓊樹千林密。疑瀉銀河一夜空。鷗鷺失羣吟景內。乾坤同色醉眸中。青山瘦馬凌朝出。翻羨袁安得臥窮。

次韻公勝早梅

昨夜寒梅忽一枝。早如常歲合開時。欲冬天地恩先及。未雪園林色易知。世眼已教容易賞。曉風何用再三吹。若論霜菊無多晚。只此春葩苦較遲。

予官將滿。婢子始植小柏于堂下。因感而書。

孤根初掘出巖隈。赤脚殷勤手自栽。翠葉未成官秩滿。清陰別待主人來。塔墀好養今朝操。梁棟須歸異日材。猶勝天桃情意薄。劉郎去後始花開。

暮春偶書呈才甫慎微

解去銅章尙目餘。一春文酒會全疎。無機自好親鷗鳥。雖弱仍甘下鱖魚。樂事易空如委蛻。流年難挽甚奔車。酒徒文友心期在。任有臧倉毀子與。

予解邑過杭遇介之學士謁告南歸

同時兩郡冠鄉書。屈指俄經一紀餘。願我冗塗移蹇足。羨君榮路駕奔車。方從解紱辭巖邑。已見飛章厭石渠。自古蓋棺人事定。未應今日較龍豬。

依韻和楊尉郊外懷鄉

策馬長郊羨子真。獨贏風物與詩論。驚飛鴈鷺投前澗。歸去牛羊識舊村。暴漲溪聲聞遠近。久陰山氣亂朝昏。異鄉我亦嗟遊宦。莫說啼鶻有怨魂。楊詩有回望鄉關在何處更聞杜宇轉凝魂之句

鄭君天常有詩貽楊尉因次韻以贈

屢覲名場歲已高。此行誰贈一綈袍。久從客踏嗟重趼。獨對秋風感二毛。遊倦幾漫許都刺。憤深將廣楚人騷。而今薦口難開吻。第愛窮途節可褒。

彭及之邀吳仲源楊公濟與某夜會望湖樓獨某後期爲關所隔偶成四篇以呈諸君

月底雲樓一水湄。天光湖色兩瑤璃。樽前更坐清風客。筆下爭翻白雪詞。物外骨毛應自爽。世間笑語不容追。千年庾亮胡牀後。此興今人亦未衰。

諸公愛月欲狂顛。脚踏花欄手擘牋。那作常時揮綵筆。直須飛句上清天。豈無劇笑驚山叟。應有妍詞調水仙。獨我清宵塵滓甚。亂蚊聲裏汗膚眠。波射飛樓縹緲間。雲梯豈合在塵寰。金樽倒盡星垂地。玉滴書乾月過山。檻底吳僧空仰望。座中蜀客懶西還。我遭魚鱗無情甚。只許吟魂夜度關。故國英雄已寂寥。飛樓氣象自飄颻。天邊鳥翼愁簷額。雨後虹光轉檻腰。直恐笑歌驚白日。却憐身世近青霄。雲梯縱險容人上。始信明河亦有橋。

再寄元真宮讀書

讀書曾寄此軒頭。官路歸來十二秋。文酒故人無一在。蓬蒿荒徑有餘愁。差池歲月辜金印。憔悴乾坤復布裘。卻掃塵埃張舊榻。雲中雞犬笑淹留。

二月二日作

江上初逢社燕歸。青春二月色猶微。茸茸屐底草烟合。冉冉樽邊花霧飛。踴蹙榮圖雙鬢改。蒼茫樂事寸心違。紫絲結鞵誰家子。馬躍東風試薄衣。

將渡揚子風雨忽作

南徐景物古愁人。薄宦扁舟更水濱。不識濁醪傾北固。獨隨寒雨出西津。連天風浪聲兼厲。當路鼉鼉氣亦振。吾道屈伸非一日。世情未要責江神。

登梵天上方

廊腰偃月勢環遭。秋寓澄明照一毫。樓檻轉身侵白日。海山隨眼沒驚濤。泉枯碧甃鰓形遁。屋跨蒼崖鳥翼勞。屈指舊遊今二紀。新愁爛漫入風騷。寺有靈級井遺甃在焉

舟過三郡率值風雨呈同行沈氏昆仲

冥冥細雨濕高秋。花底歌前也合愁。烟樹幾株疎兩岸。風帆一夢過三州。生涯未解謀根固。官路那能免葉浮。却羨鄰船樽有酒。不妨弟勸與兄酬。

依韻和公濟寄仲靈禪老

藤州大士兩眉厖。萬卷叢身寄一窗。詩力健能支倒岳。詞源湧可截奔江。高名聳動朝中士。舊隱荒蕪嶺外邦。想像孤風獨未見。何時能使片心降。

贈承天月長老

幾年中屢四方遊。倦足還逢勝地留。電迅禪機超達磨。雲閒詩意等湯休。絕塵貌與烟霞古。疊石心存岱華秋。此軒累石爲山今我取師觀所嚮。豈嫌儒墨不同流。

承天元長老乘本寺寄淨慈以詩戲之

城裏叢林一唾捐。收身微笑寄湖邊。此生直欲看山老。不住真爲出世賢。野屐懶穿雙露脚。雲裘嫌重右披肩。人間萬事都無著。獨與風騷有愛緣。

詩贈寶應禪老溢公

或來文室問師禪。師解臨機示意筌。雲在虛空寧有礙。月當陰晦亦長圓。更無餘事牽塵想。猶有能醫結世緣。瓶錫憧憧參祖學。幾人垂老得林泉。師被府令駐錫此山

前日奉和仲靈禪老春雨詩。復辱見答。走筆依元韻酬之。

千年支許事如新。欲作前遊漫歷旬。雨帶黑雲障俗客。猿呼飛鳥伴幽人。從容劇論知何日。感激佳篇慰此辰。四海聲光非繫齒。道安名重若爲親。

觀嘉祐南宮奏名

主司撥馬選龍媒。二百珍羣奏籍開。皎皎公衡垂日月。儀儀士類望風雷。誠知至鑑無遺照。那免良工有滯才。鄉國幾人同應詔。只將春色與關裴。

寄題殊公禪老黃雲閣二首

大士當年密行成。山居黃色有雲生。黃雲已共斯人去。飛閣猶爲此地名。欲到塵埃先擺落。縱觀氣象亦崢嶸。誰云瑞應難追復。禪老而今祖意明。人悅禪翁巧結廬。更營飛閣取幽虛。溪山雨後翠欲活。櫺檻風來清有餘。龍象幾年成佛界。猿猱深夜雜僧居。還如夢得聞涵碧。誰寫丹青復寄予。

經故明靜師支離堂

支公昔講支離學。堂上無容坐客庇。往日衣冠今尙否。經春几席自蕭然。談間精義門人記。身後清風嗣子傳。一紀宦遊尋舊社。空將感涕灑塵編。

戲呈宋周士

臘去垂垂凍欲消。春光未動思先饒。最宜才客臨歌席。更看佳人轉舞腰。一笑勞生應有定。三冬薄宦獨無聊。蘭臺侍從風流裔。合爲行雲賦此朝。

洪君然太博以元日刺字交馳卒不一見作詩相遺依韻和答

知君元日趁鷓行。雙觀雲邊聳百常。拜表歸來乘逸興。跨鞍相就攬吟腸。還同皇甫尋僧繡。却笑山公顧葛強。我亦及門空刺字。不容高論聽琅琅。

暮春感懷

雨聲日夜催春老。不願愁人鬢欲華。堂上自來相熟燕。樹間猶有未飛花。詩篇閒裏曾無數。酒盞生前亦有涯。傳語東風且從款。蒼顏更畏數年加。

賞春

到老能逢幾席春。直須飲量強增分。予素少飲吟情無際共芳草。遊思難收如亂雲。還見春風與桃笑。却教人意嘆芝焚。予近喪偶妖紅爛白方爭賞。疎竹休誇號此君。

昨日以鄙詩示王君。遽辱贈篇。過有推飾。輒依元韻奉答。

未有功名與世傳，且驅懷抱向詩篇。昔曾篆刻工童伎，今敢風騷領將權。媿匪窮經臻聖處，妄推聞道在君先。還知苦意微吟否，不已猶云博奕賢。

答章傳道二首

旋刻辭章就禮闈，禁園花在遂空歸。客愁春雪杯間釋，詩句青雲紙上飛。從祖近持丞相印，舊交半著侍臣衣。揚雄未老猶堪薦，忍聽滄洲買釣磯。

夫子詞源湧大江，相逢早覺片心降。日哦李白詩千首，累日復夜獲虞卿璧一雙。昨日驛屢發彩牋移曲几，不知紅燭短幽窗。吟高莫信須窮滯，亦有從來擁節幢。

送呂監簿歸淮南侍下

花邊把酒趁晴暉，春去花空興盡歸。白髮親庭寬北望，青簾客舫喜南飛。京埃袞袞休回首，淮月娟娟好振衣。年少身名當自立，不須裘馬事輕肥。

贈蘇宣甫

謫宦多因衆口讒，猶君戰飭困羈銜。鷹擎羣雀翻遭網，舟駕長風忽斷帆。曾擁貔貅交白刃，肯同兒女泣青衫。有才恐失朝廷意，不日房陵被詔函。

某嘗約才甫遊雙溪，以連雨多事因循未果，辱詩督行，謹依韻和。

共君曾約訪烟霞，欲趁芳時物物嘉。宿諾古人嘗有誠，春遊今我果成賒。眼看日下無窮事，腸斷風前已

落花。天氣清明當趣駕。此詩先寄謫仙家。

送宋國叟赴吉州司理

水光山翠一城浮。碧瓦朱甍萬井稠。平日居人皆富庶。少年新掾更風流。傳家妙術觀尊府。決獄能聲擅劇州。利刃有餘清興足。不應詩句廢江樓。

依韻和正老自嘆之什二首

妙年爲學恥迂疎。直欲聲光擅八區。已是宦情嗟澹泊。可堪世態較錙銖。不調台鼎行吾道。便翼天兵戮汝孥。出入功名當若此。自餘瑣細盡非夫。

我無尺地可耕鋤。君有高田占具區。正老吳門有上腴數頃若論生涯有厚薄。獨於宦意等分銖。壯年未建鴻毛利。寸祿聊甘稚齒孥。不學庸庸自持者。高官空食上農夫。

贈辟疆

人譏徐子迹飄零。我愛文章輔六經。大筆疑爭造化力。幽吟難遁鬼神形。良金縱毀剛無耗。寶劍雖埋氣自靈。進則皇夔退荀孟。莫容得喪擾中扃。

依韻奉和王平甫學士寄元內翰詩

蓬萊仙闕地深沈。視草讎書此盍簪。禁漏傳聲來閣外。宮雲曳影過廊陰。能詩摩詰淹儒館。未相微之在翰林。馬躍秋風出閭闔。片時相失遂成吟。

送紫微沈舍人守越州

翁子懷章未足多。會稽歸日已蹉跎。舍人緣髮垂金印。院吏朱衫導玉珂。去國忠心傾斗極。過鄉喜氣壓江波。君王許便雙親養。奈渴黃麻紫詔何。

依韻和酬閬州劉侍禁季孫見寄

別來雙鬢一衰翁。近喜劉郎信息通。劍氣未閒頻犯斗。賦聲無用尙塵空。君頃以能賦稱太學而竟屈於不得科試傳聞蜀道踰天上。見說城南冠閬中。杜子美有閬中勝事可腸斷閬中城南天下稀之句山水縱遊那覺久。清霜兩度變丹楓。

人日立春輦下作

樓上滿傾人日酒。更逢春氣到京華。盤擎白玉來生菜。勝插黃金出鏤花。客興紛紜那可數。年光流轉亦無涯。天邊梅柳應相笑。兩度東風不在家。

依韻和鎮叔送元宵之什

一夜雲衢火樹空。照人唯有月華同。却思廣陌追遊處。都似南柯夢寐中。未分園林辜樂事。況栽桃杏有春工。可憐此景何時再。直待明年歲起東。

席上呈正老

去年贈別折寒梅。盡道行人不再來。今日樽前成邂逅。大家花下且徘徊。經春雨脚無時斷。浮世眉頭幾度開。莫待明朝離闕後。空將餘恨寄吟杯。

送鎮叔

三月將交雨細時。餘花撲撲柳飛飛。已於樹底聞鶯恨。更向花前送客歸。暗綠幾行迎去馬。亂紅無數落征衣。傷春惜別鍾吾輩。此際寧容瘦骨肥。

次韻答正老

幽懽閒憶去年時。飲量人人灌漏卮。我更典衣邀淺飲。君猶刻燭賦新詩。由來世事都無定。再結朋遊未可期。一紙清風惠佳句。慇懃勝寄隴頭枝。

依韻和正老暮秋郊行感事

秋郊物物作秋容。目送橫天一鷓雄。更遠更疑山隔霧。或飄或聚葉隨風。對時唯恐朱顏改。遣興除非白酒充。感事子真成麗唱。恨無佳句敵才翁。

再和

有客秋郊曠望中。更憑佳句發才雄。牛羊飽食眠平野。鷓鴣乘時擊迅風。倦目幾隨殘照斷。渴腸惟藉濁醪充。登臨不用頻興感。憂喜能忘是塞翁。

再和

我行平野覽秋空。物象吟懷覺兩雄。遠水有時明返照。疎林無限戰西風。京坻相望農收足。廬井多懽歲計充。亦向此時追樂事。歸來倒載效山翁。

依韻和答公諤郎中冠氏適中偶成

滂滂黃埃接大河。驅車底處覓陽和。參差花信春將半。惱亂詩情日轉多。樂事恍如初覺夢。年光撇若迅流波。馬蹄莫放歸時緩。知有佳人聽玉珂。

依韻走筆和答徐無畏見招

憶初識面越庠時。餘教嘗蒙覺後知。早念兒童能刻賦。晚逢夫子許言詩。從容江介心方壯。蹭蹬京華鬢已衰。道舊不須親握手。滿篇往事略無遺。

馬上口占呈記注李才元學士

一時聞望絕朝裾。幾歲文章動直廬。鳳尾新批天子詔。螭頭看載史臣書。故關卽路嚴霜後。曉殿初班瑞雪初。蜀道歸時須六印。不應駟馬擅相如。

送曾元恕太祝赴漢陽監征

漢江山色秀蒼烟。山擁江光入馬鞭。行思欲飄飛鳥外。別顏空慘落花前。勉旃關賦那終歲。好在家聲幸壯年。鸚鵡故洲應寂寞。得無新句發晴川。

次韻通判張靜之郎中席上對客

一飲真須盡百杯。異鄉懷抱酒邊開。田園幾日能歸去。軒冕浮雲亦儻來。交態與誰論淡水。宦情空自學寒灰。何如席上張公子。白雪辭兼郢客來。杜子美贈張翰林有天上張公子之句。

寄秦倅呂四丈職方淵

丈人官意靜如山。五十朱衣鬢未斑。富庶謳歌歸別駕。太平談笑服諸蠻。熊熊一兆高門後。鴻鴈連飛絕
案間。愛弟翰林時帥邊園。莫學馮唐終蹭蹬。功名猶好出秦關。

寄保安軍楊公濟判官

高吟絕塞十年前。醉筆纔停萬紙傳。麟閣主人降健句。雞林官長購精篇。舊遊散落今誰在。新感縱橫日
自憐。肝膽不同軀幹小。幾時獻畫請開邊。

依韻和張君儀職方城上觀雪

重城雉堞粉相圍。亂片情多故點衣。浩蕩關河無表裏。微茫草樹有光輝。冷侵客鬢雙蓬短。急伴年華一
箭飛。卻憶水曹詩句好。羣鴉接翅傍昏歸。

會故人集崔侍郎園池

貳卿園沼壓關西。上相篇章絕景宜。舊日宮牆流水過。至今苑池畫圖知。孤花春去猶臨岸。野蔓晴來欲
占籬。





3
4

1893

祠
部
集
二



成集書叢


編初

者編主
五雲王

行發館書印務商



祠 部 集
(二)



3 0649 7733 7

強 至 撰

詞部集卷八

七言律詩

南都二月二日憶杭州去歲之遊

去歲江頭對此辰，花邊弄筆詠青春。異鄉愁緒還隨客，今日風光不著人。贈證官名侵綠髮，鷓鴣生理託洪鈞。湖隄草軟辜遊屐，空踏平臺陌上塵。

題姚氏三頭牡丹

姚黃容易洛陽觀，吾土姚花洗眼看。一抹臙脂勻作艷，千窠蜀錦合成團。春風應笑香心亂，曉日那傷片影單。好為太平圖絕瑞，卻愁難下彩毫端。


文懿大師院假山

繞郭非無海上山，更收紫翠入禪關。竺峯飛過傳聞後，蓬島移來想像間。草樹細含生意足，雲烟輕帶野情還。主人高臥嵩衡畔，應放幽尋杖履閒。

宋都憶梅

古屋前頭幾樹梅，長年臘後已全開。自經遠別憑誰寄，欲問清香無使來。空與吟懷驚歲月，愁將客眼對塵埃。棗林榆莢粗疎甚，索寞山東把酒杯。

083
1124
2:1894



留別西京僉幕陳子雍著

夷門一別三年夢。洛宅相逢二紀心。人事漸隨詩筆老。交情似共酒杯深。從今日望青雲色。寄遠時傳白雪吟。不獨此間堪下淚。秋風無處好開襟。

題魯司徒廟

司徒精爽儼如昨。舊史風流傳至今。一雨能隨賢宰意。石舍人頃宰中牟。歲旱有禱於廟。不日甘雨霑足。千年不死愛民心。蟲緣壞壁青苔合。鳥噪荒庭古樹陰。桑雉逢人雖遠避。近來僮豎殺機深。

送漕臺感書

郡縣齊瞻使者麾。馬蹄行處是霜威。前驅寧免爲負弩。高謝未能圖拂衣。顧己自知吾道在。折腰甘被俗人譏。古來策足皆貧賤。伊起耕夫呂釣磯。

送竇彥法學士被詔赴闕

綠髮傳家五丹桂。青雲錯路兩朱轡。鳳批天語來嚴詔。馬躍春風候禁門。造膝從容應有問。披心慷慨不無言。君王一見知堪用。未歷財闈定改恩。

剛叔以雅言題拙稿輒依韻和酬

每恨塵勞荒舊學。更慙篆刻得初名。聖賢闡奧期深入。風雅源流庶一清。短技示人方蓄縮。雄篇壓我太崢嶸。君詩合作咸韶祕。何爾輕酬鄭漢聲。

送江卿知徐州

鳧繹州山繡畫開。東方重鎮仗卿才。過家喜氣隨行蓋。入境懽謳接賀杯。玉璫試尋彭祖宅。金羈看戲項王臺。都門送別無新句。盡屬文通自賦來。

送程公關郎中知洪州二首

滕閣欄高紅燐竦。章江水闊碧琉璃。幾年氣象歸談笑。一道藩垣繫指麾。那待韓公來屬部。無勞王勃寫雄辭。使君自有文章手。能與山川作好碑。

君王從此不南憂。善付名郎第一州。笳鼓出嚴千騎從。旌麾坐制九諸侯。城顛觀閣屏間見。江底乾坤鏡裏浮。門下賢豪常滿榻。却應仲舉減風流。

送喬岑

世俗誰誇畫錦歸。鄉人應笑舊儒衣。一言許與經詞伯。三道聲名出禮闈。天府試策。特爲主司所稱。好在青雲須遠步。莫愁黃鶴不高飛。還家便養軒騰志。當使閭閻見面稀。

題錢安道節推環秀亭

巖巖虬簷插斗飛。乾坤秀色四輝輝。晴江對酒平如掌。晚樹開簾細作圍。笑裏城烏啼月過。吟邊巢燕掠花歸。主人風骨爭森爽。無處容塵到客衣。

送公濟還闕下

不候關征滿歲歸。乞成資得請邑人徒爾挽行衣。肯將淚對殘花落。應自心先去鳥飛。官向長安多富貴。君當即日享輕肥。綠槐陰合天街後。恰綴宸班拱帝暉。

送劉伯壽團練致政歸洛陽舊隱

幾年笑傲負纒雲。一日重尋麋鹿羣。歸老漫賢疏太傅。不侯誰念李將軍。霜天劍氣閒中見。月嶺笙歌醉裏聞。回首功名今似夢。逢人嬾說守邊勤。

和唐林夫正字韻

共是江山棄水雲。更同魏北走埃塵。官書斷手何多日。樂事回頭已一春。入夏解衣宜野逸。幾時縱酒到天眞。由來朋字難爲正。莫漫剛顏忤世人。

初秋與趙無愧小飲下關河亭。季秋送客復至其間。偶成短句。

秋早津亭一笑歌。紅妝晚景落清波。重來霜後攀疎柳。更向風前數敗荷。物理盛時能有幾。人生樂處亦無多。不知當日樽前曲。卻傍誰邊斂翠娥。

依韻和王立之中秋陰雲不見月

更長不見水精盤。搔首庭除夜向闌。一氣人間清自轉。孤光雲外好誰看。關河夜色暗朔漠。樓閣吟魂飛廣寒。幕府病眠憔悴客。獨無樂事可相干。

夜會洪方叔

別盃曾破菊花期。今夕相逢菊又衰。宦路經年能會合。人生何處免參差。漸驚老態侵常日。猶喜交情似舊時。一笑形骸俱自失。三更星斗席邊移。

再宿白巖院

寺在疎林積霽間。舉頭無處不蒼山。老松怪石莫知歲。幽鳥孤雲相與閒。袞袞紅塵嗟宦路。時時飛夢繞禪關。上方大士觀空坐。應笑喧闐數往還。

立之臨別。連以佳篇見貺。依韻和酬。

建溪夫子惠新詩。雅道深慙未得知。曲享鷓鴣真過矣。吟成款段復何之。日斜留煮山家茗。烟重愁燃客舍其。我繫一官君四海。可憐出處不同時。

依韻和居方觀崔生畫

古今畫手得名人。一物纔工自出倫。字與丹青俱是絕。勢關飛動不無神。浪傳誤筆成蠅點。那待青山寫鶴真。候鴈枯荷含遠意。江湖歸興劃然新。

次韻知郡郎中應期喜雪

公將民欲達天心。瑞雪如期白晝陰。皓色恍疑霄宇接。濃寒都爲歲華深。辭妍席右人雄贍。興盡溪邊客訪尋。鈴閣唱高宜和寡。不才剛綴郢中吟。

依韻和答晉倅洪君然都官三益見寄

別乘文章晚更奇。全家才業繼前徽。園中蔡琰詩無敵。善魚軒膝下劉歆筆有譏。代合子啓論歷歸意我慙彭澤柳。清腸君愛首陽薇。案頭簿領真流俗。獨喜吟懷與世違。

丙午歲與府中諸君重遊張氏園慨然成詩

醉書曾記並遊人。今日重遊墨尚新。對酒年來驚白髮。惜花時復數青春。四方散落幾交臂。萬事參差一病身。傍水園林自蕭洒。不須出郭遠風塵。

題余公亭

公自披榛上築城。以公題榜壯圖經。名佳應與溪山久。地勝渾疑草木靈。到喜翠樽能滿意。退嫌圭組只勞形。異時邦俗思賢化。還似甘棠愛此亭。

喜晴

雷威無節雨霖頻。倍喜晴陽照火旻。野外芻蕘尋故道。田間簫鼓賽閒神。亂苗豎似痿人起。積蘄披如舊屋新。更待高樓今夜月。一樽且樂有涯身。

中秋對月有感

西風入夜掃微雲。皓魄來無一點塵。樓閣通宵雙玉戶。水天隨處兩冰輪。光搖樽酒清宜客。影落關河思煞人。我向乾坤違樂事。孤蟾照淚滴衣巾。

送劉嗣復都官赴辟秦州幕府四首

安西幕府諷聲華。禮幣迎門促去家。長日壯圖看劍氣。隔宵喜信報燈花。輕裝度隴山來慣。逸轡追塵不待撾。賓主禦戎俱有策。只陪談笑却邊沙。

十萬強弓略未彎。妖氛漸滅賀蘭山。元侯把詔開新府。上客隨書出故關。詩酒不妨行樂外。功名只在立談間。主人待勒燕然石。誰道能銘獨姓班。

幾載關西任醉醒。一朝意緒屬青冥。舌端江海傾談韻。掌內風雲指陣形。烏府中丞知國器。中憲王公知朝鴻樞學士納邊庭。二公遠近觀成效。莫使旄頭尙有星。

入秦乘夏頗相宜。笑拂征鞍盡別卮。鸚鵡隴西迎賦筆。芙蓉幕裏近花期。祖琨清發能長嘯。老杜冥搜有雜詩。杜子美有秦州雜詩君去定應兼二美。軍書暇日戍樓時。

走筆和楊蟠從事庭菊

揚子門無載酒賓。菊開誰共醉天真。簷前寂寞逢吟客。霜後蹉跎伴主人。鈿帶綴花疑細翦。金錢繞屋豈全貧。東家早秀誇桃李。今日空枝不似春。

河北送洪景之進士如荆南

十年肝膽照交情。朔漠相逢意轉傾。蒼鬢飄飄予薄宦。青雲蹭蹬子諸生。更同樽俎知何地。漫與詩篇送子行。南北倦遊那得定。扁舟江水欲之荆。

依韻和答陳公度五邑季點道中見寄之什

幕府清郎安在哉。方冬行縣冒塵埃。寂寥坐客思車樂。點檢詩朋欠鼎來。按吏最誰官簿整。教民幾處戰旗開。此行兼點鄉兵未應輸我論文飲。贏得新詩滿篋回。

北都春日漫書

蓬鬢雙侵京國塵。花枝五別故園春。曉鷲莫漫驚遊宦。夜鶴多應怨主人。日月名遲愁攬鏡。江湖興在憶垂綸。天邊涕淚懷吾弟。卻恨衣冠繫此身。

苦熱

羣鳥無聲抱翠條。乾坤雖廣絕微鷗。魚龍尙懼滄溟沸。草木甘從赤日焦。只與火雲張氣勢。未容霖雨解炎歊。經時未雨猶閒事。莫放晴虹作旱妖。

觀蓮

水仙也曝晚霞衣。萬片鮮紅照綠池。花近酒盃逾酷烈。蓋隨舞袖忽敲垂。且延勝賞觀靈匹。好折清香贈侍姬。苦被濁泥埋沒久。題詩今喜相公知。

韓魏公生日二首

早陪樞筦晚持衡。曾與君王致太平。一代盡宗蕭相畫。四瀛猶服晉公名。乾坤爽氣初秋動。社稷元勳翌日生。今歲故鄉諸父老。壽樽應喜得親傾。

功名富貴舊元台。誕日新歸故里來。綺席重張孫相閣。錦衣三照鄴王臺。相望全魏榮封國。不盡清漳伴

壽杯最是銜恩門下客。秀眉前祝落鄒枚。

榮歸堂二首

堂就新紆上相車。名尊爲出紫泥書。公以詔語名堂清杯燕喜三春半。黃閣歸來一紀餘。香徑生輝榮草木。畫簷

垂蔭樂禽魚。官輕可笑江東老也。漫懷章詫里閭。

嫩柳濃花圍舊圃。朱甍碧瓦照春池。黃金腰下還鄉印。翠琰胸中報國詩。乘駟長卿羞志淺。懷章公子恨名遲。知公觸事須尊主。揭榜新堂是訓辭。

依韻和酬留別

魏國山河氣自雄。殊方客子一身窮。靈文獨富肝脾內。秀句連成咳唾中。細數舊遊如俯仰。俄驚新別又西東。郡侯早晚論高行。嬾就秋闈望至公。

九日二首

去歲重陽踏路塵。異鄉今日恨還新。如何佳節長爲客。卻恐黃花解笑人。強飲破愁爲樂酒。自憐多病足情身。龍山舊事知難問。千載相期屬此辰。漸老襟懷已足悲。登高節物可無詩。秋聲颯爽侵蓬鬢。晚意蕭條伴菊枝。故里江山尋好處。重陽樽酒負當時。天邊鴻鴈隨南望。憶弟雙眸淚欲垂。

馬上見華山

身寄秦川紫翠間。舉頭行坐對南山。忽來烟際逢仙掌。更覺天邊慰客顏。霖雨不知何日作。片雲猶向此時閒。三峯信美那能戀。自有家林未得還。

西距渭南二十里。有佛祠曰梁田。其主僧守遂者。引予登閣。久之欲題名屋壁。守遂遽阻曰。有榜諭。恐得罪于邑大夫。願勿題。又閣有韓玉汝赴洋州日留題詩板。而書字猶新。詢于守遂曰。前日韓將漕本道亦邑宰。令寫之詩也。因感世態而作。

洋州太守駐雙輪。佳句曾留渭水春。一紀却提關右節。二篇纔出屋間塵。濡毫忽聽山僧語。題柱須防縣令嗔。只道衣冠專世態。炎涼也屬不毛人。

五路嶺

一徑高盤十里餘。人心馬足厭崎嶇。只憑頑石專爲險。不識青雲自有衢。地氣難通樹多瘦。陽暉應近草先枯。我行方欲奮遐跡。願爾安能礙坦途。

和梁潤之晚登繡嶺

翠華絳節去忘還。輦路宮牆壞舊山。青史空文興廢後。玉真餘恨有無間。杖藜一笑綠危徑。弄筆高吟望故關。足力怪君強健甚。慣行棧道不爲艱。

依韻酬獻陳州王密學見寄二首

觸熱初來太華西。恐煩後命促佳期。杜子美送李祕書赴杜相公幕。有恐失佳期後命催之句。兩人幕府叨同日。裴晉公詩。有兩人同日事征西之句。某與

張宮舍俱 參幕下。千載門闌值一時。儲邸忽開趨命召。賓筵空在失棲遲。念公詩句情無極。更聽秦民話去思。憶昨驅車始向西。樊川又見菊花期。滯留舊幕嗟今日。談笑清樽記昔時。屢辟濫充賓客晚。厚恩慙報主人遲。淮南臥治那能久。天子懷賢入夢思。

和張文通書懷

仕塗衆僞雜吾真。誰信千鈞重一身。赫赫朱門公相遠。寥寥黃卷聖賢親。府居此日嗟孤宦。鄉飲當年謬上賓。猶喜故人同舊幕。每容詩句續陽春。

依韻和張文通寺丞寄鮮于子駿職方

西州夫子善談天。語入精微服四筵。子駿尤深於易交分正論詩卷裏。別愁忽到酒樽邊。馬銜雪片歸梁苑。鷲喚年芳憶渭川。盛事青雲看接跡。衣冠鄉里舊多賢。閩州陳氏在衣冠盛事爲最多

送隴州使君劉仲儀左藏赴治

夾道濃香數里焚。隨車和氣一城薰。兵民如見古循吏。文武兼能今使君。冷射祠堂沂水月。晴飛郡閣隴山雲。幕中知有才從事。樽俎清談定喜聞。雷從事實長安佳士

依韻和酬順安使君王大觀見寄之什

蒼鬢蕭疎並曲臺。予嘗與大觀同爲博士太常北門笑口屢同開。仲升投筆燕南去。王粲從軍陝右來。月冷戍樓悲短笛。奉狀天寒戎幕賴深杯。更爲後會知何地。終日思君首懶回。

送人還闕

談笑三年陪主帥。文章二紀在公卿。莫辭別酒傾秦地。古詩有秦地句。且聽離歌唱渭城。鞍馬入關侵臘尾。宮鶯到闕破春聲。朝廷拔擢賢才急。合有當塗薦姓名。

依韻和達守徐郎中見寄

鏡鼓鳴船送出都。中間不奉一行書。荷公恩禮無時薄。接物襟懷似舊虛。久別近參元帥幕。相逢屢枉使君車。詩筒自附西來驛。那要烟波雙鯉魚。

依韻奉和經略司徒侍中寒食後池詩二首

放懷吟笑艷陽天。誰似征西相國賢。春酒丁寧終席滿。風花點檢幾枝全。柳間鶯踏柔條軟。池面魚吹細浪圓。東閣恨參賓客晚。五湖那暇憶漁船。

置酒高吟禁火天。主人勳德重韋賢。廟朝論道看三入。樽俎談兵已萬全。曉竹洗烟叢玉瘦。春池濺雨亂珠圓。曲江壯觀今蕪沒。不復紅妝照客船。

南軒小桃盛開。皆言羣花未發。而此獨先之。偶成短篇呈諸君。

紫萼紅英細細裝。新枝短短舊枝長。未經曉日誰言艷。可藉春風自有香。卻恐折殘妨把酒。若爲遮住莫臨牆。關中氣候由來晚。二月花開豈是忙。

長安春日感懷

誰道關中節候遲。晴川二月繡參差。有期去燕尋歸棟。不改新花發舊枝。宦路飄飄無定所。客顏顛顛異當時。林花巢燕休相笑。攬照懷鄉已自知。

保安楊公濟書來問疾以詩答之

青雲意緒漸悠然。白晝昏昏懶欲眠。詩攪肺腸來暇日。病驅腰脚入衰年。春來把酒猶能強。老去逢花只漫憐。童稚情親今好在。遠煩問訊到秦川。

次韻答方晦之

昔時英傑未伸時。胯下淮陰尙俛眉。之子古心能自信。衆人謗口不須疑。討論直取遺經本。芟剔寧容異說枝。聖世尊儒君富學。等閒危涕莫交洩。

依韻奉和經略司徒侍中清明興慶池上之作

後騎前騶拂曉晴。風光初轉繡旗明。功名上相班春樂。談笑西戎計日平。烟際飛禽屏上見。水邊遊妓鑑中行。勸公急趁花時醉。宰席猶虛主意傾。

春日興慶池上作

韋杜風光掠眼明。南山秀色入重城。林端袞袞晴烟起。冰底濺濺亂水鳴。載酒小舟聊晚泊。隔花幽鳥忽春聲。漢唐壯觀今何在。惟有新蒲細草生。

奉和經略司徒侍中垂蘿洞之什

洞裏流泉過幾家。洞門一醉與何賒。桐飄欲下題詩葉。桃笑猶存誤客花。清結晚陰堪宿鳥。綠牽春蔓擬藏蛇。相君燕喜緣賓樂。滙上誰人合姓車。

和司徒侍中上巳會興慶池韻

熒煌台座隔魁三。杜工部詩有君家最近魁三象之句。喜對新詩見二南。好酒似聽山鳥勸。落花真惜野蜂銜。天光不斷連春水。月影初來破夕嵐。紅旆欲歸珠履散。遊人猶愛畫船撿。

依韻奉和判府經略司徒侍中上巳晚遊九曲池詩

地勢盤紆巧鑿開。當年匠意亦多才。池名不逐唐宮廢。岸折猶如蜀阪來。水落有時逢舊石。草深無處覓遺臺。行春丞相尋陳迹。往事空嗟浩劫灰。

長安上巳日對雨憶杭州

三月吾鄉三日盛。一春盛事一時傳。山花迎笑探芳騎。水鳥驚飛張樂船。今對清樽看細雨。更搔短髮數流年。曲江蕪沒不堪覷。那復麗人來水邊。

經春長在幕府今日偶出見花

幕府文書日日同。愧無長策議平戎。但驚蓬鬢看雙白。不覺花枝已半紅。宦意蹉跎侵晚景。客愁散漫逐春風。古人枉說從軍樂。興在江湖短艇中。

遊寶掌院

當年祕寶已無形。獨有層峯似舊青。不許俗人留轍跡。却應神物護巖扃。山腰猿嘯孤烟暝。洞口龍歸暴雨腥。今日一來探絕賞。始知全勝考圖經。

登塔

身世如追汗漫遊。丹梯一步擬三休。漢唐前後漫陳迹。城郭是非勞寸眸。寒日微明飛鳥背。孤烟漸起暮山頭。姓名滿壁今空在。登此幾人忘百憂。杜子美登塔詩有自非曠土懷登茲翻百憂之句。

依韻和尹嗣復祕校登回鑾寺閣有感之什

尹子辭才兩鬢奇。家聲好繼漢翁歸。人間茂器無施設。天畔危欄獨據依。詩興遠隨孤鳥逝。客心閒傍片雲飛。登臨不比江南節。何事徘徊怨落暉。

依韻奉和判府經略司徒侍中春陰馬上之什

濕雲落地未回天。墜絮將飛力尙綿。霧重自侵旗尾潤。日高誰傍甕頭眠。行田歲稔三登穀。按轡詩成萬選錢。霖雨長應隨出處。春來只見月光圓。

送成都舊尹趙龍圖至驪山作

阻傍嚴公住浣花。喜從秦地見高牙。致君前去心逾赤。撫俗歸來髮未華。路出錦江乘夜月。騎停繡嶺揖朝霞。自憐二紀遊門下。今日聊能託後車。

依韻奉和判府司徒侍中賞西禪院牡丹之什

花蒙一顧重長安。從此時人洗眼看。留醜徘徊供燕席。飛香迺邇上招冠。露苞含曉宜三嗅。風朶搖春似七盤。便好移歸東閣種。免教來歲隔欄干。

依韻奉和經略司徒侍中過湫馬上始見終南

紫誥泥封墨未乾。暫班全陝詔條寬。舊來霖雨從神覓。好在晴山立馬看。翠入重城朝自潤。勢吞平野夏猶寒。公師巖石同臨鎮。關右人心轉覺安。

依韻奉和司徒侍中留題靈泉觀

壞道頽牆遶舊山。空餘紺嶺鬱巒岈。庭柯引蔓長垂蓋。林莢遺妖尙合歡。觀有垂蓋古蹟溫泉之側皂角生輒相並俗謂楊妃皂角云。清渭不隨人事改。溫泉那解客心寒。唐宮蕪沒今何在。漫拂津陽石記看。

題靈泉觀閣

山腰碧瓦鬱參差。勢壓開元觀閣基。野氣欲來雲拂地。天光不動水平池。飛簷鳥道愁相逼。故國人煙入俯窺。便擬幽尋隨杖屨。清秋幕府事文移。

韓魏公生日二首

勳名一代俱稱首。將相三朝愈飭躬。雅意自安台鼎外。羣生長願化鈞中。破除白髮留賓醉。收拾黃金濟士窮。舊鄴山川齊壽考。秀眉何獨魯龜蒙。

天地開秋氣。兆涼當年大昴降。星芒溢城鼓。吹迎恩賜。傾府衣冠。望寵光。馬出上閑牽駿足。衣頰內府疊。

濃香令孫今日方傳詔。更待曾雲捧壽觴。

依韻奉和司徒侍中戊申西洛中秋對月

白玉盤從海面浮。閒雲一點卽時收。山川表裏無遺照。天地尋常可是秋。清景似偏孫相關。高情更屬庾公樓。暫紆化筆歸詩句。不泯長隨洛水流。

澗池

古邑人煙陝洛間。馬蹄車轍許誰閒。不堪曉雨妨行興。猶喜秋風慰客顏。老去稍知筋力勸。年來祇益髮毛斑。相如屈趙無遺迹。獨有空名重泰山。

長安九日

鴈落霜清對此辰。蠲浮酒濁喚何人。二年不見江南弟。九日空憐渭北身。白髮轉多羞插帽。黃花漫好擬霑巾。功名又逐秋風晚。惟有登高詩句新。

離京兆日。獨里人葉舜舉祕丞胡從道戶曹遠餞至長樂坂。

兩經辟命住秦關。府罷東隨相國還。物態當時傾附後。人情今日有無間。青門雨送歸行色。白酒風吹上別顏。相見去留終不改。祇應同里與南山。

嶽廟齋宮與崔伯憲都官王正甫殿丞飲別。二君各以詩送行。席上作短篇奉答。

鄉人分散幾流萍。長樂坡頭已涕零。太華相逢聊永日。故交漸少似殘星。別杯猶恨樽前緩。詩筆那容席

上停車馬東西從此隔。明朝惟見亂山青。

九月二十六日河上雪

昨朝今日盡天風。九月長河雪片中。雲外誰偷榆莢種。人間自滿菊花叢。翠陰已鼓先時勇。萬井應愁卒歲窮。亦欲蹇驢乘逸興。灞橋何處覓詩翁。

祠部集卷九

七言律詩

依韻和判府司徒侍中雪霽登休逸臺

環臺雪後從公登。四顧乾坤表裏明。粉水半消池日薄。玉枝相戛竹風清。園林洒落人間世。樽酒逍遙物外情。寫景不須搜畫筆。詩參化匠自天成。

依韻奉和判府司徒侍中壕林

星榆落種還生地。營柳移根總傍壕。夸父林稠宜較盛。太師垣峻敢爭高。歲科充蠶疲民產。公詩有鹿角科民歲甚勞句。城守勝提壯士旄。長與萬家添外圍。鄰人心結此恩牢。

留守司徒侍中寵示上巳屬疾鈞什。謹依韻奉和。

上巳曾陪宴後池。風光一匝又花時。當年簪履誰猶在。今日門牆獨未離。步怯園林雖晚到。恩深草木已先知。都人不省憂民病。只訝行春繡旆遲。

和登金銅門

高門締構自何年。朱戟金鋪麗日前。樓上台光臨暇日。座間涼氣失炎天。草涵宿雨濃如染。林曝晴曦燥欲然。早晚定歸黃閣去。剩移夏榻就風眠。

某伏觀判府司徒侍中置酒宴客卽時雪作謹成七言律詩一首上獻。

相君東閣冒寒開朔雪貪隨樂事來。臘信未通先漏洩。台光欲近却遲回。勢輕漫擬凌歌袖。片小纔能綴酒杯。寂寞相如孤客在。定應授簡屬鄒枚。

某不度輕僭始以鄙句塵獻判府安撫司徒侍中特屈威尊過賜寵和伏讀榮荷謹成律詩一首代啓上謝。

司馬當年侍兔園。只據祕思奉清樽。豈如下客吟飛雪。繼屈三公賜雅言。句揣物形雖有迹。筆鑿天巧獨無痕。寧惟一府誇榮玩。猶得他時耀子孫。

依韻奉和判府司徒侍中望宸閣雪後

雪中氣象但漫漫。雪後乾坤淨好看。零落瑤林晴照裏。參差銀闕暮雲端。疑開粉墨圖新就。猶洒樓臺筆未乾。萬井都人蒙煦育。恩深不覺夜來寒。

再和

公到層軒雪已殘。蕭森素節曉相看。山融愛日酥千點。地接頑雲縞萬端。曾有金樽開兔苑。況無鐵甲戍桑乾。清風落紙成佳句。身世渾疑在廣寒。

春日送王明遠

馬蹄乘興急離秦。輕雪初消塞外塵。談笑暫來趨幕府。文章猶記從車茵。雍雍妙畫平邊徼。袞袞清言服

座人詩句不須論別意。臨歧探破故都春。

依韻奉和司徒侍中春陰席上

未消殘雪在牆陰。晝景昏昏似日沈。土凍轉愁花信遠。天寒惟仗酒分深。笑談四座相歡色。富貴三朝不動心。詩句一傳人競寫。也應潛購到雞林。

走筆別王彥祖宮贊

別襟曾到宋王臺。魏北相逢一笑開。帥府紅蓮曾入幕。公堂黃菊偶銜杯。未應許國全無策。祇恐趨時自有才。且置功名歸度外。詩筒頻附塞鴻來。

奉和龍興燈夕

結綵仙山對淨坊。曳珠寶履捧台光。燈搖夜月天形動。歌聒春風物態狂。刻燭詩成傳魏國。吐茵酒釀醉程鄉。今年始徹清宵禁。倍覺都人樂意長。河朔上元久不放夜

依韻奉和司徒侍中上元遇雨卽席

金絡香鞵匝匝來。門闌徹禁夜無猜。正憐舞曲隨風轉。驟覺燈花冒雨開。屏翳呼雲何倏忽。嫦娥收月漫徘徊。相君未放春宵醉。倒盡宜城第幾罍。

依韻奉和司徒侍中春雪

草木空催造化忙。六花先出壓羣芳。酒寒玉笋消春味。烟濕金爐減畫香。地暖落巵堆旋失。風和亂片舞

初長相公更好調元去。已兆豐年在此鄉。

送河北轉運燕刑部被命充三司副使

億萬供須仰縣官。大農選筵徧朝端。外臺心計推公最。中詔恩除副帝難。文石近班趨玉筍。紫絲新帕覆銀鞍。行據仁義裁經費。天下征繇不日寬。

晝眠

酣酣枕上息吾形。日過南窗第幾樞。所得高眠容幕府。爲無深責繫朝廷。苦遭浮蟻催來熟。忽被幽禽喚得醒。卻整葛巾尋晚酌。竹間呼客盡吾瓶。

留守安撫司徒侍中生辰三首

七月穹旻大火流。元精信宿降伊周。公師一品儀刑重。將相三朝德業優。桑梓鄉邦兼鎮撫。苴茅封國正居留。人間盛事仍難老。富貴功名未白頭。

宰衡倚賴更三聖。神器傳歸定兩朝。幾御銅符雙在手。尊榮金印六垂腰。流民相率歸仁政。疲俗新蒙罷橫徭。壽考轉隨陰德遠。開倉累萬活黎苗。

凜凜威名遠邇知。去年談笑屈西陲。平時旌節臨全魏。計日朝廷起一夔。狎賜綵衣今禮數。待還繡袞舊麻詞。佇看來歲稱公壽。苟令依前在鳳池。

走筆謝司徒侍中惠相

十年空憶滌林香。今日堆盤得恣嘗。摘處嫩苞金隱粟。剖來清液露盈囊。自堪珍玩誇羣目。可惜餘甘落俗腸。拜賜愈知公意重。不同設醴望元王。

安正堂二首

居守園林氣象閒。堂成壯觀入躋攀。三朝力輔乾坤倦。一國身儉歲月閒。傾座語驚邪說破。勒碑詩召正風還。險夷出處皆公迹。不動公心似泰山。飛飛燕雀卷簷牙。繡拱雲楣鬪彩霞。樽俎燕閒歸相閣。鼎鐘勳業在王家。直紋惜破牆陰竹。巧笑嫌開席外花。今日正風傳魏國。平居詩思亦無邪。

依韻和酬楊立之進士見贈

詞場綠髮競才雄。幕府朱衫覺道窮。孤憤掃除詩句裏。壯圖流落酒盃中。宦游已倦年將暮。人事隨生日又東。珠玉滿篇勞寵贈。建溪風格襲文公。立之實翰林文公族弟

依韻和酬王明遠見寄

一日論交坐席間。肯平壯氣就衰顏。篇章漫欲窺滄海。道誼從來仰泰山。白日聲名君籍籍。青雲意緒我斑斑。元戎幕府那能久。太學諸生已望還。

送河北提刑王詹叔郎中被詔充開封府判官

人物神州雜五方。平明京兆坐黃堂。民投牒訟千狙詐。吏抱文書百鴈行。幕府要人關聽斷。朝廷自昔選

才良朔陞使者聲名久。隨詔南轅佐趙張。

次韻通判都官和諸公雪中席上之作

龍沙千里絕纖埃。銀色渾疑王母臺。宴席此時驚酒薄。曉枝無處認梅開。騁辭梁苑客方至。乘興越溪人自來。從古六花長一色。化工應不費培栽。

和判府司徒侍中喜雪

朔雪飛花趁歲陰。喜看不覺酒杯深。應時自合蒼生望。澤物真同上相心。未怕春風融粉水。恍疑江國見梅林。西山一夜千層白。那復能留寸碧岑。

送王敏夫判官赴舉京師韓魏公塔

邳公門下識義之。風骨無塵聳秀姿。壯氣海鯤翻碧浪。逸才天馬脫金羈。旋憑詞律趨明試。首聽文衡中有司。太學舊遊應刮目。青衫事業盛當時。

伏觀留守安撫司徒侍中鎮魏三日遂獲甘雨吟成律詩一章上薦

相袞前年撫雍民。下車飛雪滿咸秦。陝右歷年不雪公賦事風行魏國纔三日。雨作商嶠恰半春。二月十日忠節此生存社稷。誠心是處感天人。二方豈合偏蒙澤。四海思歸舊化鈞。

即席依韻奉和司徒侍中上巳會許公亭二首

禊事初修樂未涯。晴陽濃淡薄雲遮。風光轉入庭前柳。春色隨來席上花。千載風流追曲水。萬人遊豫揜

長沙。杜工部有著處繁華矜是日長沙千人萬人出之句。相公今日攜諸吏。那比山公醉習家。

三春樂事揖蘭亭。駐旆名園敞繡局。酒盞綠深須露白。花梢紅少已多青。賓裾特盛人間會。公袞能忘物外形。化筆暫歸詩句裏。清風一誦醉還醒。

上巳飲許公亭。通判錢郎中以詩獻。因依韻和呈。

丞相開筵御水頭。席間別乘擅詩流。特誇元已從公飲。不比常年結客遊。淡色雲陰籠日薄。暖香花氣傍人浮。篇章唱絕雖容和。酒盞恩深豈敢酬。

和推官壓沙寺惠詩

上相行春樂有餘。繡旗朝共宿雲舒。特教紅袖停妍唱。爲許朱衫託後車。肯說大烹專鼎食。旋容小摘薦園蔬。多才幕府論榮遇。詩句飄飄動客裾。

走筆依韻和楊進士偶登南樓之作

當年割據屬英雄。樓觀誠奢物產窮。藩鎮一歸平削後。關河盡入照臨中。離宮此日號大壯。織杼無人歌小東。全魏萬家今樂業。袞衣唯恐迓周公。

瓦亭偶書

城中塵土眯人眼。隄上風烟醒客心。沙擁河聲時斷續。雲合野色屢晴陰。平蕪點白鷺雙起。細柳弄青蟬一吟。魏北古來車馬地。此亭偶爾得幽尋。

送謝先生歸紫霄峯

不同賣藥入都市。又異執帚見相君。冠蓋臨門求上劑。公台解榻叩多聞。應思夜鶴侶蕙帳。卻笑伯鸞家布裙。藜杖還尋紫霄頂。無心出處似山雲。

送傅宣李子範供奉歸闕

曾共征西幕府來。相逢今日魏王臺。喜情重把論交袂。感淚頻添話舊杯。此別情懷無限惡。他時談笑尙容陪。馬蹄歸趁春風急。應有花先禁苑開。

依韻奉和司徒侍中西園初暑之什

夏木參雲百尺長。晝陰籠日一軒涼。雜追楚榭迎風袂。冷笑淄川作雨滂。歌扇參差立燕趙。客裾容曳赴原嘗。坐來詩句清人骨。勝抱冰壺飲玉漿。

聞參政王侍郎令子著作登第復除崇文校書

宮壺移刻對延英。文帝從容問賈生。儒館旋承恩詔入。士林尤說御批榮。丹山鳳出寧無種。滄海鵬搏遂有程。漸待青氈歸舊物。區區義獻漫家聲。

依韻奉和司徒侍中苦熱未雨

乾坤五月氣炎敲。丞相憂農心更焦。思脫塵埃遺暑濕。擬排寥廓御風飈。穴中戰蟻空知驗。雲外晴虹尙肆妖。下土顛顛望霖雨。好回天意慰黎苗。

韓魏公生日

上公拜表請辭官。中使傳宣未聽閒。雍府遙兼新節鎮。鄴城重領舊山川。左弧共記生賢始。右席誰居獻壽間。陰施在人天報遠。蟠桃三熟鬢毛斑。

依韻和趙晦夫書記將替寫懷

芙蓉幕裏住三年。鸚鵡才高動四筵。風月漫勞吟杜曲。文章自好紀燕然。朋簪會合愁分手。官簿縱橫待息肩。直道先難終易偶。近聞知己薦書全。

代上余太宰生辰

瑞挺真儒翊聖時。瀉山秀氣育丰規。慶符昌運千齡會。前應中秋十日期。天上光連奎昴宿。人間身占鳳凰池。粉榆暫領旬宣寄。榮誕衣冠祝壽眉。

送公度赴詔歸闕

兩京三仕並交遊。有道從來慕太邱。白日聲名隨詔召。青雲家世踵鸞流。數程去路朱蹄駿。一曲離筵翠黛愁。材力如君當拔擢。敢辭幕府獨淹留。

依韻奉和司徒侍中庚戌秋分

金氣纔分向此朝。天清林葉擬辭條。三秋半去吟蛩逼。百感中來醴蟻消。候早初逢句甫浹。月圓前距望非遙。十日如今晝夜均長短。占錄無勞史姓譙。晉天文志云蔡邕

奉和司徒侍中秋遇雨韻

要盡賓歡醉繡筵。準憑良月作螽緣。孤光已蔽浮雲外。衆目猶傾小雨前。聲入鬢毛同颯颯。潤生林葉自娟娟。宴杯纔徹寒蟾露。踈影參差魄正圓。

依韻奉和司徒侍中秋筵散雨餘微見月色

待月開筵細雨侵。月來賓去意空深。未容午夜瞻全璧。先隔微雲漏碎金。萬戶漸宜歸一望。重樓恨不起千尋。應須潤澤周封內。始放清暉出暝陰。

依韻奉和司徒侍中重九會安正堂二首

茱萸綴席落新堂。丞相詩鋒不可當。九日繡筵吟節物。十年黃閣運陰陽。酒邊和氣忘公袞。風外清歌出女牆。賓去每來安正坐。泰然德宇發天光。

黃杯引滿宴公堂。病客偏容泛淺觴。爲愛菊花驚晚節。不差蓬鬢插秋香。衆賓談笑誰傾座。上相風騷獨擅場。來歲鳳池吟此日。夔龍高會耀辭銜。

和重九晚登騎山樓

登臨樓觀一重重。下客追隨豈易逢。九日燕私同愷樂。三台禮數極優容。自酬佳節揮鴻筆。誰詫元勳載景鐘。只恐斜陽催勝事。時時回首望西峯。

依韻和崔伯憲謝王正甫遺三靈丸蜀茶

一九道士曾投藥。七椀先生亦愛茶。此見玉川先生詩服久有時輕俗骨。味新應早摘靈芽。病軀自健遺藤杖。睡眼全醒耐燭花。可是兼饒詩力壯。芙蓉幕裏句堪嘉。

依韻和伯憲九日感懷

隔霧南山愁漠漠。破烟東日淡輝輝。風欺白髮勤吹帽。酒妒黃花故點衣。九日淚兼疎葉落。幾時身逐短篷歸。青雲欲早秋先晚。更惜登高樂事違。

依韻奉和司徒侍中歷沙寺梨

誰將冰蜜共囊封。結實祇園顆顆同。蔽芾舍傍思召伯。周流林下賦揚雄。長楊賦云周流梨栗之林花經春月千層白。頰傅秋霜一抹紅。江橘空甘得奴號。果中清品合稱公。

讀尹師魯集

章句橫行古道堙。先生筆力障頽津。高文簡得春秋法。大體嚴如劍佩臣。冰鐵剛顏低獄吏。雲風壯略竦邊人。謫官竟死空名在。一讀遺編淚滿巾。

奉和司徒侍中辛亥二月十五日

去去春光鳥翼過。雲陰風惡更相和。屢探花信猶全闕。擬借鶯聲肯暫那。鈴吏事來須緩報。相公賓退正閒哦。九旬已是中分了。詩酒尤宜併一科。

和司徒侍中清明會歷沙寺詩

野寺尋芳二月殘。弄晴幽鳥自關關。堤沙壓雨迎金勒。旆繡翻風蔽玉顏。官妓隨車翠幄飲張花雪底。綵舟歸漾水天間。五年貪戀行春樂。不覺移文笑北山。

依韻奉和司徒侍中同賞梨花

千株綴雪紺園中。數頃花開幾度逢。體瑩直憂春欲妒。色孤猶喜月相容。香浮翠蓋台光近。瓣落清樽飲興濃。公恰徘徊吟妙句。不須忙打寺樓鐘。

送大名府僉幕吳都官幾復移倅安肅

相公檣俎納豪英。使者封章薦姓名。落日送愁離幕府。翔雲隨眼入邊城。萬蹄朔馬休南牧。一笑燕姬慰北征。此去單于還請繫。洛陽前後有書生。

送朱傳道推官赴刑部詳覆

文章自老齒獨壯。富貴偶遲名最先。冷落官曹按丹筆。風流幕府別紅蓮。高談傾座迥無敵。清骨照人常欲仙。好在胸中書萬卷。校讎四庫續登賢。

依韻奉和司徒侍中辛亥上巳會許公亭

許開壯觀舊平津。今日還延相閣賓。茅社一臨封國地。花亭三見禊杯春。隨車和氣蒙魚鳥。卽席高吟動鬼神。西北連年參幕府。東風長忝從遊人。

依韻奉和司徒侍中同賞牡丹

按譜新求洛下栽。朱欄圍土事深培。半妝曉日爭光照。一笑春風喜競開。得地自依孫相閣。飛香欲繞鄴王臺。繡簾對賞猶嫌遠。翦上金盤近酒杯。

依韻奉和留守尙書會六同年感舊詩二首

鼎科第一策名人。金榜誰能躡後塵。三紀鵬圖猶綠髮。累朝龍首最青春。同懷談笑宜開口。間代文章各致身。古詩有恨無同。因致身客共登背雲梯句。醉倒不知歌舞罷。杏園舊態恰如新。

好傳此會詫時人。歌揭青雲動暗塵。霄漢得仙同白日。風騷寡和敵陽春。笑談未減題名地。富貴相高報主身。誰向衣冠增盛事。龍頭結客事尤新。

依韻奉和司徒侍中三月十八日遊御河二首

玉勒牙旌駐水湄。萬人齊看柁開時。此朝河伯想增氣。去歲國公還賦詩。岸蝶偶然穿翠箔。沙禽曾不避紅旗。句餘卽報行春足。可厭歸軒暮雨隨。

此日河生舊俗傳。相公同衆樂沙塹。迎舟戲羽來低岸。冒席遊絲落半天。佳句獨高珠履上。貴名都忘玉樽前。明年盛會知難再。行看還朝百辟先。

遊河遇雨

翠幄初防日影侵。春雲送雨信無心。莫愁客散妨車馬。且喜農安得砭針。侍妓點衣重結束。遊人霑蓋尙追尋。臨歸未盡杯中興。却放船頭醉裏吟。

依韻奉和司徒侍中喜雨應時

合書時雨奏銀臺。潤澤從今徧九垓。應禱豈愆三日後。爲霖曾是十年來。已逃虐魃知何地。自起乖龍不待雷。無數公堂森賀笏。盡同秋種荷陶坯。

依韻奉和司徒侍中七夕未伏

七夕三庚共此辰。風迎西火轉南薰。金盤瓜果隨時俗。玉盞笙歌勸相君。月下巧心空自競。天邊私語復誰聞。早歸肯效東方朔。待看星橋夜度雲。

依韻奉和司徒侍中元城埽行河

一鼓千夫下槌聲。缺堤漏穴幾時平。盤渦倒吸滯流住。巨浸疑浮厚地行。舉鍤每年勞衆力。治河無策貢愚誠。賴公自有安邦德。何處風波敢更生。

行河道中

風起秋河吹旆旌。林梢初日露微明。壤歌接野知堯力。水害橫堤想禹平。無數焚香迎使節。不妨傍轡問農耕。江湖未敢生歸興。爲戀車茵每侍行。

卽席再賦

樂事遙追戲馬臺。高吟節物總天才。三朝致主誠心竭。九日攜賓笑口開。白酒似隨秋露滴。清歌疑喚晚雲迴。放懷不有公台貴。慣得萸枝首賜來。

辛亥九日晚登騎山樓

樓倚秋風引興長。龍山吹帽憶前良。簾虛霜氣清逾逼。葉脫天形遠更詳。巧送四筵雙舞袖。坐收萬景一詩囊。登高且醉銅臺酒。黃閣多年望袞章。

祠部集卷十

七言律詩

依韻奉和司徒侍中視河愜山

聞昔茲山運土成，喜情比屋與連營。可憐事出三王後，不得親逢伯禹名。鄰國一朝罹暴水，相君先慮護嚴城。他時人說公來日，應記初更月旦評。

依韻奉和司徒侍中冬節筵間喜雪

初長日景午陰前，瑞雪迎開上相筵。點綴酒盃飛細細，侵陵歌扇落緜緜。歲功豫作三登地，雲氣都成一色天。驚破醉魂詩句險，不容吏部甕根眠。

和司徒侍中喜雪

熙寧玉燭最調和，瑞雪先時破札瘥。大紀有年仍歲後，尺盈平地此冬多。戲珪旋翦飄疎葉，祭璧初沈委大河。再變陰陽人望久，一方順氣入塗歌。

依韻奉和司徒侍中元宵席上

席上香風轉綺羅，北門東道漢蕭何。燈搖萬井年光嫩，月覆千閭夜色多。樓閣影重占物阜，管絃聲洽驗民和。相公不惜陽春曲，傳與都人每歲歌。

寄齊州曾子固學士

歷山名重舜耕餘。太守文章世罕如。但見清風變齊魯。未聞紫詔起嚴徐。最宜眎草歸時訓。可惜揮毫落簿書。千騎行春且乘興。里無勝母莫回車。

依韻奉和司徒侍中壬子上巳會許公亭

庶吟令節最多年。禊飲春亭五侍筵。初戊申上巳長安燕亭後軒侍飲和詩明年隨府來魏是日奉和鈞唱有當年簪履誰猶在今日門牆獨未離之句愛客公心寬似水。催人物態急如弦。園林爛漫驚三月。樽俎徘徊戀二天。跡近風花飄未定。且隨珠履醉金船。

和司徒侍中壬子寒食會歷沙寺二首

四照梨花一色中。他時珍賞有雌雄。魏人能辨梨實雌雄高牙就景開芳宴。皓齒停歌誦正風。樂極光陰窮日御。詩成造化奪春工。佳辰不禁祇園火。林杏兼然萬點紅。

金星隱地燦遊車。那用行隄更築沙。官妓趨時簪玉蕊。藝工隨分賜銀花。每乘此節尋蕭寺。全勝當年醉習家。歸漾綵舟懽意在。還延賓從盡流霞。

會歷沙寺觀梨花

小隊逶迤駐寶坊。祇園花發認崑岡。日高恐釋三春雪。風細猶傳數里香。垢染了無依佛界。品流逾重被台光。更蒙佳句形珍賞。漫說寒梅競效妝。

和同賞梨花

紺園幾頃白雲英。似覺漫天玉氣騰。勾引春風香陣陣。侵陵夜月粉層層。時間冷豔尤難識。世上妖葩各有朋。每歲旋來張翠帳。芳庭同賞憶吳僧。

奉陪韓魏公燕王氏園亭席上賦詩留題二首

脫去塵官一屣輕。十年世網羨冥冥。幽花笑晚新詩就。好鳥啼春宿酒醒。辭客醉題紅粉壁。黃丞題翠客名氏于屋壁相君高宴綠陰亭。是日飲雙柏亭鄴人應恠三台畔。今夜光聯處士星。

盜陽賓客擺塵羈。一笑名園萬事遺。細草幽花多自種。閒雲靜月最相宜。鄉人乘暇就攤酒。野客尋春來賦詩。白髮朱衫猶幕府。南歸已覺十年遲。

依韻和司徒侍中壬子三月十八日遊御河二首

當時御水始通津。遂作河生記此辰。載籍不聞傳故老。盛遊相繼到今人。金貂爲政居隨俗。畫鷁連年出慰民。錦繡匝隄簫鼓沸。風光游動一城春。綵舟徐動信春風。承相行春樂意融。花底馬蹄追暮鳥。柳梢旗尾挂晴虹。驅馳造化三篇裏。擺落尊榮一笑中。何況佳辰偏宴客。酒樽東閣不曾空。

送王仲賢郎中游天平山

近來好事數中郎。笑指秋山學楚狂。故人宋喬實從此行絕頂去天應咫尺。回頭平楚只毫芒。步侵猿鳥雙藜杖。吟蓄雲煙一錦囊。日並塵遊疎逸駕。自憐邱壑意空長。

依韻奉和司徒侍中安正堂觀牡丹

獨王花天晚自開。翠芳臣妾漫爭媒。金刀幾度栽雲葉。玉席多情向斗魁。晉志魁第一星西三星曰三公檀口似迎遲日笑。香心肯逐疾風頽。晉進之云曰頽相君造化春工手。寫入新詩意更瑰。

壬子六月庚申夜陪魏公詣龍壇

上公小隊俯郊關。讀祝焚香拜夜壇。旱魃此時尤肆虐。應龍何處輒圖安。咒辭如律噴孤劍。封血須明驗一盤。盛夏連年陪席位。自慙不是牧民官。

晚晴

雲暗青天一鼓雷。旱蝗那得輒爲災。易盈畎澮流先溢。不盡關河色漸開。豐兆已從膏澤見。喜情還逐夕陽來。平明官屬趨丞相。樂合公堂送賀杯。

依韻奉和司徒侍中壬子中秋對月

莫畏流光催白頭。且欣圓魄半清秋。當時初作今宵會。每歲還同故事修。飛蓋漫游虧燕喜。胡牀獨坐滅風流。何如錦席笙歌擁。醉看銀盤射玉樓。

病中漫呈師朴學士

初春抱病涉新秋。叩徧醫門廢歷酬。小子幸災因語怪。乃有倡言子居於室中而知老夫委命獨忘憂。情知仕路多猜險。賴有君家共戚休。自予臥病魏公賜書恤問再三藥裏關心詩興在。未應風月廢吟搜。

依韻奉和司徒侍中八月十九日賞菊

秋風生意衆憐遲。一旦先開豈足悲。無髻競分濃藥插。有襟聊對細香披。閨催雖隔重陽月。節去猶勝十日時。不比無名閒草木。早蒙造化只堪嗤。

依韻奉和司徒侍中壬子九日

虛堂飛閣席頻移。早宴安正堂肯對茱萸憶賜枝。杜子美有茱萸賜朝士雖得一枝來句詩集元精尤唱絕。歌翻新曲更相宜。太常沈丞以新詞侑飲席以登臨晚日曾誰怨醉倒秋風不自知。一種孤根輸老菊。明年猶得傍東籬。

酬鄭叔巖虞曹惠詩因以奉送

五年西北事軍書。心共青雲頗負初。老大濫隨丞相後。歲寒未覺故人疎。論情詩句空稠疊。轉眼花枝欲破除。相見不能同酒盞。春風添恨入離裾。

仲春感懷

春色愁邊已不濃。眼開天地久陰中。亂紅雜下殘花雨。暗綠兼飛弱柳風。生計荒蕪存酒盞。交期零落減詩筒。多情惟有堂前燕。來往貧家與舊同。

上高明府孫世則寄書及詩依韻和酬

客顏憔悴過三閭。猶喜良朋記拙疎。忽隔重江論舊契。更言終日困新書。來書有新法推行宦情共減中年後。樂事難同二月初。正月晦日獲詩與書好在江山一樽酒。他時懷抱爲君舒。

某以數年之前。蒙集仙盛公慰薦。今方用是改官。近以啟事論謝。伏辱長箋垂答。因成短篇。少舒感臆。

淮邊曾以此身歸。每見常寬使者威。一昨薦章蒙首上。十年墜翼怡重飛。功名未果時看劍。報效猶乖夜攬衣。聊向短箋論感慨。更煩尊教寵寒微。

次韻陽朔邱尉述懷

登科君已十年餘。斗粟猶肩縣尹卑。閱已漫形韓子賦。添丁賴有玉川兒。悔邊毒瘴濃如霧。嶺外征途亂若絲。三歲歸來無薦者。金門猶喜從臣知。

次韻邱秘校程苦熱

羲和驅日晝如燔。萬里焦原草木乾。早雨驟晴還作熱。炎風寡勢豈成寒。渴思沆瀣朝餐美。坐想凌兢迹到難。汗浹肌膚空秉箠。浪將霜雪擬輕紈。

依韻和道濟秘丞集英殿秋宴作

都場百戲已先呈。舞字逡巡列太平。酒緩天顏應有喜。樂高禁漏不聞聲。晴暉忽傍金莖動。協氣偏從玉座橫。何事君臣皆共樂。銀臺連日奏秋成。

何太宰生日二首

卻數中秋已過旬。老君親送石麒麟。力侔二氣文詞重。迴繼諸公德業醇。論道他年要黃髮。看公當世幹

洪鈞泰山如礪河如帶。到此猶爲劍履臣。

河嶽靈神擁瑞來。劍川一夜起雲雷。祥風破臘吹灰琯。和氣先春報砌槐。龍邸久膺心膂託。金甌終爲姓名開。年年已與梅花約。長借清香入壽杯。

哭曾四丈供備

前浙東都巡檢

平生獨慕霍嫖姚。弱冠功名喜自邀。報國劍鏦沈氣象。絕人弓藝委風飈。總戎江海空流轉。分闢關河竟寂寥。幾百熊羆懷舊愛。哭聲應過甬東橋。

贈黃任道

辭源浩蕩輸滄海。筆勢飄搖薄紫霞。公府薦才猶未試。士林淪滯不須嗟。相逢轉更開懷抱。一跌何嘗掛齒牙。文帝欲興三代治。可容賈誼在長沙。

依韻奉和省判程郎中省宿

北望宮牆樹萬年。九霄雲退湛秋泉。坐間星斗懸吟次。夢裏江湖在目前。月綏粉闌添皓色。更長紅燭滅青煙。中郎心計元無敵。更向風騷擅將權。

雪霽出郊

京塵滾滾日眯眼。心豁郊原初雪晴。幽禽忽傍粉樹語。瘦馬時踏瓊田行。高吟浩蕩真吾事。薄宦飄搖愧此生。卻羨老農相顧喜。土膏乘潤說春耕。

元夕觀駕御端門詩

仙韶樓底弄春和。簾額隨風捲繡波。午夜九霄開寶扇。一聲萬壽徹明河。燈傳月影祥光動。酒入天顏喜氣多。侍從有班無籍去。花邊空聽太平歌。

次韻都曹燈夕之作

夜色澄明宇宙寬。新正纔半覺春慳。行歌湖月疑塵外。醉眼隨車憶夢間。燭影更和人散亂。漏聲不放馬舒閒。啼烏看報嚴城曉。滿引金船倒玉山。

仲春攝太僕卿祭馬祖宿齋城外作

一年四出國門西。今喜春郊散馬蹄。晴日自隨河面動。宿雲仍傍柳梢低。齋宮得句還揮筆。鄉國尋芳憶杖藜。承祀九卿猶假攝。不應巧宦至通閨。

篋中得調官時楊氏所寄書慨然追感

笑語無蹤莫更尋。每懷平昔恨猶深。况看滿幅相思字。曾訴幽閨獨自心。因想音容如在目。不知涕淚已盈襟。恨銷除是綵牋滅。弗比遺香苦易沈。

庭前梨桃二花方盛爲暴風所吹感事成篇

梨白桃紅纔可嘉。風前亂雪趁殘霞。提壺有口只喚酒。鳴鳩何心專妒花。九陌樂遊非往昔。五陵豪氣漫塵沙。清樽倒盡卻興感。席上餘春天畔家。

一春未嘗行樂。而羣花今已離披。感而成篇。

只知倦馬趁風沙。不覺啼鴛破物華。始擬尊前謀小酌。早堪枝上數殘花。壯圖慘淡流年駛。樂事參差暮景斜。薄醉浩歌搔短髮。江湖歸興滿天涯。

送史正孚

再提試筆入南宮。落紙文章近更工。一第聲名光晝日。十年意緒散春風。眼驚梁苑花枝靜。心豁秦川酒
殘空。材大莫嫌關賦冗。青雲知已有諸公。

陪羣牧使進呈揀中御馬

薰風微轉殿南稜。玉色天顏粹自凝。數馬從容陪晝接。飛龍迺邇備時乘。久圖駿足求初得。一顧奇毛價
遂增。竊笑漫躡梅福願。半生玉陛輒三登。

二月十二日城西送韓玉汝龍圖馬上作

信馬春風踏軟沙。晴郊芳意接京華。綠垂波面官橋柳。紅出牆頭御苑花。過玉津園莫問年光侵老境。且拼日
醉送生涯。歸轡猶恐嚴城隔。那得行人不念家。

後二日趙無愧杜君章垂和前篇。復用元韻自和。呈二君。

給園勝地隱金沙。隨意開筵餞使華。社日兼宜數杯酒。春風未動一枝花。垂垂禁鼓喧城裏。一一歸鞍傍
水涯。魚目閒投引驪頰。夜光雙吐照貧家。一云傳語行人莫回首。綠槐陰合定還家。

三月五日病中對雨作

何術可留枝上錦。誰人能換鬢邊絲。不堪有恨餘春日。更值無聊足病時。久判浮名唯念酒。肯因閒事輒忘詩。雨頻未拂金明柳。空聽蓬萊唱舊辭。

漫呈盛任道監簿

甲第衡門憶並開。笑談無日不追陪。繞欄共覓花時句。隔壁嘗呼雪夜杯。一別青雲俱蹭蹬。相逢白首重徘徊。炎天臥病還同巷。早晚欣聞步履來。

苦熱

天上扶桑樹合枯。火雲四起抱陽烏。誰能赤脚渡銀漢。直欲跳身藏玉壺。河朔飲杯空酪酏。臨淄汗雨自沾濡。井深水遠渴心劇。百丈無繩轉轆轤。

客有貌吾陋容者。以詩謝之。

野姿瘦骨逼吾真。處士毫端合有神。正色未嘗移勢位。苦吟自覺遠風塵。漸驚老態侵雙鬢。猶逐時名繫一身。可是封侯須燕頤。恨無勳業上麒麟。

用洪景之韻送郭子山

別筵那得易爲情。別酒連連且共傾。車馬縱遊憐客興。江湖幽適負吾生。盤中異味歸南食。篋裏新詩記北行。文史藏身榮路在。未應高跡混柴荆。

賀吳樞府吳公尹京踰月
適拜樞府之命

治聲一月滿。長安直上星。樞筮具觀空。策危言。驚主易。能施行。事似公難。詔辭浩蕩。留邦國。廟略縱橫出。肺肝拜慶親。闈雙白首。更傳盛事入衣冠。

九日作

九日登臨雙闕邊。三秋感慨一樽前。黃花若解憐多病。白髮應嗟老去年。憶昨忽叨門下召。此辰方醉侍中筵。追歡筋力于今異。贏得新愁入短篇。

臘月二十三日。羣牧使元內翰曾龍圖。同日拜樞參之命。是日立春。

洗馬池邊喜氣俱。二公同日上雲衢。北門學士參台鼎。內閣才臣貳斗樞。曉殿春風迎拜舞。晚街霽日照傳呼。回頭應笑蹉跎客。養拙長甘伴圉夫。

甲寅仲冬祠馬步宿齋宮。乙卯仲春十七日復因馬祭到此。漫成短篇。

昔年庭木雪無條。今此風和柳自搖。人事轉如風不定。年光暗與雪俱消。城中佳氣生宮闕。塵外清居隔市朝。願我何能知馬政。江村祇合老漁樵。

甲寅二月罷戶部勾院。移羣牧判官。待次數月。乙卯春復自請罷羣牧。

誰容豺虎漏讒人。又遣花封退食貧。漸老可無詩過日。連年唯有悶償春。奔波塵土非吾事。流浪江湖合此身。且信濁醪存妙理。一盃萬慮付洪鈞。

席上走筆贈別李子先

醉魄吟魂李謫仙。風流未絕驗家傳。詞源直欲傾三峽。飲量真疑漏百川。幾寸燭花催餞席。數程柳絮撲歸鞭。別愁袞袞無由說。吏部先尋甕底眠。

送彭景行寺丞侍養得請歸荆南別業

二年慈母懷鄉淚。愁殺啼鵲耳畔飛。歸計任荒揚子宅。劍外先喜情自入老萊衣。秣陵五馬開樽待。父執

今守金陵。荆渚雙魚薦饌肥。能為聖朝全孝理。賢聲行色兩光輝。

孫公素中允。將往相臺謁韓魏。公貽詩為別。因以酬送。公時新改京兆節旄

紫宸班退聽宣麻。鎮鄴司徒換將牙。到日玳筵公定喜。當年珠履客尤嘉。公頃鎮北門賦驚圍座爭觀禰。樂重當時合姓車。入夏後園聞更好。繞池十丈看荷花。

依韻和酬孫公素中允寫懷見貽

車馬門前住罕逢。春坊內允獨相從。領垂素髮驚潘岳。公素以予駭其早白來詩有霜毛初出之句器負青雲愛仲容。身世百年今有愧。功名萬事近尤慵。不緣婚嫁須微祿。已拂紅塵就赤松。

九日陪兩制諸公燕趙氏園亭

筋力追歡勝去年。不應吹帽愧華顛。壯心未折秋風裏。笑口頻開晚照邊。學士帶欺黃菊爛。侍臣綬奪紫萸鮮。自憐蹭蹬諸公後。一醉猶能賦此筵。

送李山甫赴熙州

懶憶肝江釣綠波。春風躍馬望洮河。平生富貴來雖緩。一日功名得便多。城上隴雲飄漢角。樓頭關月慘羌歌。剩裨儒帥開邊策。大有燕然石可磨。

予在病告。君玉見過。翌日成短篇奉招。

官居冷落人稀到。病枕敲移日幾回。薄宦淹留無處語。平生懷抱爲君開。盤中飢飯延粗飯。甕面澄凝泛好醅。更有無窮欲言事。可能重誇蹇驢來。

順師歸湖寺後以詩見招因戲答之

山月溪雲思有餘。嶺猿沙鳥靜相於。閒中物象都收斂。別後詩才愈發舒。擬就鄰翁沽竹葉。直邀野令走籃輿。提壺漫叫無憑準。一醉春風莫誤予。順師有可能沽酒引柴桑之句

紫微舍人宋公愛子姪三人同日得第作詩以紀盛美二首

君王親策集英年。始信常山子姪賢。白晝相將金榜上。紫微三謝玉階前。衣冠近事尤爲盛。閭閻清芬愈可傳。馬躍春風歸里巷。蘆花爭看一行鞭。

君王賜第御靈和。兄弟同時捷雋科。名占風雷三級徧。恩沾雨露一門多。衣冠盛事喧金榜。里巷榮歸綴玉珂。他日鳳池須接翼。侍中陰德有餘波。

山中雨後

雨足前村雲未回。逡巡屏面數峯開。相呼野鳥逢人住。自戲山蜂趁馬來。野色通明林葉淨。溪聲奔迸岸沙頽。田翁見我應偷笑。底事行吟廢酒杯。

寄題雙巖寺

古寺南偏兩翠微。錦溪碣石豈全非。雲煙來去長相接。猿鳥東西各有歸。泉溜夜淙寒入座。嵐光朝滴潤生衣。而今野曠無人築。唯見林僧對掩扉。

莆陽徐太守數賜臨顧

軍壘初分太守麾。馬頭南去有光輝。吏人郊外迎飛蓋。父老溪邊指繡衣。到日嶺梅含細藥。昔時鄉樹長新圍。世間得意多遺舊。誰肯柴荆數款扉。

林大年殿直金輪院讀書有寄

仕到監州興漸多。人生四十未蹉跎。自嫌朱紱生門調。直要青雲取世科。新喜鴈名傳日下。暫題試筆寄巖阿。山翁只作書生看。不識前呼導玉珂。

依韻和吳七丈詠雪二首

平明無數六花飄。氣象崔嵬變一朝。落勢孤城圍不盡。寒威窮巷著偏饒。臨衣未拂還成舞。近燭纔看早覺消。最稱少陵吟鶴髮。更逢太白跨鯨腰。

江邊玉樹渾無地。世上銀河自有橋。宿凍卽交山口路。冷波應減海門潮。當年右席辭空在。今日扁舟興

轉遙寬褐紅爐溫坐外。人間萬事任寥寥。

園竹爲大雪所折

露葉煙梢拂草亭。雪中顛倒翠虬形。且留完處裁吹律。莫聽旁人議殺青。卻恐看來愁野客。若爲扶起屬園丁。寂寥數畝清風地。宿酒從今不易醒。

輓故司徒侍中贈尚書令韓魏公三首

建儲嘉祐發先機。蓋世功名古亦稀。一冠駕行丹地立。兩扶嘉德九天飛。偃藩汲黯時云臥。去國周公遂不歸。星坼中台薨訃入。君王淚濕輟朝衣。

平生忠節見臨危。四紀三朝報主知。伊尹告歸曾未果。子房強臥竟難支。廟庭首配嚴親饗。鹵簿新排送葬儀。澤在生民功社稷。堯文更揭墓前碑。

西北油幢疊總戎。六年幕府從裴公。談兵玉帳知何在。宴客金錢定已空。麟閣英姿隨爽氣。鳳池陳迹想清風。白頭無路酬恩地。一寄哀情薤挽中。

馬公節輓辭

慘淡南宮鍛羽翰。空歸座席甫能安。魂收長夜棺尋閉。淚灑殘春袖未乾。君下第還家不數日遂卒老母始甘無祿釜。世人今轉薄儒冠。土中猶動難平恨。月照孤墳桂影丹。

王廣淵郎中輓詩

暮歸紫陌尙鳴珂。夜哭逡巡接浩歌。暮歸高歌漸老爲郎逾蘊藉。平生從仕亦蹉跎。笙沈絃嶺空乘鶴。書絕山陰欲換鵝。日落九原車馬散。悲風更向白楊多。

祠部集卷十一

五言排律詩

依韻奉和司徒侍中雪二十韻

瑤林紛有蕊。玉海浩無津。蓋地都藏險。漫天不露垠。片輕消鑿落。光冷奪純鈞。賀笏庭前客。懽杯壠上民。清輝交夜月。妙曲次陽春。兔苑誰傳簡。蠶崖自比銀。香沈宵燕麝。烟濕晝炊薪。履沒平三徑。窗明斷一塵。乘時飛更急。帶晚賞逾珍。酒合斟瓊液。巾宜頂白綸。分形雖各值。洒潤要皆均。滲野今豐魏。飄筵昔瑞秦。禽疑越貢雉。獸訝晉祥麟。巧剉枯株木。偏宜勁節筠。寒林圖似展。粉筆埽初勻。嘗愛漆園吏。寓言姑射神。如公詩具美。揣物意尤新。久作依劉客。難追訪戴人。幕中賡絕唱。席右媿嘉賓。不獨調元手。風騷敵孟醇。

詰朝雨寒密雪雜下輒成一篇呈諸匠者幸賜光。

飄酒初驚曉。霏微或舞簷。勢應緣雨作。威未抵霜嚴。水面瓊銷液。山頭玉露尖。偏能仁富室。只解虐窮閭。樵凍肩增豎。漁寒手懶箝。助清歸賦筆。送冷入歌簾。退縮悲鬢兔。埋藏憤老蟾。旋醒凝酒薄。密擁喜爐添。尚媿伴連璐。纔宜比散鹽。飛輕憂絮妒。落早欠梅兼。真宰恩先漏。豐年兆逆占。綾加侍臣被。彤下使君幘。預促羣萌達。前驚百竊潛。尤勝窮臘降。多後世情嫌。

某近辱諸公光和前篇鄙思未已復自次元韻奉呈

纔落先明黠。無多未壓簷。得時雖較淺。著物始知嚴。報歲三登速。栽花六出尖。賀祥開萬物。却竊喜千閭。腹餒禽剛啄。螯僵蟹怕箝。地成銀色界。門盡水晶簾。燕席凝盃蟻。書幃冰硯蟾。天形四垂接。曙色十分添。海訝龍飛沫。盤疑虎刻鹽。陰陽驚臘早。氣象假風兼。嚼爽腸忘渴。吟寒口懶占。學輕頻舞袖。禦冷盛張幘。謝媛資佳詠。袁生苦密潛。自緣人意別。一愛一憎嫌。

長安二月二十二日雪十韻

曉白乾坤靜。寒清氣候侵。麥滋堆壠疾。花沒聚枝深。浩蕩中春尾。昭蘇庶彙心。函關雙粉蝶。繡嶺一瑤林。鶴冷驚幽夢。鶯愁悶好音。拂衣輕點綴。落酒旋浮沉。門擁藏高臥。牕明照獨吟。飄時穿箔罅。積處直樓陰。南客增蕭索。東風助浸淫。年來交態淺。乘興欲誰尋。

送朱元弼主簿登第後還鄉

簿領非吾事。儒林物議間。談經泮宮水。校籍道家山。職業纔相稱。塵勞豈素嫺。官期慵屈指。親側且承顏。楚岸維齋舫。揚州入故關。時人榮畫錦。洗眼看南還。

送度支劉郎中被旨赴闕

赴辟函關道。來時犯雪泥。今乘匹馬過。早見晚鶯啼。曉闕兼程到。丹墀數日躋。一言知國器。三接是雲梯。小醜翻然順。靈誅自此稽。和戎須上策。議要合征西。

次韻郡僚櫻桃之什

人說櫻桃美。誰知味特殊。顆勻圓更好。色麗賞還須。樹樹紅攢夏。年年價滿都。畏風應早摘。宜日稱晨敷。血滴春鵲淚。胎含火齊珠。透肌勝琥珀。爽口劇醍醐。怒目睛全赤。妝唇點誤粗。愛擎宜翠籠。登進合銀盂。秀實期先薦。流鶯莫漫圖。園林千百品。甘處後塵無。

彭九廷評改丞衛尉。首垂臨訪。未遂馳賀。輒成鄙句。少伸愧謝。

三年廷尉評。別寺忽除丞。步武通閨近。生涯薄俸增。翰林終必復。雅道已難能。不預聞新命。那期念舊朋。馬鞍煩遠御。爵刺改前稱。禮曠徒慚汗。情高倍服膺。彈冠開慰喜。簪袂羨軒騰。馳賀冰泥滑。賓階愧後登。送評事十九叔入秦

白露沾蘭草。王孫轉憶歸。蔡州新戰罷。郢路去人稀。謁帝不辭遠。懷親空有違。孤舟看落葉。平楚逐斜暉。北闕見端冕。南臺當繡衣。惟余播遷客。只伴鷓鴣飛。

依韻答公節

長髯踏昏鼓。詩卷置予懷。屢讀銷蘭炬。幽眠廢竹齋。雷陳切契密。李杜媿名偕。子美有李杜齊名無忝竊句明月驚雙目。清風暢百骸。舊遊今歷紀。新句老逾佳。筆力支傾嶽。詞源瀉倒淮。覓官猶博奕。賤賦甚優俳。夫子心雖壯。羣兒日更排。謗譏從爾類。事業屬吾儕。他日材須用。平時照莫理。相期空有道。欲薦反無階。足跌那傷驥。角爭堪誚蝸。醉鄉逃得喪。兄之新亭傍曰醉鄉俗調外淫哇。縱酒時遺幘。逢人或懶鞋。閒乘太湖棹。靜繫洞庭涯。梅雨開新霽。江天斂宿霾。苦吟邀郢客。妙唱聽吳娃。願我千憂集。陪兄一笑乖。此行情分厚。枉道願言諧。

策馬關城遠，深愁日墜崖。

北京判府司徒侍中生日三十四韻

仁祖龍飛榜，宗工鳳舉春。爭先欣得雋，直上欲驚人。終賈年方妙，軻雄學已醇。紆朱光半刺，垂白慰偏親。器業期廊廟，聲名壓搢紳。試言俄有旨，落筆不無神。儒館羣邦彥，王畿位幕賓。諫垣尋振翼，法座屢櫻鱗。雨露專圖報，雷霆肯避嗔。上心疇侍從，大手屬絲綸。使蜀星文動，回梁帝眷新。點羌初負漢，儒將續臨秦。就統興師律，能損受命身。苦甘齊士卒，寤寐息風塵。未幾登培幄，猶稽秉宰鈞。旋更諸鎮帥，連牧數州民。文武才俱屈，安榮策未伸。總戎辭晉野，移疾守漳濱。符契真千載，謀謨復四鄰。鴻樞纒首連，英袞遂同寅。扶日升黃道，朝天冠紫宸。功高嫌赫赫，跡退喜恂恂。分陝勞姬旦，還鄉滯買臣。良籌深制勝，苗格偶增旬。西顧憂全釋，東歸懇繼陳。俞音來答詔，喜氣送回輪。故國分銅虎，離都改玉麟。誰知圖任舊，祇見寵章頻。茅社重留地，桑弧載誕辰。喬崧秋降甫，寶歷歲名申。馬錫天閑駿，衣班內帛珍。康強鍾衛武，爵祿茂平津。長與三台應，兼之五福臻。神明知必相，壽合等靈椿。

晦之江樓小飲，辱詩懷寄，謹答來貺，因以奉招。

遙知相憶處，相憶對秋江。涉有波濤闊，飛無羽翼雙。端居君故里，薄宦我他鄉。交臂經時失，憂心曷日降。此稀人迹到，惟聽足音登。願命朋遊駕，來吟吏隱窗。倦談須脫屣，劇飲定空缸。論契何如重，千鈞不可扛。

文相生辰祝壽

盈數號良月。應鍾飛律灰。當年疑間氣。此際毓元台。出契千齡運。居爲百辟魁。智多全德水。位峻冠朝槐。經世雄門盛。熙邦鉅業開。賚商名掩傅。平蔡略輕裴。肅物嚴秋去。充閭慶旦來。最誰興善頌。蒙顧實微才。圭袞榮長享。松筠歲不摧。相階常煥耀。巖石鎮崔嵬。適限糜官局。無緣薦壽盃。膺天五福外。更願事康哉。

次韻元恕苦寒之什

繁雲凝不散。朔吹動無涯。林禿霜摧葉。河膠凍裂沙。饑禽啄石髮。殭鼠墮簷牙。應有四方客。倍懷千里家。老松堅自若。病竹折相叉。喜擁重衾麝。愁聞絕塞笳。謀溫藉狐腋。辟冷泥榴花。豈待窮冬雪。方爲氣象誇。

次韻梅守著作喜守倅冬杪祈雪春初獲應之什

郡境時雖泰。江鄉臘已深。羣情憂雪晚。精意喜天忱。夙駕纔分禱。春空倏變陰。銀成佛氏界。瓊掩帝家休。始向風前舞。還逢水面沈。乾坤方一色。埃滓莫相侵。薄畏晨光鑠。清宜夜魄臨。撒鹽矜巧喻。授簡喜知音。月窟埋仙兔。霜毛碎獵禽。驗深兒植杖。聽落女停針。扃戶人安臥。乘舟客訪尋。長鋪吳地練。競貢禹邦琳。潤未沾農畝。威先到旅衾。馬蹄行見跡。鶴髮此羞簪。愛潔慵施帚。思烹預滌鷺。難收俱碎璧。漫想辟寒金。飛瀑傾台嶺。驚濤過越潯。兆年能作瑞。澤物豈無心。氣象符神設。陰陽順斗斟。護梅偏拂拂。欺柳故森森。樵塢迷如失。漁蓑重不禁。積遲唯瀆壑。白早是高岑。爐飲聊堪禦。樓觀恐不任。當令平坎凸。免使有崎嶇。第止塵心渴。誰開凍口吟。梅州才素逸。藻思衆嘗欽。高唱俄摠發。終篇絕麗淫。更兼和密霰。并好爽煩襟。屬和仍鴻筆。珍藏勝楚琛。正聲都欲寫。抽曲入瑤琴。

某介直寡合爲邑無狀而杜兄一見過愛作詩稱許謹依來韻奉答。

平生懷古哲所趣背時人。餓死不巧宦。力行惟庇民。風波方滿眼。霄漢欲謀身。山水得一縣。松筠爲四鄰。分安籬鷓悅。機少海鷗馴。道義聞君久。襟懷類我淳。盍簪何太速。傾蓋似非新。交向篇章定。情緣里閭親。胸中都絕介。席上競誇珍。他日據長策。相攜獻紫宸。

送京西運使周度支

公持使臺柄。行矣過鄉關。自昔捐縑處。于今擁節還。素推仁義本。將底賦輸閑。惠足躋民富。威先變吏頑。高談能佐治。大筆出誅姦。所稟具純德。未嘗柔正顏。最爲時論重。自結主知難。忠節久方見。詔音行復頒。匪朝登相閣。均福浸人寰。列郡方馳戀。征虜已莫攀。風霜十月始。鐃鼓一川間。驟奪孤生庇。瞻言感涕潛。

郊外感事

田原土盡闢。禾黍積如鱗。聖主弗橫賦。農民猶苦貧。未遊滋不業。積弊久相因。富室豪奪利。里胥蠶食人。爲生常汲汲。乃粒罕陳陳。況在水旱際。更遭科斂頻。其將委溝壑。何以給昏晨。去弊與務本。無非縣令親。

上知府張少卿

邦君今刺史。光祿古名卿。況是三台後。仍兼二事榮。才猷希世出。議論一時傾。文燄長千丈。詩鋒銳正兵。量形滄海狹。氣與素秋橫。官路錙銖競。公心紱冕輕。金華推美郡。銅虎愜專城。半歲開尊府。休風變細甿。棠陰空書訟。桑野勸春耕。每布詔條暇。閒攜賓從行。江山尋勝地。笳鼓擁遊旌。好景樽前挹。新編席次成。

雙溪茲壯觀。八咏昔虛聲。治狀稱尤異。宸衷眷直清。勢應非久次。代豈俟終更。卓馬朝將近。元龜德素明。豐功增閎闕。舊物取鈞衡。屬吏誰堪卹。孤蹤此最平。下科踰十稔。薄況甚諸生。尙壯羞乾沒。雖驚願使令。斯辰如賁飾。吾道定蒙亨。輒引鹽車吭。聊逢伯樂鳴。

謝知府少卿

某爲邑歲餘。材術短疏。知府少卿。特形清舉。事出望外。謹成五言十二韻詩一章。上謝萬一。

賤僚尸屬邑。踰歲事雄藩。自視無尤異。何階冀薦論。公爲千騎長。官復九卿尊。升黜懸諸手。榮枯繫片言。俄收一介技。俾出大賢門。銳意推臣轂。刻章飛帝閣。先容掄散木。後澤浹孤根。立發韓灰燄。坐生鄒谷暄。泥塗漸霄漢。瓦礫變瓊璠。倍喜非初望。難酬是厚恩。敢忘知己賜。況有寸心存。稱謝階墀阻。形留意欲奔。

上知府少卿

近代東南守。何人與古同。唯公臨婺女。變俗似文翁。流化陶編戶。延儒萃泮宮。棲糧農畝溢。鞠草訟囿空。風月歌詩健。江山氣象雄。雙溪今改觀。八詠昔非工。文酒高權外。園林勝賞中。妙年登白首。素節有清風。嘉會千齡合。皇天五福融。晚躋卿位棘。行覲帝宸楓。卓馬趨嚴詔。元龜簡上聰。謀猷一朝啓。利澤萬區通。諸邑誰無狀。孤生性最蒙。簡書循吏檢。牒訴盡愚衷。銳意鋤姦蠹。推心活困窮。不能防衆口。止解潔微躬。方託雲垂蔭。俄觀歲改筩。氣寒期念黍。聲在或知桐。昔值民留寇。始聞書薦雄。生成單賤跡。今日願因公。

上運使工部

天地慳英氣。人皆所得偏。公乎何卓越。性乃獨純全。精學窺神奧。遺經討聖淵。辭宗師者衆。詩將敵無前。風雅一篇出。邦都萬紙傳。斯文知未墜。大筆救將顛。早聽諸公論。仍推執事賢。松筠貞節勁。金石亮誠堅。勳受嚴宸寄。嘗持外計權。才良魚遇水。姦墨雀逢鷗。黜陟司當爾。澄清古亦然。讒機成貝錦。亂曲惡朱絃。未幾恩函改。俄聞使旆還。彭門勞鎮撫。漢詔許周旋。鈴閣晝開卷。熊轡春行田。坐棠稀頌牒。恭梓接鄉廛。治狀頻稱最。褒章訝未甄。淮州繁轉給。漕柄議登延。旒展知名舊。朝廷付命專。溫書頒綠檢。要職復青氈。歲亦膏腴地。河膠金穀船。尙緊心計敏。能免國需愆。旣足中都食。兼充內帑錢。輸將今底績。留滯矧經年。不俟更書滿。行聆迅召宣。帝猷歸潤色。天下佇陶埏。賤士何爲者。孤蹤最瑣焉。技疏謀颺鼠。聲泯類寒蟬。七載沾微命。三霜備冗員。謹廉徒自信。樸訥復誰憐。材散良工棄。筋鴛善御捐。泥塗寧避暑。溝壑尙憂填。援手唯公易。爲容更孰先。願由門下進。畢力効塵涓。

上運使工部

綱紀提諸郡。朝廷重外臺。舉今持使柄。第一議公才。心計籠寰宇。時名薄斗魁。邦家經費足。山海利源開。待哺充兵口。圖豐積帑財。鄧侯慚首漢。唐室媿稱裴。幹濟謀無敵。澄清志不回。諂顏迎刃破。姦膽望風摧。美課連優異。繁司久剴裁。由來藏器業。所趣在公台。豈俟更書滿。當聞迅詔催。帝前推惠澤。天下活枯荄。賤子今州縣。孤蹤始草萊。十年參紱冕。再命尙塵埃。馭吏猶防盜。憐民甚撫孩。官箴誠自勗。士穀復誰推。近幸窮山側。親瞻大旆來。霽威寬跼躅。賜坐許徘徊。短效時令獻。微躬或見哀。光華生裸壤。氣燄發寒灰。

古亦伸知己。愚寧醜自媒。鑄顏惟此爾。捨魯更何哉。巨冶容頑鑛。良工取散材。願繇恩館出。畢力策駑駘。

上致政蔣侍郎二十六韻

憶昔初登第。公時再鎮杭。諸生盡賓禮。賤子正親喪。願在齊衰下。難瞻棨戟傍。無依繞樹鵲。欲進觸藩羊。豈謂二千石。容趨數仞墻。襟懷一虛接。位貌兩俱忘。復坐蒙嚴誨。公嘗教某以忠孝之大節窮居庇末光。寒蹤深退省。感遇劇中藏。俄解武林印。復懷吳郡章。重經所憩杜。俯近必恭桑。吡陵舊隱在焉政績前遺愛。州存舊大綱。風騷搢韋白。術業駕龔黃。衆有台衡議。朝推治狀良。棟材掄杞梓。廟器薦圭璋。卓馬還非遠。公甫用代還遠有退休之請冥鴻趨莫量。儻來輕弁冕。思去做滄浪。俞詔優賢降。安車就第康。鴻樞辭密輔。碧落應文昌。世外風波息。齋中日月長。靜憐詩酒地。回笑利名場。愚也生無似。公乎惠未償。昨官從一掾。去德越三霜。迭聽解華紱。末由稱賀觴。旅巢今甚邇。恩館密相望。傾仰心搖旆。兢慚背負芒。功成何以祝。五福具無疆。

寄獻王中丞

近侍才俱傑。明公望獨尊。紀綱新憲府。德業舊王門。禮樂陪朱邸。文章落紫垣。訓辭含鼓動。氣概獨飛鶩。厭直詞臣筆。堅求牧守藩。圖書遷禁閣。封部領家園。曉日旌旗疊。秋風鼓吹喧。萬人瞻駟馬。千騎簇雙鞬。令肅關河靜。仁深草木蕃。先皇俄側席。百姓互攀轅。到闕何心緒。遺弓已淚痕。東廂延進對。數刻慰煩冤。一昨逢仁廟。三朝見聖孫。風雲歸宿契。社稷入危言。罄竭丹誠露。從容玉色溫。殿中緊執法。陛下肇披元。爰立宮寮近。由來國史存。台星看比比。淮水正源源。白簡抨彈後。洪鈞宰制繁。盛期開旦暮。偉烈照乾坤。

下客真疏鄙，參戎謬薦論。去年趨大幕，累月奉清樽。召旨催乘傳，驚情劇戀軒。此生猶斷梗，在處是孤根。豈自身難致，云誰手未援。空彈愁坐劍，感慕主人恩。

送陳郎中泗州得替

歷選臨淮守，多聞政術偏。若非柔似水，卽是急如弦。下吏或弄法，屬僚時竊權。邀懽沸鐘鼓，布譽飾庖箋。此弊歲月久，何人才業全。我公來作郡，衆口悉稱賢。寬猛履中道，勤勞經比年。憲章難爾枉，公素精法令網紀自吾專。問喜文字飲，懶開歌舞筵。迎賓常倒屣，公喜賓客門無留調酌水尙留錢。公潔廉之聲尤重時論無愧古循吏，豈同今備員。頻升功狀最，宜待寵章甄。上意深嘉乃，高懷遠撤然。琳宮願監董，公始抗章監嶽仙觀鈴閣厭拘牽。帝惜惟良去，公逾所請堅。俄聞拜俞詔，章再上乃許解郡欲往閱陳編。公嘗語某曰吾欲求去郡無他欲得閒局因圖史爾未可謀真隱，行當被峻遷。散材蒙剪拂，殊遇絕夤緣。有立期他日，無忘報二天。聊將感知淚，洒送北歸船。

七言排律詩

送王夕拜移帥慶陽

一月天書兩紫泥，朝持使節暮征西。公適自京兆府就領都漕又改帥慶陽一月之間凡兩拜新命關中父老攀旗尾，關外偏裨望馬蹄。行色欲侵邊雪散，威聲先壓塞雲低。情勤佳客雙延辟，公辟劉李二君欲置幕下令肅彊兵倍訓齊。城堡此時歸鎮靜，朝廷自昔重招攜。坐收勳業光彝鼎，入拜恩私寵介圭。文武兼才緣已試，父兄前烈不難躋。却慚主帥經三易，幕府徘徊守故棲。

送趙龍圖赴成都

禁中延閣龍圖貴。天下名藩益部雄。紫詔一開雙渥澤。錦城重入五春風。公自御史使蜀距今出守凡五年矣吏民望拜行塵外。父老喧迎氣喜中。猶指繡衣前蜀使。宛然綠髮少文翁。獨當明主新才選。應記先朝舊諫工。蘇息兩川遺惠在。撫柔千里宿心同。旌旗每順遊人出。樽俎寧容座客空。卻恐江花尋未徧。已除刺史作三公。

送張龍圖赴益州

天子首除全蜀尹。今上初即位公首拜此命近班親問治才長。輔臣皆曰明公可。出守當令遠俗康。擁節兩川曾不擾。剖符千里定爲良。圖書溢目延丹禁。印綬垂腰制一方。紫誥忽來雙雨露。城錦重五去星霜。望塵騎走兒童竹。夾道壺傾父老漿。坐嘯樓臺萬山碧。行春車馬百花香。西南每往臨藩屏。前後多歸入廟堂。那比小侯論歲月。卽陪元宰燮陰陽。無勞青史誇京兆。今代成都有趙張。公實代趙

僊姑馬上回見野塘荷花盛開感成短篇

波面參差萬萼紅。直憂絳蠟日邊融。卻應絕艷無仙骨。何事清香屬釣童。綠芰間成新樣錦。畫船撐動亂霞叢。便能移植金堤畔。早恨曾淹濁水中。一等生成勞化匠。獨教榮落對薰風。逢時得地俱難偶。自古賢才與爾同。

送孫公素機宜書記赴太原劉龍圖之辟

夕樓清嘯卻妖氛。越石并州晉史云。威望裔孫行破敵。美名才子去從軍。關榆礙馬陰初合。塞草迎人綠

自薰幕下清吟消日月。樽前壯略起風雲。尋常喜論兵民策。尺寸羞銘將吏勳。頃歲金門同獻賦。劉公素實
年進平時玉帳暫論文。早傳尺素頻來魏。莫待飛鴻晚過汾。誰問何官一書記。十年閫制自當分。甫送高

送知府余少卿

朝野清風五十年。更留政績與民傳。全家只飲東陽水。自古無如太守賢。手把耕犁農業勸。足投庠校士
風遷。弗容惠愛終三載。倍使罷窮戀二天。來暮井閭存昔誦。去思亭觀有新篇。傾城幼艾方遮道。盡日旌
麾不得前。塵土想趨層闕下。夢魂猶憶兩溪邊。吾君正欲登耆哲。未放收身到地仙。

送記注楊學士被詔赴闕

學士聲光壓並遊。詞源浩蕩浸崑邱。九重紫殿三題就。萬里青雲數刻收。天子臨軒名第二。春官奏卷等
俱優。翰林試筆尋揮寫。冊府譌文倏校讐。京邑紛華非所好。鄉邦偃息得其求。始看別酒傾同舍。早聽讜
謠載兩州。嚴詔飛來批鳳尾。近班歸去立螭頭。一年父老漫留寇。四世公台將至彪。即日金鑾開步武。往
時駟馬減風流。蹉跎舊掾瞻行色。漸老從軍祇自羞。

孫曼叔待制安撫至陝西先以詩寄

不同四客老商山。朝出東宮暮近班。鵬翼豈容時暫息。龍鱗只自歲餘攀。身猶侍從先康濟。心與生靈共
歎艱。郡國上聞愆雨澤。朝廷四顧動天顏。凌虛禁閣違登降。觸熱輶車事往還。赤地相望千里外。清風一

洒百城間。誰知奉使今持節。比見從戎昨過關。漫學彈冠貢公喜。鬢毛蕭颯欲投閒。

送張如瑩

柏城親見五雲飛。歸奏嚴宸侍玉墀。重得三長專筆削。新遷八座總綱維。却緣關輔初通屬。便向齋壇去把麾。暫使文星歷東井。方資遠略控西陲。乖崖今覺談諧驗。清獻但容龜鶴隨。李丞相以尚書議論剛正。故併及之。巫峽風高送帆席。錦江春動照旌旗。臨川略應漆刀夢。宣室行聞盛德詩。看取鋒車卽西去。巖廊正欲聚皇夔。

依韻和志國首夏霖雨之作

平溪雨漲欲過人。垢土浮泥苦寄身。但得薰風如舜世。未應大水似堯民。淵魚弄沫知生樂。林鳥啼餓與死濱。急浪橫流成浩蕩。陰雲狂態轉紛綸。盃觴自好消長日。草樹猶疑泣晚春。杖策北園尋傲吏。葛衣飄洒任吾真。

送運使李工部自陝西移益部十韻

近取河湟議出師。公才正合濟今時。朝廷好問平戎策。郡縣無勞諭蜀辭。蕭相餽糧看仰給。馬卿建節忽西之。未容歲課關中奏。卽聽風聲劍外馳。壠雪欲飛行路片。江花應發到官枝。桑麻蔽野居民富。錦繡連臺雅俗熙。萬井謳歌饒樂事。百城財賦省文移。就更使部雖云速。入用王朝固未遲。緣鬢貴名由衆論。青雲舊物是台司。東歸馬首須迎賀。爲感新來國士知。

韓魏公生日三首

致身時位俱云得。同體君臣繫所遭。仁廟自從延輔弼。聖孫相繼委鈞陶。早辭十載調元鼎。尙擁頻年出帥旄。白首未嘗安富貴。丹心愈更事勤勞。曾無半語矜功大。猶有流言忌德高。皎皎忠誠通日月。悠悠險計息波濤。由來正直陰須相。此去勳名勢轉牢。伊昔初秋降中甫。於今外牧滯蕭曹。恩頒天廡雙龍種。賜及家庭一鳳毛。再拜奉觴何所祝。願公三熟見蟠桃。

新秋再宿微涼兆。間氣生才歷世稀。綠髮文章驚紫殿。青雲事業照黃扉。力陳社稷安危計。首幹乾坤造化機。一相鴻圖三聖倚。兩扶龍德九天飛。勳名屈指中階少。富貴抽身北道歸。翁子鄉邦纔得請。鄴王臺觀已增輝。擁旄欲去觀民政。仗鉞俄來統將威。信令指揮千帳帖。仁恩涵養百城肥。西方幾月留旌節。南面終朝待袞衣。入幕最容孤跡早。捧觴尤抱寸心微。初逢誕日稱公壽。長願台星輔帝暉。考近汾陽功更似。德攀衛武道猶非。洪鑪物品常無滯。翹館羣英永有依。拜賜韋賢車服盛。元城傳詔到庭闈。玉勒雙牽名驥鬣。錦章輕疊瑞麒麟。三朝丞相迎恩賜。萬歲君王寵誕辰。將命綵衣宣漢禮。拜嘉香案望堯仁。太平致去今無迹。造化裨來昔自神。社稷一言嘗定策。色辭九鼎但垂紳。乾坤不負謀謨力。日月難磨富貴身。封國連紆六金印。鄉邦阻駕兩朱輪。行追前訓還英袞。再領羣生入大鈞。聊借壽樽傾北海。久叨賓館祝平津。却應從此天文裏。遂指台星作老人。

王尙書生辰

肅時霜氣凝良月。近晦星精降慶閭。弱冠文章驚殿幄。青春富貴絕朝裾。安危倚注心逾壯。中外翺翔髮未疎。禁職榮兼三學士。選朝尊冠六尚書。別都宮闕留魚鑰。全魏關河入隼旗。輔相合逢先帝久。君王今用舊臣初。日邊紫誥來朝暮。天下蒼生待慘舒。身與太平功業老。康強衛武百年餘。

兩浙轉運使呂少卿輓辭

卿月無光沒使星。屬封淚涕逐霜零。敝褐舊服從身歿。素節清風到目暝。澄汰濁流師孟博。誅求橫賦罪延齡。塵埃尙父當年玉。寂寞韋賢弈世經。千里九秋傷旅襯。一門三相起家庭。誰提大筆書功行。爲激貪夫作美銘。

祠部集卷十二

五言絕句詩

暮春伯憲留飲席上走筆戲成二首

春從花際來，卻向天邊去。
鶯蝶空徘徊，尋春不知處。
春去無多日，勤來把酒卮。
殘花聊點綴，猶勝對空枝。

次韻和純甫遊寶掌遇雨

遊騎來逢雨，寧全是折磨。
純甫有天山神應洗路，恐惹俗塵多。

穴泉

泠泠西穴間，終日滴甘乳。
道旁渴者多，切莫飲豺虎。

龜峯

一峯如龜橫，得自禪翁說。
衆山迤邐來，宛然此前列。

有待

來時簾捲盡，坐久竹移陰。
有待無消息，南窗睡興深。

七言絕句詩

立春二首

待得春來解病顏。東風猶細北風頑。未金青帝行新令。臘去元須浹日間。
菜絲生葉落雕盤。欲去春衣怯曉寒。惟有多情雙彩燕。不須風暖舞釵端。

楊公濟以詩索粉紙依韻和答

春雲落紙不歸天。就把霜刀翦四邊。欲送草堂還縮手。少陵慣見浣花牋。

二月二十六日偶書

舊年把酒對花頻。酒氣花香日傍人。今歲酒疎花未見。惟將感淚濕青春。

三月十日作

一病十日不出門。坐銷芳意疎清樽。今朝騎馬探花去。枝上十空無一存。

暮春晦日

綠陰輕處記春蹤。芳草雖殘飲興濃。明日清和天更好。不須愁聽曉樓鐘。

視林失詩編信筆

唐子能詩世一家。不矜纖巧剪天葩。直闕六義追風雅。世上騷人漫葦麻。

書香山寺壁

精藍孤絕亂雲間。雲外疑無路可還。願我塵喧非白傅。緣何今日到香山。

張升甫惠新筍走筆代簡謝之

粉籜迎霜嫩更勻。中廚未有許嘗新。明朝便好供佳客。只恨杯羹欠紫葍。翌日當
屈升甫

升甫旋和答復走筆酬之

嫩籜斑斑玳點勻。圓膚細細玉條新。渭川美實容先食。卻向秋風懶憶葍。

公度惠花走筆戲謝

二月都城未見花。不知春色落誰家。滿盤折惠情何重。略嗅生香思已嘉。

送王審言供奉

飛花幾點送春餘。執手春風意慘如。一見相歡露肝膽。莫因別後卻情疎。

送石師正

馬蹄南出都門路。行客少年春色暮。花片空隨別棧飛。柳條難繫征鞍住。

禽鳳二絕

擊搏微禽拙自防。網羅須觸是尋常。不知利觜鷹揚處。卻漫喧啾怨鳳凰。
鳳凰只是瑞時鳴。邂逅千年或一聲。不比喧啾爭巧舌。微禽何苦蓄疑情。

次韻酬禮之見贈

爲吏淮壩歲歛周。不如當日傲公侯。今君亦欲折腰去。遇好雲山且勝遊。

次韻遊山雨中

飛飛烟雨惱春遊。幾許餘花水上流。獨有佳人折殘艷。歸來滿插鳳釵頭。

寄縣學方晦之

素志青雲已帖然。風霜苦處涉層巔。不如未第方夫子。獨抱遺經議聖賢。

戲書保安院壁

僧言此寺從唐建。冠蓋無人一到來。還似長官居僻邑。不逢使者枉行臺。

辛卯七夕悼往

憶共佳人曝繡衣。餘香如昨舊歡非。鵲橋雖別年年在。猶勝嬌魂去不歸。

聞馬公節裴光世別頭入試偶成

憶昔丁年力戰文。旁吞強敵若無人。鄉書果在諸生上。二子今誰躡後塵。

偶書淨信院壁

繫舟曾訪遠公廬。游屐重來一紀餘。惟有湖山如往日。懶將前事問禽魚。

松江別吳伯強

底處與君長笑歌。夜舟醉漾松江波。君帆今夕不我住。其奈一江風月何。

盧申之以惠山泉二斗爲贈因憶南仲周友二首

舊年拂石坐松陰。曾與周郎共訪尋。淪落人間少知味。一逢瓶榼便傷心。
文園病渴酒難澆。望見南泉意已消。買得茶來無銚煮。只將清冷送箬瓢。

奉和堯夫

固窮終不悔沈淪。滿腹深藏上古珍。手寫新詩成幾卷。亦教餘事照千春。

過伯樂廟

廟下孤墳儻是非。壞簷仄柱若憑依。門前過馬空驥首。那得當年一顧歸。

開元寺仁王院見叢竹偶書

一別琅玕數畝陰。七年飛夢繞家林。北僧好事猶能種。偶向塵埃洒寸心。

太陽嶺

高侵寥廓勢盤紆。倦足登時每一吁。方寸人心猶有險。况教廣地盡平塗。

苦旱二首

壩上痿人臥稿苗。頻年郡國訴諸朝。雨師不爲蒼生起。只縱晴虹作旱妖。
赤地關中帶幾州。濁涇清渭總如溝。野農不省天時晚。猶禱閒神望有秋。

承乏幕府晨出馬上戲書

五載青衫走兩都。始作開封掾今爲縣元城北門宦緒更區區。馬鞍出帶殘更夢。卻是雙飛鄴縣鳧。

朱郎中以梅花衣香分惠諸君皆有詩謝依韻和之

百和殷勤出省郎。清真似有雪中香。風流不在金爐煖。自轉餘薰到錦囊。

望思臺

一朝木偶發深宮。父子恩隳暗曖中。不見戾園埋恨處。至今草木有悲風。

溫泉

壯觀悲涼舊迹存。蓮花泉暖至今溫。行人莫罪無情水。一笑華清是禍源。

依韻和溫泉

上公分陝半年餘。駟馬東還不待驅。肯獨澡身湯室裏。行推潤澤浹肌膚。

寇參軍九日惠詩以左馮翊趙監所遺玉液一壺并詩答之

久傍嚴公趨玉帳。近蒙賀監解金龜。一壺分助登高飲。客宦長安共此時。

九月十日龍興寺飲餞蹇礪翁赴梁門酒半題名南軒因偶書屋壁

昨日曾來把酒卮。隔宵已過菊花期。回頭一笑成陳迹。不獨秋香有盛衰。九日與府中諸君會此

又自和二首

萬事人間若漏卮。喜情常滿固難期。卻將昨日樽前菊。零落金鈿已覺衰。

好把悲歡付一卮。明朝北客有行期。勸君莫聽驪駒曲。只恐催人兩鬢衰。
寇參軍以孤鴈一絕見貽因酬之

紫塞來時偶失羣。追飛已隔萬重雲。人情所喜惟朋附。耳聽狐鳴似不聞。

依韻和栽花二首

前後殷勤選衆芳。名園移植總成行。要須花笑春風裏。次第迎公入醉鄉。
移花新了詔書來。似負迎春著意栽。桃李我公天下滿。不須偏待此中開。

宋周士以新輩爲惠并示佳句依韻和答

食蕈由來勝茹芝。十年此味望晴霓。雕盤細簇春雲朶。惠我殷勤助殺雞。

醉中劉道叔尹嗣復李子先垂和予乙巳歲開元寺仁王院詠竹二十八字。復依元韻走筆答之。
喜弄吟毫倚翠陰。也應新筍更成林。感君瀟灑賡詩句。不負凌虛一寸心。

韓及甫惠陝梨走筆書句謝之

霜後瓊漿味轉饒。關山封寄路迢迢。分甘珍重知君意。應爲相如正病消。

李景初許借剪綵花數軸一觀累日不至戲成二絕督之

壺蜂蛺蝶日徘徊。只欠生香去復來。應是春風隨玉指。剪刀行處一花開。
剪綵茸茸細逼真。秋風堂上數枝春。爲偷造化防天覺。却擬深藏不借人。

病中雪夜聞韓六祕校會諸君二首

玉色乾坤無一痕。暮寒慘慘入千門。自憐司馬方消渴。不得攜詞醉兔園。別都觀閣玉欄干。尤稱褰簾把酒看。唯有三冬多病客。擁衾時聽葉聲乾。

庚戌仲春十二夜同無愧飲林夫西窗有感

憶聽西窗一曲歌。金杯未盡轉橫波。酒徒依舊歌聲斷。今夜西窗奈我何。

走筆依韻和酬王彥霖四首

幾度春風信陸沈。曾題醉筆寫花陰。詩情不復隨風亂。今日花前對展禽。感舊情懷日日深。三春能幾半晴陰。醉題難盡當時意。啼徹春風羨暮禽。夫子人間第一流。清言暫隔已離愁。今朝偶負尋春約。詩思勾牽未肯休。不住年光袞袞流。鶯花漸老使人愁。鶯猶可聽花猶在。再卜他時一醉休。

和司徒侍中同嘗梨花

膜花急把玉交杯。風掃殘香已幾堆。酷愛豈唯公假借。慣曾御苑見花來。

聞無愧夜會二三君子戲呈二十八字

燭邊醉臉擬融酥。盞畔歌喉欲貫珠。應念東家多病叟。靜披寬褐擁紅爐。

坐客宋周士忽垂光和復用元韻答之三首

魏臺營妓勝添酥。一笑堪酬百琲珠。只恐更深雲雨散。明朝共是守寒爐。
風流雙腕轉凝酥。舞徹伊州汗有珠。探手始知簾外冷。照堂獸炭焰闌爐。
誰云燕趙敵瓊酥。何似君家一綠珠。酒罷獨歸香閣睡。也應蘭麝早添爐。

謝和詩

窗外家僮遑疾呼。開門滿幅把明珠。驚回一覺無聊夢。猶有寒燈守藥爐。
上詩惠酒有謝

登高無具結懽悰。狂寫愁吟叩主翁。邊荷兵廚均美釀。卻將醪酎謝西風。
暮角

畫角悒悒清且哀。古今曉色此中催。可堪絕塞風霜苦。還傍將軍玉帳來。
和司徒侍中舟中再賦一絕

燕子迎船帖岸飛。波光流色日輝輝。都人倍戀行春樂。只恐恩容畫錦歸。
河亭戲題

黃沙袞袞激洪流。白舫人羣雜馬牛。卻憶春風湖上月。畫船載酒鑑中遊。
馬上見庭竹

玉圓碧瘦與誰期。只待丹山綵鳳飢。生傍短牆真失所。可憐直節衆人窺。

席上戲成

玉溪一別十年餘，北綰銅章西辟書。寄語湖山好相待，蒼顏歸日駭禽魚。

勾院偶書

一坐閒窗百慮清，門前寵利自營營。官書既少人喧息，唯有嚴風戛竹聲。

謝元功惠茶

長卿病肺渴欲死，宰予寢興晝復濃。綠雲杯面呷未盡，已覺清液生心胸。

謹和答惠茶之什

綠雲浮面味回長，每飲疑兼盛德香。不獨獨煩優下吏，更容歸遣細君嘗。

九日有感二首

每歲登高盡醉歸，未曾輕負菊花期。今年枕上酬佳節，感淚雙痕落似絲。時屬疾頗久

憶昨方陪上相筵，召書忽到菊杯前。主人舉酒勤令飲，一醉秋風恰二年。壬子歲丞相登高筵上，余被堂

不比蘇府得縱飲矣

甲寅立春夜雪

迎得新年送臘回，一朝生意動寒荄。玉塵後夜籠金闕，元是春風帶雪來。

謝春旛

曉策羸驂趁謝恩。君王昨夜賜春旛。塗金剪綵雖云異。競戴還同拜禁門。
張文通以詩覓小桃走筆依韻和答

名園聞說洛陽春。金谷前無石季倫。第一牡丹應慣見。憐君翻作覓花人。
文通復用舊韻相示仍走筆和之

花前直判醉酬春。飲量慚非劉伯倫。折去也應顏色在。不知誰是戴花人。
牧養監閱馬

骨瘦誰知驥駉名。駑羣平視圉夫輕。夷塗好在重驥首。喜見今年春草生。
陳伯成學士垂訪以病中新浴不克見走書二短篇謝之

時情逐勢餌邊魚。貧病由來俗易疎。何事太邱真有道。炎天問病到貧居。
病膚新浴覺神還。散髮支頤一室間。豈敢不冠延重客。空將感抱寄慚顏。
別戶部勾院竹

一來省戶兩春暉。今日飄然襍被歸。直節真心惟我愛。此君相別似依依。
泛湖有作

不比危湍急瀨船。平湖慢槳恰相便。蓬飄萍泛真吾事。舞袖歌鬟付少年。
贈芝公長老

我愛師開方便門。聞人有疾足先奔。何須端坐禪牀上。始是如來不動尊。

閒卿遽然云別因書二十八言奉送

禪翁爲我出巖扉。坐席纔溫便拂衣。又道孤雲無定所。如何卻傍舊山歸。

閒卿遽垂和答復依元韻戲之

師怨白雲相望久。師有白雲教撒然便欲攬征衣。其如飛雪能留客。不放禪翁及早歸。師有飛雪

詩餘

漁家傲 梅影

雪月照梅溪畔路。幽姿背立無言語。冷浸瘦枝清淺處。香暗度。粧成處士橫斜句。渾似玉人常淡佇。菱花相對盈清楚。誰解小圓先畫取。天欲曙。恐隨月色雲間去。

祠部集卷十三

劄子

代轉對劄子

伏觀朝堂曉示。近降中書劄子。奉聖旨。臣僚已授差遣。並令依例朝辭。許當日實封轉對文字于閣門投進者。臣身在冗列。特其心思有所補。欲一進狂瞽之說。而厥路無由。今乃承詔得自獻其愚。茲不可常之遇。然而不以二帝三王之道陳於前。是不以堯舜文武望吾君也。臣竊謂致治之本在用人。用而不得其當。如弗用。徒有所累而無益于治也。故其先論用人。且廣容德。達衆志。宜莫如聽言。聽之不得其審。而是否參用。則累于聰。故其次論察言。夫巧僞興則誠實廢。天下之俗將相率而趨于詐。故其次論所以矯士風之僞。又聳士大夫之節者。在遇之以厚。倘進責其節備。而退待其身薄。則賊恩而無勸。故其次論所以措老臣之宜。今臣之所陳。敢不以堯舜文武之道有望于陛下。是故竊不自知。輒冒不赦之誅。著篇于左。惟陛下垂聽而擇焉。

論用人

臣伏觀陛下以聰明睿智之德。臨有重器。方銳然垂意于大有爲之際。躬攬萬化。乾剛震烈。以權以斷。凡事有所以宜于人者。朝思而夕行之。不持循而固守。雖前世已行之熟。未嘗或憚改。天下懽呼鼓舞。拭目

以觀聖人之作。而跂踵以待極治之成。謂按資計日。不足延卓異之士。而責非常之效。或左右一言以爲材。或偉辭高論。自合于上意。則超然置于平進之上。而不復限常序。在聖君求才之心爲得矣。奈何未聞有奇功顯業。取稱朝廷之所以寵異。而聳動衆人之心。使之歆羨者。不惟不如是。又人人有不自滿之色。而翻憤其躋已。且興勸之道未一得。而奔競之風已四起矣。借如某士以計進。既越千百人。而處之金穀。要劇之地矣。經費一有不給于內。民力一有屈竭于外。方是時也。宜倚辦斯人。果籌畫有以應猝。而財用由其所自出。雖日遷之職。人不以爲過。其以文學政事進者。類試之若是。惡有不服者歟。今則不然。取其名不責其實。始以此進。而終不以此試。又冒虛名而受實用者。或其中無以異衆人。欲人人自安其分難矣。且不得知于左右。則不能自達于朝廷。計資級累日用。則不能底富貴之速。以是走公卿之門。惟恐足跡之或後。望廉恥之長。而奔競之息。抑難矣。持甚高之論者。未必無甚卑之行。騁喋喋之辯者。未必有犖犖之見。言之不可必信也。如此噫。虞舜之智。非不及其臣。又命之以九職者。皆當時功德易見之人。猶咨俞曲折。以盡羣臣之可否者。知獨見不足以取人也。矧一言以爲材耶。既奏以言矣。而復試以功者。知徒說未足以明其效也。矧一論之偶合耶。臣愚以爲取人以言。則詭辭巧辯者出。以希一時之合。曾無益于實也。進人與其失于速也。寧緩。進真才失之緩。其德章而不可揜。終爲國家用。若庸才誤速進也。徒激不如已之憤。而于誼無所勸。然則若之何其可用。人法虞舜斯可也。

論察言

臣竊以聖人體不降几席之上。而聰明隱于旒纒之內。凡天下臣民事物之情。洞然若家至而目見者。由廣問以得之也。問之者廣。則言之來無窮。君子小人有時而雜吾聽也。用其言不善。則失之於跬步。况其遠者乎。得失之機。在用君子小人之言耳。惟君子者。其言初若厲己。而終有以利于行。故聽之者難也。不必效于近。或有驗于遠。以爲闕于用也。小人則不然。其言逢意而易入。行于遠則泥。措于近或通。以爲切于理也。其有所愛。必有所是。其有所惡。必有所非。而是非未嘗牽于愛惡之私者。君子之言也。以愛惡而移是非。其情僞卒莫可見者。小人之言也。於戲。問之非艱。受言之惟艱。受而察之。又其艱也。昔虞舜所以獨稱大智而後世弗可及者。由好問而察邇言也。既好問矣。下情其有不通乎。又察言矣。是非其有不自乎。故其智塞乎天地之間。而莫與較其大也。恭惟陛下達萬化之變。而不自以爲神。燭百事之隱。而不自以爲聖。舍己稽衆。畢采羣說。由公卿以及于百執事。莫不人人爭竭其慮。言路開而治道行矣。然而惟君子與小人。其言關乎得失。方聽納之際。臣願陛下有虞舜之察而辨之。在早使大公至正之論行。而不爲巧辭邪說之所勝。則其爲智愈大矣。

論矯士風之僞

臣伏聞聖王在上。莫不欲明德厚俗。所以教化醇而習俗媿者。由先正天下之風。其風正。願有蹈非其道者乎。臣竊觀急賢願治。未有如今日之切。而作僞成俗。亦未有如近世之盛。方陛下寤寐咨訪。思得惇實樸茂之士進。以爲風俗之倡。有人焉曰。仕者有某士。處者有某士。其爲人也。性恬而操的行淳而質茂。固

外物無所累其內。公卿以言諸朝。而朝廷用之。不待班次。天下之士知上之所取者以是。則有隱爲沾激。求聞之計。而陽爲靜退不競之行。其心惟恐爵位之不高。而其言惟恐山林之不深。至於矯情飾貌。以譁衆動俗。及名成而計得矣。而意有所未滿。且懼進之不加速也。則又有斬閒願退之請。以邀乎上。其請數者。其寵益固。小詐則小得志。大詐則大得志。後來者務勝于前人。愈假不可及之言行。以濟其詐。朝幸進而暮失其所守。浸淫誕謾。天下日入于僞而不知止。此風遂肆。欲望俗化之厚。其可得耶。噫。巧言令色。不容于堯之朝。今士僞其行。豈聖世之所宜有。夫欲矯之使正。豈曰無術。且衆人曰。某賢矣。其行淳。又不苟乎進。必考其實。果非矯妄以疑世。又有可進之勢而不進。是真賢者也。然後進之。又其退也。聽其所自退。則真退者出。而士之言行進退。皆誠天下之俗。其有不歸于正乎。

論措老臣之宜

臣伏聞惟聖王能養臣下之節。其進而使之也。旣以禮。及其退也。又示之以不忍輕去之心。然後人知自重。而不失去就之正。惟其去就之不失。所以廉恥興而風節完矣。古者大夫七十而致仕。是老者必自告於其君也。若不得謝。則必賜之以几杖。是臣雖告老。而君或不聽其去也。老而必以告者。知耄將及矣。卽有萬鍾之享。不可得而戀。以安吾義也。告之而不聽其去者。彼誠老矣。而力若可勉。猶當強而祿之。以終吾仁也。近世俗澆薄。廉恥不行于衣冠之間。或醜然忘其齒髮之衰。筋骸之憊。貪進而不知止。至有其身嘗用于國家矣。一日老與疾相會。怙怙然求涖閒局。以不得請爲憂者。有自蔽其狀。告上以不疾。至放之。

田里猶惓惓然有乞哀不欲去之色者。噫！仕而至于老且疾，可去矣。然猶不去，以自辱彼固不足惜也。但少盡其力而老，無以容其身。其在仁政，抑恐有所累爾。今夫四海之廣，百官之富，若此等輩，豈不容有耶？故疾則賜之告，以冀其萬一之安。老則置之散，以養其不復久之歲月。免斥歸之名，則疾者無所愧。獲易得之祿，則老者無所憾。然後全進退之體，以示夫不可輕之去就。顧老而疾者，既愛之若是，則少者勉力而無卹于後矣。風節其有不完者哉！昔在三代之治，惟周家所以號忠厚者，獨此養老之爲備。成周之養老，果復行于今日，臣不勝大願。

右謹具如前是四篇者，倘竭臣愚區區之忠，曾不足以仰輔盛德之萬一，干冒宸嚴，臣無任激切屏營之至。

代唐公乞錄用魏鄭公裔孫劄子

臣讀唐史，見魏元成之輔太宗，能盡忠切諫，卒致貞觀之治。所以後代欲治之主，知納諫爲先，是其功不止一時，而實及百世。此其裔孫，乃夷民伍。又本家見執前來，州縣判憑，得免差役。今乃一刺義勇，一充衙前，真可憫悼。欲乞朝廷，特與家長道嚴一官，仍免本戶差役。庶使爲臣者，聞異代忠賢之後，猶蒙獎錄，則今日能忠于朝廷者，誠有所勸也。兼臣據魏道嚴齋到遠祖處哲，治官告二道。處哲，乃元成之孫。治，乃重孫。今道嚴等鄉里在臣管下，既再有敍陳，合具敷奏，取進止。

代孫待制乞郡劄子

臣學術淺陋。始備東宮官屬。陛下睿德自廣。無有所補。洎六飛在御。首蒙拔擢。置之近侍。恩榮兼極。獨母老懷鄉。日夜思去。臣方受命西陲。不敢卽以私計妨公事。今已事歸闕。是敢輒干宸聽。臣欲乞某處一郡。遂老母思鄉之心。又得以二千石之祿。侍奉甘旨。乾坤恩施。莫此爲大。臣非不知荷陛下生成之德。有逾父母。遠闕庭咫尺之地。則戀清光。蓋臣事陛下之日長。而事親之日短。伏願陛下憫烏鳥區區之情。特賜俞允。

代乞徐州劄子

臣近三上章。乞就移徐州。伏蒙聖慈。遣使降詔。不允所乞。豈惟恩禮之重。懼弗克稱。伏讀睿訓。尤增悸慄。始者地震北道。民流去四方。朝廷以四路綏御之柄。全屬臣。臣于此時勢有可辭。而不以爲辭。今災震既息。流徙旣復。民和歲穰。幾至無事。而又去三路之煩。而就一道之簡。可以無辭矣。而辭之由。外而觀臣。則有若所爲倒錯。而闔安已甚。在臣自省。則以爲前日之不辭者。力猶可勉。今日之必辭者。疲不任劇。若猶處此。則上不能勤宣陛下利澤。下不能深究兵民疾苦。中不能完養老臣久衰之氣。是朝廷重易臣一州。而俾臣負三不能之患。恐非所以厚仁。思念舊物之本意也。臣識具材術。無足過人。如天性所得之多。私心自信之篤者。惟至誠樸忠爾。今臣以樸愚之誠。叩陛下。倘陛下垂聽而哀憐之。使養疾僻州。避遠要劇。物性得所。自然安和。天地之恩。有如今日之再造。犬馬之力。敢忘異時之少施。然臣尙有餘懇。謹附陳其口奏云。

代乞邢相劄子

臣近以連年被疾。三曾奏乞就移邢相一郡。今月二十二日。某官齋到敕告各一道。伏蒙聖慈加恩。再任者復司筦鑰。仍換節旄。恩與願違。敢畢愚懇。伏念臣久勞多病。日瘁一日。而猶遲回強勉。不敢亟去。甫及二歲。然後決請於朝廷者。重辭陛下北顧之託。冀憫其日月之久。而筋力不支。有可去之理。今乃蒙改恩遣使。再委重寄。丁寧賜諭。不許訴免。上心圖舊。雖至優篤。在臣愚分。義實難處。且前臣之所以辭。是力不勝劇也。若今日之所以受。是有邀而貪得也。名爲辭劇。而實在邀得。此非事君之道也。陛下卽哀臣旣憊。不忍遂廢。猶當置之閒郡。俾資醫藥。心休體佚。自有生意。犬馬未斃。尙効餘力。矧北門衝會。非養疴之地。倘再勞歲月。或殘軀不能保。是寵之適足以害之也。恐非所以愛老臣之意。伏望陛下特回鑒照。曲全衰朽。就移邢相一郡。使便調養。形骸雖荼。苟完復之。有時溝塗未填。免哀憐之已晚。罄輸血懇。決俟矜從。

代謝宣賜劄子

顛飭使指。肅將恩賚。踴然拜貺。感懼交集。伏以仁廟在位四十二載。神功聖烈。貫蔽天地。善美衆鉅。莫可勝紀。此書之成。雖曰浩博。若論次本末。則官吏協慮。照定是否。則仰憑睿鑒。臣於其間。夫復何力。而中金上幣。文韉良駟。謂酬薄效。殆虛寵數。此蓋伏遇皇帝陛下。紹休鴻業。推廣孝治。維時文祖。垂光典冊。終篇奏御。親紆省覽。凡一時秉筆與夫典領之臣。匪頒增秩。以至降詔褒諭。莫不務極優渥。以稱聖孫。所以奉揚祖德之意。罔功被獎。以榮爲愧。乾坤恩施。何以論報。

謝刷蕩劄子


人君之言格諸天地。吏民同聽。孰不感悅。恭惟皇帝陛下卽位以來。孜孜政化。常欲置刑不用之地。而下民多辟。自抵邦法。雖深居鑿濶。而猶軫萬方有繫繫之幽。每歲獻暑。降詔矜恤。堯仁禹泣。何以尙之。臣職在長民。不能諭陛下欽慎之意。俟丁寧而後知。則臣之過。宜無以宥。謹當奉行德音。夙夜自勉。庶幾獄無留繫。吏無濫罰。以副聖君慎刑之心。此臣區區之願也。





3
4
1894

祠
部
集
三



叢書集成


初編

主編者
王雲五

商務印書館發行



祠 部 集
(三)



3 0649 7729 5

強 至 撰

祠部集卷十四

表

賀乾元節表

伏以維夏肇和厥月幾望。訢是穀旦。實生聖人。罄率土以騰懽。比南山而稱壽。恭惟皇帝。肇洪基于不拔。億萬天算。綿景祚于無垠。臣無任瞻天樂聖。聳躍歡呼之至。

賀壽聖節表

伏以陽春之首四時。既謹書王之始。月魄之成三日。聿臨誕聖之期。罄海寓以騰歡。擬岡陵而薦壽。恭惟皇帝。陛下心游道秘。躬攬乾綱。晏然享函夏之歸。坐以須大昕之旦。雷霆號令。常必信于四方。天地生成。曾靡遺于一物。躋時極治。與古同符。會歲籥之更端。紀電樞之啓瑞。大開路寢。普見羣臣。萬笏稱觴。前祝無疆之算。八音奏雅。間歌既醉之篇。喜動明廷。事光甲觀。臣比司留鑰。久去從聯。未望清光。敢嘆周南之滯。阻陪盛禮。第勤嵩極之呼。

賀同天節表

伏以日御盈旬。風薰報夏。高厚協贊。聖神挺生。慶節誕臨。懽聲四起。伏惟皇帝陛下。續烈淳耀。宅心太清。



083

1124

21825

祠部集

卷十四

一八七

濬堯思之欽明。懋禹躬之勤儉。清和首月。震夙丁時。六五帝以御圖。傳祖宗相授之業。億萬年而享祚。對天地無疆之休。臣適守宮符。阻陪廷著。第罄岡陵之祝。一均海寓之情。

又

粵若首夏。肇惟浹旬。是生聖人。克享天命。傳祖宗相受之業。六五帝以御圖。竭臣子仰祈之心。億萬年而慶壽。恭惟皇帝陛下。聖躋維日。德肖乎天。發威斷之神明。藏政機于鼓舞。虹流電繞。臨載誕之初辰。日永風薰。亘無窮之協氣。臣欣逢慶節。阻望清光。適縻北土之居留。徒罄南山之頌祝。

又

伏以火德兆時。協契景炎之運。虹光薦瑞。挺生睿哲之姿。慶節誕臨。懽歌四起。伏惟皇帝陛下。德符乾健。治對離明。性循仁義之行。躬發神明之斷。風薰報夏。日御盈旬。厥月清和。維時震夙。觀文太史。喜逢箕翼之明。稱壽羣工。願等岡陵之固。臣跡遙廷著。守在宮符。第虔就望之誠。阻預歡呼之列。

賀明堂大禮表

精饗告成。湛恩隨布。庶邦聞慶。億口騰歡。竊以合宮之祠。歷代不講。肇自有唐之際。迄于我宋之初。議有欲興。寢而弗暇。邈哉墜典。舉在熙辰。恭惟皇帝陛下。紹三聖之休。御九圍之廣。洪造天冒。盛猷日躋。行教化之所未行。紹禮樂之所未紹。祭典咸秩。治具畢張。謂夫布王政者在明堂。爰脩曠制。示民孝者由宗祀。乃奉嚴禋。逮乎訖大禮于總章。坐中天之嶢闕。追肆赦于往古。許自新于吾民。靈心願歆。並貺多福。渙渥

汪濊一清賤。牢人神共和。遐邇均幸。臣跡糜守土。籍遠侍祠。第聽德音之宣。阻觀帝饗之盛。

代魏公賀明堂大禮表

伏以聖人爲能于饗帝。並侑五精之神。嚴父莫大于配天。兼風億姓之孝。合宮已事。罄宇蒙休。伏惟皇帝陛下。紹淳耀之烈光。享重熙之盛福。九穀登富。二儀降康。益謹靈心之承。勿專聖德之有。遂沿報本之故事。參講思文之曩篇。旣款殊庭。載假清廟。爰及宗祀。維時總章。百靈居歆。六樂備奏。迺薦鬯之夕。昭格神光之靈。痊幣之時。歛蒙天表之應。思共蕃祉。隨宣湛恩。協氣交流。一均雷雨之施。懽心各得。並泆人祇之和。臣等適聽休成。倍深竊忭。方祇留務。異興歎于周南。莫克駿奔。第馳誠于魏北。臣某無任慶幸。抃蹈屏營之至。

代沂國公主賀表

伏以聖人爲能于饗帝。並侑五精之神。嚴父莫大于配天。兼風億姓之孝。合宮訖事。罄宇均懽。伏惟皇帝陛下。紹淳耀之烈光。享重熙之盛福。念物蕃俗。阜茲二氣。所以降休。謂德大報微。非一純莫可將意。以至微鼓吹。以盡齋容之恪。潔圭幣。以謹靈心之承。臣民欣睹盛儀。隨霑渥澤。兒妾夙蒙睿訓。亟被皇慈。側聞玉輅之旋。誠切素襟之忭。

代婕妤俞氏才人朱氏賀表

伏以德產至大。惟至虔可以上交。孝思無窮。非昭配不能自達。於穆宗祀。維時總章。人祇普和。恩禮並洽。

伏惟皇帝陛下。暢配天之偉績。乘順帝之清衷。乘涼露之感懷。俟旻穹而謁款。玉帛薦潔。粢盛報豐。靈心顯歆。協氣充塞。妾等陶生盛世。玷號後宮。竊觀熙事之成。同慶洪私之布。

賀南郊表

聖人能饗。卽陽位以齋明。上帝居歆。擁神休而孚佑。照臨所暨。鼓舞維均。恭惟皇帝陛下。紹淳耀之烈光。享重熙之盛福。謂俗康物阜。茲二氣所以降休。德大報微。惟一純可以將愨。乃乘長日之至。遙奉圓丘之禋。四海之助各來。九州之力畢獻。高禋上達。昭格靈心之承。協氣旁流。並緣精意之感。祖考參侑。人神普和。臣等顯相待祠。阻觀大報之盛節。歡呼聞禮。第誦思文之彙篇。

又

圓丘肇祀。率土均休。熙事遙成。湛恩隨霈。竊原經禮之載。莫重神明之交。三年親祠。盛王所以報本。列聖參侑。孝子所以奉先。於皇我朝。尤縟往典。恭惟皇帝陛下。聖躋維日。德肖于天。有懷前人。初見上帝。卜南至之長晷。罄中虛之一心。旣款殊庭。載假清廟。遂登蒼壁之幣。祇奠紫觚之營。百靈居歆。六樂備奏。乃薦鬯之夕。神光陸離。升禋于陽。霄寓澄廓。天旋法駕。星拱端闕。鼓舞兆民。普均雷雨之施。壽康丕后。並浹人祇之歡。臣適聽休成。倍深竊忭。忝司留鑰。異興歎于周南。阻從屬車。第馳誠于魏北。

代元厚之給事賀南郊表

躬行聖饗。遙觀熙事之成。嘉其神休。隨肆湛恩之霈。羣生鼓舞。諸福紛綸。洪惟盛朝。參用往典。報德產之

本所以三年一郊。盡孝心之思。所以四聖同侑。恭惟皇帝陛下。紹烈精之淳耀。承累洽之休期。聿懷前人。初見上帝。卜日南之長晷。祠地上之圓丘。百靈居歆。六樂備奏。乃薦鬯之夕。昭格神光之臨。升禋于陽。歆蒙天表之應。旋鳴清蹕。還御端闈。協氣交流。普均雷雨之施。懽心各得。並浹人祇之和。臣久去從聯。比塵使指。阻肅雍而相祀。第抃蹈以馳誠。

代沈兵部賀南郊表

竭精意于圓丘。熙成祀事。浹歡心于率土。霈發德音。凡在周行。維均竊忭。國家順稽古道。參用禮經。以天地大神。有廣生之惠。祖宗故事。存並侑之文。乘三年之親祠。追四聖之嚴配。恭惟皇帝陛下。濟躬乾健。至德離明。自臨皇路之尊。肇奉紫觚之饗。謁泰壇而徧乎道祖。假清廟以極乎孝思。力畢獻于九州。助各來于四海。陶匏有踐。幣玉普登。神明相交。禮樂並作。高禋上達。通肸蠁于靈心。協氣旁流。格紛綸之瑞應。於昭景貺。以右丕圖。乃御端闈之崇。適孚渙號。嘉與罄宇之內。共沐龐休。臣跡繫朔陲。心馳魏闕。陪祠莫及。拜慶徒深。

賀正表

伏以東國著經。謹春秋之五始。西京講物。覽圖籍于三朝。於皇盛時。尤重令節。恭惟皇帝陛下。欽脩人紀。茂憲天心。七政之察璿璣。四氣之和玉燭。方對時而育物。屬獻歲之發春。星拱臣鄰。稱慶歲元之會。日章聖德。同符歷紀之新。臣適守別都。正遙丹旆。阻預壽杯之獻。不勝魏闕之情。

賀冬表

伏以雲物望書。因豫知于祥禋。天陽來復。方漸發于孳萌。恭惟皇帝陛下。握斗披先。對時凝命。遙臨慶序。翕受鴻禧。鳴玉造廷。儀亞三朝之盛。測圭視日。景同萬壽之長。臣適領守符。方遙陞城阻。預捧觴之列。第虔拱極之誠。

賀皇帝登位表

伏以虔遵末命。光紹丕基。天地同符。人祗共悅。臣聞重華之協于帝。所以陟元后之尊。下武之繼于文。所以昭先人之業。恭惟皇帝陛下。聖躋維日。德肖乎天。性于欽文。躬有歷數。四方所照。適仰燭于離明。萬國以寧。逮獨觀于乾造。荷五聖之謨烈。副三靈之眷懷。臣早預禁聯。久違朝宇。恭聽龍飛之會。阻陪鼇抃之行。

又

大明相繼。景命維新。凡在懷生。孰不稱慶。臣聞帝出于震。品物所以咸蘇。龍飛在天。聖人所以有作。恭惟皇帝陛下。至仁生稟。盛德日躋。孝悌溫恭。發于主器之際。聰明睿哲。廣自承祧之初。人祗交懼。宗社永賴。雲行雨施。矧霽霈于德音。乾端坤倪。率薰蒸于喜氣。臣適提外計。久去邇聯。第深欣戴之誠。阻預懼呼之列。

賀太皇太后受册表

載享尊名。益光令典。欽開大慶。胥悅羣情。恭惟太皇太后殿下。至德靜專。柔儀閑淑。粵嬪仁廟。以位中宮。訖無私謁之心。陰有相成之道。全節鉅美。揜前世之徽音。順子慈孫。續兩朝之孝養。惟是神功之超卓。難哉顯冊之形容。臣逃聽禮成。不知手抃。方居留于北道。阻馳慶于明廷。

賀皇帝爲太皇太后皇太后受冊表

輔臣虔使。奉寶刻于二宮。聖主尊親。廣孝心于四海。恭惟皇帝陛下。寶有重器。勤懷永圖。妙斷日新。睿能天縱。維神幾聖。烈蓋自得于生知。而子道孫謀。乃一歸于慈訓。爰舉極尊之號。以酬莫大之恩。臣適守宮符。遽聞國慶。阻就歡呼之列。第深鼓舞之情。

又

思齊太任。方受尊名之禮。稽古帝舜。益光絕德之風。凡在照臨。率均怵蹈。恭惟皇帝陛下。聖躋維日。德肖于天。念撫毓于清躬。荷愛慈于文母。極九州之味。以爲養。未充孝心。上萬年之壽。以爲歡。自篤恩性。遣輔臣而申飭。奉顯冊以上聞。寶刻燦然。光有司之備物。宸衷祇若。答莫厚之深仁。臣久去近班。側聞盛典。阻歡呼于嵩極。猶繫滯于周南。

又

上崇名于長樂。仰慰慈顏。舉盛典于熙朝。益光孝治。照臨所及。懽蹈其均。恭惟皇帝陛下。獨運乾綱。若稽古道。自臨正宁之凝命。克謹內朝之問安。荷文母之仁深。撫清躬而愛篤。夙厚恩性。比同政幾。復辟踰年。

遂高懷而退處。有司擇日奉顯冊以上聞。臣久去從聯。方恪司于留鑰。阻陪慶列。第延望于明廷。

又

尊名恭上。慰長樂之慈顏。盛禮敷聞。廣中宸之孝治。照臨所及。鼓舞維均。恭惟皇帝陛下。駿命紹休。清衷覃粹。懋聖人之至德。仰事內朝。大文母之徽音。寅加顯冊。飭輔臣而虔使。奉寶字以尊親。能報厚恩。豈止三牲之養。載光大號。可形四海之風。臣適處外臺。正遙丹旆。激懽誠而尤劇。就慶列以無從。

賀皇太后受冊表

寶文溫厚。奉國典之休稱。聖孝尊親。極母儀之大奉。遙光盛禮。增抃周行。恭惟皇太后殿下。夙懋柔儀。誕敷陰教。含坤元之德。久內助于先皇。育天下之君。旋尊居于長樂。比厭政幾之聽。屢形慈訓之勤。復辟隲年。尙淹于顯冊。有司擇日。爰上于隆名。臣適領漕符。欽聞國慶。阻就歡呼之列。第深鼓舞之情。

又

恩篤內朝。禮崇顯冊。四海臣妾。一辭歡呼。恭惟皇太后殿下。坤德靜柔。母儀光大。進賢以輔先帝。有內助之勤。斷愛以戒後君。無外施之失。動懷明識。嗣鬯徽音。含飴弄孫。早優游於長樂。臨軒遣使。方享受于隆名。臣比領左符。側聞盛典。阻從慶列。第激懽誠。

又

寶字肅將。飭輔臣而虔使。隆名恭上。極聖帝之尊親。慶浹天區。事光坤極。恭惟皇太后殿下。懋靜專之懿。

德推涵育之慈懷。順承上天。輔佐先帝。有相成之道。無私謁之心。逮聖嗣之繼臨。預政幾之同聽。大公天下。未嘗恩澤于外家。密導宸衷。多用祖宗之故事。旋還明辟。益廣徽音。長樂優游。自享九州之養。內朝定省。乃惟四海之君。欲報厚恩。遙崇顯冊。嚴母儀之大奉。盡臣屬以均懽。臣久去陞廉。比司宮鑰。側聞盛典。竊忭愚襟。

又

欽奉內朝。上進極尊之號。懽呼罄宇。下均欲報之心。恭惟皇太后殿下。坤德靜專。母儀光大。進賢以輔先帝。有內助之勤。斷愛以勗嗣君。無外施之失。自懇還于明辟。益增廣于徽音。含飴弄孫。遂優游于長樂。臨軒遣使。旋享受于隆名。臣適領漕符。方遙廷著。莫陪慶列。第激懽誠。

賀皇帝爲中宮受冊表

琬琰敷言。遙恭行于盛典。宮闈動色。益增耀于徽名。凡在有生。維均大慶。恭惟皇帝陛下。寶有重器。勤懷永圖。踐宸極以稱尊。重坤儀之作配。念邦家之所御。先在儀刑。猶日月之相須。始全臨照。緊進賢而輔佐。廣稽古之聰明。以正位于長秋。未膺顯冊。因熙成于大禮。爰舉上儀。臣職繫朔陲。身遙丹朮。徒仰毋臨之慶。莫從鼇抃之聯。

又

有司備物。謹擇日以選儀。乃聖臨軒。重倪天之作配。文敷琬琰。喜動宮闈。恭惟皇帝陛下。稽古稱尊。撫辰

凝命。丕有至明之極。亦資內助之賢。厚德承乾。貴天王之同體。長秋正位。懋太姒之徽音。爰加冊禮之崇。以稱坤儀之大。輔臣將命。持使節以奉行。率土傾心。仰母臨而懽。臣任廢朔野。跡遠明廷。就慶列以無階。馳愚衷而第切。

又

儷宸極之尊嚴。屢周華歲。膺寶文之溫厚。增耀長秋。凡在懷生。率同大慶。臣聞闕睢所以基王化。坤順所以承乾元。岐陽之宜百男。驗進賢之效。媯汭之嬪二女。輔稽古之明。以迄盛朝。亦資內助。恭惟皇帝陛下。清衷昭曠。至治登闕。大亘地以稱尊。重倪天之作配。以禕衣之奉宗廟。裸獻時勤。而赤綬之正宮闈。柔恭日茂。尙淹盛典。未稱徽名。申飭柄臣。肅將冊禮。臨軒以遣使節。示極褒宗。率土之仰母臨。維均拊蹈。臣比司宮鑰。阻侍殿帷。第激懽誠。莫從慶列。

又

禮行吉日。冊備長秋。喜動六宮。慶均萬寓。恭惟皇帝陛下。紹休五聖。齊德二儀。丕有至明。亦資內助。乃眷中闈之重。尙稽顯冊之加。爰命弼臣。奉將盛典。維邦家之所御。先在儀型。猶日月之相須。始全臨照。臣比司留鑰。正遠朝鑿。莫從鼇拊之聯。徒仰母臨之慶。

代韓魏公賀淮陽郡王進封穎王表

伏視邸報。皇子淮陽郡王進封穎王者。真封易地。徽冊告庭。遙增王爵之光。載發宸闈之慶。薦紳聳聽。罄

宇均懽。恭惟皇帝陛下。一德溥臨。萬幾獨運。性堯仁而睦族。躬禹度以儉家。乃眷天支。曰咨國典。以主器莫尊乎長子。而擇日以命夫有司。寵換舊藩。進疏新渥。孝恭天至。克謹間安之朝。文敏日躋。靡煩在傅之日。側聞盛禮。大愜羣情。臣跡限居留。心馳慶列。無任瞻天樂聖。聳躍懽呼之至。

賀穎王納妃表

宜家淑德。作配元良。極典冊之盛儀。誠邦家之大慶。臣聞人倫茲始。嘉禮所以重乎婚。宗事其承。親迎所以聞于誠。恭惟皇帝陛下。建大清之極治。紹淳耀之烈光。畢張朝經。爰及家事。乃眷天支之愛。矧居王爵之尊。孝友生知。溫文日就。雖曰少成之善。當資內助之賢。歷選華門。進嬪朱邸。適得公台之後。備該圖史之聞。禮法自嫻。言容兼懋。長子主器。既度越于戚藩。遣使臨軒。亦寵優于嘉耦。將傳萬世之嗣。茂對三星之期。動喜氣于深宮。沸歡聲于罄宇。臣適司留鑰。阻預朝饗。鳳飛遙聽于吉占。鼉拊第馳于懋悃。

祠部集卷十五

表

代韓魏公謝歷日表

清臺密課。綠檢細書。旣叨拜祝之榮。又被勸民之訓。竊以布治正月。雖萬俗之具觀。頒朔諸侯。欲四方之皆曉。恭惟皇帝陛下。乾綱總攬。王事遙新。戶牖儲精。自坐知于天道。璣衡則象。復敬授于人時。臣適忝居留。預聞辰告。當仰虔于詔意。使畢懋于歲功。

又

西京講物。萃圖籍于三朝。東國尊王。書春秋之五始。恭惟皇帝陛下。至仁天冒。盛德日躋。晏然享函夏之歸。坐以須大明之日。蒸民觀象。會歲歷之更端。上帝降康。宜春祺之備合。臣懷章北道。方諧偃息之求。稱壽南山。阻預歡呼之列。

又

日月所躔。天地之紀。會成密課。例被誕班。恭惟皇帝陛下。握斗宅尊。撫辰凝命。靈承乾緯。首飭人時。黼坐儲精。長茂在躬之數。清臺考法。順稽合體之元。臣適守留符。預觀明訓。豈敢失墜。惟謹奉行。

代韓魏公謝進仁宗實錄賜詔獎諭表

大典告成。實虞漏略。細書垂諭。猥被褒嘉。伏讀載周。兢榮失措。恭以仁宗皇帝。稽古文思。憲天聰明。高拱博臨。享國既久。至仁廣澤。入人者深。威惠之漸。外區命令之孚。羣聽忠賢。哲輔之參用。墜禮闈儀之並脩。可著無窮。悉歸所載。編研之手。固曰難才。典領之司。尤非易處。而臣叨榮有日。逮事當時。久居機政之間。親奉德音之數。雖見聞之靡惑。終才識之非長。妄董諸儒。獲成信史。比塵聖覽。方悖愚衷。伏遇皇帝陛下。祇服孫謀。遙追祖烈。以天地之德。難紀。赦其摠實之非工。以歲月之積。頗多。因以念勞而加獎。欽承寵賜。惟謹榮藏。

代韓魏公北京謝上表

獨當一道。尚容俯竭于微才。兼撫連城。實恐難勝于重任。肇班寬詔。深愧厚恩。伏念臣風力不強。器能實謝。致身奚識于枉道。接物惟存于至誠。朝廷非繫于重輕。將相輒更于出入。且所臨皆劇。精神已耗于當年。而其得過多。疾病遂成于今日。方戢倦飛之翼。少安舊集之林。甫爾涉春。遽然易地。大稱全魏之部。北控幽燕之疆。比雖水旱之稍平。茲尚民流之未復。冀蘇疲俗。爰屬老臣。顧無惠術以安人。慮乏威聲之服遠。始懇辭而弗獲。訖冒號以爲慚。此蓋伏遇皇帝陛下。政在圖新。任先求舊。特自清衷之所簡。不惟綿力之弗堪。敢不蒐講武經。導宣利澤。殘軀黽勉。倘偶立于事功。睿旨丁寧。庶弗孤于器使。

代韓魏公謝賜詔允相州表

引疾拜章。不覺懇言之累發。賜書遣使。忽蒙聖諭之矜從。恩重何勝。感深以泣。伏念臣久塵大任。一信孤

忠禦邊未究于薄能。臥閣旋嬰于宿疹。徒然自勉。曾未有瘳。勢不遑安。顧總帥非養疴之地。情無所隱。冀上心推從欲之私。果軫淵衷。特頒溫詔。備詒禮遇之非薄。更赦赤愚之可誅。俾息殘軀。許還舊守。書奏而臨淵。每懼恩俞而弗藥。自康豈曰衰罷。可當眷寵。此蓋伏遇皇帝陛下。仁如天冒。德與日躋。虛懷最後四隣。愛不移于內外。拂性恐傷一物。念愈篤于始終。容解劇煩。庶期完復。優游此日。倘存犬馬之餘生。黽勉異時。誓答乾坤之大施。

代韓魏公謝遣使齋詔撫問及授大名府判兼河北安撫使表

使指親臨。詔音開論。清漳病骨。蒙曲軫于餘生。全魏高牙。俾勉從于重任。成命固知于難免。私心間有于未安。伏念臣幸適逢時。才非經世。早以功名而自許。不知量力而後行。晚雖衰茶之相乘。未卽乞身于勇退。丐故鄉而偃息。冀滿歲以優游。會朔野之滄災。動上方之北顧。乃分綏御之柄。以屬短疎之材。而又丁寧以遵卹民之言。周旋以盡使臣之禮。此蓋伏遇皇帝陛下。寬仁兼愛。終始誤知。因付畀于劇權。首簡圖于舊物。倘止以別都而假守。猶堪強策于疲鷲。如兼數路之提封。實恐坐成于瘵曠。所有兼河北安撫使。臣已別具劄子論奏。謹奉表稱謝以聞。

代韓魏公謝再任表

惻惻累陳。從欲許還于新節。衰疲自力。竭能勉撫于舊封。委寄逾陳。顛濟是懼。伏念臣本緣一介之曲學。歷被三朝之誤知。自解宰鈞。繼紆守紱。早年遇事。風霜不計于殘軀。晚歲纏疴。藥餌乃同于常膳。比引揣

躬之分。數裁辭劇之章。力丐閒州。少安病質。而恩生望外。事與願違。俄更西雍之帥。施仍赴北門之留鑰。所以極陳去就。仰瀆聰明。幸寵利非事君之宜。必冀寢加恩之命。策疲鷲雖老。臣可強。敢不拜再任之休。訖奉俞音。兩諧愚懇。此蓋伏遇皇帝陛下。至仁天冒。盛德海涵。器使庶工。愛偏舊物。雖俊傑甚衆。並試有爲之時。而厝瘁之餘。惜投無用之地。敢不勤宣條教。兼拊兵民。倘溝壑之未填。尙乾坤之可報。

代韓魏公謝加功臣食邑實封表

三年親郊。一日慶澤。乃眷近司之舊。遙加美號之榮。賦兼益于爰田。懼實深于維谷。懇辭弗獲。虛受爲慚。伏念臣力學不強。賦能俱短。二府迭居于一紀。三朝奚補于萬分。要路妨賢。故鄉乞守。自季秋之去國。僅三月之偃藩。伏值朝家。若考前經。肇膺上帝。九州畢獻其力。四海各勤其來。而臣適領左符。第聞盛禮。固不能聽屬車之雷動。扈從諸塗。觀吉土之天臨。肅雍在位。逮成熙事。首沐湛恩。併推異數之優。增負罔功之愧。此蓋伏遇皇帝陛下。祇節聖饗。永承天心。雖於穆猗那。已形容于美頌。而克自抑畏。弗專享于蕃禱。均需洪私。俯延外牧。敢不勤宣條教。益勵忠規。免貽空食之羞。兼塞假名之議。

又

熙事適成。湛恩隨布。載加寵號。兼衍真封。賦仍進于爰田。懼實深于維谷。伏念臣素慚遠業。自信孤忠。朝廷非繫于重輕。將相輒更于出入。平生許國。竭愚慮而不無。連歲撫民。論治功而何有。伏值寧朝。展窳陽館奉禋。四海各來。莫克陪祠于夙夜。九州畢獻。尙安助費于毫釐。建推神貺之均。首及宰司之舊。蕃然異

數。萃此罔功。飭詞臣而賜書。遣族孫而將命。禮踰常矩。恩激微衷。此蓋伏遇皇帝陛下。靈承天儀。風示民孝。雖鴻名弗受。自存聖德之全。而不祖所蒙。嘉與臣鄰之共。敢不勤宣睿訓。勉懋壯猷。庶逃空食之羞。兼塞假名之議。

代韓魏公謝中使齋詔令赴闕朝見表

故鄉得請。合從便道之行。溫詔垂音。特許明庭之觀。仍飭王人而將命。愈知君父之隆恩。俯伏拜嘉。兢榮萃感。伏念臣自明愚分。獨特主知。懷章本望于息肩。改帥弗容于量力。私心尙歉。未遑觀戍卒之旋歸。宿疹俄嬰。安敢效古人之臥治。雖獲鄉邦之願。豈忘魏闕之思。召節遙臨。禮數尤異。此蓋伏遇皇帝陛下。不遺舊物。垂記孤臣。親遣星軺。俾傳天旨。仰荷乾坤之愛。曷勝犬馬之情。

代韓魏公謝都知傳宣撫問並賜龍茶表

北門居守。未宣駑力之寸勞。南土貢珍。遽錫龍盤之上品。仍屈王人之長。親傳天語之慈。恩重難勝。感深以惕。伏念臣初無遠業。訖至近司。間緣疹疾之乘。方避寵榮之極。勉來全魏。且兼拊于兵民。幸邇故鄉。猶少安于習俗。一切師領。屢拜君言。存問旣勤。匪頒尤渥。矧靈芽之異產。豈俗肺之易嘗。此蓋伏遇皇帝陛下。克念老臣。弗遺舊物。垂睿音而下及。加寵賚以俱需。載省衰疲。奚從報塞。

代韓魏公謝詔書撫問表

念臣衰之多病。適履歎炎。煩主聖之推慈。有加軫卹。詔音開諭。使指親臨。伏念臣蚤備近司。初無遠業。猶

兼將相之過寵。盡出聖神之誤知。忠與生俱。罄厥股肱之效。疾隨老至。僅乎皮骨之存。溽暑貫時。淵衷閔舊。因曲頒于睿旨。俾自補于殘軀。此蓋伏遇皇帝陛下。盛德海涵。至仁天覆。治恐傷于一物。欲盡安全。愛尤篤于四隣。弗殊內外。特垂清問。爰及孤臣。

代韓魏公謝傳宣撫問表

恭被德音。遠聞睿訓。以帥權尤劇。防閑俾慎于忽微。而聖慮過深。愛惜實同于顧復。伏念臣本無遠業。止任孤忠。相二宗之日。雖多事陛下之時。猶淺第云智力之逾竭。未有謀猷之可嘉。尙賴風雲協期。日月垂照。灼知慙樸。可備使令。斷自上心。付之西略。迄去離于左右。蒙記憶于姓名。恐識不明。未朕之前。而事或暗可虞之際。導至言之委曲。遣中使以丁寧。難勝之恩。有如九鼎之重。欲報之命。不啻一毛之輕。昔告齊宣。嘗聞孟子謂君之視臣如手足。則臣視君如腹心。今陛下念區區之蹤。其撫存旣若此之厚。在臣某荷巍巍之德。其愛戴宜如何之深。誓委微躬。仰酬洪造。

代韓魏公謝傳宣撫問并賜湯藥表

星輅將命。忽傳金玉之音。天旨均慈。仍拜刀圭之賜。兢榮維谷。荷戴如山。伏念臣久玷冢司。備蒙容獎。知樸忠之可使。付寵寄而不疑。一遠威顏。再經旬浹。悉心圖報。弗知道路之勤。回首瞻恩。惟有闕廷之戀。方休徒御。初見吏民。遽被溫言。兼班珍劑。此蓋伏遇皇帝陛下。俯憐舊物。有軫深仁。念病質之久衰。冒時寒而遐適。特賚養疴之具。仰銜惻隱之恩。誓竭愚能。少酬聖眷。

又

議將易地。先開諭于溫書。念此養疴。復分頒于靈藥。禮誠出于特異。力敢忘于自量。伏念臣幸適逢辰。才非經世。少則被用。不謂精神之有涯。老猶謹身。至于衰茶而後已。向往經于疆場。比入覲于闕廷。天光照見于殘骸。鄉曲許還于素志。優游偃息。纔安僻郡之十旬。委曲丁寧。欲付朔陲之數路。屬此大寒之際。軫其多病之餘。親飭輕輶。兼頒珍劑。此蓋伏遇皇帝陛下。視孤臣之厚。無舊物之遺。拜嘉雖荷于深恩。揣己難勝于大任。臣已別具劄子奏論。謹奉表稱謝。以聞。

代魏韓公謝詔書賜湯藥撫問表

舊疴荏苒。乃貽君父之深憂。溫詔丁寧。更屬王人之曲諭。言頒靈劑。俾輔殘軀。伏念臣學昧聖賢。名兼將相。祿旣浮而量溢。福不勝以災生。忠激一心。雖曰股肱之自力。疾攻四體。僅乎皮骨之獨存。敢圖皇慈。特遣使指。形十行細札之訓。分五色一丸之輝。豈云衰遲。可稱矜卹。此蓋伏遇皇帝陛下。愛偏舊物。義篤老臣。爲憐犬馬之嘗勞。不輕螻蟻之至細。始終乃眷。遠近弗移。倘積疹有瘳。喜敢言于勿藥。願大恩欲報。命何啻于如毛。

又

詔旨趣行。方就所封之國。聖心垂軫。俯憐多病之軀。爰飭貴璫。特頒珍劑。捧受惟知于恩重。報償逾覺于命輕。伏念臣自效孤忠。累更大任。俱殫智力。勇爲不復于當年。兼拊兵民。劇用尙蒙于今日。靡容辭病。豈

敢圖安。勉去故鄉。亟來會府。卹民寬詔。奉行未及于彌旬。將命輕軺。傳聞已臨于所部。賜細書之溫厚。加靈藥之光輝。此蓋伏遇皇帝陛下。愛篤老臣。念深舊物。以驅馳之卽舍。俾服餌以扶衰。仰戴睿慈。曷勝愚抱。

代韓魏公謝賜藥物表

老臣告疾。累奏于囊封。聖主推仁。特頒于藥物。恩踰望表。感極情涯。伏念臣幸適逢時。才非經世。昔懇辭於冢任。旋總制于西師。夙夜忘疲。庶寸勞之報國。寒暄乖攝。俄舊疾之嬰身。瀝愚悃于上聞。動睿慈之垂卹。命使者之駕傳。宣惻隱之言。按神農之經。仍賚蠲疴之品。自慙弱質。有軫清衷。此蓋伏遇皇帝陛下。禮厚近司。愛偏舊物。欲勉驅于衰茶。因曲賜于矜憐。良劑載和。庶仰資于衛養。洪私所被。敢少怠于報償。

代韓魏公謝賜生日禮物表

報極終身。感遂親生之日。禮頒多物。恩深君賜之時。伏念臣蚤竭孤忠。久更大任。效微毫髮之可數。力覺筋骸之已疲。竊愧妨賢。屢求去位。萬錢空食。進無補于聖明。六韙啓行。出猶叨于將相。兆涼厥月。載育初辰。垂記淵衷。猥加異數。衣均內帛。駟出天閑。飾有繡鞵。玩兼鏤器。遣子舍以將命。耀公庭而拜嘉。生也降神。維翰實慙于山甫。力非稽古。所蒙何望于桓榮。此蓋伏遇皇帝陛下。德厚生成。愛俾顧復。俾孤臣之誕日。榮寵錫于聖時。敢不恪勉事功。益循涯分。既謹且乘之戒。仍逃不稱之譏。誓罄丹衷。仰酬洪造。

又

親生任旦。方追願復之恩。君賜維時。遽被寵榮之數。拜嘉既渥。萃感兼深。伏念臣自任孤忠。遂階顯服。萬錢之享。十年已負于空餐。六印之歸。一道尙尸于重寄。適臨誕日。垂記淵衷。賜出帝庭。命銜子舍。織文鏤器。以光其玩。綉鞵良駟。以養其安。部室增輝。羸軀動色。維周之翰。固慙山甫之生。稽古所蒙。何有桓榮之力。此蓋伏遇皇帝陛下。至仁天冒。大度海涵。曾舊物之弗遺。省初辰于載育。遙頒多物。併及孤臣。敢不脩建事功。益循涯分。既謹且乘之戒。仍逃不稱之譏。庶答洪私。曷勝丹抱。

又

親生在旦。方萃感于已孤。君賜維時。遽拜嘉而至渥。寵榮所集。震厲無從。伏念臣底滯天資。迂疏時用。特緣一介之術業。游歷三朝之弼謨。罄竭短才。猶坐兼于袞鉞。徘徊重祿。未歸就于田廬。左弧第謹于私庭。中詔忽傳于子舍。衣頒內府。馬錫天閑。鞵葉有輝。器文加鏤。生而維翰。實慚山甫之降神。今也所蒙。又異桓榮之稽古。此蓋伏遇皇帝陛下。愛深舊物。禮厚孤臣。垂記始生。猥加異數。敢不益殫驚怯。少答龍光。庶逃不稱之譏。仍謹且乘之戒。上恩既重。臣命逾輕。

又

門弧之志。四方適記親生之始。邦詔之書。一札遽蒙君賜之臨。矧惟被惠之優榮。敢不拜嘉而竦激。伏念臣比塵冢任。自信樸忠。才近不足以鬯遠猷。智小不足以諳大體。未竭股肱之效。已嗟筋力之疲。妨賢懇避于宰塗。本覬鄉邦之養疾。易守忽兼于帥路。復叨關輔之宣風。西略是經。寸勞何有。遙丁誕日。第謹私

門敢謂睿明亦煩省錄。飭身枝而將命。獲手舞以敷休。良駟繡鞮。既輟天閑之數。織文鏤器。復分御府之餘。光生陋軀。榮動衆目。考愚衷而自省。知恩紀之由來。此蓋伏遇皇帝陛下。禹度并容。堯仁廣被。乃眷四鄰之舊。不遺千里之遙。爰舉舊章。併推蕃錫。孰爲進退。一酬今日之所蒙。必也功名庶保。爾生之無忝。

代韓魏公謝生餼表

抱恨已孤。記親生之有日。載賡既渥。感君賜之維時。拜命云初。銜恩莫罄。需雲寵被。震厲交深。伏念臣風力不強。時才甚陋。萬鍾厚祿。十年已負于空餐。六印重權。半歲頗慙于假器。身遂戎旂之遠。心存王室之間。厥生之初。在秋云孟。遽荷懽恩之浹。仍蒙飮賜之臨。此蓋伏遇皇帝陛下。優渥老臣。始終舊物。記其誕日。嘉乃丁時。均籩粢之精甘。輟醪牽之肥旨。既醉既飽。愈防鼎食之浮。有猷有爲。畢望豐功之立。庶殫塵露。少答雲天。

代韓魏公謝賜生日禮物表

左弧之志四方。日記親生之所始。細書之行一札。時蒙君賜之云臨。期服寵榮。彌深震疊。伏念臣素無遠業。特恃孤忠。蚤緣誤恩。塵玷重任。出入將相。萬錢久負于空餐。綏御兵民。六印洵叨于兼綰。適逢載毓之旦。方軫已孤之懷。奉將溫辭。垂遺愚息。衣出內府。馬分上閑。帶飾光軀。器文溢目。降神之美。維翰既慚。山甫之生。稽古之誇。所蒙又非桓榮之力。此蓋伏遇皇帝陛下。不遺舊物。曲示厚恩。名器所司。輒容于假寵。服乘以拜。唯有于論酬。誓訖餘生。少償洪造。

代韓魏公納節表

躬荷兵民之重任。既非有疾之能勝。生蒙將相之兼榮。抑豈無功之可據。比懇還于印飾。庶僻守于麾符。蓋高未動于物情。宣諭遐煩于使指。洊敷危懼。決俟俞音。伏念臣四紀逢亨。三朝竊寵。良自寡能而厚祿。遂罹多病以久衰。一辭東府之鈞衡。再領北門之筭鑰。莫非強勉。以濟劇繁。心雖云勞。力有不逮。以至河齧舊防而失備。民逃常產而未歸。職由冒居。皆合引去。然猶徘徊歲月。偃息朝昏。庶幾小康。翻覺筋骸之漸憊。若曰微效。訖無毫髮之足甄。于茲不能。可以遂止。苟尚貪于要地。將不保于餘生。惟有至仁。能全微欲。伏望皇帝陛下。俯憐舊物。特軫孤臣。許上戎旃。并收貂冕。小邦簡靜。俾專近于方書。悴質支離。免卽填于溝壑。瀝膽願回于天聽。沒身期執于君恩。

第二表

由衷叩露。納節矧緣于疾辭。冀上哀憐。改麾兼賜于可報。物情必至。天意未回。苟避雷霆之誅。恐先溝壑之委。敢殫危懇。決俟俞音。伏念臣生賦樸忠。早塵顯服。不惟智力之可否。但務私恩之報償。甫及中年。遂罹多病。自叨再任之後。已是久衰之餘。雖復親近簿書。繕完城府。蓋一日效昔人之必葺。固匪樂爲。且三載乏往典之陟明。自宜引去。况兵民非臥疴而可治。將相豈尸祿而得居。更勉強以貪榮。將顛隕而速禍。弗全殘喘。有累至仁。伏望皇帝陛下。日月照臨。乾坤覆載。任別圖于衆哲。志曲就于匹夫。許上戎旃。免司留鑰。息肩閒郡。俾生意之稍完。沒齒盛朝。庶皇慈之可答。

第三表

罔功納節。以疾請麾。再嘗自陳。一切未許。行恐餘生之不保。敢千萬死以有聞。伏念臣中實枵然。生而戇甚。寵榮欲報。勇于遇事。而輒爲筋力旣衰。失在知難而未止。比救將顛之質。疊傾必至之誠。厚祿戒貪。願上淮南之旄鉞。小藩乞守。免當河朔之喉襟。尙遲矜從。尤激危懼。蓋殘軀不息。慚歸溝壑之爲隣。空食寢深。轉愧涓埃之無補。伏望皇帝陛下。特回天聽。俯徇物宜。不遺螻蟻之微情。各任鷦鷯之常分。有民人足以爲政。畀支郡足以養疴。許將相之辭隆。絕公朝之假寵。旣完素守。仍息久勞。恩施難名。報償何有。

第四表

病難任劇。職合辭隆。開可不時。顛躓無日。危迫敢殫于血懇。哀憐願軫于皇情。伏念臣起自孤生。初無遠業。祿常過量。寵榮最早于他人。福不勝災。疾疹遂纏于今日。所以懇還將相之印。力避兵民之權。庶就開州。少舒瘁質。私計已決。愚誠不移。雖委寄誤深。不謂三年之已久。而衰疲待報。翻嗟一日之爲長。矧是戎旃。固非虛器。無功以領于義。未安使老臣兩失于寸心。豈人主相優之本意。伏願皇帝陛下。特回天鑒。曲盡物宜。就更麾符。許上旄節。驅馳駑足。免令濱死以未休。偃息殘骸。或冀餘生之可保。大恩難狀。丹抱奚論。

第五表

重負未釋。日寢久而力窮。疾呼欲聞。天轉高而聽緩。敢罄論于懇迫。願畢賜于矜從。伏念臣自信直誠。所

差枉道寵利雖豐而宜取。未始輒辭事爲至劇而可當。曾何少避。惟是戎旃兼一品之要。留鑰守三年之餘。得旣過多。號亦云久。且無功而享厚祿。雖貪夫有所不爲。多病而荷重權。在老者尤難自強。所以納節以逃空食之恥。乞守以息殘軀之勞。凡經危懼之屢。陳未施德音之一可。苟遂循于緘默。是坐待于顛隲。伏望皇帝陛下。曲貸餘生。洞明孤抱。知辭隆非出于飾僞。念避劇實緣于負荷。就改麾符。并收施鉞。親近醫藥。免令溝壑之卽填。養安形骸。悉自乾坤之再造。謀心已決。得請後休。

祠部集卷十六

表

代曾魯公辭加恩奏

合宮已事。罄宇均禱。首眷近司。併推蕃數。罔功被獎。匪服懷慙。在義未安。獲辭乃止。伏念臣蚤緣家學。繼竊朝榮。策足冗塗。致身華貫。始校文于書殿。尋勸講于經帷。進司西掖之言。起視北門之草。以至攝治大衆。參聞萬幾。往冠斗宮。曷坐籌于勝算。旋登台路。第隨講于成規。迄是踰年。居然備位。伏遇國家風示民孝。靈承天儀。尊推先君。昭配上帝。并升圭幣之潔。益凜廟祧之嚴。裸將于宮。樂徹乃俎。熙成禋禮。需發德音。慶浹人祇。寵先丞弼。既疏美號。并衍真封。而況克濟上儀。實非一力。有主計之臣。以助乎經費。有陪祠之衆。以供乎駿奔。禮率按于舊常。事動咨于睿訓。夫惟彼相。于此何功。翻兼冒于王明。懼弗容于物議。尙緊確讓。可弭煩言。伏望皇帝陛下。全度天涵。大明日照。洞微衷之必至。追成命于已行。特寢誤恩。俾諧愚分。

第二表

贊書錫寵。錄相祀之微勤。讓牘啓還。具假名之大略。靡回宸旨。促拜恩章。雖前蹈于嚴誅。難少移于確請。游披危懼。決俟俞音。竊以輔相乃表儀之司。匪義則動將安仰。慶賞無巨細之異。當分則處之弗疑。而況

捍難者是謂功臣。固非虛號。進律者抑存王制。莫重真封。豈有陪原廟之天臨。扈屬車之雷動。陟降九筵之次。雍容萬玉之先。密奉清光。縱觀盛禮。願粢盛之豐薦。益抃時和省俎豆之前聞。頓還舊學。茲爲厚幸。復敢叨恩。矧聖饗之先期。有王言之誕告。具咨列辟。毋上鴻名。而臣地在具瞻。誼當一德。侍嚴祠而何力。尙爾尸榮。思明詔以何顏。甚于得責。伏望皇帝陛下。如天從欲。與物終仁。念志莫奪者匹夫。且賞不妄者人主。亟追繆寵。以勸有功。

代曾魯公謝加恩轉官表

官榮不次。列讓牘以啓還。宸旨莫回。降批章而促拜。寵靈滋極。涯分深踰。承命若驚。撫躬莫措。伏念臣日蒙樂育。天與樸忠。才不足以濟時。誼惟知于許國。因緣資序。寢歷禁嚴。孤立公朝。固絕心于朋勢。久登宰路。常持慮于滿盈。建功無塵露之微。負責有邱山之重。造昌期之相繼。膺景命以維新。霈發德音。並均澤浸。特舉便蕃之數。示優獎理之司。遽進崇階。仍躋榮于鳳閣。驟加庸品。將取刺于鵜梁。竊揆誤恩。愈知厚幸。此蓋伏遇皇帝陛下。至仁丕冒。大度兼容。曲眷柄臣。務全邦體。苟筋骸之可強。誓効微勤。在肌髓以寧忘。仰酬洪造。

代曾魯公謝男授龍圖閣直學士表

愚息進秩。就加舊閣之從聯。老臣退居。愈幸私門之榮觀。仰承乾造。俯劇震驚。伏念臣歷事三朝。蚤更二府。遽至禮經之七十。未償恩紀之萬分。印綬寵名。悉上王朝之久。圖書寶構。誤延子舍之微。何意頽齡。與

逢顯渥。此蓋伏遇皇帝陛下。至仁天覆。盛德海涵。博延衆材。畢取介善。不遺輔國之舊。遂及趨庭之私。敢不教忠。俾盡馳駑之薄效。庶其論報。弗辜舐犢之微情。

代曾魯公謝生日禮物表

門弧設左。視生適記于初辰。邦詔發中。君賜遐頒于多物。拜嘉有腆。萃感無涯。伏念臣南服孤生。端朝平進。偶緣樸學。寢歷華塗。器不兩周。安適方圓之用。才無一可。矧兼文武之資。自樞幄之冠謀。卽宰庭而亞政。未竭股肱之效。已驚齒髮之衰。竄畏人言。曷裨王體。惟載生之始旦。第自謹于私門。敢謂睿明。亦煩省記。敕身枝而將命。俾手舞以敷休。鏤器織文。殫巧工之精製。華韜良駟。分寶技之餘輝。榮動比閭。光生豐蔀。仰寵章之特異。知恩紀之由來。此蓋伏遇皇帝陛下。與物終仁。爲邦隆體。乃眷四鄰之輔。謂同一德之親。爰舉舊常。併推蕃數。皇慈甚渥。惠固絕于能名。愚抱如丹。誼惟知于欲報。

代王君貺尙書北京謝上表

環封千里。開府萬兵。坐制此方。據非其地。班條云始。負愧于中。載惟全魏之區。遐控強敵之境。洪河襟帶于其左。朔野咽喉之所衝。自罷郡以置都。常擇人而作屏。地望滋重。朝僉愈艱。會紆兩府之印章。方付北門之管鑰。授之近侍。誠曰曲恩。伏念臣少也短能。初無遠業。先朝親試之次榜。甫冠首叨于甲科。臺省回翔。藩維偃息。犬馬之年尙壯。鷓鴣之序徧揚。蒼鬢嚴塗。覩顏空食。懸領中山之一道。兼提支郡之十城。尤幸菲才。適丁無事。日常安枕。歲聿更書。未瞻天日之清光。敢圖省錄。又乏涓塵之素效。何所甄升。就畀別

京弗沿彛制。仍加冢宰之秩。以示邦人之榮。此蓋伏遇皇帝陛下。神造曲成。乾綱獨運。懋法宮之新治。念仁廟之舊臣。特躡彝章。俾尸甸服。敢不刻求民瘼。蒐講武經。謹視河防之虞。豫嚴邊鄙之備。報償恩施。猶知今日之能爲。揭立功名。豈獨少年之所慕。

代王君貺尙書謝傳宣撫問表

貂璫中使。因將命于別京。管鑰守臣。辱記名于丹扈。俯宣溫諭。增感危悚。伏念臣僅有薄材。亶無奇節。樸忠自信。竊蹈古人之爲。孤直誰容。特膺先帝之遇。游揚中外。奚補毫分。自聖統之紹臨。卽帥符之遐部。靡須受代。旋易居留。固未能舞抃廣墀。一瞻天日之表。論思近著。少竭涓埃之愚。矧全魏之奧區。實朔方之會府。控制邊鎖。繕完河防。總一道之戎鈐。隸萬屯之兵籍。前有元台之舊老。已建成規。上繫眞主之睿謨。第行寬詔。曾徵善狀。可格淵聰。祇自顧循。敢圖省錄。適遭星軺之降。遽聞天語之傳出。如絲綸仰撫存之甚渥。煖于布帛。愈蒙被以爲榮。特越常彝。誠知厚幸。此蓋伏遇皇帝陛下。至仁丕冒。大度兼容。念法從之典藩。屢更全節。乘臯華之至部。親導玉音。下堂拜嘉。守土增耀。敢不深惟恩假。益勵忠勤。誓畢微生。覬酬洪造。

又

使臨所部。傳溫語之丁寧。跡遠于朝。荷清衷之省錄。才微自恨。恩重難勝。伏念臣受性至疏。逢時獨早。勵孤忠而自進。堅一節而靡踰。用不兼人。曷周臺省之務。拙于從政。漫歷藩維之行。自龍德之天飛。卽虎符

而州守決需滿歲歸覲清光。就移全魏之封。漸近長安之日。神都南望。未一拜于帝暉。星傳北徂。遽再垂于天語。嗷咻斯至。蒙被爲榮。念久冒于華塗。復累更于劇鎮。第勤夙夜。曾乏猷爲。止虞物論之非。罔裨毫髮。敢謂主知之誤。曲記姓名。每常遣于皇華。卽導宣于睿誨。此蓋伏遇皇帝陛下。至仁天覆。大度海涵。以法從之。近聯實先朝之舊物。念數經于事任。弗忍棄遺。思特示于恩勤。洵加存撫。誓圖薄效。仰答洪私。

代王尙書謝加食邑實封表

三年親郊。遙成熙事。一日慶澤。爰及從臣。疏新命于訓辭。增舊封之食賦。罔功被寵。匪報懷慙。伏念臣稟性樸忠。與世迂闊。歷華塗而始徧。愧薄效之未收。一離鳴玉之朝。數換剖符之地。宣上方之恩澤。亦旣累年。撫北道之兵民。汔茲半稔。伏念國家嚴順帝之大奉。講就陽之肇禋。四海各勤其來。九州畢獻其力。而臣適專留鑰之掌。絕望屬車之馳。奉引諸塗。空預甘泉之籍。駿奔以職。莫陪吉士之祠。第率守臣之常。坐脩方物之貢。甫訖聖饗。頻沾睿恩。旣廣爰田。復加眞戶。容孤臣之竊幸。由洪覆之推仁。此蓋伏遇皇帝陛下。靈承天心。均施神貺。雖清衷寅畏。自抑于鴻名。而慈渥涵濡。亦周于外輔。敢不勤宣條教。益勵忠規。免貽素食之差。思稱鴻恩之渥。

代王尙書謝添公使錢一千貫文表

公須匱乏。輒請益以上聞。天旨矜從。遽增多而下濟。仰蒙曲賜。內激危悚。維全魏之要都。當朔陲之孔道。軍校之所犒設。使人之所勞迎。向除兩府之舊臣。有緝謂之隨使。苟待四方之過客。在禮不致闕供。臣比

忝于居留事頓裁于往例去者大半不承權輿措遺利以相兼恐傷大體告常貲之不及妄叩淵衷伏遇皇帝陛下至德包涵大明臨照飾廚傳以自喜知臣不爲損府庫之有餘如臣所請乾坤施大塵露報微敢不益勵乃心自矢清冰之節庶幾勉供厥職上酬洪覆之仁

代元給事謝加勳并食邑表

親郊已事灑澤均休賜詔十行轉勳一級賦益爰田之數寵深維谷之憂伏念臣起自諸生最爲孤仕祗游揚于三紀奚云補于萬分頃貳大農旋升近侍引南州之紱何有治功籠北道之財復無利術會盛旦之展采奉園丘之肇禋第羨諸侯之駿奔敢嗟太史之留滯固不能聽屬車之雷動扈從諸塗觀吉士之天臨肅雍在位遙成熙事例沐湛恩併蒙異數之加彌積罔功之愧此蓋伏遇皇帝陛下務均神貺祇順天心雖於穆猗那已形容于美頌而克自抑畏弗享受于隆名尙需洪私俯延庶尹敢不益圖忠藎匪懈論思誓畢微生庶酬上德

代王禹玉內翰謝兼侍讀學士表

玉署代言之地老于文學之所居金華進讀之聯通厥古今而後預兩塗踐一已爲儒者之極榮孤宦獲兼茲實聖時之盛遇而又華韜良駟以安其體美衣博帶以文其容難俯偃以循辭輒服乘而拜覬竊以佩服與德而相對始免于譏車馬稽古之所蒙可誇乎寵如臣者學未到聖賢之奧處論或剽父師之緒餘蚤緣科選之誤優寢辱禁殿之首據侍牲幣告豐之聖饗何有駿奔之勤敷雷霆作渙之王言復無潤

色之狀。詎意上恩之博。遽加中講之崇。御府頒衣。天閑授駿。申錫副帶環之麗。餽金增韞葉之光。載省無堪。深虞不稱。洪私甚昵。屈名器之大公。危抱如丹。竭涓塵之少效。

代包孝肅公謝樞密副使表

伏以疏恩至渥。懼大取于時譏。瀝懇維勤。弗少移于詔意。勢不遑讓。寵其可驚。勉服華章。難安忝魄。伏念臣仕以孤進。術無他長。獨信樸忠之可持。不知微幸之爲利。蚤際聖世。頃塵諫員。遇事輒論。以身當怨。殿邊隅之巨屏。曷暢遠圖。專江濟之孤城。訖無善狀。旋膺迅召。假尹中畿。近則賴天子之聰明。遠則學古人之鉤鉅。雖奸豪之稍戢。于暗拙以何功。誤聽朝僉。擢持風憲。紀綱之地。未能爲國體而一言。金穀之司。猥以付邦須之大柄。事端萃止。心計茫然。方虞官瘝。俄正使號。列讓封而懇避。曾未踰旬。綴陪幄之後塵。遽焉易地。在責愈重。揆才弗勝。然有時乎爲貧。尙且辭富。以前日不受是。抑恐今非。而況主計惟艱。運籌不易。議曉治亂。方能合四輔之謀。略具武文。始可究五兵之本。自視近器。曷參繁機。歷開不可之端。庶寢已行之命。愚衷第確。天旨靡回。俾附樞躔之末光。許聞廟算之餘論。此蓋伏遇皇帝陛下。大明如日。全度惟天。乃眷孤臣。不遺造物。舍盈庭之衆哲。特取菲能。忘假器之煩言。專融睿斷。敢不夙夜重寄。渴譏一心。切平世防微之圖。凜聖經慎戰之戒。誓畢餘齒。仰酬上仁。

代泗州盧郎中謝到任表

戚休千里。宜求外牧之良。忝冒一麾。茲實下臣之愧。揆恩至渥。引分何堪。竊念臣學弗名家。器難適用。尸

榮僅四紀。出守者數邦。罄竭鄙才。訖微善狀。而况沿汴置郡。臨淮據衝。舟車往來之繁。曾無虛日。金穀運輸之入。率由此途。俗薄好爭。地卑多潦。雖賢守長。猶艱智力之周。若臣愚蒙。曷稱要繁之委。此蓋伏遇皇帝陛下。乾坤其量。何細不包。歲月之勞。雖微亦采。使之治劇。敢不究心。宣布詔條之寬。變移風俗之厚。庶幾一得。云補萬分。

代泗州盧郎中明堂大禮陳乞次子恩澤表

伏遇國家。詔舊禮之常。修合宮之饗。稀闕之典。事遽復于我朝。疎遠之臣。澤庶霑于厥嗣。輒披愚款。仰瀆聰聞。臣有次男某。生會右文。少知從學。以其本專儒術。未能自致于榮名。欲乞特授文資。所覬不違于素願。兼臣歷任以來。並無贓私過犯。伏望皇帝陛下。廓如天之造。推延世之私。曲軫聖慈。俯從臣請。如是則人神胥慶。喜曠制之舉行。父子知榮。荷茂恩之均及。

代泗州陳郎中待罪表

臣任叨守土。職在長人。不能宣諭教條。發揚孝治。曾無善政。撫其理惟良之稱。是致下民。抵五刑莫大之憲。竊以古之良守。名布冊書。因昆弟之忿爭。尚閉閣而致咎。而况子之毆母。事越常聞。傷教悖倫。莫茲爲甚。未能投紱引去。以謝匪才。是敢拜章自陳。恭俟黜典。

代待罪表

長人亡狀。致條教之不行。匹婦何知。抵刑科之莫大。臣聞古之刺史。名在冊書。悼昆弟之訟田。謝吏民而

閉閣矧茲同產。輒爾相殘。有傷孝治之風。其實守臣之罪。左符所繫。未能投紱而遂歸。甲令有文。是敢拜章而自劾。

代馬察院謝表

昨叨寵數。因揣器能弗稱。徽章乃呈。讓奏靡回。成命豈敢固辭。勉強拜嘉。兢慙失措。伏以憲府之選。官材實艱。論朝廷是非。舉臣寮過失。秩輕責重。受易才難。專一意以謹司。尙虞敗職。假他官而兼授。豈曰慎名。竊念臣發跡寒鄉。策名昭世。最爲平進。絕少他奇。畿縣補官。未施于寸效。庭闈遭禍。偶及于終喪。宦緒間關。生意衰落。會曲恩之延被。佐通漕之輸將。而且金穀數叢。江淮歲歉。僅充舊課。遽錄微勞。弗循官次之常。俾預臺中之列。布衣奉詔。有媿于祖風。赤芾貽譏。深防于物議。臣所以歷披悃愾。懇避龍光。渙渥不休。尸榮爲甚。此蓋伏遇皇帝陛下。乾坤覆燾。日月照臨。采臣銖兩之勤。欲有功知勸。加臣糾察之目。欲雖遠竭忠。敢不力樹壯猷。思稱上意。經營大計之暇。圖講當今之宜。國家之事。可言雖危不避。君父之恩。欲報之死無他。

代劉希道待制謝上表

獨當一道。兼拊六城。初見吏民。敢言師帥。第奉行夫寬詔。奚取稱于明恩。伏念臣比自孤生。驟叨近侍。進不由于累日。幸實出于遭時。言責所司。那避貴權之側目。計文云總。粗知功利之究心。僅此再朞。訖無寸效。會坤維之缺守。荷乾造之曲成。簡自淵衷。畀之重寄。食君之祿。義難取于便安。以親爲辭。情蓋緣于危

迫露章既上。悸魄弗寧。不能叱馭以爲忠。方爾闔門而待罪。適逢廣愛。特緩嚴誅。眷朔野之奧區。號常山之劇鎮。弗離舊部。就付要麾。待慈母板輿之來。近踰十舍。觀居民雲屋之盛。雄視四封。竊寵尤多。戴恩有所。此蓋伏遇皇帝陛下。至仁天冒。大度海涵。孝治之行。不欲一夫闕養。容慈所及。尙容千里班條。敢不圖講政經。刺求民瘼。庶集涓埃之績。少酬覆載之私。

代都運趙待制謝上表

小材而臨大計。不知經畫之所從。薄量以涵厚恩。惟有思勤而可補。竊以今之北道。重曰外臺。邊宿勁兵。境控強敵。歲支洪河之備。而民力幾屈。所以艱于賦輸。地列數鎮之師。而吏員益繁。所以要在刺舉。宜擇精明彊濟之器。以付轉給澄清之權。若臣空孱。于事迂拙。舉引兩川之漕。近貳九農之司。率惰竭于愚衷。訖罕通于利術。敢期煩使。乃委孤臣。此蓋伏遇皇帝陛下。廓天地之容。收涓埃之細。特加不次之命。而欲勸來者。弗責已試之効。而俾懷後圖。得不夙夜以思。始終乃職。豈敢專聚斂之最。以上累于君仁。亦當拊凋殘之餘。庶下蘇于民瘼。

代張景元龍圖知成都府謝上表

優加職任。特私名器之大公。初見吏民。卽諭朝廷之廣德。才微責重。寵至懼深。竊惟益部之奧區。茲實坤維之劇鎮。有江山之控帶。兼民卒之撫綏。從來守臣。多采宿望。如臣甚陋。自視無堪。侍從最爲晚躋。技能奚適時用。更計籌乎內外。乏政績于毫分。及此踰年。遽云增秩。顧巨藩之所委。非小器之可當。而又煩使

向臨于兩川。先臣嘗列于近職。領蜀門之印綬。曾是昔遊。直延閣之圖書。復叨世選。何乃微躬之幸。獲茲數事之兼。此蓋伏遇皇帝陛下。躬攬乾綱。日新睿斷。眷先朝之舊物。記通漕之孤臣。躡等班行之間。推恩屏翰之寄。敢不博求民隱。祇訓戎韜。坐布寬條。底輿情于安集。力圖靖治。副聖訓之丁寧。

又

初見吏民。卽宣條教。任重而力不逮。寵過而心若驚。伏念臣江海微生。朝廷孤士。常龍德離潛之始。方參貳于大農。泊天心求治之間。復總司于外計。未嘗伸愚瞽之慮。得以補聖神之聰。忽蒙誤恩。起置華選。矧頃馳于單傳。嘗歷使于兩川。今茲守封。實乃故地。叱忠臣之馭。雖媿于古人。剖刺史之符。獲綏于舊俗。倍爲榮幸。尤荷生成。此蓋伏遇皇帝陛下。躬攬權綱。首敦勸嚮。不責已試之驗。而觀其後效。特屈非常之命。而激其壯圖。遂俾短能。亦叨劇委。而且徑從便道。祇赴嚴程。阻瞻前旒。弗克稟睿謨。而後往。務靖遠服。庶幾虔詔旨以恭行。

代漕使謝上表

才難稱職。旣當煩使之劇。權恩在圖新。復冒從臣之舊籍。寵緣任假。感與懼并。竊以維今外臺。莫重北道。邊控強敵。成屯勁兵。籠貨民間。而惟恐涉傷財之名。轉粟塞下。而僅能供待哺之口。而又歲支洪河之備。而官用幾屈。所以艱于運輸。地列數鎮之師。而吏員實繁。所以要在刺舉。苟虧精明。強濟之具。曷振轉給。澄清之綱。如臣空疎。于事暗拙。漫更委寄。蔑著勞能。比分師符。偶陷吏議。官非理去。旣一跌于嚴塗。咎止

退思已都忘于榮路。尙荷皇慈之寬置。每蒙法語之矜存。通漕朔方。果疏恩于不次。進班延閣。仍還職以如初。載省生成。率歸造化。此蓋伏遇皇帝陛下。乾綱獨運。神斷日新。進退朝倫。必清衷之自擇。予奪官序。絕浮議之可移。遂俾單庸。訖叨甄錄。敢不內殫愚慮。仰副睿懷。少見事功。庶酬燹覆。

又

小才之臨大計。未知經畫之所從。薄量之涵厚恩。尤懼寵榮之不稱。竊推諸路。並兼外臺。特陝西領使之難。蓋軍須自昔之爲重。緣康定用兵之後。顧民力至今而未完。籠貨關中。而惟恐涉傷財之名。轉粟塞上。而僅能供待哺之口。加用度之百出。無利源之一遺。而頻年薦饑。常賦罕入。在平時之無事。尙或須才。方近日之餽邊。豈容冒選。宜得老于金穀之要術。號曰朝廷之能臣。俾總漕權。始安物議。如臣暗拙。于事迂疏。曾微日月之勤。第幸風雲之會。預嚴塗之陟降。迨此彌年。董朔野之輸將。止于踰月。驟更劇部。誠出誤恩。此蓋伏遇皇帝陛下。曲軫清衷。弗遺舊物。蓋念自塵于侍從。未嘗少建于事功。使効微勞。免慚空食。敢不內殫愚慮。上體睿懷。雖云轉給之司。務充常課。不爲聚斂之計。取累至仁。

代謝進和御詩獎諭表

參羣簫而奏御。庶載非工。被優詔之發中。褒嘉甚渥。惕然拜君父之賜。藏以爲子孫之榮。伏惟書曰。帝庸作歌。所以極道明良之意。雅云。臣能歸美。所以上酬福祿之辭。惟千載一時之逢。踰三王二帝之際。乘太平之多暇。講稀闊之盛游。歷寶宇以披祖宗相受之文。御飛帚以縱神聖有餘之學。以至置酒別殿。賦詩

中宸于時從聯。成績容唱。如臣者有樸愚而植性。無文采以表身。自陪風憲之要司。都廢微言之舊學。妄挾鄙思。綴成斐章。大樂在前。發哇聲而接響。太陽臨下。銜熿火以交光。旣瀆邃旒。若臨深谷。敢謂兼容之度。例行過獎之辭。游聖門者。謂之難言。矧繼堯文之後。踰華袞者。重夫袞字。況蒙漢訓之加。夫何孤臣。叨此厚幸。此蓋伏遇皇帝陛下。齊德乾覆。育材士倫。善雖小而弗遺。力或矜其不逮。誓竭講劄之效。庶酬勉勗之仁。

代謝進職表

恩數推優。禁聯增峻。名浮已甚。寵至惟驚。伏以本朝啟宸構以藏書。憲義圖而署目。因名學士之職。以擢從臣之才。所宜識際聖微。術鉤經奧。俾塵清選。迺稱徽章。竊念臣一介單寒。片文猥瑣。蚤緣山藝。輒冒異科。幸旣出于逢辰。仕不由于累日。參憲臺之風議。無所建明。預財府之權謀。曾何經畫。姑守愚而斂分。敢躡等以越思。亟叨內閣之華。密奉前旒之邃。固未能發揮儒效。藻潤帝猷。會邊閫之須人。假州麾而出守。樸忠自信。已誤簡于容心。闇懦少機。弗過防于讒口。果飛疑似之語。仰瀆聖神之聰。蓋孤根之易搖。致謗猷之肆起。尙賴容慈垂側。皇鑒照微。止頽尺一之書。移總東南之漕。荷知臣之至哲。堅報國之初心。雖金穀數叢。江淮間款。力經大計。未始寧居。旁均百郡之輸。仰給中都之費。偶充歲課。僅免官瘼。遽收采以寸勞。加顯嚴于近署。況臣閒關官路。久去于清光。執掌利權。悅迷于舊學。拜嘉非稱。竊幸居多。此蓋伏遇皇帝陛下。天造曲成。帝暉下燭。以臣夙因會過。嘗備使令。簪履之舊。弗捐。靡遺于煩使。毫髮之功。亦獎。示勸

于勞臣。特假龍光。濫延疏外。敢不激昂志尙。究悉事爲。誓策疲鴛庶酬覆露。

代百官謝御筵并傳宣表

順理大川。實由王道之正。推慈廣燕。益盡臣心之忠。馳遣使人。宣傳法語。涵濡睿渥。鼓舞輿情。恭惟皇帝。陛下。總攬萬幾。畢張百度。眷言二埽之決。尤動數城之憂。塞故開新。雖交陳于羣策。取長舍短。緊獨斷于淵衷。亟興厥工。陰有所相。如期底績。飛奏告成。蓋建中克應于天心。故潤下不違于本性。爰卽會府。以頒慶筵。廣坐多僮。同聽鹿鳴之什。寧朝信史。復紀河平之年。

代謝生餼表

載誕丁辰。方集已孤之感。匪殞列品。俾供式宴之私。出拜王人之命于庭。入聞宗黨之慶于室。恩榮相照。喜幸交深。伏念臣偶以樸忠。驟當睿選。智小不足以識大體。才近不足以經遠猷。自坐論于中階。殆空餐于厚祿。第懼煩言之起。敢希飫賜之臨。豈謂皇帝陛下。分篤君臣。禮優丞弼。記其生日。將以懽恩。均肥旨之醪牽。加精甘之麴蘖。仰對需雲之施。愈慙鼎食之浮。飽上德以何厭。醉皇慈而難酢。惟勤夙夜。稱今日之所蒙。稍立事功。庶爾生之無忝。

代元給事壽聖節進功德疏表

王春謹始。適臨月魄之成。聖運發祥。嘗紀電樞之繞。蒼精出震。炎歷承乾。會載夙之初辰。洽均懽于萃土。臣是敢躬趨金地。面對玉毫。命淨侶以薰修。誦祕文而演暢。所覲離明照耀。與世界以無邊。睿算延長等。

河沙而莫數。第極後天之祝。曷勝向日之誠。

代趙都運壽聖節進奉功德疏表

歲聿發春。月茲成魄。當五始書王之後。迺千齡誕聖之初。繞電流虹。蚤開于瑞應。普天率土。均沸于懽聲。臣是敢叩金地之莊嚴。面玉毫之奇妙。恭延淨侶。積演祕文。覬不盡之勝因。資無疆之睿算。第切後天之祝。曷勝向日之誠。

看詳

看詳知開封府度支郎中王克臣所進熙寧通議。

臣看詳。政簡厚則民說而不擾。是以有樂生之意。而富壽臻矣。三代所以得民心者也。夫欲行王道而不先乎此者。戾也。是以簡苛禁。厚仁術。戒吏祭之爲明。而本乎恕。知民力之有限。而用以節。皆爲政之所宜急者。

臣看詳。君子勸不待賞。沮不待罰。惟賞罰所以待衆人。然賞過乎輕。不唯失勞。而又沮爲善之效。罰過乎重。不唯失罪。而又賊人恩之大。茲二者。實近世尤病。願詔有司審處之。臣看詳。冗兵之可汰。戍卒之可損。固已汰其所可去。而損其所可留矣。若方今未革之弊。知理財之爲急。而不知耗財之所漸者。增置官局是也。以其所得而不補所失者。數易利柄是也。置苟不一。則財不勝耗矣。易苟不已。則失不勝計矣。望員品之清。府庫之實難矣。

臣看詳。有警則嚴兵備。無事則惜兵費。類皆能言之。殊不知費有不得已者。而備不可一日弛也。譬如巨藏之家。曰固吾堂室。而藩牆不足守。曾不知外圍既虛。則固於其內者。將不能獨特。噫。備之不可廢於邊也如此。況近年戍卒。其分此近郡者。不爲不多矣。若又損外而益內。安知契丹專利吾金繒。而不窺邊備之虛實也。

祠部集卷十七

狀

賀韓魏公生日狀

素商肇序。元精萃在于金行。大昴儲祥。上相出符于寶歷。維時載誕。與國同休。恭以判府司徒侍中。道濟王塗。望高宰路。功名自著。而避遠無跡。德爵極隆。而持循以謙。一己安行而有餘。衆心仰慕之不足。卷三朝之鉅業。久退守于宮符。撫千里之環封。復懇紆于鄉紱。門弧戒旦。鼎食增榮。宜壽而感。合萬辭而祝頌。若富與貴。永百福之崇高。某適倅計庭。正遙恩館。馳歡誠而第劇。就慶列以無從。北望台光。卑情無任。激切瞻禱之至。

賀樞密富相公加戶部尙書狀

伏審誕敷內命。具告外廷。進長地官。增崇台序。伏惟慶慰。恭以樞密相公。器包民極。勳濟王塗。洞安危之大機。更文武之二柄。宰庭論道。尙存鄩侯之舊規。樞幄本兵。不聞冒頓之南牧。兩朝感會。一德將明。遭繼聖之重光。采建儲之前議。特加峻秩。示獎元勳。雖懇列讓封。隱廟謨而弗有。而勉從制冊。激朝論以逾高。上富資政狀

向紆守紱。遯遠台符。當淮州囂冗之衝。積官簿沈迷之慮。馳心材館。徒爾增勞。奏記鈴齋。缺然不講。伏惟

布黃堂之政事。萃秦宇之福膺。恭以某官。道簡上心。名重天下。高文大冊。蚤中于賢科。要職美官。獨揚于聖世。將命絕域。能尊大于本朝。避寵鴻樞。益光華于全德。進升祕殿。出領巨邦。綏一州之氓。惜利澤之未廣。調大鈞之化。庶中外之咸依。行奉詔書。入居鼎席。

賀樞密張太尉加吏部侍郎狀

伏審顯對冊書。增崇命數。優國老之舊德。進天官之亞鄉。邸報初聞。朝論胥慶。恭以樞密太尉。天民先覺。王佐偉才。抱忠諒之一心。出誠明之正性。參鼎司而調萬化。清風尙存。坐宥省以論五兵。白首逾厲。適報受遺之德。遯疏進秩之恩。垂光中階。登貳冢宰。鴻樞之祕。想妙略之咸依。赤松之遊。追先分而未可。永言企躍。曷盡敷云。

賀參政趙侍郎加吏部侍郎狀

伏審帝制發中。天官登貳。埏陶所暨。喜躍惟鈞。恭以參政侍郎。道備將明。德含惇大。忠言坐斷乎國論。文體追還于古風。自結主知。歷紆賢業。拜先皇于臥內。親受遺言。出嗣聖之宸衷。特崇舊德。加峻中臺之貴秩。益光近輔之榮班。某總計朔陲。馳誠翹館。願業官之有守。思展慶以無從。

代賀向少卿狀

伏審宸檢疏恩。月鄉進秩。暉映之下。躍抃兼常。恭以某官。亮節在廷。懿文表世。榮寵紳綏之貴。慶鍾圭袞之餘。領通漕之事權。瞻大邦之用度。芝函錫命。棘位登賢。心計無垠。聊屈外臺之寄。聰聞甚熟。佇觀迅詔。

之來。俛惟冗微。鎮卜棲倚。

代賀李參政狀

伏審帝詔登賢。宰庭進序。挺鎔所暨。權躍惟鈞。恭以某官。上天元精。清廟偉器。行出世表。文爲人師。識度宏深。夙稱大臣之業。忠誼肅正。自結真主之知。遠達京邑之雄。徑宅廟堂之貴。圖講治安之策。今也其時。樹立太平之基。決于匪日。九州四海。萬口一辭。某適貳守符。逖遙台屏。雖聞風而增忭。惕馳賀以無階。

代賀待制諫議狀

伏審入覲宸旒。峻躋諫闥。側聞新命。竊忭丹悰。恭以某官。莊重自居。直清不倚。早逢文雅之會。優踐廉良之科。回翔顯塗。暉映當世。早居侍從之職。屈領事爲之權。掌通漕之司。方凝于茂績。奏甘泉之計。密簡于上衷。遽兼內閣之華。驟置七人之列。金穀之委。聊慎于才難。鈞衡之崇。佇膺于冊拜。卽圖趨伏。併述忻翹。

代賀梁副樞改給事狀

一遠牆宇。久偃鄉邦。有箴領之摠懷。習成慵放。願音函之布問。坐致闕稀。茲承疏渥。嚴宸登賢華序。矧叨暉庇。實倍忻愉。恭以某官。莊重自居。直清不倚。逢辰熙穆。筮仕光亨。飛綏金馬之廷。早揚仙貫。視草玉堂之署。密暢宸猷。日侍奉于威顏。位益隆于體貌。鴻樞之府。參掌于繁機。青瑣之門。驟光于寵拜。矧時所傾。屬上方倚毗。咫尺三台。行摠真相之業。仁壽億姓。以畢大臣之能。

代賀歐陽龍圖知府狀

伏審光奉制書。就移治屏。伏惟欣慰。恭以某官。際天蘊識。名世標才。允極將明之資。以基太平之業。屈司宮鑰。鬱四海巖巖之瞻。行被宸緝。宅上台兩兩之曜。

代賀文相公狀

伏審恩章均霈。冊命發中。慶與國均。榮動物聽。竊以昊天著象。酌氣者機衡之司。皇國設官。賦政者喉舌之任。審是要選。歸于宗工。恭以某官。上台元精。清廟偉器。歷二府之重委。踐三槐之絕班。晉公底淮右之平。入持宰柄。山甫補周家之闕。遠踵賢規。大屬股肱之良。益隆體貌之地。某職貳方郡。跡遙廟堂。馳賀無階。企棟良極。

代賀發運待制狀

伏以寶典履長。盛儀亞歲。義易紀其來復。魯史載夫望書。恭以某官。才貫幾深。德涵剛實。外臺重委。誠曰藉才之司。內閣邇聯。決非久次之地。順迎令序。誕擁龐祺。某適守賤司。不獲躬詣。增埽稱慶。卑情無任瞻頌。激切悚惶之至。

代賀運使張刑部狀

伏審寵承鴻渥。榮改清郎。伏惟慶慰。恭以某官。業履蹈中。才猷彪外。游更重委。率著能名。括地賦于列城。實關心計。陟秋官之要秩。茲副恩章。俛惟下寮。方備屬吏。側聆甄擢。倍萬忻愉。

代賀許發運賜出身狀

伏審光被詔音。榮升科等。側聞異數。陰忭丹悰。竊以國家圖講聖治之端。追救時文之弊。以有司持尺寸之度。豈盡得人。而賢者具經濟之資。或艱申第。爰頒不次之命。以擢非常之才。恭以某官。識洞深幾。學探精蘊。雄文大筆。自結于主知。細札溫書。特躋于賢選。天下知勸。朝論加優。燕賀良深。葵忱曷罄。

代賀龐昭文狀

伏審就膺制冊。升冠宰庭。成命旣行。有生同慶。恭以某官。高文經世。鉅業代天。道誼致君。忠諒行己。間綏邊閫。旋貳樞廷。寢隆萬乘之知。參斷三公之論。底邦猷于甚盛。密簡中宸。隱廟略而勿居。一歸上袞。遽正元台之位。以彰真相之才。廟堂之號得賢。莫先今日。區夏之觀至治。計在匪朝。某職預漕臺。迹遙政府。亞紳縷之權蹈。邈矣無階。託鈞冶之埏鎔。幸而有地。

代賀陳雜端狀

伏審榮改諫聯。就登憲職。伏惟慶慰。竊以臺選之妙。官材實艱。言朝廷是非。糾臣僚過失。其膺慎簡。允屬宗賢。恭以某官。行潔性醇。德宏業鉅。高文大冊。早中于賢科。美職要官。進揚于聖世。才爲時而傑出。道遇主而盛行。間分九五之憂。往撫東南之地。全安罷俗。宣諭至仁。甄擢俊長。抑黜姦儒。迨使車之還止。果宸展之嘉焉。開英袞之便塗。濟繡衣之上笏。彌縫庶政之闕。今也其時。樹立太平之基。決于匪日。俛惟冗瑣。舊入獎憐。新命傳聞。寸衷竊忭。訖恩成而有地。從賀列以無階。

又

祇服恩華。進更臺選。伏惟慶慰。竊以國家深講至治。並登偉人。風議所關。憲職爲最。糾朝行之過失。正色不回。論邦體之是非。危辭無避。其膺妙簡。允屬宗工。恭以某官術業宏長。才猷膚敏。見不忠于君者。直哉必言。苟可利于國乎。行且弗顧。曷領嚴宸之命。盡觀列郡之風。升賢黜姦。扶弱抑蠹。迨旋崇旆。入覲邃旒。宣詔意而甚明。果上心之稱允。繡衣劇序。聊示於徽章。英袞絕班。行光于寵拜。

代賀陳相公狀

伏審寵建使旌。榮兼相印。仍躋祕殿。復鎮舊藩。伏惟慶慰。恭惟某官。社稷宗臣。山河間氣。秉直道以結人主。挾重計以尊朝廷。彝宅鼎司。首膺晉錫。裁黜貴倖。振拔滯淹。窒塞濫源。啓關治路。底邦猷于甚盛。密簡嚴宸。避廟略而弗居。懇辭上袞。部守符而均佚。露公冕以觀風。卷康濟之大而就一州。遂蕃宣之樂而鬱四海。帝心久注。恩數推優。謂體貌舊臣。宜帶宰臣之序。欲節制諸郡。因加將鉞之雄。禮意甚隆。輿言弗愜。一相處外。勞周伯之來歸。萬民具瞻。望晉公之再入。行膺徽冊。還陟元台。曾是疎頑。嘗依挺造。頑金待器。更期大冶之開。廣廈旣成。敢效翮飛之賀。

代賀發運鄧郎中狀

伏審祇奉茂恩。出司通漕。側聞成命。竊忭寸襟。恭以某官術業宏長。智謀膚敏。郎垣應宿。蚤躋位著之嚴。使節宣風。游領事權之劇。旋聞名于法坐。亟佐職于財闈。眷言淮海之輸。實備邦家之計。董外臺之轉給。宜得周才被溫詔之褒升。允資碩畫。俛惟屬部。將庇末暉。欣幸交深。名言非悉。

又

伏審祇奉恩函。總司利柄。竊以中都之費。率緊通漕之供。乃簡周才。以分重寄。恭惟某官。中和迪哲。亮直秉葵。謹漕節之輸將。洊登最狀。參財闈之經度。久試豐功。遽爲聰哲之知。都領東南之計。俛惟儒品。管庇末光。復依使旆之嚴。不失君軒之舊。永言慶忭。倍萬等倫。

又

伏審進膺宸誥。出總使臺。將託末暉。預深竊忭。恭以某官。行推高爽。道具醇全。遴復旦之聖期。踐列星之郎位。備紆賢蘊。自結主知。洊持漕節之嚴。入預計廷之劇。綢繆利柄。歷詳金穀之原。蒙被朝僉。都領江淮之運。物論皆允。邦須所依。俛惟下寮。行備屬吏。永言欣幸。曷究名言。

代賀施龍圖狀

伏審北轅按部。中路改恩。罷總漕臺。往司官鑰。伏惟慶慰。恭以某官。器包民極。勳濟王塗。親對休辰。洊揚旌仕。領邊藩之劇部。參財省之偉謀。風績並凝。褒章增峻。邁升延閣之祕。益注嚴宸之懷。董大計於東南。久煩經畫。副具瞻于中外。差緩升庸。遽被溫書。暫班寬詔。俛惟屬吏。夙荷恩私。歡戀並懷。指云非諭。

代賀錢侍讀移青州狀

伏審光膺細札。移殿巨藩。伏惟慶慰。恭以某官。方格淳脩。器識宏遠。高文大冊。早決于世科。至論昌言。有裨于國體。進直禁局之祕。旋陪乙夜之觀。禮遇益隆。地望絕擬。輟居嚴署。出守南麾。已躋雅俗之安。靡俟

更書之滿。朝端上袞。差緩于登庸。京左數邦。聊繫于鎮撫。卽光冊拜。大副巖瞻。

代沈主客賀文侍中知永興狀

進膺冊命。出布政條。伏惟慶慰。恭以某官。王佐偉才。天民先覺。濟極功于天下。暢鉅業于朝端。蚤躋台序之嚴。旋宅宰司之冠。蒐闢儀之未講。墜典畢脩。畫常憲于可行。成規永賴。去終禮制。起應詔音。建淮海之高牙。鎮關河之巨屏。式是遠略。穩如長城。繫樽俎之前籌。寬朝廷之西顧。外蕃主室。暫勞申伯之行。歸乘國鈞。再俟晉公之入。伏望上爲宗社。精調燕興。

代賀知府李密學狀

伏審祇奉制音。就觀畿政。側聞新命。竊忻寸襟。恭以某官。經世偉才。薦紳碩望。由妙年而取上第。不累日而都要官。亟自禁林之遊。徑登樞府之直。時論歸重。上知愈明。京邑四方之表儀。翕騰于尹治。宰廷百辟之師帥。當被于朝僉。咫尺聰聞。旦夕冊拜。未遑馳慶。先辱占書。媿喜并深。名言非諱。

代賀安撫太保狀

伏審肅膺朝命。出諭上仁。拜德有階。普天共慶。恭以某官。識度沈遠。機神迅清。名簡萬乘之心。才兼數器之任。帝念東南之郡。民罹水旱之年。分使臣之光華。奉承溫詔。布天子之惠愛。撫慰羣元。某適守陋藩。行瞻嚴施。永言企忭。曷究文陳。

代賀青州文相公狀

伏審就膺細札。移鎮巨邦。凡出埏陶。惟均忭躍。恭以某官。山河間氣。社稷宗臣。道遇主而盛行。位因功而數易。運神機于樞幄。纒服華章。參正議于鼎司。遽更徵冊。方將緝熙當世之繹。舒暢蒼生之心。會狂孽之悖常。嬰孤城而假息。獨形忠憤。請殄姦妖。廟算略施。寇巢隨破。晉公登用。最高平蔡之勳。傳說贊襄。休有弼商之策。追合宮之闕典。一旦舉行。詔列郡之禮闈。同時開設。少見大臣之效。弗殫真相之才。露冠冕以觀風。剖守符而均佚。朝端上袞。矧久鬱于民瞻。京左數邦。復暫勞于君重。行祇明命。還宅元台。曾是孤生。嘗叨清舉。請假書林之職。俾兼漕節之權。雖寢曲恩。如沾大賜。自違鈞屏。尋總計臺。第切歡誠。阻從賀列。

代賀宋內翰移鎮狀

伏審祗奉明縉。移東巨鎮。伏惟慶慰。恭以某官。民靈先覺。王佐偉才。道簡上心。名重天下。升華延閣。蚤潤色于宸篇。翔步禁扁。久發揮于內命。旋陪乙夜之覽。允極丁辰之光。固宜陟降王塗。優游公路。遯出觀于藩政。已外鬱於巖瞻。復被恩函。改臨邊閫。眷惟中國之望。恃若長城之堅。綏懷遠人。節制諸郡。講兵民之利疚。考風俗之便宜。行聞氏羌悚威。固無南牧之意。朝廷倚重。不復西顧之憂。紀績王常。調元台鼎。某適司通漕。方庇末光。亟聞新命之行。徒劇懦衷之戀。葵傾倍切。燕賀無階。

代賀制置端公狀

伏審拜嘉朝右。進秩臺端。凡被誕鎔。惟均慶慰。竊以國家盛重中都之計。率緊通漕之才。謂金穀之繁。尤關乎要務。而歲月既久。茲見于成功。將大升庸之階。故先雄劇之序。恭以某官。性與道會。器隨用周。遂翊

對敷方嘉於碩畫。法冠直指。遠踐乎榮班。恩出主知。事光物論。矧繡衣之上笏。卽英袞之便塗。時議皆然。愚言非佞。俛惟辱薄。最辱獎憐。新命傳聞。喜踰於他等。賤司嬰繫。跡阻於前趨。企棟攸深。名言匪悉。

冬至賀錢內翰狀

寶典履長。盛儀亞歲。義易紀其來復。魯史重夫望書。恭以某官。業術崇高。智謨光大。厭禁林之久侍。聊以觀風。暢台袞之偉謀。行聞祇召。順迎令序。誕擁龐褱。某守在小邦。跡遙巨屏。祝南山而爲壽。適阻前趨。託縑幅以貢音。曷殫下懇。

代賀張刑部得替狀

伏審顯膺召節。榮解利權。行乘卓馬之朝。入覲蒼龍之闕。良階柄任。增忭襟襟。恭以某官。風業宏長。才謀膚劭。自領漕臺之劇。益爲宸展之知。給食京師。已報輸將之最。敷休軒陛。佇嘉經畫之明。亟列近嚴。庶符頌願。

代賀省副端公充待制狀

伏審祇奉恩函。榮躋禁職。側聞顯命。竊忭丹悰。恭以某官。識宇宏通。才謨高亮。對休辰而逢吉。揚臚仕以開榮。蚤爲聰哲之知。出總東南之漕。剋去積弊。樹成新規。力董輸將。矧勤勞于十稔。訖緊幹濟。已贍足于中都。固風績之茂焉。果上心之嘉乃。適因奏計之便。遽被疇庸之章。對命嚴宸。升華延閣。訂茲慎選。誠曰當賢。籠金穀于百城。暫還舊物。秉機衡于二府。佇拜明恩。

代賀張待制知揚州狀

伏審解麾吳服。移鎮淮壩。審卽便時。已開尊府。伏惟慶慰。恭以某官。秉心峭介。懋德優宏。素履清風。最高乎時論。美官要職。歷踐於班榮。蚤居延閣之華。累典名城之重。蘋洲舊俗。方結于去思。蕪城故知。尙嗟于來暮。適兩轡之稅駕。班寬詔以觀風。靡俟政成。行光柄任。

代賀發運端公授省副狀

伏審顯承恩詔。進貳財閫。成命已行。寸襟竊忭。恭以某官。才兼數器。名重當時。弗援強近之知。自結聖神之眷。兼臺綱之美秩。總漕節之劇司。給食京師。矧風猷之久懋。敷休軒陛。會歲課之告成。亟嘉經畫之明。旋被褒升之渥。亞計廷之要職。方倚國才。暢台路之密謀。行光寵命。俛惟疏宥。最辱獎題。適領守符。阻從賀列。

代賀運判賜章服狀

伏審被詔發中。拜嘉不次。伏惟慶慰。恭以某官。鍾氣間傑。爲時聞人。名動搢紳。道結當扈。高文大筆。自取于要官。鉅業周才。遽當于顯用。乘江淮之歲歉。加金穀之數叢。力暢偉謀。助成大計。果申慶典。以錄豐功。將興歎於能臣。乃疏榮於品服。王恩至當。物議皆然。某適貳守符。阻陪賀列。瞻言使旆。曷諭愚悰。

代賀二漕改官狀

伏審歲課告成。星垣增峻。公庠所暨。私忭惟均。恭以某官。名重搢紳。才兼數器。被邦家之選遇。蚤暢賢謨。

董山海之輸將。洊登最狀。旋承鴻渥。進改清郎。矧繫碩畫之明。更聽茂恩之擢。屬官居之有守。趨慶列以無階。企悚交深。文陳非諭。

代賀副樞給事狀

伏審顯承明制。參掌繁機。成命既行。有生胥慶。恭以某官。智謀光大。業履崇高。挺金石之純誠。抱廟堂之偉器。忠言坐斷乎國論。亮節素邀乎主知。間倚重于翰垣。將往綏于邊圉。遘谿會之峒強。憑富險以釋騷。議舉靈誅。僉推碩畫。方使旌之就道。俄宸詔之命還。果廟算之萬全。破寇巢于一舉。洎聞大凱。因答豐功。拜嘉青瑣之門。貳職鴻樞之府。圖講治安之策。今也其時。樹立太平之基。決于昨日。佇更徽冊。進陟元台。副函夏之具瞻。畢大臣之能事。俯惟愚品。久託鈞麻。散木弗材。常荷先容之賜。頑金能躍。更聞大冶之開。第劇歡誠。阻趨賀列。

代賀何龍圖移慶州狀

伏審茂對宸緝。就更藩閫。受知有素。忭躍惟深。恭以某官。才爲世生。道先民覺。蚤署含元之上第。旋直承明之祕廬。當展以忠誼知名。薦紳以文章矜式。俄持太史之筆。久列侍臣之班。益峻恩章。邁升禁列。眷惟治屏。俯控西陲。宜得國楨。以綏邊俗。用恩威之二道。專節制于一方。隱若長城。暫繫于坐鎮。霈然中詔。行趨于登庸。某適貳麾符。阻趨旌棨。遙瞻使節。曷罄愚誠。

賀得替都監王殿直狀

伏審告成美課。入覲嚴宸。驟奪公麻。第增愚戀。恭以某官清端不倚。沈毅有謀。董師律于方州。適茲滿歲。佐戎旃於邊閫。其在匪朝。倍愼寢興。以酬光渥。

賀田告曹移令狀

伏審顯奉宸緝。就紆縣紱。伏惟懽慰。恭以某官器資夷遠。品格端嚴。決科妙年。掾郡更歲。薦書交上。劇論于美材。褒詔亟頒。優分子便邑。未遑修慶。先辱占音。感忭并深。名言非悉。

賀金華著作狀

審即便時。已臨劇邑。方棲餘庇。竊忭丹悰。恭以某官學有本原。性函剛實。參華金馬。茲漸于清塗。分寄銅章。遂據於素蘊。宿官所限。稱慶莫前。瞻扑交深。名言非論。

賀文潞公狀

伏審肅即便時。肇臨宥省。神機所總。福祚具蕃。恭以某官涵德淳深。秉華光大。協風雲之盛會。揭日月之貴名。早冠序于宰塗。迄致平于王路。比煩遠略。往殿劇藩。建淮海之高牙。方開尊府。挹河汾之間氣。趣覲清光。夙推英袞之謀。首付鴻樞之柄。方隅無事。暫賴留侯之運籌。廊廟有聲。復歸蕭相之畫一。邕熙朝之偉績。收高世之極功。鐘鼎所銘。邦家之耀。俛惟衰晚。訖託誕銘。第內激于懽誠。阻前陪於慶列。

代趙待制賀昭文相公加左僕射狀

伏審誕膺徽冊。祇服華章。進升右相之尊。增重元台之體。伏惟慶慰。恭以昭文相公。世濟人傑。道包聖微。

揭日月之高名。會風雲於先帝。奉綴衣之求命。定策禁中。暢英袞之偉謨。立功天下。上念大忠之力。恩推異數之文。加峻秩于天臺。光元勳于王室。傳聞成命。舉慰具瞻。某職總利權。身遙材館。阻從慶列。第劇歡誠。

代趙內閣冬至賀昭文相公狀

伏以在復之來七日。陽德其升。建子之貫三微。王心所慎。恭惟某官。先識經世。元勳格天。衣冠百工。鈞冶萬彙。繫安危于天下。感會兩朝。輔左右之廷中。周旋再紀。遙臨慶序。翁受純禧。具瞻之石巖巖。永堅民望。相比之星兩兩。增耀台光。某兼冒從聯。總司漕節。薦壽觴而莫及。跋相閣以逾勤。

代李才元學士賀西京文相公狀

伏審就膺徽冊。更尹別都。尊府初開。搢紳均忭。恭惟某官。器包民極。勳濟王塗。蚤殄寇巢。旋持宰柄。履正德以表庶位。挾重計以尊本朝。蒐未紹之闕儀。適殫能事。暢無前之偉業。重享成功。措邦體于既平。隱廟謨而弗有。踐崇高之極。而自鈞出處之致。斂康濟之大。而樂就蕃宣之勞。亟換左符。兼升右揆。列讓封而避寵。順成命以居留。然而幅員蒼生。咸願晉公之再入。坯冶舊物。豈忘周尹之具瞻。行對宸緝。復調台鼎。

代賀何舍人狀

伏審宸緝疏渥。法從登賢。向聽朝僉。預伸而賀。旋承拜命。適偶戒行。徙增忭于寸襟。阻裁誠于尺牘。竊以代訓誥宣明之作。真見上心。惟文章雅正之才。能體詔意。膺是妙選。允歸宗工。恭以某官。誠貫幾深。學該

鉅細早躋諫垣之祕列。亟踐禁廷之貴游。丕變時文。一至古道。載筆書萬代之法。茲爲儒榮。持衡宰四海之平。猶鬱時議。矧注錄之上笏。卽登庸之便塗。行奉詔音。驟光冊拜。某嚮緣同籍之分。嘗被虛襟之容。迭聞褒升。倍深茂悅。

代賀韓舍人狀

伏審茂對恩書。榮躋法從。側聞褒擢。陰切欣愉。恭以某官。器資淳修。業術精奧。早逢文雅之會。優陟秀廉之科。華要滄揚。聲光愈綽。方載言于法座。俄給札于禁林。有文章溫厚之才。能體詔意。代誥令宣明之作。遠當上心。行追三代之醇。遠駕二京之右。殫儒者之顯效。宜鄰哉之近班。

代賀安撫陳舍人狀

伏惟某官。品格淳修。才猷廣敏。言經邦國之體。學際天人之交。道簡宸襟。地嚴諫署。珍策重計。施諸當世。而可行。要職美官。不由累日而自致。出宣溫誥。溥諭上仁。行入對于清光。亟徑躋于嚴近。順迎令序。誕集純禧。某別乘庀司。矧宿官之茲限。南山興祝。固介壽之莫前。

代賀李刑部移襄州狀

伏審就蒙細劄。移鎮巨藩。伏惟慶慰。恭以某官。經世偉才。搢紳碩望。露章懇郡。方俞詔之褒優。當軸須賢。行寵恩之升擢。伏望上爲邦國。精調燕興。

代賀張待制移揚州狀

伏審膺圭符之寵寄。易淮海之奧區。肅東剛辰。已頒寬詔。俛惟陋壤。獲邇大邦。榮庇末暉。喜踰常等。恭以某官才猷高亮。風績宏長。早會遇于聖辰。久翱翔于禁職。解吳興之郡印。尙仰褒書。旻廣陵之守麾。復開督府。露章按罪。方紹昔賢之風。加秩賜金。行光循吏之目。某適膺州檄。阻叩賓闕。從慶列以無階。馳懦衷而第劇。

代賀廣州王少卿狀

伏審茂對明縉。就移巨屏。躋奉常之少列。兼文館之祕聯。蓋以國家慎重長人。愛綏遠俗。因推不次之命。以付非常之賢。登庸出于此塗。權頌均乎衆口。恭以某官直清不倚。莊重自居。行高薦紳。名記當辰。雄文取重于時論。大雅追還于古風。董淮服之輸將。瞻神都之供億。才周數器。勳濟本朝。督府千兵。暫臨南海之鎮。溫書一札。行陟中台之階。俛惟下僚。久備屬吏。側聞異數。竊忭寸襟。藐如嬰兒。驟奪慈母。茶若疲馬。止思故軒。喜戀交情。名言非諭。

代賀湯都官狀

伏念自奪恩暉。寢更月所。門墻愈遠。牋牒不時。豈謂不遺冗賤之蹤。特賜丁寧之誨。拜而伏讀。藏以爲榮。旋聞入奉明縉。寵更巨屏。庇廕之下。喜忭兼常。恭以知郡都官。秉節直清。賦才雄健。會龍飛之復旦。被龜紫以光朝。出守之領使麾。矧隆帝渥。衣繡之過故里。茲實儒榮。趨伏非遙。瞻依倍切。

代賀正上亳州宋侍讀狀

恭以某官。學際天淵。名重纓綬。早陪乙夜之覽。允極丁辰之榮。翔步王塗。居勞侍從之事。班條侯閫。出詠中和之詩。順履慶辰。具膺景福。宅上台而秉軸。諒在匪朝。祝南山而奉觴。莫遑爲壽。

代賀正上昭文相公狀

斗初建寅。帝出乘震。西京講物。允重三元之朝。東國著經。實尊五始之月。恭以某官。山河間氣。社稷宗臣。挾重計以尊朝廷。秉直道以結人主。位隆公袞。勳濟王塗。太平之策略行。已盡至治。畫一之歌繼作。第守成規。坐掄大猷。首調元粹。廟堂之上。深暢于偉謀。旒展之間。日傾于正誼。聊觀風於雅俗。因均佚于陪京。須五月之政成。復三篇之冊拜。伏望順迎令序。誕擁龐禱。南山之石巖巖。鎮爲民望。秦階之星雨雨。永耀台光。某職列漕端。迹遙相閣。薦壽觴而進拜。阻預後陳。貢慶牘以浼尊。曷涯下悃。

祠部集卷十八

狀

代冬至賀諸官狀

寶典履長。雲臺視朔。復天陽於七日。亞儀會于三朝。恭以某官。洵直懋功。融明迪哲。發揮當世之務。茲鬱於賢謨。綱紀列城之風。聊分於使領。順迎令序。誕擁龐禩。某適限他司。莫前爲壽。傾瞻抃頌。曷諭下情。

冬至賀鄰郡知州狀

一陽肇新。萬寶伊始。合陰陽之交讓。步珠璧以聯輝。恭以某官。才爲吏師。學際聖闈。頒條治屏。聊鬱於遠謀。鳴玉嚴塗。佇揚於華貫。導迎令旦。集受繁禧。瞻禱所深。名言匪悉。

代謝運使工部保舉狀

某自少也賤。實今之愚。學弗名家。力徒稽古。一竊科籍。久糜祿鍾。間關四紀之餘。忝冒數州之寄。唯臨淮之陋壤。乃沿汴之要區。自領一麾。僅彌期歲。事弊未革。民瘼尙留。日虞官瘵。以底吏責。豈謂某官。曲矜懦介。特賜甄揚。掩其疏短之才。謂可劇煩之使。親形封奏。上達冕旒。感積於中。望踰於始。昔者楚諺珍季布之諾。不啻得金。魯經尊仲尼之褒。有踰贈袞。竊欣幸會。迴越舊聞。敢不佩服攸箴。周旋乃事。天休雖至。而不以爲喜。官局是專。而靡營其他。永矢捐軀。仰酬知己。

代謝施待制狀

昨以他郡寓家。便塗抵任。子居虔命之署。冷甚廣文之官。豈謂曲諒愚衷。過垂恩惻。俾沿臺牒。往促漕舟。皆緣公爲得遂私欲。獲挈賤累。盡歸巨庥。此蓋伏遇某官。盡物以誠。任仁于己。永言感服。曷究指名。

代謝二司狀

某到郡累旬。監州無狀。簿書弗整。管庫少嚴。製錦致傷。雖強學而安可。血指爲斲。蓋不能之使然。承攬轡之按臨。欲望風而引去。不時斥罷。盡出優憐。知無不爲。力圖拙者之效。死而後已。仰答仁人之恩。近阻高明。諒臻禧福。伏望順節自壽。協時所瞻。

代謝兩府狀

被恩至渥。冒職如初。俯伏拜嘉。兢慙失措。伏念某早緣曲藝。竊綴茂科。逢辰寡資。累日取進。懸領漕權之重。往當河朔之雄。方殫鄙才。思稱繁使。而所屬列郡。非良長人。致狂寇之不成。嬰孤城而自守。不能慮事。而先撻。徒爾傾忠。于已萌。賴廟算之萬全。破寇巢于一舉。私心俟黜。恩典從寬。止奪使麾。尙叨守紱。雖頻年易郡。未始滿期。而南服按刑。僅諧累月。豈圖明命。復眷孤蹤。官改外臺。俾還舊物。蓋使過者欲功之勉。嘗失者知得之榮。靖言忝塵。厥有緣自。此蓋伏遇某官。代天敷化。當軸均仁。匠物謂無可捐。器人容有。不備。卒令鷲質。仍玷龍光。敢不究悉事權。激昂志尙。少圖拙者之效。庶答大鈞之私。

代到任謝兩府狀

比者就蒙細劄。移領善邦。望闕非遙。假麾何幸。竊念某本由平進。親遭盛期。累日而取官資。固無他術。應宿而居郎位。誠玷茂恩。而復頻易左符。率遷喬木。唯泗封之故郡。實淮服之會區。曷稱衰遲。輒當繁要。此蓋伏遇某官。代天敷化。與物終仁。昇分外補之榮。曲盡大君之賜。敢不周旋乃職。黽勉在公。永矢捐軀。仰酬知己。某下情無任感懼。激切之至。

代謝諸官狀

茲以短才。猥當煩使。叢然財賦之供億。乘以簿書之冗紛。徒爾傾風。末由奉記。豈圖情照。首貺音滕。意在遠而彌親。禮由謙而益厚。仰銜勤抑。第切銘藏。歆溥云初。標儀尙邈。勉綏寢饋。前對寵榮。

代謝轉官狀

帝饗告成。德音申諭。泛均洪澤。施及冗員。被寵匪叨。拜嘉知愧。伏念某本由曲藝。進冒茂科。早緣幕廷。踐闈籍。止圖累日之效。以致列星之聯。豈謂禮訖總章。慶覃列位。或講求曠典之舊。或侍從嚴祠之勞。此而例遷。固匪虛授。若茲忝據。良自夤緣。此蓋伏遇某官。素昂霄期。致階榮漸。卒令鶩猥。亦玷龍光。敢不加慎。操修益思。樹立上酬天造。次答已知。舍是而他。不知所措。

代謝二司狀

露章易郡。得請還朝。獲遂私誠。將違公庇。怔惶承命。喜戀裝懷。伏念某荏苒外麾。徘徊路末。力圖爲政之效。日抱療官之虞。重以迎侍安輿。阻遙故里。雖竭晨昏之奉。殊乖羞膳之宜。然君父之命已行。弗宜數改。

而人子之心未盡。因用上陳。豈謂容慈。俯從愚欲。此蓋伏遇某官。素垂大惠。曲軫孤蹤。贊行軫物之仁。使就養親之便。永惟感幸。曷究指名。

代得替謝上司狀

術短事叢。地卑郡要。知庭闈之奉養。有風土之乖殊。弗便旨甘。遂形懇請。願除便郡。以就私誠。露章方聞。俞詔隨下。矧爾更書之代。將遠蔭宇之醴。得免官瘵。卒以理去。靖言所自。厥有由然。此蓋伏遇某官。早借題評。俯矜樸直。靡尤庶物之曠。曲示兼容之優。獲解守麾。俯行體之入覲。回瞻恩館。惕感涕之無從。

代謝提刑狀

近以露章宸冕。卜兆親塋。因緣盡室之還。將就乘舟之便。爲謀弗熟。引慝固多。值使旆之按刑。呼篙工而詰問。仍移牒命。俾述事端。雖勉開陳。尙虞舉劾。豈謂靡尤。既往之過。特寢必行之文。此蓋伏遇某官。量極兼容。仁推再造。念效官四紀。粗守於謹廉。使竊寵一麾。獲全於榮幸。欲報知己。敢辭捐軀。

謝兩制狀

祇奉明縉。就叨寵寄。京畿近服。邦漕重司。併集茂恩。驟加庸品。竊以爲國領計。須官得人。餽輸中都。不腴民而厚上。澄序庶位。不簡賢而附權。具是兼長。乃名宜職。苟容竊位。曷弭公言。某效局無堪。瘵官有素。江淮易任。曾靡寧居。金穀主謀。悅迷舊習。豈謂浩繁之委。不遺孤冗之蹤。此蓋伏遇某官。言味借優。褒華引重。振拂汗滯。矜憐介愚。寢聞當辰之聰。還復外臺之命。敢不周旋乃事。恪慎厥修。永矢捐軀。仰酬知己。

又

謬被恩縉。出提憲局。才輕責重。寵至憂深。竊惟庶獄之原。動繫生民之命。雖詔條所約。深慎于吏文。而州縣之間。或違于上意。因精使者之選。以董欽哉之刑。必得周才。乃名宜職。竊念某職非經遠。品不及中。襲鉛槧之遺芬。粗求寸效。究簡書之深意。都昧舊聞。就領僻官。尙虞墮職。矧在淮州之劇。尤稱犴獄之繁。此而按章。誠曰假寵。靖循忝冒。厥有階緣。此蓋伏遇某官。言味借優。褒華引重。振拂汗滯。矜憐介憇。寢聞當辰之聰。俾預外臺之寄。敢不持存平允。考察濫冤。永矢糜軀。上酬知己。

代謝王舍人狀

逖阻風猷。寢更年所。日爲簿領之關。掌坐致音書之闊。稀方切傾賢。遽蒙下教。感與忝會。情鈞禮優。恭以某官。素練善經。游揚臚仕。沈毅有略。不廢壺歌之懽。嘯聚自潛。已絕萑苻之警。果凝顯烈。驟陟榮班。某處事弗精。療官是懼。尙蒙寬假。不汝瑕疵。去德未遙。佩恩良極。

代謝許發運狀

某一竊科籍。久糜祿鍾。累日而取官資。固微他術。應宿而居郎位。誠玷茂恩。向叨郡紱之榮。越隸使臺之屬。罄殫拙效。訖乏最稱。逮秩滿以還朝。仍便麾而假守。靖言忝冒。厥有階緣。此蓋某官。爲容有先。增價十倍。卒令鶖猥。亦被龍光。敢不佩服攸箴。周旋乃事。庶幾一得。云補萬分。永矢捐軀。仰酬知己。

代謝經過諸處官員狀

近沿臺牒。獲道治封。上謁賓除。屢遵賢規之粹。交謹宴俎。過蒙主禮之優。還局而來。息肩未暇。復往推於詔獄。因曠奉於音滕。尙賴寬明。弗加疵咎。伏惟歆炎貫序。福履登和。謬款寢遑。傾瞻曷旣。益綏燕起。前對褒升。

代謝王副樞答書狀

近者伏聞某官。光膺徽冊。參掌繁機。增天子得賢之稱。副大臣行道之實。幅員億姓。咸託於鈞陶。藩翰下察。竊形於距躍。因傾愚悃。上浼台光。豈謂公輔量寬。廟堂政暇。自忘絕禮。回貺鈞函。拜讀以還。兢榮失據。伏惟緝熙帝載。翁受天祺。恭以某官。王佐偉才。民靈先覺。高文大冊。蚤冠於雋科。華貫嚴途。游揚於聖世。備紓賢業。自結主知。密侍清光。益隆體貌。禁局視草。久屈將明之資。樞幄暢謀。聊分宥密之寄。行明縉之登進。職上褒之凝嚴。副國倚毗。協時瞻矚。

代謝許州相公狀

頃在三川。屢爲屬吏。第疲驚而自守。微銖兩之足甄。伏蒙矜憐介愚。終始振拂。預郎垣而竊寵。忝侯閫之亞塵。訖賴曲成。敢云自致。栽培之德。怵論報以無塔。樽散之資。復託蹤而得地。出入材館。貿遷歲筒。辭藝荒蕪。濫肩下客之列。禮遇優厚。率荷上臺之仁。會遷印於宰廷。方建麾於京輔。首錄門下之賤。俾綴仕階之榮。露章上聞。兪命隨降。弗由稽古之效。遽有進身之基。靖言載惟。厥有攸自。此蓋伏遇某官。大鈞播治。煦律吹枯。匠物謂無可捐。器人容有不備。是令茂渥。輒又鯁儒。棠棣微生。盡沾雨露之澤。鶴鶴勳品。皆緣

卵翼之恩。永矢糜軀。仰酬知己。

代謝中書狀

濫被恩俞。出司憲職。語能且薄。荷責惟憂。竊以國家倬尙至仁。哀矜庶獄。治刑之吏。或舞於深文。抵罪之氓。間罹於密網。因重按章之選。俾澄濫罰之源。宜得敏才。以當繁使。伏念某肖靈非粹。學古不優。早從朝弁之華。寢冒書林之目。以至分守符之寵。寄備王府之末員。罄竭鄙才。訖微善狀。優游一郡。思全嬾放之懷。董按列城。本非平素之望。靖言塵玷。厥有階繇。此蓋伏遇某官翼亮天工。運平帝緯。器人容有不備。匠物謂無可捐。坦然至公。施及無意。敢不周旋乃事。恪慎厥修。誓殫一介之勤。少答大鈞之賜。

代謝李兵部狀

比緣厚幸。得備屬官。向因愚悃之傾。輒瀆使威之重。豈圖乘轉給之豐暇。忘爵德之達尊。俛頽下僚。特頒諄誨。仰佩一謙之美。第增三復之勤。恭以某官元精所生。盛德之後。早躋纓紱之貴。自結纘旒之知。總漕節之劇司。方圖顯效。復相門之遠躅。行被茂恩。

謝蔡學士狀

愆冥亡狀。汨沒于時。向補隸官。嘗備掾屬。轅駒局促。曾建議之弗明。市狗悲號。或賞音之間及。汨冗曹之滿歲。會卓馬之還朝。無何孤蹤。亦旅上國。天銓待次。殆困東方之飢。酒正乏員。遽叨北海之薦。靖言鴛猥。曷稱甄揚。此蓋伏遇某官與勸官能。助開公道。不遺簪履之舊。力提管庫之微。敢不佩服攸箴。周旋乃事。

謹材六物。寅守于舊聞。第課三年。庶成于微效。

謝范陽軍司理狀

官舍接疆。日瞻高矩。客車過郡。時標美聲。思清晤以未涯。遽珍題之爲賦。恭以某官。才猷庸敏。方格淳修。一命開榮。尙淹于遠躋。上臺交薦。行蹈于亨塗。倍順節宣。少平頌願。

代謝文相公答書狀

蚤以孤單。素叨獎遇。訖被大鈞之賜。寢貳外塵之榮。旋去門墻。漫逾歲月。一身銜感。因罄敍于悃悃。兼幅瀆尊。懼目貽于罪戾。豈謂王公之量。曲惟犬馬之情。弗爾擯遺。親形誨諭。拜嘉至渥。論幸無涯。伏惟靜鎮大邦。具膺景福。恭以某官。天元間氣。王佐偉才。以忠誼結上知。以過德爲己任。畫一之歌。旣作。休有成規。太平之策略。行。翕臻至治。俄還宰印。出剖使符。幅員蒼生。望晉公之再入。旦夕徵冊。副周尹之具瞻。

代謝兩憲狀

某天資闇昧。胄系寒微。早挾片文。晚塵一第。脫略名場之困。間關仕路之榮。旋貳方州。適居要地。鮮嘗坐局。多所抗塵。間參決于簿書。訖無裨于課最。慙廉自信。卑瑣誰容。豈圖經世之才。方重按章之選。夙夜重寄。品裁庶官。隨器而任人。市骨而圖駿。以某外弗修于邊幅。內粗守于廉隅。諒其介愚。謂可甄拔。特邀露奏。上達邃旒。坦然至公。施及無意。靖言忖度。厥有階由。此蓋伏遇某官。樂育興懷。兼容成德。輕於慰薦。錄此屏庸。敢不持前所存。覬後有立。糜軀以報。知己難酬。

代謝何龍圖狀

伏蒙特抗辟書。俾從藩服。匪才被獎。早度其難勝。成命未行。預虞於弗稱。惟治朝之故事。付帥府之要權。得舉賢材。以備官屬。眷乃題與之請。最居推轂之先。贊行教條。關決政務。講兵民之利疚。考風俗之便宜。當取經通之流。以光慰薦之首。如某者。胄從寒薄。性得顛愚。局若轅駒。固建明之無所。欣如蠶蟄。第竊忭之爲多。伏遇某官。爲木先容。采葑下體。將令駑獍。亦玷龍光。儻卵翼生成。獲繇於恩館。則頂踵酬報。不後於衆人。

謝府推學士狀

自去京都。亟來淮服。馳心翹館之下。回首長安之遙。仰企高風。倍增勞臆。恭以某官。德宏業巨。行潔文醇。由妙年而取甲科。不累日而踐華貫。早被溫書之召。入登祕館之遊。贊劇治于神畿。勢非久次。暢辰猷于禁署。議所同歸。願輔粹襟。行光寵數。伏惟瑣亞。倍百他倫。

謝李兵部狀

近以驟遠崇威。懼遺孤迹。魏向重知之地。尙懷未滿之心。因貢牋函。仰通几格。由誠計之迫遑。致言詞之譁張。謂塵將命之嚴。必冒瀆尊之咎。終朝自省。悻魄難安。曷圖大漕之崇。弗聞冗曹之細。益恢全度。曲究下情。謂夫以賤干貴者。蓋有欲言。由初及末者。方能成物。特寬罪斥。親賜教音。事絕舊聞。幸踰始望。惕焉下拜。藏以爲榮。兼審順履時暄。誕膺景福。恭以某官。早紆賢業。自結主知。言施當世而可行。名揭本朝而

甚白。連更重柄。未嘗坐席之溫。方總外臺。行被詔函之趣。還台衡之舊柄。光史冊之新書。庶俾屏庸。訖歸
挺治。

代謝二漕狀

承乏于茲。字人未幾。官簿弗整。民瘼尙留。與錦使裁。雖強學而安可。血指爲斲。誠不能之使然。聞攬轡之
按臨。欲望風而引去。不時警斥。盡出優憐。究悉寸心。誓殫拙者之效。周旋巨庇。庶免瘵官之虞。方遠使威。
第馳愚悃。恭以某官。才兼庶品。名重本朝。綱紀列城之風。暫光主寄。發揮當世之務。行暢賢圖。伏冀上爲
邦家。精調寢饋。

代謝舉升陟狀

尸官下邑。才微分寸之長。被薦上臺。恩甚邱山之重。事踰望表。感劇愚衷。伏念某孤平之蹤。汨沒無狀。語
能勿齒於俗吏。行已恐羞於古人。一竊祿鍾。偶逃官曠。再污縣紱。復避親嫌。繇從淮服之遐。易宰江濱之
陋。而且歲穰相接。民訟幾稀。鞭扑牒訴之罕。關懷賦租科斂之易。爲力顧何治績。足稱褒章。此蓋伏遇某
官。興勸官能。助開公道。諒其儒介。謂可甄揚。特屈知人之明。猥形躡等之舉。敢不周旋。乃職佩服。攸箴永
矢。糜軀仰酬知己。

謝知府少卿狀

長無寸才。寒有餘地。百里自效。職頗憚于不修。二天誤知。衆遂疑其可取。近具版謁。前從府趨。瞻棨戟之

甚嚴。覺筋骸之如束。伏蒙甫寬苛禮。爲霽嚴顏。損邦侯之達尊。加國士之優遇。以至均惠公庖之品。許陪燕俎之懽。千騎雍容。下臨所舍。十日駭愕。相視爲榮。事信越于前聞。心第藏于厚賜。下邑歸去。尙戀卿雲之濃。終朝度思。益知恩地之重。恭以某官稟氣間傑。爲時老成。朝廷渴賢。方念元龜之舊。廊廟虛位。佇增顯爵之光。孤生成依。四海僉屬。

謝通判國博狀

某託庇歲餘。發蹤門下。散木成器。緊公輸之先容。駑馬爲良。由伯樂之回首。近白吏事。往趨恩闕。方守閭之通名。已倒屣而垂接。斂版長揖。爲降階墀之尊。虛襟相容。不知州縣之賤。以至燕觴延勞。鸞御枉臨。泥塗生光。僚友改觀。守在民社。未幾告還。瞻言軒墻。猶有餘戀。伏惟協班寬詔。坐擁繁禧。恭以通判國博器完道醇。性潔文妙。雍容倅乘之任。豈曰盡才。顏頡書林之遊。此其宜職。伏望爲國自壽。以時考祥。

謝越州知府待制狀

蚤聽諸公之論。竊親盛德之光。位貌間殊。情禮疎絕。恍自進之無路。第仰高之有年。遽被上臺之符。俾論會府之秀。雖殫愚效。何裨勸駕之勤。比訖事經。方適拜塵之願。而大賢不自貴重。一介亦加采收。以至燕俎將恩。餞壺申貺。退銘盛遇。增劇丹悰。伏惟訟鋸盡空。道環天粹。恭以某官器函剛實。才貫幾深。允蹈古人之直清。喜言當世之利疚。旋躋延閣之祕。自結嚴宸之知。東南請麾。已諧均役之志。旦夕被詔。亟對登庸之休。四海共依。孤生非俊。

謝揚直講狀

近並諸君謬程多士。曾是辭才之短。介于季孟之間。而甘辛好殊。藏否蜂起。人執一見。誰將適從。實緊定鑒之精。與決羣言之惑。卒多彼彥之在選。獲道有司之弗明。終朝度思。受賜深矣。復緣賤子之跡。管出先公之門。掩其頑蒙。陰有憐獎。逮單車之亟引。遡翹館以增勞。伏惟贊行寬條。翁受純福。恭以某官薦紳碩望。名世偉才。學造聖賢之微。文經邦國之要。武東南之巨屏。猶鬱羣瞻。陟左右之嚴塗。乃云宜職。伏望爲國自壽。副時所傾。

謝陳秀本狀

發詔羅俊。命卿辨才。代審一摠妙文。旋中異等。遠躋此始。私心竊懼。首貽長牋。尤識厚誼。陳君卽先輩氣得秀粹。學探本原。諒竊祿鍾之榮。勉從貢部之式。華歲方盛。致身其時。青雲在前。舉足可到。永言欽頌。曷罄懽愉。

回劉侍郎生日詩狀

五十富貴。偶同治越之年。八千春秋。難辱借秦之諭。珠璣可玩。瓊玖是慚。空積感懷。莫知報禮。

謝富丞相狀

比者祇被恩書。與持計節。寵幾于冒。分失其安。伏念某偶席世資。罔通時用。介愚既定于所稟。矯揉雖勞。而莫移。矧策足于冗塗。固絕心于要路。向會高明之當國。一隨長短以取人。緣是孤屏。亦叨獎拔。承財闈

之官乏。何所建明。佐神甸之治經。終然暗拙。懇求外補。止覬小麾。曷圖造物之仁。弗願假人之議。遽以煩使。屬之短才。既假漕臺之劇權。又分淮服之近地。無桂玉之憂。足以致舉家之溫飽。有海陸之產。足以奉偏親之旨甘。實私懷之便安。第官責之深重。按列城之吏狀。要在澄清。籠一道之地財。抑資幹濟。當竭愚慮。以酬誤恩。載惟單跡之生成。率自大鈞之終始。卽具舟楫。益遙門墻。敝感臆以無從。企台光而增戀。恭惟某官。器包民極。勳濟王塗。挾重計以尊本朝。履正德以儀庶位。三辰以軌。百化其凝。公路倚平。暢偉謀于當世。親闈棄養。纏巨痛于終天。愈隆注意之私。屢降奪情之詔。雖力祈終制。靡循方進之故常。而久鬱其瞻。深跂晉公之再入。狀望節哀。願變視履考祥。上副廟朝之依。下平海宇之願。

謝賜酒食狀

僕馬瘠勞。暫遂寧居之適。酒肴豐旨。兼蒙飮賜之加。戢感良深。諭言匪悉。

謝館燕狀

竊冒使華。肅將君命。屬征騁之稅鞅。卽候館以肆筵。祇服恩勤。第增感戢。

謝合食酒果狀

邦家脩睦。慶歲籥之履端。肴核優賓。參壺漿而申祝。仰承嘉惠。增戢愚衷。

謝春盤幡勝狀

歲功迺起。春物滋榮。製妙飛幡。動鏤花于剪綵。珍叢多品。錯絲菜于雕盤。併此拜嘉。惕然萃感。

謝生餼狀

車馬少休。方諧定館。餼牽並賜。迥越授餐。匪頒之禮。旣優。荷戢之懷。良劇。

謝射弓御筵狀

燕儀示惠。過蒙折俎之私。禮射序賓。會乏主皮之善。其爲媿幸。無諭感銘。

謝餞筵狀

輕輶載飭。將事千征。嘉豆旅陳。遵叨式宴。良厚使廬之眷。特加祖軼之勤。祇佩弗忘。敷論罔旣。

燕京謝酒果狀

遠駕單車。甫經別甸。特念行人之至。重煩使者之臨。均沾玉斝之清醪。兼雜秀林之珍寶。仰承優賜。增戢鄙懷。

上李刑部狀

頃在親喪。嘗經治部。名屢達於將命。遇迥殊於衆人。旋承卓馬之朝。入覲蒼龍之闕。俛惟賤迹。時旅於上。京適會輜軒。遠使於絕域。第傾德宇。阻叩賓筵。賴幸會之猶然。績恩暉而有所。周旋侯幕。方備於下僚。密邇遠塵。復爲於屬吏。愧營職之無狀。致貢書之不時。仰跂標儀。坐勞悚臆。恭以某官。夙鍾間氣。親遘熙辰。秉忠諒之一心。出誠明之正性。固合住宅元輔。陶成太和。本朝以漕權之艱。淮服爲最。兵興調度之供億。地賦詔求之浩穰。庸資兼才。以領大計。然外臺分寄。誠鬱於具瞻。矧中辰須賢。行膺於爰立。伏望爲國自

重。以時納休。

上知蘇州蔣密諫狀

近修板謁。獲叩坐隅。伏蒙忘位貌之霄泥。錫燕私於樽俎。間沾豐品。申祝名醪。揆恩禮之踰常。決肌骸而盈感。奔馳吏役。邈矣一涯。契闊台光。倏焉累日。愧營職之無狀。致貢書之不時。伏惟鎮撫善藩。綏寧泰宇。恭以知府密學諫議。夙鍾間氣。親邁熙辰。秉忠諒之一心。出誠明之正性。優游訟樹。密邇恭桑。圭袞儻來。靡嬰於素志。江山有助。不廢於清吟。伏望爲國自重。以時納休。

代上李度支狀

向擁州旗。曠馳書舍。伏惟贊司邦計。妙順生經。恭以某官親會熙朝。游揚美任。佐大農之調度。方委於周才。邇中辰之聰聞。行歸於劇任。

代上呂狀元舍人狀

伏審茂對恩書。榮躋法從。伏惟慶慰。恭以某官。學術精奧。方格淳修。學足以挹軻雄之源。行足以蹈淵鷲之軌。親逢文雅之會。優冠秀廉之科。華要游揚。聲光愈綽。方載言于宸扆。俄給札于禁林。有文章溫厚之才。能體詔意。代語令坦明之作。遽當上心。佇見追還三代之醇。遠駕二京之右。少見儒效。卽歸宰司。某頃吏邑封管。棲蔭宇側。聞新命。增忭寸襟。

代上范資政狀

伏自某官就奉制音。往觀藩政。門墻愈遠。慮違冗賤之蹤。牋牒不時。懼浼高明之聽。伏惟靜班寬詔。誕擁純禧。恭以某官王佐偉才。民靈先覺。忠言坐斷乎國論。大筆追還于古風。領樞廷之弼謨。專將闡之節制。備紆賢業。獨映朝端。旋升祕殿之華。益重嚴宸之眷。幅員億姓。已躋富壽之區。藩屏一方。聊布中和之治。行圖舊德。還宅元台。會是儒微。素叨知獎。特矜孤進之自力。畢大鈞之仁事。雖愴于命違。恩固踰於衆遇。更緊埏造。以託生成。

上永興路監司狀

叨從帥幕。將預戎機。才無一長。顏有餘愧。某其少也賤。乃今之愚。治曲學而不根。經遠猷而恐泥。他技俱短。獨潛圖吏之精。自知甚明。僅給簿書之務。若建都之舊地。重開府之盛游。主人仁賢。僚友俊茂。應抗章之辟置。往廁其間。須主畫之該詳。密裨于內。笑談足奉於多暇。牋檄皆如其欲言。縱橫智謀。出入方略。若此之比。率非所能。尙緊官局之居。適託使臺之庇。致孤生之冒選。良本爲容。昧素術於從軍。願前承教。據依有所。欣幸兼常。

代上判府劉龍圖狀

貳政小邦。瞻風上笏。屬秋商之貫序。仰福履之餐和。恭以某官經世偉才。搢紳碩望。忠言坐斷乎國論。大雅追還于古風。中外游揚。明哲一致。迅躋內閣之貴。益重嚴宸之知。京邑四方之表儀。翕騰於尹政。宰廷百辟之師帥。當被於朝僉。咫尺聰聞。旦夕真拜。

代上催綱王太傅狀

向嬰藩守。阻奉郵音。仰計水行。妙熙谷養。恭以某官。稟氣間傑。爲時聞人。掌禮局之儀。深明於典故。促漕臺之運。方藉於幹能。行疇茂庸。驟陟華貫。伏望上爲宗社。精調宴興。

代上通判陳太傅狀

自遠風符。洊更年籥。川壤攸阻。絨膝幾稀。伏惟贊行教條。翁受禧福。恭以某官。量函夷雅。學際本元。侯閫亞麾。尙淹於遠躋。相門襲慶。當繼於先芬。伏望上爲邦朝。精調寢饋。

代上楚州監酒洪推官狀

日傾高誼。斗曠幽絨。湊料燕寧。妙符生理。恭以某官。藝文精奧。方格淳脩。坦坦榮途。固宜於闊步。區區利局。誠鬱於遠途。佇善課之告成。卽寵恩之躋等。更新珍齋。少慰顯瞻。

代上運使李刑部回衙問候狀

伏審出按屬城。近旋崇飾。仰惟吉履。俯萃醴休。恭以某官。親遘聖辰。備紓賢業。登車攬轡。已澄紘於官聯。輓粟飛芻。復羨盈於邦計。行旌幹濟。驟陟凝嚴。伏望上爲闕廷。精調寢饋。

代上知郡郎中狀

近者屢布音函。繼紓誨牘。屬餘寒之未殄。諒冲履之惟休。恭以某官。方格淳修。政能通敏。守麾頻易。率揚循吏之稱。時議翕歸。尙起潛郎之歎。佇凝顯績。行被茂恩。瞻奉尙遙。傾祈倍切。

上知郡都官狀

自去公麻。鎮糜吏役。日尸鞭扑之囂。冗坐致音。膝之闊稀。伏惟入對王休。備摠賢蘊。神觀靜復。天和舉。臻恭以某官。迪氣純全。賦才肅給。守麾滿歲。方格上聰之聞。使節宣風。行膺外計之委。俛惟屏懦。永託甄題。伏惟上爲邦家。精調寢餼。

又

解麾南服。奏課中宸。藐如嬰兒。驟奪慈母。茶若疲馬。止思故軒。仰跂恩暉。第零感涕。惟齋舫之遐遡。固德宇之中安。恭以知郡都官。才貫幾深。器函剛實。政不火烈。民自畏之。心猶衡平。事罔欺者。行光循吏之目。親受聖王之知。匪朝甄躋。協時傾屬。某短才初仕。嘗備於使令。裕度兼容。靡尤於鈍拙。更繫餘末之庇。曲保孤單之蹤。不由他門。以畢大造。伏望上爲邦社。精調寢興。

代上府推學士狀

望闕雖邇。瞻風甚勞。伏惟視治多餘。練神增爽。恭以某官。量函夷雅。識貫幾深。親奉益朝。獨膺華貫。書林擢職。方贊畫於王畿。法從須賢。行拜嘉於宸陛。






3
4

1895

祠
部
集
四



成 集 書 叢

編 初

者 編 主
五 雲 王

行 發 館 書 印 務 商



集 部 祠
(四)



3 0649 7725 3

撰 至 強

祠部集卷十九

狀

代上施待制狀

某自督漕舟。鎮繁使部。居靡定所。日無少閒。職是音滕之缺。然曠諮德履之安。否恭以某官稟氣間傑。為時聞人。由妙年而取甲科。不累日而都顯位。外臺重使。誠曰藉才之司。內閣詞臣。決非久次之地。行膺迅召。亟踐元台。顧惟屏微。有所棲倚。


代上潤州知郡曹丞狀

近者伏遇某官。駕言于藩。道出茲土。輒緣門下之舊。屢獲坐隅之親。方敘感悰。遽零別涕。惟兩轡之稅駕。聳雅俗以瞻風。仍審剛辰。已開尊府。宿官茲限。馳賀無階。恭以某官。識貫幾深。量函剛實。雄文取重于時論。大雅追還于古風。圭袞儻來。靡嬰于素志。江山有助。不廢于清吟。而况先一州乃大用之基。為三公繇此塗而出。行甄治狀。入對王休。列職近嚴。副時傾矚。俛惟屏懦。最辱獎題。企頌兼常。文陳匪悉。

伏上本州知郡虞部狀

某自除近屏。久偃故廬。輒緣恭梓之由。屢叩訟棠之下。備蒙優顧。陰激懦衷。為郡事叢。貢書禮曠。仰惟坐鎮。俯順生經。恭以某官。親親熙朝。游揚膺仕。紫垣應宿。早歷于清郎。秀野班春。聊蘇于雅俗。行膺宸選。少

083
114
2:1896



慰人言。伏望上爲國家精調寢鍊。

代上致政相公狀

自領守陞。日棲鈞庇。仰惟吉履。俯萃醴休。恭以某官。道著將明。量函方重。出應千齡之旦。來翊兩朝之功。天下旣安。已休於廟略。宸衷得請。遽致于官榮。

代上新知南京歐陽龍圖狀

某士鄉近器。儒世緒風。頃繇天幸之然。獲綴賢科之後。輒階素分。嘗覲清塵。旋緣位貌之殊。邈有霄泥之隔。自視冗外。不敢貢書而瀆尊。日聞軒翊。徒爾望風而竊抃。伏審祗承恩詔。出尹留都。某適督漕舟。矧往來之皆道。復欣里閭。將鎮撫之焉。依榮幸兼常。企瞻倍切。恭以某官。際天蘊識。名世標才。中外洊揚。明哲一致。主盟吾道。於變文章之淳。昌言當時。幾臻風俗之厚。尙緩台衡之拜。聊司宮鑰之嚴。然父母一邦。不足充天下之望。而領袖百辟。行以副上心之傾。

又

某早會右文。寢階下列。出繇寒士之目。樂聞大夫之賢。若夫作世之宗師。立朝有風采。迭聽輿論。率歸巨公。如揭日月而行。孰不仰望。居爲秦楚之隔。未嘗進趨。比者。伏遇就奉詔音。出觀藩政。夫何恭梓之里。獲被訟棠之風。敢緣幸會之機。以紓平素之願。恭以某官。德函剛實。識貫幾深。道簡上心。聲聞天下。而自振藻書殿。代言禁廷。文章大醇。坐復古道。制作一出。立爲人模。固宜暢鈞軸之弼謀。廣幅員之休祉。尙淹符

冊。屈布寬條。然祕殿侍臣。寧久外補。而上台貴仕。行被外庸。副國倚毗。協時瞻矚。

代上柳侍郎狀

叨紆守紱。獲邇侯封。如鄰洪河。日所蒙潤。不遠數舍。缺然貢音。伏惟鎮撫雄藩。綏寧泰宇。恭以某官。早紆賢業。親會聖辰。挺忠諒之一心。出誠明之正性。華要之選。翺翔已周。訟樹班條。寧容於滿歲。公槐正位。行在於匪朝。

代上錢內翰狀

徘徊末路。荏苒外麾。日爲吏事之勞。分絕朝遊之齒。自視冗散。罔敢片言之瀆尊。豈圖高明。遽加餘論之垂飾。諒其愚介。謂可甄揚。遐佩恩暉。陰盈感悚。恭以某官。忠諒許國。文章世家。親逢聖期。獨膺賢選。究國體而指人事。已極著篇之奇。潤神化而輔帝猷。佇觀行事之效。矧禁林之上笏。卽台袞之便途。匪朝登庸。爲世休福。

代上昭文相公狀

適祇官局。遐企台光。去國非遙。盡出大鈞之賜。貢書差緩。重干上袞之威。伏惟變調氤氳。翕受禱福。恭以某官。際天蘊識。名世標賢。以文章取甲科。以忠誼結明主。向專將幄之制。力底寇巢之平。衣冠百工。極大臣之能事。富庶四海。見真相之偉才。

代上潤州曹殿丞狀

奔馳吏部密邇侯封。間輒貢書而渙尊。遽蒙記室之還教。拜而伏讀。藏以爲榮。伏惟鎮撫善藩。綏寧秦宇。恭以知郡殿丞。夙鍾間氣。親遭熙辰。父母一州。不足充天下之望。旦夕中詔。行以副上心之傾。徊翔顯途。暉映常世。俛惟孱懦。鎮託甄題。感臆所懷。名言匪悉。

代上王承旨狀

一違墻宇。尋莅方州。有簿領之裝懷。寢成冗瑣。顧音滕之布問。坐致闕稀。伏惟某官。學術精奧。方格淳脩。學足以挹軻雄之源。行足以蹈淵騫之軌。親逢文雅之會。優冠秀廉之科。華要滄揚。聲光愈綽。視草玉堂之署。密奉宸猷。調元金鉉之司。行被神化。

代上交代郎中狀

伏審入奉宸緝。出紆守紱。夫何榮幸。輒預交承。善政缺然。靡尤於既往。高賢繼者。當侯於更張。方視除書之來。因馳賀牘之晚。恭以某官。學際聖閭。才爲吏師。泗當淮服之衝。佇凝於治。狀歲上甘泉之課。首被於恩章。咨覲非遑。欣瞻倍切。

代上留守龍圖狀

就蒙恩詔。移領邑章。來往江淮。願舊學之幾廢。委寄民社。於有政而易施。尙幸單蹤。早棲大庇。高明有造。諒舊物之不遺。鎮統焉依。幸孤生之有託。行瞻大旆。增忭寸襟。

代上柳龍圖狀

把麾侯服。遠跡賓除。徒然德誼之傾。缺爾賤賤之奉。仰惟純履。舉萃醴休。恭以某官。盛業熙邦。雄文經世。席兩朝之宸眷。夙著耆明。踐內閣之官榮。行聞登用。

代上潤州曹國博狀

猥瑣無堪。愚頑惟舊。乘以吏曹之冗。缺然賤賤之脩。伏蒙自損達尊。時占勤教。而復諒其孤進之自。絕有先容之爲。俯矜滯蹤。力發薦口。常自策於鶖猥。庶訖稱於獎提。伏惟鎮撫善邦。綏安泰宇。恭以某官。直清不倚。莊重自居。才爲吏師。名重物論。東南之屏。聊布於寬條。左右之廷。渴聞於正議。行承溫檢。驟陟顯塗。

代上知郡郎中狀

比者知郡郎中。得請宸旒。奉安親兆。暫還仙墅。兼侍壽輿。自使旆之戒塗。卽秋霖之綿日。稔獲晨昏之奉。諒忘跋履之勞。仰料沖頤。翁臻純祖。恭以某官。體凝簡重。氣迪醇深。親逢復旦之期。寢踐列星之位。書繡旋里。茲極於時榮。昔禱興謠。方繫於風治。

代上端公狀

近者伏值某官。臨督通漕。留止屬封。俛惟冗曹。適備下吏。獲委草茅之賤。履趨旌棨之嚴。使車南轅。倏茲累月。官簿盈案。曾無暇時。第馳戀於門墻。曠布誠於賤牒。伏惟坐籌大計。舉萃龐禔。恭以某官。道具粹醇。器函剛實。早紆賢業。自結主知。總金穀而瞻中都。久茂風績。秉鈞衡而調大化。遲膺冊書。眷言單瑣之蹤。訖望挺鎔之賜。

代上宋內翰歐陽龍圖狀

祇奉臺移。往提河役。奔馳俗狀。留止治封。伏蒙忘宗工之顯嚴。願郎曹之散冗。外廚五鼎。靡獨享於豐珍。清酒百壺。並曲加於撫勞。比需訖事。亟往拜嘉。一瞻體貌之尊。少敘腹心之感。遽被上官之命。俾從他郡之行。鄙願頓違。愚衷第切。伏惟坐班風教。翁幸福禧。恭以某官。上天元精。清廟偉器。高文經世。亮節在廷。鉤姬孔之聖徵。發爲事業。輔勳華之主德。動罄謀謨。暫淹公輔之才。出鎮藩垣之寄。行膺徽冊。登冠中階。益隆宸辰之知。庶協朝紳之議。

代上文相公狀

伏審還印宰廷。領麾藩服。肅使旌而就道。露公冕以觀風。仍卽便時。已開尊府。恭惟某官。器函剛實。才貫幾深。出對休辰。進更顯仕。密蘊廟堂之略。往分邊閫之憂。旋總計於漕臺。亟升華於延閣。殿坤維之劇部。尋被更書。掌樞幄之繁幾。未嘗坐席。遽膺宸詔。改貳台司。值小醜之不咸。嬰孤城而固守。獨形忠憤。請殄姦妖。果廟算之萬全。破寇巢於一舉。晉公平蔡。宜位絕於官師。傳說賈商。以道開於人主。登庸賢俊。掘拔滯淹。拒塞倖門。追講闕典。少見大臣之能事。弗殫真相之偉才。懇瀝讓封。願還幾政。雖斷章趣戒。重違金石之誠。而俞命隨頒。聊付圭符之寄。加尊八座。均逸陪京。諒五月之政成。復三篇之冊拜。

代上兩轉運狀

寄身節下。日棲蔭宇之濃。董役河濱。斗曠音函之奉。抗塵容而無狀。企使範以增勞。伏惟主計多餘。奮神

增裕。恭以某官郎垣碩德。王國偉才。親遘光華之辰。備伸久大之業。綢繆利柄。矧風績之茂焉。趨走詔音。行恩章之嘉止。

代上張端明狀

昨者沿牒上臺。假塗大府。企門墻而竊抃。將卜嚴趨。貢牋牒以瀆尊。預紆下悃。伏值被細書之溫厚。移巨屏於東南。阻叩坐隅。徒瞻庭表。豈謂廟堂之量廣。不遺塵土之跡疎。首占鈞函。仍頒釋部。拜嘉甚渥。撫己增榮。伏以某官方格淳修。業術精奧。高文大策。蚤踐於賢科。至論昌言。有裨於聖世。旋持荷橐。遂陟嚴塗。司內命的禁局。方殫儒效。暢偉謀於計府。已集邦須。輟祕殿之華班。分左符之重寄。民瞻滋切。上意方傾。遐遘親闈之悲。差淹公袞之拜。然萬鍾及養。足少抑於哀摧。儻細札奪情。庶兩全於忠孝。

上徐都官狀

昨調天銓。始官淮服。風波起乎萬狀。初驚宦路之艱。塵土萃於一身。因識掾曹之辱。若乃接人情之至術。治獄事之大方。侗然而愚。罔知所嚮。備蒙教助。僅保傾危。以至陰拂滯蹤。力開薦口。皆重恩之難報。第孤抱之知歸。去德彌年。瞻風惟日。悵簿書之犯慮。汨沒無休。願牋牒之問安。缺疎不講。分從譴怒。自爾擯遺。何長者優容之深。出微生忖度之外。兩頒勤誨。愈篤曩懷。固始望之大踰。加積憂之頓釋。仍審協宣寬詔。增裕冲襟。恭以某官莊重粹溫。剛明精敏。關掌郡治。尙鬱高賢之資。鈞深聖微。行躋太史之局。其爲慶幸。曷盡敷陳。

上陳主客狀

某承學不優。宿官無狀。當淮州之雜會。決囹圄之重繁。慚磔鼠之微能。訖無智慮。挾籠狙之小數。間得事
情。其如鄙訥少文。羈孤寡。援第慤廉而自守。雖顛躓以誰憐。散木之出溝中。匠無顧者。棄芻之委道上。人
皆踐之。尙緊吏局之卑。正隸使班之下。特矜寒素。弗忍擯遺。坦然開至公之懷。舉以堪一邑之寄。發蹤自
始。諭感無涯。遭外計之需才。邊嚴麾之易地。心傾恩館。戀極疲軒。伏惟順泛齋舫。具綏泰宇。恭以某官器
能膚敏。風業宏長。親對休辰。洊揚顯仕。按簡書之輕重。方及朞年。董金穀之輸將。驟移南服。矧時論以剛
明推重。主上以忠誼知名。行間被優詔於塗中。趨還轅於闕下。亟更大任。少副羣言。

代上揚州張學士狀

千騎過郊。向諧瞻觀。武車監郡。鎮若將迎。間參決於簿書。因寢稽於牋牒。伏審肇開尊府。肅布寬條。密接
化封。日聞治狀。猷炎貫序。燕寢餐和。恭以某官學造聖微。識探經奧。對休辰而逢吉。躋顯仕以揚光。預計
財闈。茂明經畫。宣風漕節。多所澄清。久簡帝宸。洊紆守紱。露章按罪。已著於威明。增秩疏恩。行膺於甄擢。

代上省主并二漕狀

庇迹崇麾。尸官再歲。五能俱短。固乏於寸長。一个無他。或矜於小善。被文移於計府。嚮籍入之民家。奔走
道途。淹徊日月。覬成拙效。罄竭微勞。比訖事經。敢希賞格。偶獲免於瘴曠。幸不辜於使令。報知己之心。雖
堅於金石。助公家之利。何啻於涓埃。遷次一官。茲誠始望之外。挈提孤跡。更賴刻章之明。恭惟某官。道廣

進人恩隆成物。開推轂之言。味多所揜揚。發險袞之褒華。願加慰薦。庶令鷲猥。足企龍光。苟無似之叨榮。則有能之知勸。深懷厚德。第劇愚誠。

上廣德知軍袁郎中狀

頃以諸生。最蒙優遇。居常策勵。報稱獎憐。再舉登科。尋喪慈母。一官來泗。遂爲冗曹。跡久去門牆之嚴。名不徹左右之聽。謂由疏賤。從爾擯遺。企軍壘之剖符。自淮州而假道。首傳勤誨。愈篤曩恩。損齒爵之達尊。屢紆駟御。顧州縣之勞職。俾侍坐隅。而復垂憫滯蹤。許開薦口。始終被惠。感服無涯。恭以某官。才貫幾深。器函剛實。守麾最樂。聊布於寬條。公袞儻來。靡闕於素志。行旌善狀。亟陟嚴塗。

代上許州相公狀

伏審繼列讓封。願還幾政。奉宸縉而得請。露公冕以宣風。因瀝愚誠。仰陳台睇。況朝廷有達尊之訓。廟堂有絕禮之嚴。豈料厚慈。兼持謙德。親命記室。回貺鈞函。拜伏究觀。驚惶失據。恭惟某官。大民先覺。王佐偉才。出對休辰。進揚顯仕。更弼謨於兩府。聳烈業於本朝。寢簡上心。登冠羣后。拔賢俊以開治路。抑權豪以閉侍門。佐闕典之未行。殫豐功於已試。懇辭上袞。出鎮巨邦。矧巖石具瞻。尙思於鈞造。而陝郊處外。行被於詔還。

代上龐昭文狀

自塵下士之列。蚤出大賢之門。旋庇台光。寢升郎位。悉心圖報。思樹立以無階。造物誤恩。亟甄提於不次。

擢自計廷之末。董茲漕節之繁。去國非遙。誠荷洪鈞之賜。貢書差緩。懼干上袞之威。伏惟坐論猷爲。力宣利澤。神明所相。福祚載蕃。恭以某官。業履崇高。智謀光大。抱廟堂之偉器。挺金石之純誠。出對休辰。進揚顯仕。更弼謀於兩府。聳風烈於本朝。獨深真主之知。首宅元台之序。圖講至治。薰陶太和。百度清明。羣生舒暢。稷高視己。儀刑列辟之先。堯舜吾君。拱揖法官之上。躋宗工之極致。光信史之直書。曾是冗微。最叨獎遇。庶成毫髮之效。訖稱挺鎔之仁。

代上柳龍圖狀

繇緣崇旆。戾止鄙邦。適佐郡符。幸通謁舍。不遺門下之舊。屢獲坐隅之親。迨使車之西還。倏彌年所。願官簿之堆積。缺貢信音。伏惟坐布寬條。誕膺純祉。恭以某官。冲襟有裕。亮節不回。明哲于躬。具存大雅之美。典刑在事。允藉老成之資。獨臨端朝。自結真主。履官階於延閣。冠卿列於禮司。藩服一麾。暫勞於王事。詔音三節。行簡於帝心。

代上李兵部狀

比者進承恩詔。往領計臺。自江而東。厥賦彌夥。矧惟封部。隣小醜之繹騷。宜有經謀。贍一方之支度。豈圖繁使。違假菲才。獲幸於天。借棲有地。恭以某官。器函剛實。識貫幾深。早邀聰哲之知。出總東南之漕。剗去宿弊。樹成新規。董淮海之輸將。適疑風績。副京師之供億。行被褒章。紀美王常。增光相閥。

代上安撫舍人狀

伏審宣命列邦輟才近署。揭使旌而就道。聳侯服以傾風。拜德有期。實天與幸。恭以某官。器函夷雅。道具粹醇。言施當世而可行。學質古人而不謬。帝念東南之郡。民罹水旱之年。屈邇臣侍從之華。奉承明詔。將天子惠綏之意。慰撫羣元。某適守陋藩。行瞻上笏。永言企抃。曷究文陳。

代上張學士狀

早繇寒士之目。嘗出大賢之門。尋冒雋科。寔升閨籍。第銜恩而有素。忱論報以無階。而且跡久去師牆之嚴。名不徹閭人之聽。謂由疎筋。從爾擯遺。會督府之剖符。自陋邦而假道。獲瞻威采。愈篤顛憐。何天幸之復然。續恩暉而有所。外臺轉給。方渴於英才。明詔褒優。亟還於要職。俛惟官次。得隸使麾。新命傳聞。寸襟竊怍。恭以某官。道先民覺。學貫聖微。夙躋朝弁之華。久列書林之選。主知物論。率高恬退之風。賢業忠謨。行罄將明之效。

代上揚州知府學士狀

伏念向從遠宦。方復故棲。夫何恭梓之邦。獲被坐棠之化。已浮單舸。將次近封。拜德有涯。實天與幸。恭以某官。才謀高亮。器職宏通。早升朝弁之華。旋被書林之選。郎垣久次。素高恬退之風。帝詔趨歸。行懋褒嘉之典。餘須瞻伏。以訖悃悃。

代上致政杜相公狀

南郡下僚。西州末介。被臺符而奔命。會靡寧居。遡材館以馳心。第勞景仰。曠修牋牒。上瀆燕輿。恭以某官。

河嶽上靈。瑚璉茂器。懿妙文而表世。端亮節以在廷。股肱兩朝。體貌一德。歷豐功於已試。避要路而弗居。珍策熙邦。備見將明之效。安車就第。益全恬退之風。素里揮金。聊追於逸致。青編載筆。增美於臺書。

代上江寧府郎待制狀

冒職云初。究心乃事。仰止燕言之美。缺然牋牒之修。伏惟吉壤觀風。沖襟疏粹。恭以某官。識深經奧。學造聖微。言施當世而可行。道質古人而不謬。厭司內閣之侍。樂駕兩轡之遊。圭袞儻來。靡嬰於素志。江山有助。不廢於清吟。行被詔歸。驟光柄任。

上南京通判都官狀

頃在士鄉。嘗依師席。訖無優學。止綴下科。遂參冗吏之遊。誠玷先生之誨。當淮州之雜會。決犴獄之重繁。跡久去門墻之嚴。書不徹左右之聽。謂由疏賤。從爾擯遺。近偶北轅。輒嘗進謁。伏蒙忘其位貌之隔。視若子姓之親。曲以顧存。優於獎最。旋違盛德。增企寸心。恭以某官。學鉤聖微。聲重時論。關決名都之治。聊以康民。延登祕館之華。乃爲宜職。

代上田省主狀

近緣臺檄。往督漕舟。止神甸之近郊。無繇越進。企恩闕於一舍。阻效臺趨。因紆瞻嚮之懷。仰瀆高明之聽。願登翹館。釋戀疲軒。遽錫公移。俯從愚悃。逮通名於謁舍。旋拜德於賓除。伏蒙損計相之達尊。願郎官之冗列。虛襟引納。更僕優延。省己毫毛之輕。銜恩山岳之重。自還吏局。增想台儀。伏惟坐籌邦計之繁。翁受

天和之粹。恭以某官。民靈先覺。王佐偉才。親邁重熙之辰。蚤躋特達之選。兼禁局之華序。領財府之劇謀。富國康民。皆出著篇之舊。經邦致主。行登秉軸之崇。

代上青州文相公狀

伏審出臨治屏。已整齋廡。鏡鼓沸川。允極行輝之盛。壺漿溢路。前知輿望之濃。矧在冗僚。最叨巨造。淮壩亞守。獲在於便塗。道左瞻風。庶伸於下拜。日需台旆。竊忭愚襟。

代上判監檢討王學士狀

自阻緒言。旋嬰細務。第瞻書殿之貴。差緩公函之修。方春肇和。所履綏福。恭以某官。術業經遠。文章世家。親逢聖辰。早暢賢蘊。譌文缺簡。參藏室之刊修。善教素風。兼成均之長育。少殫儒效。行被帝咨。亟踐嚴塗。繼升顯任。伏望爲國自壽。以時考祥。

代上王承旨狀

枵淺之資。冥頑惟舊。頃緣吏役。嘗拜台儀。鈞造特深。有容一介之技。天幸何薄。不出大賢之門。始遠貳於州符。復累從於臺檄。奔命弗暇。貢音絕疎。尙繫全度之寬。靡誅苛禮之失。伏惟總司內命。誕萃繁臚。恭以某官。識宇閎通。才謀高亮。蚤甲雋科之選。亟更書殿之遊。游歷班榮。密謀邦體。以至提綱憲府。作尹天京。旋出殿於邊藩。益茂凝於風績。甘棠勿剪。方惠政之化民。零雨旣濛。遵介圭之修覲。上心宿注。時論僉歸。金鼎調元。行顯持於宰柄。玉堂視草。聊首暢於宸猷。

上裁造太博狀

自遠師牆。鎮膺吏局。日臨鞭扑之囂。冗坐致音。賸之缺疎。仰跂恩暉。第盈感戀。願歆炎之在序。諒燕起之惟時。恭以某官。識貫幾深。德函剛實。出納關慮。誠屈高賢之資。校讎需才。行歸太史之局。俛惟辱陋。永託甄題。伏望上爲邦朝。精調寢餼。

代上省主張端明狀

向奉朝參。嘗修板謁。世蒙援進之賜。跡免瀆尊之嫌。闊絕台光。倏焉累月。棲遲旅次。邈矣一涯。曠敝暄涼。仰諮寢味。恭以某官。夙鍾間氣。親遇熙辰。秉忠諒之一心。出誠明之正性。入尹京邑。進居樞廷。允極將明之資。以基太平之業。然而國朝重選。主計爲艱。金穀大司。得才則濟。意先財府之充給。卽議冊書之寵加。匪朝登庸。爲世休福。伏望上爲邦社。精調宴興。

祠部集卷二十

狀

代上張刑部狀

顯承召節。榮解利權。俛惟枵冗之蹤。素出獎題之目。逮違大庇。曷諭丹悰。藐如嬰兒。驟奪慈母。最若疲馬。止思故軒。溯恩館以增勞。進公函而差緩。伏惟盛寒貫序。冲履餐和。恭以某官器識闕通。材猷高亮。挺純誠而結主。懋鉅業以熙朝。曷持使節之嚴。出領計臺之劇。邦須仰給。歲課頻優。旋被詔音。進圖心畫。佐財閔之經度。聊藉全才。參政府之訏謨。行叨顯命。

代上審官密學狀

伏念某學古不優。語能至薄。嘗備屬官之列。過蒙國士之知。一出品題。遂階榮進。亞守麾於淮上。曾靡定居。瞻恩館於日邊。略諧拜伏。奔命勞止。貢書缺然。伏惟順履新陽。翕膺景福。恭以某官鍾氣間傑。爲邦老成。蚤結聖神之知。益加體貌之重。飛綏禁城。久居侍從之聯。班詔邊藩。累布中和之治。疏恩黼座。進直鴻樞。審覈官能。暫繫於定鑒。敷宣王化。行秉於大鈞。

代上運使度支狀

近承崇旆。出按屬封。俛惟陋藩。最處要壤。或官書之弗整。與民瘼之未蠲。宜舉上臺之威。以警他邦之闕。

尙緊寬假。不汝咎疵。去德未遙。佩恩良極。仰惟純履。舉集休祺。恭以某官。才爲吏師。名重物論。行甄風績。驟被褒華。

代上許待制狀

近者伏值某官。奏輸將之大計。入覲京師。還留止於屬封。殆彌旬浹。獲修版謁。屢叩坐隅。特忘位貌之殊。俾親燕語之重。伏惟新陽貫序。粹履發和。恭以某官。才爲世生。道先民覺。宸篇彬郁。方躋潤色之班。國計羨盈。行被褒嘉之渥。

上趙屯田狀

曷列冗曹。日叨巨庇。泊赴中銓之集。方聞嚴飾之來。雖甚傾德誼之高。不逮事堦墀之末。旋拏舟而東下。獲斂板以前趨。伏蒙削去常儀。過存優遇。兩紆騶從。特顧旅居。自違遠於門牆。鎮淹徊於道路。瞻風惟日。進記不時。恭以通判屯田。行潔文醇。才周業鉅。關決要邦之治。聊以康民。延登祕館之華。乃爲宜職。

上樂職方狀

曷爲賤掾。方託仁侯。曾不終朝。遽然滿秩。伏蒙忘其位貌之隔。視若子姓之親。迨赴集於中銓。復寓家於盛府。惠周幼艾。日賜撫存。旋補邑以南還。獲趨隅而下拜。許陪宴豆之末。申祝公庖之珍。越去恩麻。泝彌月所。淹徊道路。闊略牋函。恭惟靜治善藩。舉綏秦宇。恭以知郡職方。忠諒許國。文章世家。試劇要邦。暫班於寬詔。垂光近署。行服於華章。

上蔣侍郎狀

葺爾微生。缺然善狀。蚤繇寒士之目。嘗出大賢之門。施試吏於淮州。復調官于京穀。一違台坐。五見歲陰。恩紀敢忘。第劇肌膚之鏤。公函不講。懼干爵德之尊。伏惟順履。蕭辰。翕膺茨福。恭以致政侍郎。才謨深亮。識宇閎通。珍策熙朝。已底山河之固。安車還第。自遺圭組之榮。爲物論之稱賢。矧上心之圖舊。就諮大政。當叩于元龜。覬保粹襟。庶全于永祿。

又

適貢蕪音。仰塵棐几。方省瀆尊之咎。遽蒙賜教之酬。恩獎過優。公言加重。拜而伏讀。藏以爲榮。昔魯經尊仲尼之褒。有踰贈袞。楚諺珍季布之諾。不啻得金。此越舊聞。尤深厚幸。茲蓋伏遇致政侍郎。主盟吾道。惇勸士倫。弗遺簪履之微。特屈王公之重。新占勤誨。俯及冗員。永矢糜軀。仰酬知己。

代上知府章學士狀

竊伏盛德。于茲累年。緣習簿書之勞。絕攀臺閣之軌。俛惟敝邑。獲邇善邦。如鄰洪河。日所蒙潤。不遠數舍。缺然貢音。伏惟溽暑貫辰。粹襟迪吉。恭以某官。直清不倚。莊重自居。蚤光書殿之遊。克踵相門之烈。尙稽顯任。屈布寬條。然才如弱翁。寧久外補。而上念實傳。行當詔還。倍綏燕興。前對休寵。

代上元屯田狀

近遇齋飴。俯經敝邑。獲風期之觀止。出天幸之使然。歛暑尙留。燕居增裕。恭以通判太博。量函夷雅。氣迪

中和掌故曲臺深明典籍之奧贊條方國佇洽海圻之安尙阻趨承倍綏寢味

代上仙尉楊祕校狀

瀕江之別累月于茲待次彌年任懶成性坐曠尺書之奉第勞寸臆之傾辱教甚勤寄顏無所恭以仙尉祕校天資夷爽士檢淳修方美職之勤行被褒書之薦達尙遙瞻挹倍衛燕興

代上北京文相公狀

伏念發蹤巨冶實台庇之焉依出守孤城已歲陰之載易比終吏課管進公函遠遠門牆之趨缺疎竿牘之獻並紆梗槩仰瀆高明竊料郵程之弗稽當歷鈴吏以茲久逮驅車於道路方稅鞅於京師區區塵容衰衰人事別都在望翹館非遐惕就謁以無從第銜恩而有素伏惟坐班寬詔參萃繁禧恭以某官簡厚凝姿宣和迪德抱精忠而致主懋顯績以光朝兩冠宰衡首謀王體闕儀墜典率圖講於明廷偉烈豐功復蕩平於外閫旣殫能事弗有元勳懇列讓封樂還幾政旋開尊府出尹留京五月之治告成適煩君重一相之尊居外尙鬱民瞻佇歸宅於上台以永康於四海

上越州知府待制狀

伏審就膺細札移殿巨邦已卽便辰榮開尊府伏惟慶慰恭以某官量函簡厚識貫幾深自結主知歷紆賢業總東南之大計蚤懋膚功暢左右之偉謀尙稽寵拜曛露臺於黼辰獲均佚於蕪城風績愈凝歲課連最思匡微俗旋易名藩雖買臣懷章歸驚於守邸而望之爲郡雅在於本朝行對詔函進調台鼎俛惟

寒士之目。素出大賢之門。恩紀未酬。愚衷曷諭。

上與國知軍陳郎中狀

頃從初仕。獲庇仁侯。鄙鈍自持。羈單孰援。遽收寒士之目。俾出大賢之門。旋去嚴魔。挈來小邑。三歲僻壤。僅絕貢書之階。一心恩闕。未知論報之地。伏惟坐班寬詔。誕擁繁禱。恭以某官。爲邦老成。作吏師表。觀風軍壘。尙鬱於賢謨。熙績王朝。行光於帝簡。

代上蔡三司狀

某實今之愚。自少則仕。席嚴父之餘寵。寢叨臺郎。誤宗工之重知。彌愧國士。曾乏寸長之錄。屢蒙清譽之加。願舟楫之攸司。號簿書之兼冗。度不能而雖止。荷所賜以惟均。一來河濱。久去門下。左右之供子職。不知歲月之遷。起居之奉公函。都失寒暄之間。仰賴恕情而曲貸。少寬廢禮之嚴誅。伏惟發抒偉謀。臨總大計。獎寶倖門之出。已閉塞以無餘。利源寶路之藏。復疏通而有裕。民財內贖於國。兵食外豐於邊。膚功遙成。能事云畢。行聽都俞之命。告厥廷中。坐開康濟之懷。擴之天下。爾時屏陋。訖望珽鎔。

代青州相公先狀

伏審入覲明廷。出臨巨屏。油幢周匝。益知丞相之尊。行路歡迎。將慰邦人之望。俛惟冗列。方冒劇司。督運淮邊。適當于便道。趨風節下。卽拜于清塵。日企台儀。曷勝愚悃。恭惟某官。忠誼結主。文章致身。蚤據康濟之才。少見太平之效。雖廟堂之上。皆利澤之素行。而藩翰之間。欲化風之親被。樂班寬詔。游撫遐氓。坐席

未溫行聞于趨召。元台之舊。亟復于升庸。俛惟疏外之蹤。訖託挺鎔之造。

李密學先狀

伏審將辭魏闕。已整齋楯。饒鼓沸川。允極行輝之盛。壺漿溢路。前知輿望之濃。拜德有期。實天與幸。恭以某官。氣鍾間傑。道具大醇。由妙年而取甲科。不累日而都顯位。幅員億姓。久濡霖雨之沾。藩屏一方。聊藉仁風之扇。餘留瞻伏。併敘傾翹。

代邵興宗北京相公先狀

受君言于國。勞使聘于郊。仰企台光。甫入別都之境。深繇天幸。將瞻上袞之威。棘竹兼懷。文陳非諭。

瀛州澶州知州先狀

遠迓使車。前經帥閫。塵容載被。行干典謁之司。德範所瞻。庶釋傾風之蘊。其爲忝幸。奚盡敷論。

題轉先狀

將命以行。勞賓于外。獲道使臺之便。卽登客廡之嚴。餘在趨承。併紓翹嚮。

代許州賈侍中先狀

得守小邦。請塗寰服。台躔在望。魂已媿于煌煢。賓袂如歸。迹自忘于疎冗。矧預薦紳之列。嘗居巨冶之間。寢竊官榮。率緣恩素。茲趨風之有地。信獲幸以由天。俟稅征車。卽干典謁。屬歲陰之凝互。仰德履之綏將。文武兼資。已極宗臣之貴。邦家所賴。行還上宰之嚴。瞻覲有涯。欣榮偕極。

上張龍圖狀

恭以某官瑚璉茂器。河嶽上靈。以忠誼結主知。以文章重時論。翺翔華序。輝映清時。曷臨邊圉之雄。洵總漕臺之劇。進榮班於延閣。升茂績於本朝。金穀要司。暫繫於心計。鈞衡顯命。佇奉於詔音。

又

自遠治屏。寢易歲時。適便道以趨官。第望風而懷德。伏唯靜布寬詔。翕臻純禧。恭以某官識蹈大方。氣陶至粹。雍容近綴。輝映本朝。內閣升華。厭邇臣侍從之事。外臺分寄。詠太守中和之詩。然而先一州乃大用之階。爲三公由此塗而出。行聞爰立。以副具瞻。

上知府龍圖狀

恭以某官莊重自居。直清不倚。言經邦國之體。學際天人之交。出對休辰。進更顯仕。旋升延閣。密侍邃旒。京邑四方之表儀。方騰於尹政。宰廷百辟之師帥。常被於朝僉。咫尺聰聞。旦夕冊拜。甫臨首祚。誕擁繁禧。某適靡漕局之煩。莫逮壽杯之奉。其爲瞻企。曷可名言。

上知郡都官狀

比者知郡都官解麾南服。奏課中宸。藐如嬰兒。驟奪慈母。茶若疲馬。止思故軒。仰跂恩暉。第零感涕。惟齋齡之遐邁。因德宇之中安。恭以知郡都官才貫幾深。器函剛實。政不火烈。民自畏之心。猶衡平事。罔欺者。行光循吏之目。親受聖王之知。匪朝甄躋。協時傾屬。某短才初仕。嘗備于使令。裕度兼容。靡尤于鈍拙。更

緊餘末之庇。曲保孤單之蹤。不由他門。以畢大造。伏望上爲邦社。精調寢興。

上貴池仙尉狀

自阻風期。倏彌歲所。奔馳掾局。常若少閒。將逐使車。曾無虛月。因曠起居之間。仰諮燕餽之安。豈謂注存。首貽音諭。不忘雅素。第切中藏。暑氣方炎。晤言正逸。倍祈愛重。少慰瞻翹。

代上何舍人狀

備位冗官。副車下郡。冠蓋旁午。鎮事于將迎。案牒沈迷。坐成于勞辱。望長安之日。第棟遐心。傾西州之風。阻瞻粹矩。伏惟雍容禁列。熙暢沖襟。恭以某官。亮直蹈彝。中和迪哲。文經邦國。學際天淵。載筆記言。方書萬世之法。秉鈞調化。猶鬱四海之瞻。行被詔音。驟光冊拜。

上參政趙侍郎狀

恭惟參政侍郎。爲國雋老。受天元精。自結主知。備紆賢業。坐陪幾政。會日月之休明。仰對慶辰。贊乾坤之茂育。翕膺時祉。增煥台躔。某職總使臺。跡疏賓廡。永言瞻頌。曷盡敷論。

上福州密學侍郎狀

就奉明縉。擢司外計。顧短材之非稱。賴巨庇之焉依。已卽便塗。行登尊府。恭以某官。夙鍾間氣。親遘熙辰。秉忠諒之一心。出誠明之正性。備紆賢業。自結主知。踐碧落之華班。兼鴻樞之祕直。差緩登庸之冊。聊分鎮撫之符。邇恭梓之巨邦。布坐棠之美化。江山有助。不廢于清吟。圭袞儻來。靡嬰於素志。風猷增劭。時論

雅高。然而先一州乃大用之階。爲三公由此塗而出。行膺迅召。入踐嚴塗。餘遲瞻承。併據翹緒。

上范資政狀

瑣焉近器。效此冗官。念案牒之沉迷。坐糜俗狀。企旌麾之嚴密。阻拜台儀。伏惟鎮撫巨邦。布宣寬詔。神明所右。福祚載蕃。恭以某官社稷宗臣。山河間氣。道誼行已。忠諒致君。傑立當朝。究悉能事。出綏邊略。進貳宰廷。收已試之豐功。厭居台路。分惟良之寵寄。連換守藩。行奉溫書。亟躋上袞。

上邵學士狀

謬叨恩詔。與領計符。朝廷弗棄非才。鴛塞以爲可使。席衣冠之餘緒。寢竊時榮。視金穀之要司。僭無素術。俯伏承命。競慙失圖。賴夫聯事之賢。茲有乞靈之地。風期伊邇。天幸居多。恭以某官學造聖微。名高士論。籠財外計。似非職業之宜。載筆嚴塗。行代訓辭之出。

上盧楊二侍講狀

自去德誼。漫躡歲時。鎮鞅薄書之勞。絕疎竿牘之問。仰惟福履。俯順生經。恭以某官。道具粹淳。學際元本。發先民述作之奧。中當世修明之科。輝映端朝。雍容近綬。屬聖主崇儒之際。得君子逢辰之光。翔步赤墀。備天臨之顧問。解經內閣。廣上德之聰明。行副眷懷。驟膺升擢。

上孫內翰狀

近被宸綸。出從吏局。馳心剡館之下。回首長安之遙。遐企恩暉。第盈感抱。惟侍從之豐暇。固神明之頓還。

恭以某官。道具粹醇。德函剛實。早居仙籍之高選。冠茲禁林之貴游。體詔意而裁訓詞。方見真儒之效。柄台衡而圖政教。行畢大臣之能。曾是冗微。最叨知獎。諒其愚介。謂可甄題。事雖迫於他端。恩已逾於衆遇。恭以某官。夙鍾間氣。親遘熙朝。論不詭於聖人。言有補於當世。蚤揚華貫。登踐禁扃。密詔深謀。或內參於坐論。高文大冊。皆進候以立成。潤色宸猷。發揮賢業。矧北扉之上笏。卽黃閣之便塗。視草玉堂。靡容於久次。調元金鼎。行副於具瞻。

上張祠部狀

向陪朝謁。阻遠賢規。仍引紱以竊榮。將還鄉而待次。優游故治。倏爾彌旬。復爲人事之勞。差緩公函之奉。仰惟純履。誕擁繁禧。恭以某官。莊重自居。直清不倚。逢辰熙穆。筮仕光亨。尙淹冊府之游。聊寄漕臺之柄。下車視事。列郡傾威。運心計于無垠。方繫幹濟。被恩章于不次。行步顯嚴。

上海州通判盛寺丞狀

逖達英範。增鬱塵襟。徒然燕語之傾。缺爾牋滕之致。豈圖情照。首占音書。意在遠而彌親。禮由謙而益厚。仰銜勤抑。第切銘藏。款溥向闌。標儀猶逸。勉綏寢饋。前荷寵榮。

上錢塘鄭寺丞狀

之官江裔。去德歲餘。幸治境之相望。惕音函之不講。日棲濃蔭。坐企高風。韶煦貫辰。燕興迪吉。恭以某官。材猷廣敏。方格淳修。較藝禁扃。賜科詞級。試才劇邑。休有美聲。翔步嚴塗。佇還舊物。益綏寢味。少副瞻祈。

上發運施待制狀

近者、伏遇某官假塗屬部。奏計中都。某適貳小邦。獲瞻上笏。旋齋舫之遐遯。固德宇之中安。恭以某官才貫幾深。量函夷雅。由妙年而取上第。不累日而居要官。利柄浩穰。暫倚濟時之略。宸篇彬郁。適繫潤色之才。方入對於王休。佇驟光於冊拜。伏望爲國自重。以時考祥。

又

某備位守藩。託身使節。日有詔條之奉。缺然牋牒之修。仰料燕興。舉臻禋社。恭以某官民靈先覺。王佐偉才。早升延閣之華。兼領諫垣之祕。提衡外計。茲鬱於具瞻。秉軸上台。行聞於爰立。伏望爲國自壽。協時所傾。

上施龍圖狀

西州一命。支郡下僚。託使旆之末塵。沾恩疇日。列公函之兼福。敍感後時。伏惟鎮撫巨邦。綏寧秦宇。恭以某官智謀光大。術業崇高。道誼致君。忠諒行己。備紆賢蘊。歷踐班榮。蚤爲聰哲之知。出總東南之漕。風猷益茂。歲課類優。掌宮鑰於留都。未溫坐席。改守符於邊閫。聊倚長城。行被詔還。驟光冊拜。

又

自去恩麻。游更月所。委質草茅之賤。嘗備下僚。馳心旌棨之嚴。第增勞想。向抗塵於臺牒。缺進記於鈐齋。伏惟班詔多餘。擁休彌裕。恭以某官中和迪哲。洵直懋功。由高文而掇異科。不累日而都顯位。名重時論。

才爲主知。早年立朝。有臺閣之風采。類歲成績。董江淮之轉輸。尙純徽冊之榮。聊屈寬條之寄。行膺柄用。大副巖瞻。

上二漕狀

某一竊科籍。久糜祿鍾。走官路而非當。悼親塋之未卜。露章得請。襄事言歸。鄉里以恩意往來。板輿以登頓勞苦。仍懷喬木之戀。不覺還轅之遲。在私欲而更安。致王程之淹引。日虞按舉。以詰稽違。賴外臺軫惻之仁。全末路孤危之迹。此蓋伏遇某官。恩推再造。量極兼容。特寢見行之文。靡尤既往之咎。使朱轡家守。獲訖于恩榮。皓首偏親。同終于孝養。欲報知己。敢忘捐軀。

上金華知縣國博狀

伏審解印還臺。促裝首路。驟遠巨庇。增鬱丹棕。聞赤子之攀轅。第欽遺愛。參諸公之供帳。莫遂愚衷。恭以某官。風業宏長。襟致夷遠。試才劇邑。適善治之告成。第課明廷。行茂恩之優及。瞻祈戀結。無諠下情。

上省副王郎中狀

恭以省副郎中。盛德之後。元精所生。甘泉之課屢優。茂恩行及。淮水之源方濬。遠用奚涯。順履天陽。載蕃時福。莫遑爲壽。第劇傾風。

代問候屯田狀

自紆守絨。湫阻朋簪。近繇愚息之行。嘗致幽絳之問。伏惟布行寬治。臨撫善邦。鎮靜多餘。神明永復。恭以

某官稟氣間傑。爲時聞人。父母一州。不足充天下之望。旦夕中詔。將以副上心之傾。迴翔顯途。變理元化。伏望爲國自壽。以時考祥。

代問候丁憂李端明侍郎狀

某自冒仕階。嘗出門下。奔馳吏役。邈矣一涯。契闊台光。倏焉累月。第馳心于恩館。曠敝感于書牋。坐跂標儀。鎮勞悃愍。仰惟孝履。俯順禮經。恭以某官名世鐘賢。際天蘊識。以忠誼結明主。以文章重當時。輝映端朝。翺翔華貫。以至載筆法座。代言禁廷。上直文昌之垣。榮兼祕殿之秩。旋出觀于藩政。俄入宰于銓衡。品題庶官。時所稱允。師帥百辟。上方注懷。遽遭親闈之悲。差淹台袞之拜。然萬鍾及養。足以慰夫生平。細札奪情。可兩全于忠孝。永言瞻禱。曷究指名。

代問候許發運狀

竊玷茂恩。獲監便郡。使麾所屬。官次焉依。伏惟順履。蕭辰誕膺。茨福恭以某官。纓紱奕世。文章冠時。上知甚明。自結益固。金穀登羨。備紓富國之才。朝廷寵嘉。行付經邦之任。某適棲暉庇。倍切傾祈。久曠台光。尤深戀結。

代問候程密諫狀

被命中宸。効官南服。門牆愈遠。慮遺冗外之蹤。賤牒不時。懼瀆高明之聽。仰惟坐鎮。俯順生經。恭以某官。亮節在廷。懿文表世。早紓賢業。自結主知。升諫暑之華班。兼樞廷之祕直。中外洊歷。明哲維均。父母一州。

猶鬱于清議。領袖百辟。行副于具瞻。俛惟下僚。嘗備屬吏。庶終塊北之造。以就生成之恩。

問候吳司諫狀

伏念竊玷茂恩。獲臨便郡。逖仰諫垣之貴列。嘗同鄉閭之昔遊。日企標儀。坐勞惊臆。伏惟居得言之地。有結主之資。咫尺清光。啟居純福。恭以某官。術蘊經濟。學該本元。親逢聖期。獨中賢選。雄文珍策。早奉對于大廷。至論昌言。茲弼遠于當世。匪日爰立。協時具瞻。

問候陳州相公狀

某比者叨承明命。獲假便麾。去國匪遙。盡出大鈞之賜。貢書差緩。懼干上袞之威。伏惟靜布寬條。翕臻純祐。恭以某官。體凝方重。道著將明。結真主之深知。極大臣之能事。幅員億姓。已躋富壽之區。藩屏一方。聊布中和之治。行膺宸照。還秉台衡。

問候司農張待制狀

某近被詔書。就移藩服。方休道路之勤頓。卽有教條之奉行。阻敝暄涼。仰諮寢味。恭以某官。夙鍾間氣。親會熙辰。咫尺清光。翺翔近禁。宸篇彬郁。方絜潤色之才。農府登盈。行被懋庸之賞。驟歸柄用。少慰輿瞻。伏望上爲邦家。精調燕起。

問候承旨內翰狀

假守小邦。瞻風上笏。惟侍從之豐暇。諒神明之綏和。恭以某官。道具粹醇。量函夷雅。頃居仙籍之甲選。茲

冠禁林之貴游。體詔意而裁訓詞。方見真儒之效。柄台衡而圖政教。行畢大臣之能。

問候安撫資政狀

近奉音郵。計塵台座。仰惟福履。誕擁休祺。恭以某官。經世高才。薦紳碩望。歷更華要之選。備極將明之才。天下之安。暫休于廊廟。方面之計。屈布于藩條。諒五月之政成。卽三篇之冊拜。伏望上爲邦社。精調燕興。

問候李刑部狀

使麾所屬。旅次焉依。如鄰洪河。日所蒙潤。不遠數舍。缺然寓音。伏惟順履。歆炎。誕膺禧福。恭以某官。德函剛實。才貫幾深。親會聖辰。備據賢業。登車攬轡。已澄序于官聯。輓粟飛芻。復羨盈于邦計。行旌幹濟。驟陟近嚴。

代問候提刑郎中狀

自遠麾符。屢更弦晦。仰惟純履。倍集龐褱。恭以某官。經世巨才。搢紳碩望。進持國紀。當宁器其詳平。出按刑章。列城竦其風采。行當秩滿。佇聽詔還。伏望上爲邦朝。精調寢饋。

代問候青州安撫大資狀

自遠鈞庇。日企台光。伏惟鎮撫之餘。福祥所萃。恭以某官。際天蘊識。名世標才。宰樞廷之密謨。專將闡之。外制。悉殫碩畫。訖致大寧。以至屈領守麾。榮兼使節。將天子惠綏之意。慰安元元。詠太守中和之章。述宣晏晏。行奉星詔。亟還上台。俯惟衰遲。鎮託鎔造。

問候通判都官狀

學古不優。洫官無狀。備使令于底下。蒙顧遇于尊前。居常親承教誨之言。不覺身在州縣之賤。貳車言邁。浹日于茲。惕孤宦之疇依。企餘光而獨甚。仰惟純履。舉萃醲休。恭以某官。莊重粹溫。剛明精敏。關掌郡事。屈領簿書之繁。鉤深聖微。行司典籍之祕。

代問候荆南知府狀

自遠鈴齋。寢移圭籥。惟淮壖囂冗之地。有官簿沈迷之勞。曠繼奉于音題。以究陳于感懷。伏惟布宣寬詔。集受繁禧。恭以某官。業履蹈中。才猷彪外。聳動端朝之望。雍容內閣之華。惟荆渚之雄藩。據洞庭之勝壤。厭居祕殿之侍。樂駕兩輶之遊。圭袞儻來。靡嬰于素志。江山有助。不廢于清吟。諒五月之政成。卽三篇之册拜。

祠部集卷二十一

狀

代問候文相公狀

近塵牋牒。仰瀆鈞衡。兩兩台星。諒迴于鑒照。巖巖尹石。彌極于企瞻。伏惟坐論萬事之機。翕受百祥之粹。恭以某官。代天鉅業。名世偉才。冠羣后于中階。總大猷于一體。稷高維已。治安率土之濱。義軒吾君。拱揖巖廊之上。某夙惟鴛鴦。嘗荷埏鎔。適居冗外之聯。阻伏凝嚴之地。

代問候運使郎中狀

貳職于藩。宿官無狀。比緣崇旆。出按屬城。道繇陋邦。日瞻高矩。去德未幾。馳戀彌深。曠奉牋函。仰咨寢饋。恭以某官。盛德之後。元精所生。紆賢業于端朝。踐郎曹之正列。尙淹柄任。暫領漕權。連心計于無垠。適資幹濟。取民藏于既庶。行底羨盈。佇簡宸衷。驟升邦署。

代問候發運大諫狀

向按屬城。道道塗之勞止。遐傾蔭宇。惕牋牒之缺然。伏惟溽暑貫辰。粹襟迪吉。恭以某官。民靈先覺。王佐偉才。由妙年而取甲科。不累日而都顯位。以至躋天閣之密侍。兼諫垣之要班。主知素明。賢業彌劭。差緩登庸之拜。屈持通漕之權。然金穀羨盈已。富王都之計。而均衡密勿。行居台席之崇。

代問候發連狀

寄身使節。職守藩旗。撫弱植之疇依。企餘光而日甚。向沿臺牒。曾靡定居。仰奉郵音。倏成曠禮。伏惟坐籌大計。舉集繁臚。恭以某官。覺任民先。行爲世表。早躋纓紱之貴。自結纊旒之知。寵寄茲隆。聲光愈綽。龍山海之貨。方洽羨盈。充邦國之須。適緊幹濟。行疇茂積。亟踐嚴塗。

代問候發連孫大監狀

解去小麾。竭來上國。尋嬰人事之冗。間奉朝趨之常。南望使臺。纒遠千里。內省書札。不修累年。簡棄乃宜。兢慙何補。伏惟坐籌大計。參萃繁臚。恭以某官。名重薦紳。才兼數器。寢揚臚仕。獨映榮班。總山海之輸將。尙煩劇任。瞻邦家之調度。行錄茂功。輿言所符。柄用非晚。

代問候許端公狀

近者伏遇某官。告成歲課。入覲天威。因假道于屬封。獲趨塵于嚴旆。宿官無狀。第引領以傾風。貢問不時。徒覲顏而增懼。伏惟時暄貫序。純履餐和。恭以某官。業履蹈中。才猷彪外。勤勞十稔。總淮海之輸將。瞻足大農。經邦家之支度。已列霜臺之祕。行登天閣之華。翹企維深。欣愉曷罄。

代問候南京杜相公狀

茲以謏材。猥當煩使。閱簡書而按治。曾靡寧居。奉牋牒以問安。已成曠禮。伏惟水行貫序。谷養餐和。恭以某官。業履崇高。智謀光大。尊股肱之一體。挺金石之純誠。珍策熙朝。已底山河之靖。安居就第。遽遺圭袞。

之榮。維衆論之稱賢。矧上心之圖舊。就諮大政。當叩于元龜。善毓粹襟。庶全于永祿。

代問候何舍人狀

恣冥無狀。汨沒于時。亞塵洙泗之交。日迷簿領。極目河山之阻。時曠音滕。伏惟坐布寬條。翁膺景福。恭以某官中和迪哲。亮直秉彝。學究天人。文經邦國。才爲時而挺出。道遇主以大行。載筆記言。未殫于儒效。露章請郡。將布于主恩。雖光晝錦之行。尙淹英袞之命。佇膺迅詔。還踐嚴塗。

代問候許州相公狀

猥瑣無堪。生成有素。亞外諸侯之守。日奉詔條。仰大丞相之尊。曠塵牋牒。伏惟布黃堂之政事。萃泰宇之福禧。恭以某官助濟王塗。器包民極。才爲時而挺出。道結主而獨深。首翔台路之嚴。親輔帝期之盛。登用良俊。裁抑責權。講闕典之所未行。讓元功而不之有。亟露章于宸扆。願遠印于宰廷。萬民具瞻。方依于周尹。一相處外。俄殿于陝郊。幅員渴鈞治之仁。朝廷思體貌之舊。行膺徽冊。歸宅元台。俛惟冗微。庶訖挺造。

問候通判都官狀

阻侍坐隅。倏彌旬浹。崎嶇末局。固奔命之無休。引遡崇靡。惕進音之滋緩。仰惟坦履。翁受繁禧。恭以某官名高王朝。學際聖闡。貳車贊治。聊鬱于賢圖。細札須才。行趨于帝所。

代問候青州資政狀

荏苒外麾。徘徊末路。門牆愈遠。慮遺疏冗之蹤。牋牒不時。懼渙高明之聽。企台光而且邈。馳愚想以滋深。

伏惟靜鎮善藩。益綏秦宇。恭以某官。際天蘊識。名世標才。宰樞廷之密謨。專將圖之外制。悉殫碩畫。歷樹豐功。天下已安。暫休于廟路。方面之寄。屈布于藩條。諒五月之政成。卽三篇之册拜。

回崔判官權縣狀

比者方效小官。獲棲大庇。偶沿臺牒。暫領邑章。撫弱植以疇依。跂餘光而日甚。豈圖高誼。猥貺瑤封。何其賁飾之多。無乃謙撝之過。永惟感服。曷究名言。

代答王待制狀

向嬰郡事。罕奉郵音。阻敍暄涼。仰諮寢饋。豈圖恩獎。猥占教文。恭以某官。經世偉才。搢紳碩望。時政有大利害。莫非昌言。宸謨之日坦明。多所潤色。行膺鈞軸之拜。少慰幅員之瞻。伏望上爲闕廷。精調燕起。

代答秀州孫郎中狀

自遠朋簪。向紆守紱。豈謂不移鄉閭之舊。曲有賤賸之貽。兼承坐布藩條。舉臻茨福。恭以某官。早紆賢業。自結主知。擁麾東南。已疑郡治之最。奉召旦夕。行被朝僉之榮。伏望精調燕興。俯慰瞻頌。

代答趙虞部狀

近者伏遇被命出都。假道過泗。輒緣門下之舊。屢獲坐隅之趨。虛襟以容。雅眷無替。而復諒其孤進。每有先容。俯矜滯蹤。力發薦口。自遠去於德蔭。庶少披於感悰。賤介遯還。誨音首及。拜而伏讀。藏以爲榮。恭以某官。當代鴻儒。薦紳碩望。郎垣應宿。早愜於與言。侯服亞麾。尙淹於遠躋。佇宸檢之褒擢。復相門之光華。

俛惟冗微。鎮卜棲倚。伏望上爲宗社。精調寢興。

代答陳都官狀

居鄰善郡。日庇餘光。竊聆卓馬之朝。入近蒼龍之闕。未遑馳慶。先辱流音。屬商序之方中。企賢規而寢逸。卽膺甄擢。倍萬和調。

代答知宿州朱司門狀

嚮繇順驛之臨。嘗拜珍函之辱。旋沿臺牒。往督漕舟。行李淹徊。日月逾邁。抗塵無狀。裁記不時。恭惟順履。初炎。翁臻純福。善藩布詔。方著於能聲。溫檢須賢。行躋於華貫。勉遵時序。倍保興居。

回諸官狀

王正謹始。天吏肇和。欽堯歷以授時。稱漢觴而薦壽。恭以某官。親逢盛際。早歷榮階。屬開祚之膺辰。期自天而集慶。永言瞻頌。曷罄指云。

代答運使任學士狀

拜嘉至渥。冒職如初。鎮鞅簿書之勞。絕攀臺閣之軌。豈圖恩照。首占教文。伏承給食中都。餐和泰宇。恭以某官。器函剛實。識貫幾深。以忠誼結主知。以文章重時論。然漕臺煩使。誠曰藉才之司。而書殿詞臣。決非久次之地。行祇迅詔。入踐嚴途。

代答湯都官狀

向緣朝謁。屢遵賢規。去德未遐。瞻風滋劇。旋承新命。榮領使麾。方列慶函。遽貽誨牘。恭以某官。才猷懋美。政術修明。早踐清郎之塗。游揚循吏之目。第甘泉之最狀。允格聰聞。殿甌閩之巨邦。行旌治迹。趨承匪邈。企引兼常。

代答王承旨狀

伏蒙遠紆公幹。垂貺鈞函。不遺外補之蹤。曲損大臣之體。拜而伏讀。藏以爲榮。恭以某官。王佐偉才。天元粹氣。以文章甲賢選。以忠誼結主知。飛綏金馬之庭。早揚仙貫。視草玉堂之署。密暢宸謨。日奉威顏。益隆體貌。台星兩兩。行正坐於燐煌。尹石巖巖。自副時之瞻矚。

代答淮陽知軍司門狀

伏審祇被恩書。榮臨治屏。寸襟增忭。餘潤焉依。恭以某官。識蹈大方。氣陶至粹。妙年結綬。蚤著於能名。列郡鎮麾。方凝於美政。行甄最狀。亟踐嚴途。某適守陋邦。獲鄰善壤。未遑馳慶。首辱占音。媿躍兼深。名言非諭。

代答昭信羊寺丞狀

伏審肅卽使辰。已臨劇邑。坐席未煖。早騰治聲。閩境相懽。謂得賢尹。方茲竊忭。遽辱流音。感媿并深。名言非究。

代回新知揚州張學士狀

伏審就蒙細札移鎮巨藩。伏惟慶慰。恭以某官才貫幾深。量函夷雅。蚤躋朝紱之貴。久踐書林之游。領漕節之輸將。參財閫之經畫。善狀連最。高懷愈恬。益隆天子之知。交上柄臣之薦。尙稽顯任。猶布寬條。然圭袞儻來。靡嬰於素志。而江山有助。行適於清吟。弗需坐席之溫。佇被鋒車之召。未遑馳慶。先辱占音。媿喜交懷。名言非諛。

代答詳覆陳著作狀

代審茂對明縉。榮躋祕局。伏惟懽慶。恭以某官器宏才博。行潔文醇。洵決雋科。未紓賢蘊。掌漕臺之通庾。遽被更書。由省戶以詳刑。適當滿歲。亟從宸陛之對。擢踐道山之游。未列慶函。首紆珍牘。永言愧怍。曷究名云。

代答揚州張學士狀

近者伏值某官。駕言于藩。道出茲土。獲賢規之觀止。愧主禮之缺然。旋聞肅練剛辰。榮開尊府。將迎鮮暇。日謹教條之行。企忭交懷。尙稽牋牒之奉。豈圖恩照。首占誨文。伏讀以還。兢慙靡措。仍審肇班寬詔。翕萃繁禱。恭以某官業履淳脩。才猷高爽。踐書林之清切。久列嚴塗。總漕節之輸將。累持重柄。洵臨巨屏。增煥豐功。旒展知名。素嘉恬退之節。朝廷倚德。行承迅召之音。

代答舒州林龍圖狀

疆埃相望。第風猷之仰止。簿書紛委。愧音記之缺然。豈謂曲貸愆儀。自敦高誼。乘偃藩之多暇。飭記室以

占書。何其賁飾之多。無乃謙摛之過。恭以某官薦紳耆碩。經世偉才。親對休辰。游揚美化。登禮司之少列。增重卿聯。參延閣之榮班。有光儒效。眷舒人之故國。分漢守之左符。藩翰須賢。暫勞於君重。朝廷圖舊。行被於帝咨。

代答盧郎中狀

向塵寶席。獲吏淮州。適逢耆德之英。出共本朝之理。大事決于庭下。率任通明。短才備於幕中。訖無云補。第積官瘼之慮。敢圖公舉之榮。過被獎憐。猥形慰薦。旋違恩館。鎮奉臺符。奔走道塗。淹徊歲月。塵勞之狀。畢冗而可嗟。起居之音。闕疎而不備。寄顏有覩。論感無涯。豈謂自損達尊。首頌勤誨。拜而伏讀。藏以爲榮。仍審泰宇。甚休景福。如召恭以某官。行推高爽。識貫幾深。付古諸侯之權。游更重寄。著漢循吏之目。行光直書。

代答杭州呂舍人狀

近玷茂恩。驟塵劇使。事經多日。悉究寸心。簿領盈前。曾無虛目。曠紓悃幅。少謝獎延。豈圖乘偃藩之多餘。飭記室以占教。祇服謙亮。第勤愧藏。恭以某官德履蹈中。智謀經遠。蚤陟雋科之首。游揚仙貫之華。載筆嚴塗。厭司於外命。請麾要郡。樂布於寬條。然而先一州爲大用之階。辭累日乃高賢之致。鈞衡之委。旦夕以須。

代答新運使學士狀

伏審就解守符。復持漕節。願惟無狀。方此按章。獲使範之焉依。增愚襟之竊忭。未遑馳慶。先辱占書。祇服謙勤。第深銘著。登車攬轡。矧視事之初。輓粟飛芻。佇疇庸之最。餘留瞻仰。以訖悃悃。

代答青州相公狀

伏審相公。光被明縉。就更巨屏。天下億姓。雖矢於埏鎔。京左數邦。獲繫於鎮撫。側聞成命。竊忭塵襟。因敍慶於單函。懼瀆尊於上袞。豈謂忘公台之絕禮。命記室以賜書。拜讀以還。兢榮靡措。仍審商秋貫序。鈞履餐和。恭以某官。社稷宗臣。山河間氣。均股肱之一體。挺金石之純誠。備紆賢業之高。亟踐朝班之劇。廟堂之上。雖利澤之素行。藩屏之間。欲教風之親及。卽膺徽冊。還乘大言。夙荷陶甄。曷勝企抃。

答通判都官狀

自違盛德。倏越兼辰。伏蒙特忘位貌之殊。首錫誨言之重。惕然拜賜。藏以爲榮。伏惟順泛齋飴。舉綏泰宇。恭以某官。學詣聖圃。名高士林。關掌郡符。豈稱高賢之蘊。翺翔書殿。茲爲美職之宜。伏望倍衛燕興。少平瞻頌。

答知軍郎中狀

久阻賢規。曠馳公牘。豈謂乘偃藩之多暇。命記室以占音。禮意過勤。感藏增劇。恭以某官。鍾氣間傑。爲時老成。軍壘班條。衆起潛郎之嘆。璽書襲績。行光循吏之稱。進服徽章。倍綏沖履。瞻依之懇。諭述奚殫。

答蓬州僉判方中舍狀

近會高車甫經陋邑。蚤緣世舊。遘晤風期。少釋愚心之傾。獨羞主禮之缺。遠顏未久。占教至三。自損朝廷之達尊。弗遺州縣之勞賤。禮緣愛厚。感與幸并。恭以某官材猷懋明。襟致夷遠。屈能大幕。聊緊婉畫之精。考課嚴宸。行被華章之寵。益綏燕餼。庶副瞻祈。

答方寺丞狀

向以菲材之資。久承旁縣之乏。簿領勞止。鎮汨於塵容。牋函缺然。第傾於賢檢。豈圖謙眷。數枉誨音。遠貽窮海之鮮。申覲秀林之實。拜賜甚渥。貢書弗時。尙恃粹襟之寬。未誅苛禮之廢。恭以某官才猷肅給。方格淳修。劇邑字吐。甫成于美課。明廷考績。行對於茂恩。倍保燕興。少符瞻頌。

答方秀才狀

某名在州縣。沮壯氣以無餘。賤如塵泥。分英才之絕願。豈謂方君先輩。特敦高誼。遠枉珍函。褻假過優。諒緣於誤聽。庸愚自揣。有激於嘉修。炎溽貫辰。燕興迪吉。行摠素蘊。平挹顯科。瞻頌交深。文陳非悉。

答范仇香狀

自遠朋遊。倏茲累月。徒勞吏職。曾靡定居。愧書禮之缺然。遽誨音之來止。益知雅契之篤。兼審粹襟之和。恭以某官方格淳修。才猷蔚敏。大邑從政。猶未朞年。當塗交章。計在匪日。

答王交代狀

疊竊恩章。濫紆宰紱。考格垂滿。治材本踈。賴有後來之賢。將更既往之謬。承拜新命。稽修慶函。豈圖隆謙。

先占溫教。恭以知縣祕書。氣得天粹。學鉤聖微。早交諸公之章。謂可一邑之政。上心嘉乃。遽降於俞音。萬目顯然。佇觀於新治。益綏福履。行服褒華。感頌所叢。名言非悉。

答東陽韓中舍狀

進膺明詔。出宰劇封。方列慶函。繼紆榮牘。兼承撫字之隙。坐擁福休之繁。民口交驩。適歌於新治。官居甚邇。幸竊於餘光。倍保宴興。少平瞻嚮。

答滕廷評狀

某名在俗吏。跡疎時賢。青雲得塗。因觀展足之遠。黃綬爲邑。益覺致身之卑。敢圖高明。弗有貴重。親占溫教。欣奉仁風。讀竟感來。榮存辱去。兼審協班寬詔。坐擁繁臚。恭以某官。道具醇全。業包康濟。歷試藝文之要。連升科等之優。別乘雍容。豈需滿歲。嚴塗陟降。其在匪朝。

答丁著作狀

自遠風概。再見歲除。旋承茂對。明緝顯升。祕局迄無暇日。阻列慶函。敢圖通明。弗爾簡棄。遠頒溫教。垂賚寒蹤。其爲感藏。豈敢忘去。恭以某官。量函夷雅。學探本元。金馬之廷。方參于華序。石渠之府。行考于祕文。歲籥幾終。天和迪吉。永言瞻頌。曷究指云。

回諸州守倅遠迎狀

國賓戾止。適修迎勞之常。道主勤斯。遽枉撫存之問。卽披賢矩。併敘感悰。

回不經歷州軍守倅遠迎狀

張旌表事。莫遑枉道以瞻風。搖旆馳心。違辱移書而講好。永言感慰。第極銘藏。

回移廚狀

方趨長道。適次巨封。過蒙主道之勤。特置公庖之腆。仰銜厚眷。竊謹中藏。

代答滕廷評狀

偶逃官曠。猥玷序升。敢圖名世之賢。首講珍函之好。誨辭溢美。感臆兼常。恭以通判廷評。學鈞聖微。才適邦選。果符輿論之屬。進列鼎科之榮。別乘雍容。靡需於滿歲。嚴塗陟降。計在乎匪朝。伏望上爲邦家。精調燕餼。

答福建轉運曹司勳狀

比玷茂恩。併加誤寵。擢司內命。假尹中畿。獨蒙慶問之流。第劇感懷之摯。恭以某官。才猷膺敏。風績宏長。領南服之輸將。瞻大農之調度。行甄美課。益保粹襟。

答慶帥孫給事狀

伏審茂對明緝。顯升瑣闥。側聞成命。竊忭丹衷。恭以某官。經世偉才。際天遠識。蚤紆碩畫。屢懋膚功。旋易左符。暫勤西略。總兵民于一道。隱若長城。肅號令于諸蕃。晏然外圍。詔音非晚。柄用其時。少副瞻祈。益綏燕起。

答雄州趙都使狀

伏審顯承恩詔增峻使聯首煩榮教之臨。差愧慶函之緩。恭惟收勤遠略。倚重要藩。用威愛之兩端。督戰耕之大本。坐升禁衛。行擁節旄。感頌并深。名言奚罄。

代馮內翰答鄭州王防禦狀

近者靈輿西引。吉仗東旋。往來要邦。終始大事。靡闕百須之奉。率繫千慮之周。坐以享成。居然備使。仍首貽于誨牘。誠過篤于謙懷。臣節益明。茲不忘于忠孝。君恩雖大。知有報于生成。欽佩兼深。名言非悉。

答棣州王學士狀

假尹神都之劇。日費剗裁。懷賢治壤之遐。居深馳嚮。迴存高誼。首貺珍題。秋老氣清。益綏寧于素履。才完行潔。將陟降于華塗。

回燕王狀

適駟輅傳。雨次都圻。猥蒙禮意之先。時損書音之貺。仰銜撝挹。增劇感藏。

答副使狀

駕言單傳。道出別畿。特枉珍題。良紉謙懷之篤。弗遺未介。第藏感臆之深。

答留臺崔籍庫部先狀

伏審茂對恩章。榮持留憲。未塵慶牘。首降誨函。仰重意之所臨。戢懦衷而無斃。恭惟留臺庫部。鍾氣間傑。

爲時老成。暫均佚于分臺。足增輝于列宿。卽諧參對。倍切欣翹。

答耀州知府樂少卿狀

某素乏吏能。繆參帥畫。屬方祇于官局。曾未列于公函。敢謂自屈名卿之尊。不忘故吏之眷。首頒溫教。垂賚寒蹤。伏讀再三。感藏千萬。秋炎尙熾。時祉載蕃。恭惟知府少卿。不世壯猷。爲邦雋老。寬條所布。方坐鎮于善藩。大政其咨。行召還于舊德。

上盧郎中狀

頃備下僚。僅彌朞歲。沐仁侯之撫愛。鈞國士之獎知。遽會露章。堅求易郡。俞詔隨下。孤蹤失依。尋伏枕於踰旬。方驚困篤。迨解麾于舊服。莫遂遮留。鎮爲吏職之勞。缺爾公函之奉。仰惟純履。舉集醴休。恭以某官王國偉才。郎垣碩德。甘泉奏治狀之最。宸展嘉老成之風。行被褒書。驟升近著。

上田省主狀

語才無狀。蒙願有年。何幸會之復然。續恩暉之有所。旋叨宸詔。出董漕舟。尋奔走于江淮。倏淹徊于日月。門牆愈遠。分遺冗外之蹤。牋牒不時。慮浼高明之德。伏惟坐籌大計。舉擁繁臚。恭以某官才貫幾深。器函剛實。雄文取重于時論。大筆追還于古風。親逢聖辰。獨膺賢選。究國體而指人事。已擅著篇之奇。潤神化而輔帝猷。尙淹當軸之效。矧計庭之上笏。卽台袞之便塗。匪朝升庸。爲世休福。

又

恭以某官。方格淳脩。才猷膺敏。雄文珍策。早奉對於大廷。要職美官。遠垂光于當世。傑識足以照今古。重計足以尊邦朝。雖上知之甚明。顧賢圖之猶鬱。主謀財府。暫繫經畫之奇。兼秩禁局。聊稱文章之實。矧觀已試之效。宜被非常之恩。詔冊發中。宰衡升用。首陶坯冶之化。大副幅員之瞻。開祚膺辰。自天集祉。某預外臺之將漕。方備屬官。祝南山而捧觴。竄違私懇。

又

某器能無取。蹤跡本孤。早被恩憐。力垂振拔。雖日馳牋牒。曷殫感遇之懷。而鎮鞅簿書。尙缺問安之禮。伏惟坐籌邦計。翕萃天和。恭以某官。行潔性醇。德宏業鉅。高文大冊。優踐于賢科。美職要官。進揚于聖世。兼禁局之嚴密。主財府之經宜。富國澤民。皆出著篇之素。秉鈞當軸。未紓經世之才。矧給足于中都。行奉承于徽冊。

上宋侍讀狀

語能無狀。被遇最優。迹久去門牆之嚴。書再徹左右之聽。居常牽吏。繼缺問安。大臣之量。猶江河。能容簡曠。小人之背負。芒刺第切。兢慙伏惟。宣布教條。導迎禮祉。恭以某官。夙鍾間氣。親會熙辰。歷更顯仕之光。增重薦紳之望。鬱胸中治安之策。猶屈守塵。樹天下太平之基。行登台席。

答李端明狀

支郡下僚。西州末介。跡一去門牆之峻。漫歷歲時。耳弗聞訓誨之餘。坐成愚陋。宿官無狀。奏記因疏。豈謂

自損台嚴。首傳教旨。孤蹤知幸。淪髓銜恩。伏惟順履。初炎。翕臻景福。恭以某官。夙鍾間氣。親遭熙辰。蚤升祕殿之華。久踐禁局之邃。華要之選。翺翔殆周。名重薦紳。道結當辰。然文章之任。已極于儒榮。而鈞軸之嚴。未平于物論。行膺徵冊。亟宅上台。

上南京歐陽龍圖狀

按章郡邑。鎮爲簿領之勞。馳想門牆。俄曠音滕之奉。伏惟肅班寬詔。舉萃繁臚。恭以某官。名世標才。際天蘊識。屯夷殊致。明哲惟均。自結中宸之知。早躋內閣之貴。幅員億姓。願託于國鈞。藩屏一邦。尙司于宮鑰。時議雖鬱。主心已傾。諒五月之政成。卽三篇之冊拜。

上王交代狀

末吏淹期。方盈于愧汗。高賢廣度。遽錫以誨音。審履春陽。益叢天祉。終朝北首。以須華馭之來。曷日南軒。俾釋芳襟之望。餘留瞻挹。併寫悃忱。

又

近者使還。貢書計已徹視。吏冗鮮暇。續踈問安。伏惟待次多餘。練神增裕。恭以某官。道具醇粹。學探本原。聚以藏身。爲士君子之守。施之有政。得古循吏之風。益輔夷襟。行光遠躋。他留瞻奉。併訖悃悃。

上發運張司封狀

解印小邦。還臺累月。京塵汨沒。益嗟俗狀之勞。書舍缺陳。第企賢規之粹。歲華方晏。福履攸寧。恭以某官。

簡厚凝姿。中和秉哲。周才足以了大事。敏識足以照羣疑。中外僉言。當踐嚴塗之祕。東南重計。尙煩碩畫之精。靡俟終更。卽祇迅詔。俛惟瑣品。蚤預同升。欣頌兼常。文陳非諱。

上河北運使李司勳狀

伏念某。葺爾孤生。斷無他術。委身屬部。嘗蒙慰薦之再三。碎首恩闕。未報生成之萬一。自違門下。承乏淮南。素號僻州。兼疎便驛。忱音滕之不講。第顏汗以無從。竊恃兼容之私。弗誅苛禮之廢。苦寒貫序。恬養餐和。恭惟某官。業履純修。才猷峭劭。蚤揚騰仕。獨映熙朝。眷言北道之雄。尤慎外臺之選。亟圖籌畫。專領輸將。適此登車。沛然餘刃。行瞻中都之費。坐澄列郡之源。雖使節觀風。誠周才之允屬。而相門襲慶。矧前烈之未墮。卽踐嚴塗。續還舊物。

上樞密吳侍郎狀

恭惟樞密侍郎。文經邦國。學際天人。親造唐虞之盛期。獨懷晁董之珍策。危言切指。蚤奉對於大廷。妙略參陳。適運奇于密幄。登庸之選。倚立以須。迎日在辰。膺時納祉。某素叨獎拂。方總輸將。惕馳慶以無階。第頌言而滋劇。

賀副樞吳侍郎加禮部侍郎狀

伏審祇承制命。增峻台儀。進敷天子之光。登踐春官之武。伏惟慶慰。恭以樞密侍郎。氣鍾間傑。道具大醇。體安素履之休。德蹈黃裳之吉。危言珍策。講重計以尊本朝。勝算偉謨。經遠猷而裨宥密。早被先皇之用。

重膺繼聖之知。特錄精忠。亟加顯秩。惟是常伯。以爲亞卿。遯聞成命之行。增切寸襟之喜。

代與發運楊郎中狀

進玷茂恩。往祇煩使。竊願官能之疎短。寵愈憂深。向陪尹政之浩穰。力隨神耗。逃責弗暇。投閒乃宜。敢虞詔紱之頒。輒與漕臺之寄。尙緊厚幸。將庇末光。屬炎待之貫辰。諒粹襟之迪吉。恭以某官。量函夷雅。才際幾深。董山海之輸將。方圖碩畫。瞻邦家之調度。行懋膚功。靡俟終更。卽趨迅召。

上李待制狀

爲郡事煩。寓書禮曠。仰惟吉履。俯萃醲休。恭以某官。才貫幾深。器函剛實。雍容邈綴。暉映端朝。侍帝閣之凝嚴。方緊潤色。掌天銓之華要。適賴持平。

上田待制狀

頃吏西州。屢瞻崇旆。玷塵慰薦之數。蒙被顯知之優。旋去恩闕。漫踰歲籥。曠奏書而絃感。姑引脰以傾風。遯料燕興。翁臻禱福。恭以某官。民靈先覺。王佐美才。親造穆清之期。洵更繁劇之委。迅躋內閣。孤映端朝。然潤色宸篇。未殫行事之效。而頒條侯服。庶見澤民之爲。

代答兩轉運狀

叨貳屬封。獲棲巨庇。輒論榮遇。虔貢幽絨。方積瀆尊之虞。固無還教之望。豈圖恩獎。嗣損音題。三復以周。一謙斯在。仍審提衡外計。按治列城。素履攸寧。蕃禧紹至。金穀登羨。適底中都之饒。綸綽褒嘉。行膺大柄。

之委。伏望爲國自重。以時考祥。

上諸路轉運狀

比塵劇使。蓋出曲恩。曾無經畫之明。率藉輸將之助。受署累月。貢音後時。伏惟坐籌邦計之繁。翁受天和之粹。恭以某官才猷。敏方格。淳修漕節。澄清方凝。於最狀宸緝。溫厚行服。於褒章瞻頌。交深名言。非諭。

代賀提刑主客改轉運狀

伏審國計須才。朝僉議可。榮膺宸詔。就改使麾。伏惟懽慰。恭以某官當軸慶枝。薦紳碩望。親逢真主之運。早踐列星之垣。忠誼秉心。術業經世。按祥刑於列郡。多所平反。第美課於嚴宸。益隆委寄。重中都之支度。領南服之輸將。運心計而有初。簡聰聞而非逸。俛惟屏品。方託巨庥。聆邦家之擢賢。惟增距躍。如犬馬之慕主。尙戀恩暉。適守官常。阻從賀列。彌深企抃。曷罄敷陳。

祠部集卷二十二

啟

上歐陽龍圖啟

就奉宸縉。往司邦漕。言念計臺之冗。得參使節之華。獲幸于天。依仁有地。伏惟餘寒貫序。泰宇餐和。恭以某官。術業該世。亮節在廷。刊藏室之譌文。備紆素蘊。進諫囊之密疏。夙罄良規。夷險洊更。明哲一致。寢結中宸之眷。遄升內閣之華。俄被詔函。屈司宮鑰。經綸之業。尙卷而未舒。登用之音。匪朝而伊夕。

上鄭州祖龍圖啟

逖阻朝游。罕馳書舍。審宣猷于屏翰。比蒙福于京師。秋氣兆涼。天和迪吉。恭以某官。學探聖闡。名重士林。獨蚤掇于巍科。最晚躋于顯服。屯夷殊致。明哲惟鈞。淹徊延閣之圖書。偃息輔藩之印綬。請麾東里。繫雅俗之撫柔。趣召西廡。卽舊人之登用。伏望爲國自厚。以時考祥。

上宿州石學士啟

伏審進膺細札。出甸巨藩。伏惟慶慰。恭惟某官。行潔文純。才宏業鉅。亞鼎科之異選。輝映熙辰。刊石室之譌文。翺翔華貫。固合發揮。賢蘊潤色。宸猷厭直。承明之廡。樂從外補。臥理淮陽之郡。暫領使麾。然鈴閣班條。豈容于滿歲。而銜車祇召。計在于匪朝。

上參政趙侍郎啓

撫關輔之一方。殆周歲籥。遠京師之千里。增跂台光。日有教條之奉行。坐成書禮之稀闕。伏惟參聞國論。翕受天和。恭以某官。學際聖賢。量包公輔。至誠以矯物僞。重德以鎮世浮。自先帝之知人。洎上方之圖舊。十載台路。一心王家。致主暢謀。益祕省中之語。貳公論道。弗收天下之名。行徵册之延登。慶洪鈞之付畀。

上集賢相公啓

往違翹館。來刺劇州。省才略之短疎。愧恩榮之優重。坐勤官事。罔知日月之遷。仰庇台光。幾缺寒暄之間。伏惟密護王體。參嚮天祺。恭以某官。涵德淳深。秉彝惇大。得位行道。擴經濟之初心。尊王庇民。邕太平之偉績。彌縫衰職之闕。調適鼎司之和。崇謙矩以自持。避豐功而弗有。堯舜相授。方逢極治之期。丙魏有聲。永底協恭之績。

上太保啓

伏以某官。術業該深。才猷廣敏。親逢盛際。獨映榮班。洊更使領之崇。自結宸嚴之眷。將明恩于郡國。方諭上仁。書茂績于鼎彝。行摠將略。

又

伏審遠泛仙艫。甫臨陋壤。行瞻使範。增忭愚襟。恭以某官。莊亮秉心。忠純迪操。羽儀環衛。蚤踐于班榮。陟降禁嚴。特優于主眷。瞻風伊邇。獲幸良多。

上樞密侍郎啓

向以短才。猥當重寄。撫綏何術。可臨西土之兵民。疾苦所詢。或見故鄉之父老。中心爰究。累月于茲。曠尺牘之間。安積寸襟之馳仰。伏惟神機所總。時祉載蕃。恭以某官。業履崇高。智謀光大。經正德以儀庶位。挾重計以尊本朝。彞冠序於宰廷。久宣勞於王室。蒐闕儀之未講。範成憲於可行。乃收真相之極功。以畢大臣之能事。付鴻樞之要柄。采英袞之昔謨。文武以兼。安危所繫。矧廟堂畫一。尙循蕭相之舊規。幃幄運奇。更藉留侯之前箸。聊制五兵之本。復調萬物之鈞。

上制置發運待制啓

蚤以頑蒙。謬塵獎拔。發蹤門下。致諸公之交章。去德歲餘。無一日而忘惠。向他邦之待次。方小邑之效官。訟牒相紛。日嗟州縣之勞職。公函缺講。懼浼朝廷之達尊。伏惟大計坐籌。繁禧來集。恭以制置發運待制。鍾氣間傑。爲時老成。董轉給於外臺。久繫碩畫。步凝嚴於內閣。獨映榮班。主知益明。賢業彌劭。紅粟朽貫。已增羨於邦儲。英袞繡裳。行進圖於廟略。俛惟疏賤。訖託埏鎔。

上職司啓

某得爲屬吏。忽踰半歲。向者某官。行衙在泗。日備趨走。承命鞠獄。幸無敗事。間雖宵人抵罪。搆虛自訴。賊狀甚白。覆案仍舊。皆指蹤之素及。非下吏之獨能。若乃潔廉自持。冰霜其操。譬良民之不爲盜。此常分而安足論。聞繇建白之隙。嘗蒙一言之賜。且曰。知汝固厚。論薦足必矣。將倡諸聯事。成汝孤跡。某聞諭悚愕。

退竊感怍。狂愚之心。不能無望。今待命凡累月。官滿過五旬。清舉未行。憂疑翻集。噫。豈材疎迹賤。不足汗薦書。將謗言橫議。陰有所嫌間。徐而思之。似不然也。果疎賤不足薦耶。則誤知在前。重言既發。豈忍遽移。果嫌謗所間耶。則執事明甚。某無纖缺。使嫌者之極。不過曰是子嘗殺人亡命。使謗者之毒。不過曰是掾嘗受賕賣獄。此於人情豈近哉。夫疑似之謗。能惑於庸人。而不能爲明者惑也。是二者皆不足疑。則雖代者甫至。解去有日。而望舉之心。猶不絕如綫。幸執事終特達之遇。續幾絕之望。先諸公與形薦牘。俾恩德不出他門。結草繫桑。生死論報。如或不然。則將求閒僻之邑。避奔命之勞。仰事偏親。俯活妻子。簿書粗了。圖史自娛。不復動心于知己矣。辭情僭迫。拱俟誅斥。

上省副兵部啓

恭惟省副兵部。才兼數器。名重本朝。屈貳財闈。甫足中都之費。進登法從。行爲近著之光。陽德方升。天和參嚮。永言瞻頌。曷盡文陳。

上發運兵部啓

某胄系單微。天資鄙固。懼無名於沒世。因有意於興宗。力究聖賢之書。弗沿父祖之業。人皆謂其狂妄。天獨啓於愚冥。兩與計偕。一塵舉首。方激昂於壯節。遽困墜於下科。母未嘗於君羹。子已泣於風樹。念偏親之需養。延餘息以圖生。勉就銓除之官。准服矧在掾曹之賤。獨稱獄吏之難。蓋上官之議有重輕。而細民之罪係出入。苟持平之一失。則置法於必傾。以故考求物情。執守公是。然孤音寡和。動畏於謗護。而方柄

投圓。間逢於嫌怒。第愨廉而自信。且樸訥之誰憐。如散木之出溝中。匠無顧者。若棄芻之委道上。人皆踐之。伏遇制置發運兵部。振起時風。陶成士類。忘其位貌之隔。視若子姓之親。許力倡於諸公。將首形於清舉。齒牙過獎。羽翼隨生。昔者魯經尊仲尼之褒。有如贈袞。楚諺珍季布之諾。不啻得金。而況通漕劇權。薦紳碩望。一言所與。羣議爲榮。決期孤跡之成。弗自他門而致。當繇恩館。以漸亨塗。重念某粗免官瘝。甫周考格。儻受代而去。不備於使令。則蒙遇雖優。何緣而振拔。是猶茂林弗能庇欲墜之葉。巨浸不足活已枯之鱗。伏望制置發運兵部。垂惻滯蹤。助開公道。特加慰薦。訖保孱庸。如此則孤抱如丹。誓圖於補報。羣才知勸。率厲於廉隅。捨是以還。未知所措。

上呂舍人啓

曷者。伏值知府舍人。被命于蕃。擁麾過泗。輒緣幸會。獲拜台儀。自爾吏職相乘。日有泥塗之辱。公函不講。懼干爵德之尊。洎解賤官。復沾巨惠。無舉家投足之地。方困他邦。給異日濟川之舟。俾還素里。沐恩至渥。論感寧殫。恭惟知府舍人。道備將明。器函簡厚。高文取重于時論。大筆追還于古風。陟降嚴塗。蚤揚于仙貫。發揮外命。適暢于辰猷。固宜徑登政府之崇。增重本朝之列。眷言右溯之會。樂駕兩輶之游。觀風澤民。尙屈一州之用。得位行道。未平四海之瞻。佇對宸緝。亟升台席。

代上本州知州啓

自塵仕綴。卽稔賢聲。萬里宦游。方貳諸侯之屏。一廛農畝。獲依刺史之天。論幸固多。貢音爲曠。伏惟坐班。

寬詔誕擁龐禧。恭以某官經世偉才。搢紳碩望。禁塗翔步。計在於匪朝。郡閣觀風。寧需於滿歲。伏望益綏寢味。以迓寵休。

代上荆南知府啓

自違節下。尋吏淮邊。念簿領之繁懷。曾無暇日。願音滕之致問。不覺曠時。溽暑貫辰。粹襟迪吉。恭以某官名重朝論。才爲吏師。自結上心之知。暫受方面之寄。荆渚江山之勝。聊助清吟。槐庭位著之嚴。行膺寵拜。入奉宸緝。出紆守紱。方休道路之勤頓。卽有詔條之奉行。馳謝未遑。賜音俄及。仰銜雅好。陰激懦衷。恭以某官夷靖自居。直清不倚。朝闈著籍。茲漸於榮階。利局沈才。行祇於休命。

代上張殿丞啓

代上青州文相公啓

伏審茂對詔音。出班藩政。珽銘有舊。歡忭增深。恭以某官社稷宗臣。山河間氣。秉直道以結人主。挾重計以尊朝廷。彘宅鼎司。首調國綽。裁黜貴倖。振拔滯淹。望塞濫源。啓闢治路。底邦猷於甚盛。密簡中宸。避廟略而弗居。懇辭上袞。剖守符而均佚。露公冕以觀風。卷康濟之大而就一州。遂藩宣之樂而鬱四海。朝端劇位。累復於登庸。京左數邦。更繫於鎮撫。一相處外。勞周伯之未歸。萬民具瞻。願晉公之再入。行膺徵冊。還陟元台。

又

伏審茂對明緝。改臨重鎮。肅使旌而就道。露公冕以觀風。休命傳聞。列藩竦抃。恭以某官。器函簡厚。道備將明。儲精上天。佐命皇國。富貴山道。宜位冠于中階。君臣同心。俾世登於至治。暢袞謀於已試。隱廟略而弗居。出甸陪京。靡容滿歲。副天子詔書之意。思慰遐氓。分大臣方面之權。就更巨屏。行開鎮撫雅俗。布宣寬條。五月政成。趣晉公之再入。三篇冊拜。復周尹之具瞻。

代上交代學士啓

自遠德誼。漫踰年序。傾風引脰。與日增企。按章淮右。忽焉再歲。泛舟走陸。曾靡定所。間獲暑居。又迫多事。起居之間。職此而怠。某術疎才短。訖微善最。止虞簡黜。以警無狀。曲恩延擢。移漕南服。退自環省。曷稱繁使。尙賴踵迹賢軌。綱領素緝。何所更爲。第守成效。匪才之人。得以冒寵。兼承祗奉詔召。將朝京師。矧文章器業。久注上意。代言禁掖。發揮辰猷。萬口一辭。僉曰宜職。某已趣行李。自淮如閩。瞻對伊邇。豫切欣幸。外臺大方。當俟必告。伏惟以時自壽。前迓休命。

代上宋都官啓

近日伏遇某官。將朝京師。暫館淮泗。出於天幸。觀止風猷。使車北轅。洵更月序。官簿堆案。曠奉郵音。豈謂自損達尊。曲敦高誼。忘賤官之么冗。錫諄誨之丁寧。伏讀已周。銘藏第切。仍審餘寒貫序。純履餐和。恭以某官。莊厚粹溫。精明剛敏。高文取重於時論。大雅追還於古風。軒陛對敷。方疇於最狀。臺閣翔翥。行陟於嚴塗。

代上交代郎中啓

領藩卒歲。受代還朝。奏課中宸。愧絕陟明之覲。解麾舊服。嘗蒙敦遣之優。契闊踰時。跼瞻惟日。伏惟肇宣美治。誕擁龐臚。恭以某官。郎署碩才。前朝舊德。班條千里。方懋惟良之稱。祇召一封。行膺大次之舉。

與孫觀文啓

跼守陋邦。坐賒賓館。誰謂河廣。曾微杭葦之艱。畏此簡書。居積道躋之歎。恭惟節宣時若。啓處用康。伏以某官。德崇國華。智兼人傑。幾深開物以成務。倜儻扶義而濟功。內參帷幄之謀。外膺方面之寄。夫倚伏之效。巧歷猶知其必然。隆污之期。賢者蓋有以無間。是故稱子文之美。爲其去令尹而弗優。言仲華之賢。亦曰襁龍章而無愠。矧以全德邁衆。達生徇天。宜其捐芥蒂而何疑。寓逍遙而自得。推數循理。已符傾否之占。求舊記功。方盡樂終之義。勉祈善毓。以副禱詞。

與王內翰啓

被詔西來。曷假金城之守。引領東望。日企玉堂之賢。缺貢書音。仰咨德履。想嚴塗之視草。擁龐福以如茨。恭惟某官。學入聖徵。道先民覺。文章取重於榮路。詔命推高於禁林。導宣睿心。明如星斗之揭。鼓動羣聽。震若雷霆之馳。聲名素格於上聰。潤色久煩於大手。行自複門之要。徑躋二府之崇。賢業得申。朝言方允。

與永康仙尉祕校啓

瑣焉近器。效此冗官。幸陋邑之密藏。分清流之勝境。豈圖高議。首杜珍函。獎與過優。銘藏增劇。恭惟某官。

天資夷爽。士檢淳明。較藝省闈。數當高選。試才縣道。尙抑脩程。行對華章。勉綏素履。

泛與諸官啟

自解守符。逖疏賢檢。邈爾道途之阻。徒然燕語之傾。契闊以還。起居何若。官能肅給。行對於寵褒。時序歎炎。勉加於遵行。企頌之切。敷述奚殫。

與錢塘知縣張殿丞啟

一辭鄉邦。三仕京府。參差歸計。汨沒塵容。邈然先疇。適在治部。聞滕公之仁政。庶得相依。因馬卿之宦游。未緣親炙。伏惟字民有裕。膺福無疆。恭以某官。業履純明。氣質高爽。治有餘地。誠百里之淹才。誦已載塗。喜萬家之蒙福。行躋華貫。遙踵清門。伏望善順節宣。精調燕餼。

與襄州劉待制啟

遠據歸鞍。適經便道。氓謠溢耳。甫及仁侯之封。賓阝馳心。行瞻延閣之範。屬歲筭之逾盡。惟福履之綏和。覲首班春。尙淹柄任。堯心圖舊。卽被召還。企嚮兼深。指云莫罄。

代問候亳州宋侍讀啟

某。黽勉副車。阻遙巨屏。沿臺移而奔命。曾靡寧居。貢郵訊以問安。因成曠禮。企台儀而負邈。馳塵想以增勞。伏惟坐布寬條。翕臻純祉。恭以某官。道先民覺。文擅辭宗。忠簡上心。名重天下。而自羽儀朝宇。黼黻宸猷。侍乙夜之親程。已殫明效。宣二天之美化。聊鬱賢謀。行被詔還。亟升柄任。

代問候安撫舍人啓

久去署居。向董河役。風霜暴露。日爲賤事之勞。牋牒缺疎。第仰崇威之切。伏惟臨撫列郡。安安粹襟。恭以某官。學際淵源。器函夷雅。揚雄之論。於聖人而不違。劉向之言。皆當世之有助。賢業彌劭。主知最深。輟諫署之凝嚴。夙將明命。布詔書之寬大。以慰羣元。行聞麾旆之還。亟陟廟堂之祕。

代薛師正問候陳州王密諫啓

久遠盛德。增跋下風。適經煩使之謀。旋抱仲兄之戚。官事勞止。私懷惘然。比朝京師。甫邇藩翰。旣造門而弗及。復奏記以莫遑。仰惟高明。卒以涵貸。伏惟坐班寬詔。日擁蕃禧。恭以某官。生德爲時。挺才不世。危言有感於真主。大節無慙於古人。臺綱懇辭。朝議愈重。股肱右郡。暫鬱士民之瞻。羽翼東宮。蚤知公輔之器。謂在旦夕。入調陰陽。發揮壯猷。登翊元化。矧叨同里之雅。尤倍薦紳之依。瞻戀所縈。文陳曷罄。

代樂職方與管御容皇城啓

伏睿奉三后之粹容。降列真之祕宇。順浮齋舸。甫次敝封。拜德有涯。望風竊忭。恭以某官。早逢熙旦。獨映榮玷。傾忠諒於端朝。密隆宸眷。肅表儀於禁列。增峻使聯。餘遲趨承。併紓悃臆。

祠部集卷二十三

啟

謝除校勘啟

祇荷寵擢。不任戰兢。竊以國家右文。寔昌聚書。增廣經始。靈蘭之祕。發揮河洛之文。表章著明。淵源深厚。然惟道術分裂。時師異言。下逮九家。猶療于野。彼雖小道。亦有可觀。故稗官以芻蕘而弗遺。詞賦比博奕而蒙幸。采獲非一。多愛益新。名山之藏爲空。廣內之策加倍。而後實事求是。聚精會神。芟夷複重。筆削譌謬。是以圖書之府。貴比列星之居。校讎之官。寵甚治民之最。自非精力過絕。篤志淵微。言古而能驗今。聞一足以知十。則何以辨雌蜺之爲字。信魯魚之失真。子雲沈思。僅能宿職。安世默識。乃爲得人。伏念某生質晦冥。天機黯淺。染人僞而逾久。求俗學以復初。顛冥失圖。荏苒過壯。性不傷物。慨嵇生之怨憎。居甚畏言。慕夷吾之老吃。曩者拔自邊邑。擢處郊庠。經汎爲通。非有專門之效。器不周用。動貽方枘之譏。先皇帝志在育材。詔從試可。白衣不召。徒愴恨于崔駰。賜劍猶存。尙孰何于衛綰。逮禁林之給筆。慙髦士之比肩。所貴莫邪于將。爲其立斷。惟是朽株枯木。獨頓先容。然而地寒者品常後人。數奇者功不中率。願惟瓠落。甘觸報聞。豈意寵恩。橫加弱植。委蛻塵滓。濯質清流。捫心自驚。非萬有一之覬望。屈指默計。儻十失五。而在茲。靜言伏思。實有幸會。此蓋伏遇某官。彌綸帝載。幹旋化鈞。大受小知。未始遠于精鑒。言揚事舉。蓋曲

盡于所長。底是庸虛。冒于甄錄。謹當思浚明之成德。勤紱繁之淺聞。砥節礪行。以爲脩。臨淵履冰。而申誠。桑榆之景。尙冀于晚收。菅蒯之微。無忘于代匱。上酬洪造。次答厚知。

謝轉著作佐郎啓

第課弗優。僅應有司之常格。拜嘉甚渥。遽參祕局之後塵。才無一長。顏有餘覲。越對明命。實尸寵章。竊以此官置員。由魏及晉。厥初到職。必撰次于名臣。於爾爲羣。皆洽通之故老。後世寢革。空名獨存。目不窺金匱之文。足不踐石渠之地。雖異實能之授。亦沿舊選之華。苟容冒居。安允清議。某也曲士。今之愚人。磔史裂經。姑欲自售。曼辭陋句。輒爲衆傳。恥用是而獲名。竊改圖而蹈道。方將劇當世之務。以爲事業。發諸儒之蘊。以爲文章。豈涉學之淺源。乃得科于下綴。一落選部。七經閏年。間嘗補掾。淮州字人巖邑。再泣喪親之血。幾灰向仕之心。奈先王之禮制莫踰。矧諸公之薦書猶在。勉就銓集。許從陛趨。漫思昔官。曾泛善最。濩落待詔。兩新華春。兢虞黜幽。都絕榮望。忽甄擢于無意。抑生成之有階。此蓋伏遇某官。樂育士倫。力開公道。市骨而圖駿。隨器而取人。仰體顓能之懷。俯援振滯之手。卒令鶩質。亦玷龍光。敢不允蹈攸箴。益堅所守。弗隨草木而泯滅。誓竭涓塵而報償。捨是以還。未知所措。

謝秀才投卷啓

親屈臨門。貺示編著。辭高理遠。且仰且服。竊以三代之盛。養士于學。文行道藝。日較月比。孰才孰否。自朝廷公卿大夫。以至于鄉黨朋友。舉得而知。後世學廢。士不素養。惟禮闈一開。猝然羣萃。材與否者。無復自

別矧朝廷鄉黨之人可知哉。故連篇累軸，爭贊于搢紳之門。跡其來不過望甄別而博稱遇，非有名當時，言足輕重，烏可塞所來之望耶？若某之愚，徒辱勤意，吏職執掌，阻叩謁舍。

謝兩制并都水監啓

進冒塗嚴，實憂公議之未允。出司通漕，曾乏使才之所長。伊此叨恩，覲然就職，竊以升黜屬官之狀，要在聰明轉輸本道之財，莫非籌畫而又地惟朔野之廣，歲有洪流之虞。北壓敵疆，內儲兵食，委之大計，須曰周才。如某者學有媿于古人，職不經于世務，蚤尸憲職，旋補諫工，因彈擊于當塗，遂流離于遠郡。生還闕下，坐陟臺端，略未踰時，亟陪主計，瞻邦家之億費，何有微勞，董金穀于一方，復更重寄，決非弱植，自致榮階。此蓋伏遇某官密借公言，曲題人品，由褒華之溢美，俾寵數之加優，誓竭愚衷，少酬恩紀。

謝密院啓

濫被茂恩，亟塵繁使，揆能非稱，受命惟驚。況獄理最幽，吏端多弊，或考情不實，煅煉以成辭，于法未安，芟夷而取當。及具文而來上，紛累牘之盈前，自非通敏之資，奚究重輕之失，竊念某天姿滯固，才具迂空，幸襲世芬，早階仕級，濩尸榮于祕館，久預俊游，曷假守于僻藩，自安愚分，思復寬閒之地，以全疎拙之圖，豈謂天造誤知，朝言曲獎，俾按章于列郡，副慎罰于中宸，靖言忝塵，厥有緣自，此蓋伏遇某官協宣坯冶，對掌樞衡，與勸有能，助開公道，謂刑哉事重，有軫朝廷之仁，謂愚者慮專，宜領簡書之冗，至恩難報，孤抱如何，誓輸委質之勤，力踐盡心之訓，上酬覆燾，并答埏鎔。

謝通判國博啓

僻邑效言。方虞幽黜。當塗薦士。遽預名聞。望有所踰。幸無與擬。竊以本朝圖講至治。延登衆材。尙慮援孤者。或泯于當時。業遠者翻沈于下列。思盡甄升之實。乃嚴保任之利。及夫私謁既行。公議不復。高門或被汲引。悴族則遭棄遺。間有非常之賢。特排既久之弊。言若衡石。審量于器能。心乎國家。甄拔于寒賤。欲允清舉。豈容匪才。如某者。涉學淺源。得科後綴。謹廉自信。竊類于古之愚。峭直少機。弗宜于今之世。尋從銓管。補掾淮州。民獄固繁。殫脩于賤職。使臺交至。灼見于鄙心。薦者凡五人。奏可移一邑。眷茲陋壤。越在窮山。雖牒訴究懷。時有一得。而衣冠過境。歲無幾何。尙安善治之聞。以動上官之聽。豈圖采擢。輒及輟庸。靖言載惟。厥有攸自。此蓋伏遇通判國博。力澄官品。協布政條。隨器而取人。市骨而圖駿。遂收一介之技。俾出大賢之門。敢其允蹈攸箴。益堅所守。刺求吾俗之瘼。鋤剔厥民之姦。庶幾立身。以報知己。捨是而往。未知所裁。

代謝兩府啓

誤奉朝恩。越叨臺職。揆能弗稱。竊幸惟驚。伏念某擢質本微。賦才非粹。蚤緣曲藝。進躡茂科。字兩邑之遐。眈孰宣上化。補一官于赤縣。遽遭親喪。旋及外除。復塵舊物。短才未試。善狀何甄。會通漕之浩穰。議增佐職。蒙茂恩之升擢。使備乏員。夙夜協心。毫釐底績。偶登歲課。僅免官瘝。均異數以旌勞。愧無功而冒賞。就如冗秩。猶曰尸榮。矧憲府之要資。假計臺之煩使。自量愚分。兼卹人言。懇列讓封。願還新命。繼頒中旨。趣

斷固辭。欲避寵再三。懼成于微譽。而拜嘉俯伏。竊疚于爲容。此蓋伏遇某官。翼亮天下。運平帝緯。器人容有不備。則長短之才畢收。匠物謂無可損。故分寸之勤亦采。是令鴛鴦獲玷。龍光謹當黽勉。事爲激昂。志尙務或干于金穀。敢不盡心。言苟利于國家。寧忘竭慮。庶殫一介之效。少答大鈞之仁。

代王給事到任謝兩府啓

三秦重鎮。七諫要班。併忝冒于優恩。適布宜于寬詔。短能所據。厚幸何勝。伏念某素乏材猷。偶承器使。向貳大農之劇。遂參近侍之華。解朔野之守塵。調西陲之兵食。坐席未定。籠財曷遑。遽被宸緝。就分帥甲。按故郡之千里。提支郡之十城。節制此方。得便宜而從事。慰安爾衆。以綏撫而爲名。致此假人。出于造物。此蓋伏遇某官。股肱一德。體貌三朝。持衡宰柄之公。登翊王塗之正。坯冶所暨。方圓畢成。本由睿選之須才。翻以愚蹤而塞詔。敢不博求民隱。祇訓戎行。允蹈古人之爲。庶幾循吏之目。上酬乾造。次答化鈞。

代轉諫議謝二府啓

國家接統五聖。推恩百工。事順考于累朝。秩遞遷于一等。亟繇郎位。超長諫垣。曾是罔功。曷勝厚幸。伏念某時名最寡。風力不強。屢從煩使之行。旋貳大農之劇。遂叨法從。仍領計符。總西土之輸將。沆茲踰歲。瞻中都之供億。何有薄勞。會乾御之天飛。覃渙恩而雨施。一个之無他技。類獲拜嘉。七人之有諍臣。遽蒙進位。顧乏致身之術。良階造物之仁。此蓋伏遇某官。體貌宗工。股肱新政。贊德音之霈發。漸士類以畢周。致此龍光。及於屏陋。誓殫忠藎。少罄論思。用答生成。次酬鈞治。

代趙閱道待制謝中書樞密三相公啓

總計司之劇部。大懼曠官。兼法從之後塵。兩慙竊寵。伏以明君之使人以器。當適小大之宜。元宰之造物若鈞。亦存窳良之別。矧此洪河之北。是爲諸路之先。制牙環守者三十六城。實煩吏職。張口待哺者數萬餘卒。尤費軍須。與之使權。必也賢器。如某者性愚而不可及。才短而無所堪。親逢聖辰。最起孤宦。參諫垣之末議。祇知重國體而敢言。領財省之要司。不能贖邦儲于既足。方負甘泉之責。遽塵通漕之榮。靖言載惟厥有。攸自此蓋。伏遇某官丹青元化。坯冶庶工。取才不求其周。所以亦收片善。進人欲勸其後。所以特用匪功。敢不講求利源。澄序官品。罔有貳專。庶成薄勞。上酬覆幬之仁。次答瑩谿之賜。

代謝參政樞密啓

翰將使權之要。論撰儒職之榮。誤寵獲兼。短才增愧。云初視事。竊懼隳官。竊惟金穀之司。實佐邦家之費。每當朝中之所選。尤以河北而爲先。蓋邊宿重兵。境控強敵。州縣至衆。而官屬亦倍。隄防雖固。而河流靡常。軍須吏稍之所資。歲歛月支而僅給。付之外計。必也兼能。如某者山東鰥生。天下孤宦。早緣法令而自效。晚喜事功之可爲。嘗馳使者之車。按章遐服。旋總理官之局。主讞丹書。比叨邦選之謬恩。參董京司之劇務。有禁扃之老以臨長。得以備員。無甘泉之課以黜幽。偶云逃責。敢圖饋輓之寄。乃屬空疎之蹤。載惟忝塵。良有階自。此蓋伏遇某官協開國論。參亮天工。匠物謂無可捐。器人容有不備。遂令甄擢。施及寒微。敢不夙夜以思。始終乃職。庶收薄效。少答厚知。

代謝朱侍讀啓

支郡下僚。西州末吏。傾服大名之日久。願見盛德而跡疎。一被臺移。往推民訟。寓樂邦而彌月。方東詔條。拜黃堂之下風。蔑諧願望。豈謂高明之造。不遺冗外之姿。以至命記室以占言。飭公牙而說諭。喚咻備至。銘刻逾常。遠遠治封。尋還賤守。營局無狀。貢書不時。伏惟觀政多餘。毓神增裕。恭以某官。民靈先覺。王佐偉才。由妙年而登甲科。不累日而都顯位。華要之選。翺翔殆周。藩屏一方。聊寄中和之詠。丹青萬化。行摠燮理之才。

代謝張修撰啓

泮宮領教。曾徵善狀之足甄。通漕刻章。誤謂鄙才之可取。所得出于望外。其感溢于情涯。竊惟北道之雄。是稱諸路之最。上臺之公舉有限。屬部之吏員實繁。沿牒而奔走者。困于道塗。據案而區理者。疲于州縣。率有伎心之交。鶩庶乎薦口之一開。援能以勢。在義爲允。某也曲士。今之愚人。進乏世資之憑。動乖時用之適。學雖絕意于非聖。仕亦甘心于爲貧。識軒冕之儻來。自安愚分。無田園之歸去。敢冒人知。向司關市之征。蓋徇斗升之祿。旋逢上相之居守。樂得諸生而養成。猥蒙薦書。遂置學館。傳道何術。真愧人師之妄。爲素餐匪功。了無歲課之可考。敢望重言之慰藉。輒先諸吏以挈提。揣躬靡他。載德有自。此蓋伏遇某官兼收介善。力啓至公。重輕士倫。若運權衡之物。名教己任。首掄庠序之官。乃俾甌生。亦叨清舉。敢不益堅素守。增廣未聞。肯效陋儒。惟專翰墨之際。尙須異日。自致功名之間。庶幾立身。少報知己。

代謝徐職方啓

自違風範。日詠賢規。沿牒他邦。未嘗安席。奏書下執。邈爾無階。夫何恩詔之深。數有誨音之及。兼審欽炎貫序。綏履餐和。恭以某官。王國美才。郎垣碩德。素重上心之眷。游臨方面之雄。增秋賜金。行膺於寵數。飛綏鳴玉。亟踐於嚴塗。

代王義甫到任謝史館相公啓

按章北道。願慙薄效之未伸。參計外臺。誤謂短能之可使。恩忽推于望表。幸茲溢于情涯。竊以國家置使于四方。漕運難才于三路。咸云河朔之付畀。尤繫朝中之選掄。蓋制牙環守者。三十四城。吏員倍費乎刺舉。張口待哺者。數萬餘卒。兵食實煩于轉輸。而又河防歲苦于常年。民力日疲于庶役。舉是職者。豈易人乎。宜得衣冠之賢。久知金穀之要。不曰冒處。始逃深譏。如某者。受性直愚。與時迂闊。仕宦最爲孤進。器資何有他長。徒以公家之事。可爲勇于竭力。衆人之言。不恤要在。便時。憲車方懼于竊乘。漕柄遽蒙于虛授。論資旣淺。度術復疎。省其由來。何所自得。獲此假人之寵。率由造物之私。此蓋伏遇某官。道啓至公。人收片善。終始成就。再三挈提。寒若頑金。首被宰鈞之所鑄。朽如散木。更煩化匠之爲容。致茲要劇之權。次屬庸虛之品。敢不殫殫。竊拙。稍集事功。有所建明。講爾俗爾民之利病。弗專聚斂。副吾君吾相之使令。

代韓符制到任謝史館相公啓

易甚難之道。任俾總外臺。得嘗失之寵榮。復聯內閣。云初視事。已懼墮宮。於皇本朝。分置諸道。惟北土漕

權之劇。蓋軍須自昔之尤煩。由頻年水沴之餘。願民力至今而未復。加用度之百出。無利源之一遺。官得衣冠之偉能。老于金穀之要術。因才以授于職。乃安如某者。器無所容。技有俱短。蚤知忠誼之自勉。晚喜功名之可爲。大河以東。全陝之右。計符連領。因嘗歷董于輸將。治狀絕稱。曾莫少成于績效。既有所試。是云不能。矧控朔陞。最曰要部。豈宜煩使。乃屬寡才。省其山來。何所自得。復此假人之寵。良繇造物之私。此蓋伏遇史館相公。首贊萬幾。更新百度。宰論可否。朝倫慘舒。以後效之足求。靡尤人于既往。雖匪功而亦用。庶勸士于將來。遂俾拙踈。訖叨甄擢。敢不圖講長利。澄清屬封。弗專聚斂之能。兼拊凋罷之俗。罔有貳事。少酬大鈞。

代到任謝監司啓

過承優詔。獲典重藩。初見吏民。自慙師帥。茲有公庥之託。得無私幸之多。伏念某一冒榮階。久糜稍食。崎嶇官路之險。少所備嘗。黽勉公家之爲。老而逾勵。曷按章于遐服。旋佐幕于中畿。專領一司。甫彌周歲。罔裨尹治。僅脫官瘵。誤奉朝恩。俾分州寄。矧彭門之劇鎮。乃禹貢之奧區。風宜信佳。氣俗殊悍。桑稼之資。旣富。萑苻之萃。亦繁。過家之上。先莖實爲便道。守邸之驚。兩組殆是故鄉。撫柔其間。疎短爲懼。茲蓋伏遇某官。器函閎博。才貫幾深。上簡淵衷。外臨要部。澄清一道。舒慘百城。特霽使臺之嚴顏。與之假借。有容卿寺之朽質。得所據依。敢不祇服攸箴。勉圖所報。推行新法之本意。以便吾民。宣布本朝之寬條。俾知上德。下情感賴。曷究名言。

答平陽方寺丞啓

茲者謬器小材。獲官下邑。賴昔高賢之治者。及今善政之存焉。民口能言。時聞于大略。愚心矜式。第守于成規。不暇裁絨。猥先賜教。過敦禮意。增劇銘藏。恭以某官。業履蹈中。才猷彪外。進丞卿寺。方啓于脩塗。山長民封。連升于最狀。倍綏燕餼。行對褒嘉。感臆所深。名言非悉。

回知邢州史大卿啓

別離恩館。不知歲月之幾遷。奔走冗塗。阻叙寒暄而上問。比遇旌麾之北。獲趨几席之前。自損達尊。未移曩眷。數幸誨言之傾聽。洊蒙嚴馭之屈臨。去德尙新。棲庇如昨。敢謂過存謙矩。首賜教函。捧讀載周。銘藏兼劇。恭惟知府大卿。偉才經世。厚望端朝。蚤躋九寺之榮班。暫領一州之重寄。講圖大政。行渴見于老成。宣布寬條。豈少須于歲最。霜稜正厲。時祉載蕃。上爲邦家。倍綏寢食。

回郭樞密太尉啓

近者伏審某官進秩廉車。增光宥府。輒具慶函之獻。獲塵台几之觀。過沐謙尊。繼頒教答。仍以某比叨宸綬。就領帥符。緣託庇于高明。持過情而眷與。占書記室。均饌兵廚。副以餼牽。極于禮意。仰承重貺。併戢丹悰。恭以某官偉績熙朝。壯猷冠代。方鬯謀於陪幄。暫倚重於長城。大臣臨邊。咸竦威聲之著。小醜款塞。益昭勳烈之融。卽還宅于樞嚴。復坐毗于國論。

代答柳龍圖啓

言念郡卑地要。術短事繁。阻奉音函。遠頒教輻。受而伏讀。藏以爲榮。仍審順履。互寒具膺。祉福恭以某官。早紆賢業。親邁聖辰。挺忠諒之一心。由誠明之正性。厭居內閣之侍。樂駕兩轡之游。圭衮儻來。靡嬰于素志。江山有助。不廢于清吟。諒五月之政成。卽三篇之冊拜。

回呂縉叔舍人啓

伏審制函疏渥。詞掖升華。邦選旣行。朝言惟穆。建國清禁。法大紫垣。式是賢才之居。麗于政事之府。凡廷中詔命之所出。雖海外幽遐之必聞。導宣上心。粲如星斗之揭。鼓動羣聽。嚴若雷霆之馳。矧體要之特工。宜訓辭之所屬。伏惟某官。學優聖闈。名重士林。就青史一家之書。入鴻都三館之直。會先朝之善述。紀仁廟之洪休。爰藉該研。適參論次。疇咨俊德。被鳳尾之褒嘉。密邇清光。謹螭頭之注錄。給廟堂之試札。上戶牖之奏篇。獨副淵衷。曰欽大手。演綸之筆。緊潤色于宸猷。拖紫于朝。漸發揮于賢蘊。追坦明于上世。揜溫厚于西京。卽自近班。亟當大用。曾慶音之未講。辱華牘之光臨。祇風謹勤。第增銘愧。

回河陽王宣徵啓

鼎食累年。門弧始旦。禮優賜予。繆叨將相之兼榮。恩重生成。莫報君親之厚德。拜嘉甫訖。集感方深。豈圖徵省之宗工。特眷留符之繼守。台光雖遠。不忘載誕之期。慶問聿臨。更發俾康之禱。永言佩戢。曷究敷論。回元內翰啟

自忝玉麟之假守。漫歷歲時。逖仰金鑾之貴游。居勞夢想。豈圖乘潤色之豐暇。篤虛謙之雅懷。發于書音。

備有情好。矧惟厚望。簡在清衷。朝夕論思。禁職已尊于內相。左右登用。政幾行與于中階。感頌并深。名言奚悉。

回運使兵部啓

伏審某官。露章辭劇。剖竹爲藩。輟使務于冀方。殿鄉邦于江國。主知素厚。暫諧臥治之榮。士論所歸。行聽節趨之寵。眷言屬部。悵失餘光。方深去德之思。忽枉摛華之貺。清函縟禮。拜手迹以彌勤。大旆嚴行。望車塵而益遠。更祈良會。少緩遐心。

回提舉鹽稅周郎中啓

竊審顯對恩函。總提利柄。伏惟歡慰。恭以提舉郎中。器資閎敏。術履淳深。蚤效傑才。累更煩使。專在坰之牧政。頃嘗試于北方。按煮海之算緡。茲兩兼于劇路。行疇最課。進被褒章。稽布慶音。首紆榮問。仰銜謙眷。奚諭感悰。

回監務司徒啓

比者冒被宸緡。獲紆縣綬。何闇愚之無狀。遇明哲之爲僚。未列音函。首占誨筆。仰惟謙厚。第劇銘藏。恭以監務司徒。蚤練善經。久從美仕。聊屈材于利局。行增耀于勳閔。瞻奉有涯。欣翹良極。

代回澶州通判駕部啓

竊審甫被更書。已諧交政。方告成于善課。行入對于清光。未列慶函。首貽榮檢。伏惟通判駕部。郎垣厚望。

王國偉才。關掌教條。入爲一府之賴。甄旌治狀。卽拜本朝之恩。感頌并深。文陳非悉。

代回王密學啓

向幸漕臺。適居治府。相從之日。殊淺。過愛之情。特深。方喜附于末光。會趣祇于明詔。就除帥寄。實踵賢規。舊必告新。賴片言爲矩矱。小而任大。得壹意以持循。比緣懿戚之行。聊獲短書之奉。第論私悃。莫具公函。計未徹于聽觀。忽遠蒙于誨諭。溫言累幅之爲。厚誼謙懷之莫量。茲獲珍藏。奚深戢感。伏惟某官。文章經世。術業光朝。行高古人。名動真主。入陪朱邸。已龍德之天飛。進直鴻樞。漸鵬圖于海運。行布朝廷之新政。坐躋鈞軸之近司。豈惟輿言。抑有故事。

回臨淮齊寺丞啓

比者竊冒恩章。繆當獄寄。方急道途之勤頓。遽司鞭扑之冗紛。未暇馳音。猥先流諭。愧惶感象。并集卑悰。

回范仇香祕校啓

嚮客上京。獲親聲采。茲官下邑。曠奉音題。豈謂雅眷未移。珍函首及。仰佩謙厚。第勤銘藏。溽暑正繁。清規尙逸。勉祈精毓。前對華章。

回侯著作啓

適官下邑。獲庇末暉。方道路之息肩。卽簿書之關慮。公函講好。第免後時。官守相望。未由前謁。豈圖高誼。嗣枉珍題。仰服謙勤。倍深藏戢。炎歊向盛。晤語正遙。覬保燕興。行服光寵。

代答亳州朱侍讀啓

自塵劇使。會靡定居。間走浙壖。亟來淮服。董漕臺之將給。精爽幾殫。企鈴閣之遽嚴。晤言都隔。豈謂乘偃。藩之多暇。飭記室以占音。祗服眷存。第勤銘刻。恭以某官。名重天下。道簡上心。屏翰一邦。聊寄中和之治。挺鎔萬品。行撼康濟之才。益保與居。庶符瞻頌。

答度主簿啓

某寡能近器。承乏劇封。願使檄之已行。不敢輒讓。恃賢僚之餘裕。可容匪才。豈謂祕書。先被郡符。暫煩獄寄。方遠始望。遑辱好音。感慰并懷。名言匪諭。

代答亳州朱侍讀啓

伏審茂對恩書。出觀藩政。側聞新命。竊忭寸襟。恭以某官。名世標才。際天蘊識。早逢文雅之會。優踐秀廉之科。華要滄揚。聲光愈綽。以至密陪衡石之覽。自結續旒之知。然翔步嚴途。曷殫行事之效。而班條治屏。少見澤民之爲。而況先一州乃大用之階。爲三公由此途而出。靡容秩滿。行被詔還。某黽勉外臺。阻遙尊府。未遑馳慶。先辱流音。媿喜交懷。名言非諭。

代都官答親家啓

自塵仕綴。卽奉朝游。宦路孤飛。漫踰于歲月。朋簪一判。凌闊于晤言。遽乘幸會之緣。得預姻連之末。豈圖愚息。獲事高閭。內省倅宗。曷勝厚幸。此蓋過敦摛抑。弗簡單微。吏牒相紛。曠馳于謝牘。使郵趣戒。亟捧于

榮函。屬冬序之正嚴。搗風猷而尙逸。倍祈珍玉。以迓寵章。感誦并深。文陳非悉。

代答許發運啓

自阻嚴麾。倏經累月。一有司之賤。動懼瀆尊。大漕使之前。罔敢奏記。豈謂高明之造。不遺么冗之姿。特賜瑤函。親承教筆。拜而伏讀。藏以爲榮。兼承溽暑貫辰。粹襟蹈吉。恭以某官業術精奧。方格淳脩。性與道俱。器隨用適。弗由左右之援。自結聖神之知。綢繆利權。于茲數稔。參貳鈞柄。決在匪朝。願綏寢饋之和。庸副幅員之望。

又

近因還使。嘗奉卑函。荷教誨之游臨。悚焉下拜。願使令之非稱。第以中藏。仰惟領計之間。增固毓神之勝。恭以某官際天蘊識。名世標才。上知素明。賢業彌劭。羨中都之經用。未罄猷爲。躋億姓于厚生。庶緊陶冶。

代賈內翰答蔡州錢龍圖啟

審即便時。已開尊府。蓋賢者以出處一致。因請宣風。天子恐侍從久勞。遂容均佚。寵之七諫之優秩。付以中京之輔邦。未列慶函。首紆榮牘。矧本朝之雋老。實延閣之真儒。力通聖言。俛華禁近。蚤勸經帷之講。日瞻法座之光。厭事朝游。樂觀藩政。然而公卿要明大誼。自昔推崇。左右思得正人。匪朝升用。伏望爲國自厚。副時所領。

代王給事回陳待制啓

伏審茂對制恩榮躋法從。側聞異數竊忭丹衷。於皇聖辰。若考古道。繩累朝之遐武。敵二閣以右文。倬彼天潢之昭回。揭爲寶宇之目。坦然帝制之明白。祕厥宸篇之辭。並延儒臣。增重禁職。居則備法座之清問。出則扈德車之順游。惟待傑材。乃稱華選。伏惟某官。氣涵渾厚。道際醇深。蚤踐積星之垣。久提太史之筆。綴應劉之賓客。方司朱邸之裁牋。聽禹啓之謳歌。遡際洪圖之纘服。首擢東藩之舊。進升近侍之聯。矧日月之親逢。有風雲之盛會。弼謨新政。惟故事之甚明。舒鬯元猷。抑輿情之所跂。未修慶問。先貺珍函。過枉巽辭。益銘謙矩。永言感懌。奚盡鋪論。

祠部集卷二十四

啟

賀韓魏公生日啟

天地新秋。山河間氣。挺生上相。允屬初辰。恭惟判府司徒侍中。一代宗工。三朝元老。大忠自任。直道不回。經世措時。動以作民之膏澤。積功累業。霈然享國之寵榮。瑣避崇高。懇圖偃息。油幢仍歲。去爲素里之光。英袞何時。歸慰蒼生之望。遙臨誕日。鈞祝遐年。某待次京師。馳情門館。捧壽杯而莫及。臨慶幅以徒虔。

賀中丞啟

審膺邦選。入總臺綱。風憲有歸。朝言允協。矧爲正德。夙秉睿心。偉業之致青雲。徧揚要路。精忠之貫白日。行啓危言。繇霜簡之抨彈。參國鈞之宰制。適聞成命。竊忭丹衷。

賀梁參政啟

發詔神庭。登賢鈞席。珽銘所及。歎忭惟均。恭以某官。勳濟王塗。器包民極。勲參憲府。進貳樞廷。感會帝宸。綢繆公路。亞上台之劇序。密贊邦權。隱真相之偉才。弗居廟略。稷卨惟已。羲軒吾君。佇正宰衡之崇。永堅尹石之望。某職貳藩服。跡遙廟堂。有地生成。無階慶蹈。

又

帝詔登賢。宰廷亞序。挺陶所暨。歡躍惟鈞。恭惟某官。才貫幾深。器函剛實。旦暮聖辰之會。期翔朝弁之華。青瑣之門。蚤光於寵拜。鴻樞之府。參掌于繁機。驟改恩書。往陪鈞席。圖講治安之策。今也其時。樹立太平之基。決于匪日。益紓賢業。亟正台躔。某總計外臺。瞻風上笏。側聞新命。竊忭私悰。

賀正上北京韓侍中啓

天地之交曰泰。卦氣云臨。春秋之一爲元。歲功斯起。恭惟判府司徒侍中。際天傑識。許國純忠。擺落元勳。而弗居。徘徊舊鎮。以自適。一道之蒙和氣。亦既有年。三階之復台躔。諒當匪日。適丁開祚。誕擁龐臚。某方佐財閫。正遙恩館。第劇壽康之祝。阻伸啓謁之虔。

賀郭樞密改留後啓

顯奉宸恩。峻遷台序。凡叨暉庇。鈞集欣愉。恭惟某官。偉略沉雄。傑才英邁。襲汾陽之祖烈。傳地上之兵符。旋入贊於神樞。亟出臨於帥路。疆事所制。輟帷幄之運籌。國威以宣。寬朝廷之憂顧。增重廉車之秩。繼收盟府之勳。行被詔音。還圖廟略。

賀潭州任待制啓

比塵恩數。出總利權。鎮鞅籌書。缺馳緘訊。伏惟坐班寬詔。翁萃龐臚。恭以某官。莊重自居。直清不倚。蚤聳端朝之望。遄升延閣之華。武職財閫。有關經畫。抗章法座。多所建明。乃眷長沙。實惟巨鎮。暫繫耆德。往拊遐氓。諒五月之政成。卽三篇之冊拜。伏望倍綏燕餽。少副瞻祈。

賀東陽侯祕丞啟

就拜上恩。進丞中祕。伏惟慶慰。恭以某官。氣鍾開傑。道具大醇。聊試治封之繁。頻登功狀之最。升名閨籍。茲揚踐於華塗。易地坤維。行漸蘇爲遠俗。永言欣企。曷究指名。

賀致政少傅啟

中詔推恩。上臺得謝。參青宮六傅之貴。保安車賜几之榮。休風穆然。輿情仰止。恭惟某官。全德邁種。英猷濟時。上林以師保而允懷。王室緊股肱而是賴。雖大雅作誦。考成重于典型。而高賢所存。功名付之天道。由是辭台鼎之機任。卽侯服而偃藩。體貌之隆。固弗遺于黃髮。止足之計。乃獨得于素心。遺塵垢于儻來。卽逍遙于物外。揮金之樂。不減于疏公。掛車之榮。足踰于廣德。竹帛所載。今昔同符。跂聞英聲。側深景行。寓跡高門之地。阻親長者之謀。仰瞻之誠。一二奚旣。

賀文相公出鎮許州啟

茂對詔音。出觀藩政。抗使旌而就道。露公冕以宣風。仍審肅練便時。已開尊府。恭惟某官。器包民極。勳濟王塗。感會嚴宸。綢繆英袞。宅元台之劇序。密暢邦猷。紆真相之偉才。究宣廟略。已見經綸之效。弗居燮理之功。懇形讓封。求避榮路。卽膺俞詔。均逸陪京。躋端揆之絕班。如真封而衍食。巖巖尹石。未移率土之瞻。兩兩台星。佇復中階之首。

代賀亳州皇甫大諫啟

祇奉詔音。肅觀藩政。伏惟慶慰。恭以某官。道先民覺。才爲世生。出入三朝。體貌一德。偉謀大政。率諮訪于元龜。茂業豐功。因享延于優祿。寢列諫垣之重。洊更守紱之榮。惟景毫之名。封實右淮之巨鎮。暫勞君重。班宣寬詔之明。行副帝咨。陟降嚴塗之邃。調元台鼎。均福民區。俛惟冗官。適貳支郡。庇台光而有所就。賀列以無階。

代賀龐昭文啓

廊廟須才。朝廷符德。誕頒明制。登踐元台。徽冊傳聞。薦紳抃躍。恭以某官。夙鍾開氣。親對休辰。文章致身。忠誼結主。宣邊陲之遠路。早底豐功。陪權幄之偉謀。旋承顯命。陟降王塗之祕。綢繆台路之嚴。參正論于中階。密裨政闕。歸成能于上袞。弗有賢謀。帝意愈傾。物議加重。果膺寵命。升總大鈞。行將專講政經。深謨王體。三光澄煥。百度清明。措國至隆。比元和貞觀之治。躋民有謚。若大庭赫胥之年。示函夏之具瞻。臻宗臣之極致。某適靡守紱。逃遠台符。有地挺鎔。無階慶蹈。

又

祇膺冊命。升總鼎司。體貌益隆。幅員均慶。恭以某官。清廟偉器。上天元精。早會遇于帝宸。參弼謨于鈞席。密裨宰論。退隱賢謀。第觀幾務之成。弗耀經綸之跡。物論如重。主知愈明。果被恩緡。首躋袞路。圖謀治安之策。今也其時。樹立太平之基。決於匪日。追臯夔之極致。永民庶之具瞻。某職守候邦。迹遙台座。側聞成命。竊忭私悚。

代賀董度支啓

申宸降命。外計委才。行美蔭之焉依。增懦衷之竊忤。恭以某官。氣陶至粹。識蹈大方。以器業之深。取重時論。有公忠之實。自結主知。參財府之劇謀。陟星垣之要秩。董淮州之轉給。素號才難。議漕節之登延。果膺帝簡。行將擡發智略。講求事經。金穀羨饒。力贍大農之用。兵民給足。佇蒙細札之褒。俟拜崇麾。併紓丹悃。

代施大諫賀龐相公啓

就膺徽冊。升總大鈞。體貌並隆。幅員胥慶。恭惟某官。器包民極。勳濟王塗。秉忠諒之一心。出誠明之正性。勲綏邊閩。進貳樞廷。感會帝宸。綢繆公路。亞元台之劇序。密贊邦猷。隱真相之偉才。弗居廟路。物論加重。主知愈明。果被明綸。亟登下袞。稷高惟已。講圖萬化之原。羲軒吾君。拱揖九筵之上。躋太平之極致。永普率之具瞻。某職總漕臺跡。遙政府。無階慶蹈。有地埏鎔。

代賀唐中丞啓

茂對制函。榮躋憲府。四方相慶。萬口一辭。恭以某官。王佐偉才。天民先覺。毅然立朝之正色。外嚴秋霜。直哉致主之精忠。上貫白日。向衣康濟之蘊。出總輸將之權。旋倚重于邊藩。曾甫安于坐席。亟承宸綬。入領臺綱。彈疏未陳。已被姦回之膽。諫言卽發。當開睿哲之心。至治之風。復覩茲日。俛惟愚品。嘗庇台光。抃躍兼深。敷論奚悉。

代賀田諫議啓

疏渥宸緝。升華諫闕。側聆新命。竊忭丹悰。恭以某官。莊重自居。直清不倚。以函一之德。會泰寧之辰。游歷事權。率凝績效。遽由內閣之祕。驟置七人之聯。青蒲伏規。佇裨當世之闕。紫芝頌檢。徑宅元台之榮。曾是冗微。最叨知獎。矧聆進擢。倍切忻懽。

代賀知郡屯田啓

善諏剛辰。榮開尊府。矧叨暉庇。實倍欣愉。恭以某官。才貫幾深。器函剛實。親逢文雅之會。優踐秀廉之科。千里班條。適據于素蘊。一封祇詔。行對于寵褒。

代賀運使祠部啓

光奉明緝。就移要部。側聞成命。竊忭塵襟。恭以某官。識貫幾深。器函剛實。親逢文雅之會。游擢賢良之科。緩書殿之貴游。領漕臺之重寄。然金穀大計。誠曰藉才之司。而朝廷急賢。決非久次之地。俛惟孱品。將託巨麻。企引兼常。名言非諭。

代賀運使向郎中啓

祇承恩詔。榮改使麾。幸巨庇之焉依。增寸襟之竊忭。恭以某官。又鍾間氣。親邁熙辰。秉忠諒之一心。出誠明之正性。登車攬轡。行澄紘于官聯。輓粟飛芻。佇羨盈于邦計。亟膺宸檢之褒擢。追復相門之光華。企頌交深。指云非悉。

代賀運使吳舍人啓

顯承恩詔。就領漕臺。大庇焉依。寸襟竊忭。恭以某官。德宏業鉅。行潔道醇。學際天人之交。文經邦國之體。珍策重計。施諸當世。而可行。要職美官。不由累日。而自致。陟降王塗之祕。翔翔諫署之嚴。買臣懷章。方建守麾之樂。孟博攬轡。遽持使節之雄。諒坐席之未溫。卽追鋒而趣召。發揮國論。潤色宸猷。俛惟屏冗之蹤。訖訖甄題之賜。阻從慶列。第劇懽驚。

代賀新運使祠部啓

改命中宸。提衡外計。將緊暉庇。倍切欣翹。恭以某官。名世標才。際天蘊識。親逢大雅之會。繼擢秀廉之科。心計素明。聊寄漕臺之任。詔音行及。亟從書殿之游。伏望上爲邦家。精調寢饋。

代賀運使度支啓

邦計須才。朝僉議可。榮膺宸檢。就改使麾。伏惟慶慰。恭以某官。識蹈大方。氣鍾至粹。親逢眞主之運。早踐列星之垣。上知素明。自結益固。屯夷殊致。忠誼惟鈞。班寬詔于兩藩。未嘗煖席。按祥刑于列郡。方爾下車。遽奉明縉。往臨要郡。然漕臺分寄。誠曰藉能之司。而宸辰念賢。諒非久次之地。某適緣幸會。方託恩暉。旋聞拜嘉。陰懼奪庇。喜戀交集。名言匪終。

代賀運使司封啓

進被恩縉。出持漕節。行棲大庇。竊忭丹悰。恭以運使司封。經世偉才。薦紳華望。按章侯服。素號平反。贊治王畿。多所建白。風績彌劭。上知愈明。果膺尺一之書。專傾東南之計。登車卽望。屬部瞻威。董山海之輸將。

方緊碩畫。瞻京師之供億。佇奏豐功。升踐嚴塗。驟光大任。某宿官無狀。守邑云初。幸使旆之焉依。罄愚襟而非諭。

代賀權揚州運使刑部啟

無堪之質。棲庇有年。備蒙矜憐。獲保孤冗。念簡書之營慮。會靡寧居。顧牋牒之間安。坐成曠禮。尙緊寬置。弗爾擯遺。恭以某官。識局淵宏。才謀膚敏。暫屈使臺之重。往臨督府之雄。董金穀之輸將。矧煩經畫。布詔條之寬厚。聊藉撫柔。

代賀江東運使張學士啟

就奉宸緒。仍躋仙局。迭聞成命。竊怵丹悰。裁賀牘以尙稽。媿珍函以首及。恭惟外臺繁使。頻成第課之優。東觀昔游。遠復載言之選。蓋上心之圖舊。推恩數以旌賢。領漕節之澄清。諒非久次。踐王塗之嚴密。行服徽章。

代賀正上安撫舍人啟

偉略熙朝。純誠結主。早逢亨會。游歷榮班。行休乘傳之勞。入被登壇之拜。甫臨首祚。誕擁龐臚。某茲亞守。麾正遙使。旆祝南山而爲壽。適阻前趨。貢兼幅以敍誠。奚殫下悃。

代盧郎中賀冬啟

盛儀亞歲。寶典履長。魯史載夫望書。義易記其來復。恭惟某官。夙鍾間氣。親邁熙朝。茲導迎于令辰。期集

受于繁祉。某適司候服。負遠賓除。瞻頌攸深。文陳匪悉。

代曾魯公回賀許舍人啓

顯對制函。榮躋詞掖。允華邦選。鈞穆朝言。伏惟某官。出以瑞時。居然名世。智周事物之變。識際天人之心。精學雅文。蚤冠士科之高選。傑才厚望。旋追儒館之盛游。一登載筆之聯。久直代言之地。淵衷駁實。寵命卽眞。詰令坦明。行見同風于三代。謀猷堅正。續當宏化以貳公。適屬退居。喜聞進拜。敢圖悖篤。弗簡衰逢。首煩嚴馭之臨。深沐長牋之貺。永銜謙眷。奚諭感悰。







3
4

1896

祠
部
集
五





叢書集成

初編

主編者
王雲五

商務印書館發行



集 部 祠
(五)



撰 至 強

祠部集卷二十五

書

上姚都官書

某愚無所似得綴一官以吏左右不逢叱怒于願已足敢望引以爲可舉哉恭以執事之賢人人願出于門下雖甚愚極陋亦知得舉之爲榮非才卓業鉅烏能捨衆人而獨取哉今執事之取某不惟人人疑之某亦私自疑噫豈執事知某之誤耶將哀其窮賤而欲推之大亨之塗耶不然安能捨衆人而獨取也苟執事誤以爲可舉則某當履其真可舉之術庶無玷知人之名或哀其窮賤而然亦黽勉自立以副執事推近之意若是糜軀論報亦不敢在衆人之後辭意鄙直仰冒威重下情無任惶懼之至

上發運大諫書

竊以士之貴于三代也可謂盡矣進則頒厚祿以寵其行退則翹車聘幣以勸其進士生此時宜無求矣然猶有自進者故箕子之書曰予攸好德皇則錫之福噫德如三代之士猶有自進而後知者矧今之士哉奇材偉行可貴而寵之者無幾間有焉或沈鬱卑辱不爲上之知可默而俟舉耶唐之儒韓愈氏卓矣然猶三上時相書惴惴焉以不出其門下爲懼况衆人哉某愚甚于他不通曉獨知士之所以爲士者以有守而或脫則轉而之小人之域不待旋踵故雖賤貧困躓未嘗脫所守綴下科與士齒者六年矣隸執



事麾下且二年。願其術無可以貴而寵之者。而辭未始一進。書未始一上。反默而受執事之知。抑難矣。恭惟執事。學際聖賢。道充當世。由文章取上第。立朝廷爲名臣。天下之所共聞也。執事之門。孰不願出哉。某今爲屬吏。獨不能圖進。是待己欲高于韓氏。進身不本于箕子。他日天子以政之柄授執事。其願出于門下者益衆。而某之跡益疎。雖辭日進而書百上無及矣。是敢執自進之說。求出于門下。伏望寬其誅斥。一賜采擇。使士不獨見貴于三代。自執事始。冒犯台嚴。跼地待罪。不宣。某恐懼百拜。

代人上張刑部書

前日獲見。伏蒙執事略僚屬之禮。顧問甚密。退自度曰。豈執事與某同產子。嘗聯職而然耶。不然。何待之渥也。若是執事固記之矣。奚假援以爲說哉。抑有欲聞者。徒以仕宦三紀。謹廉自守。雖前後薦者二十餘。力懍心怠。墜不能奮。中夜浩嘆。甘爲廢人。歸無田園。未決引退。竊嘗謂上之人求人爲用。愈于在下者之求爲人用也。何則。部使者持外臺之柄。不獨以按舉爲己任。抑將擇能者以分職治一官。否則一職弛。宜得強敏精幹之爲用。若某之病弗堪。烏足當執事之用哉。方其往來督舟運宜。其懍也。今乃獲免。將受代而去。家貧族重。患弗能任。伏望執事就舉。慮壽暨舒。一監兵以處某。使得從容養疾。而又食口百指。獲圭田以自贖。則生成之賜。盡出門下矣。干浼威重。伏地待罪。不宣。某惶恐百拜。

上京西運使田刑部書

自使車北轅。凡五六月。而一書之奉不徹。將命。豈特爲簡情哉。蓋大人者。不責人以苛禮。雖一書不通。未

爾得罪。某不佞。兩得備屬吏。頃官河朔。不幸以喪去。因不得玷清舉之末。及執事領淮漕。某復佐泗幕。覲執事收麾下之舊。雖愚不遺矣。而天奪之幸。適會移部。噫。豈某之望絕耶。曰。不然。天其或者俾某困梗滯。滯官久益練。抑待執事之知深。然後挈而躋大亨之塗。不爲艱矣。若是未能絕意于甄錄也。伏望爲國自壽。以副區區。不宣。某惶恐百拜。

上運判馬太傅書

正月日具位某。謹百拜獻書運判太傅明公執事。某常病今之學者。始攘取六經之文。以爲辭章。幸一中第。則志滿意得。曰。吾方從政。安暇學爲浮剽不根。遂爲淺人。噫。君子之于學。豈獵其名而止哉。蓋曰終身而已矣。某不佞於他無足道。唯是嚮學之心。異前之云者。雖奔走賤辱。未嘗輒忘學也。竊嘗謂學患不通。經經苟通。則性誠明而文深醇。不經之文。猶葩華爛漫。見者悅之。終無益於實也。雖間常爲小文。視今之得名者。或輒犯其鋒。然于聖人之道。則浩不知所濟。思得大人先生傳授聖言之微。使術明而性通。然後發爲文章。行爲事業。以成某之志者。有日矣。恭惟執事學際聖賢。名重當世。六經之道。自己誠明而深醇。然豈獨裕諸己哉。必將推其餘。以及學者。則某平日之志願成于門下。或曰。下吏之于上官。非公事起居。不得輒至其前。乃欲受教。僭矣。某曰。不然。爵位有尊賤。傳道無尊賤之隔。設孔子爲司寇。須三千之徒。均爲司寇。然後乃傳道。聖人之意。不亦狹哉。則誨人不倦。不爲孔子言也。若乃論窮訴滯。懇懇有乞憐之辭。此衆之所以望衆人。非某之所以望執事也。干冒威重。進退俟命。不宣。某惶恐百拜。

上運使李刑部書

某竊以疎賤之士或嘗得王公大人一言之賜。他日獲進猶藉以爲說者。何耶。蓋貴豪之門。人所歸也。歸者日衆。則疎賤之跡。有時而遺。其意逸不得通矣。必道其嘗所得之言。以信左右。彼大人者。必曰。是吾嘗所言者。然後賤士之意。通而其迹不遺矣。頃執事領漕。某時以衰裳見門下。執事不以越禮而加罪。與之進而賜之坐。使極其所欲言而去。及執事倅計府。某方調官得泗掾。復進謁于門下。執事教之曰。泗車舟之所會。上官之耳目甚近。當潔汝行。幹汝局事。人將汝知矣。某再拜而謝曰。公之言聖賢不過是。敢不拳拳孜孜以戒。夫失墜。今執事按茲部。某適得備屬吏。則向之言不獨使銘之於心。奉行于己。異日知某者。不在他人。而在執事爾。某固疎賤。不敢他云。以瀆尊者。止道嘗所得之言。取信執事。干冒威重。伏地俟譴。不宣。某惶恐百拜。

上發運主客書

發運主客執事。伏自使車南轅。卽欲一拜書。以諮起居之安。而且布其區區焉。朝以奔命。夕以訊獄。輒因循而至今。甚畏服執事之名。爲日滋久。重以大漕使之尊。越任麾下。目未嘗觀盛德之光。耳未嘗剽訓言之餘。一旦獲見。遽以吏事白左右。其禮有所限隔也。其情固未相接也。使明且辨。猶將踏焉而不能通。況某之愚且訥。旣畏執事之威。又迫尊卑之勢哉。宜乎跼促而無所建明也。夫聲之巨。莫若雷霆。無顛踏越墜而駭之者。以常聞也。光之巨。莫若日月。無蒼皇掩目而畏之者。以常見也。設不常聞其聲而聞焉。不常

見其光而見焉。將疾走折足之不暇。豈止畏且駭哉。某前日之見執事。何異初聞雷霆而乍視日月。偶不疾走爾。尙安吏事之建明哉。噫。江淮僅百郡。郡約十吏。若然。則奔走于使部者殆千計。其間以文著。以法稱。以幹聞。辱知于執事者。凡幾人。知而深器之者。復幾人。某以不佞無似之迹。泯然于千百人中。覬執事之知。抑難矣。雖然。常內訟而自咎曰。某文如是。某法如是。胡不強其所不能而求及其所能哉。故夙夜孜孜。庶幾有立而後已。噫。聖人捨夫畫者而取夫將進者。執事之心。不過若此。其知之器之。非所敢望。倘憫其進而憐之。不勝大幸。干瀆鎔造。無任戰汗之至。不宣。某惶恐百拜。

上運使李刑部書

某聞有困于路隅者。垂朝夕之命。反低遲其聲。而欲人之哀之。雖過者千百。莫知其求救也。幸一有知。將轉溝壑矣。寧若大聲疾呼。及救之速哉。某自得第歸。已喪母。制除調官。待踰歲。位卑祿微。族弗能贍。不爲不困矣。竊嘗思祿足周數口。位足以見行事之效者。惟邑爲可。然國家慎重此選。須舉乃用。某勉強所不能。而陰覬舉者有日矣。懼左右或未信。故默而不敢遽言。其亦低遲而欲哀者歟。昨日親舉邑新格。外臺慰薦。歲定常數。今而後求出于門下者。日益衆。求者既衆。執事必拔其尤異者。而遺其常品者。某以不似之迹。若又後衆人而進。縱執事錄門下之舊。不以不才而遺之。一旦某不隸麾下。則執事徒有振拔之心。某徒切覬望。而事且無及矣。今日疾呼而告者此也。倘哀而救之。俾預清舉之末。則困躓之迹。免爲路隅之比矣。干冒威重。不任戰汗之至。

上提刑主客書

某聞詢樂工之能否。宜就太常。問吏狀之殿最。宜就考功。何則。所統專者。其知詳。設太常曰。某吏之狀最。未必果才也。考功曰。某工之藝下。未必不能也。何則。非其所統者。其知必略。是故須考功升黜。然後知吏狀。太常進退。然後辨樂工。今天子登賢材。而試諸用。命執事領外憲。然則執事所統何等。爲最專。不在刑獄乎。某獄官也。將有問才否于執事者。倘執事謂某才。雖千百人交毀。不爲損。謂不才。雖千百人交譽。不爲益。何則。毀譽者。雖衆。不若執事所統專。而其言取信之必也。然則獄官之職。何爲哉。曰。囹圄謹。訊劾審而已矣。能高下其議。而卒與法會者。獄官之才也。若是某之才。豈足當執事之稱耶。曰。不然。執事之責某者。職於才。何預焉。恭惟執事雄剛卓越。當代罕儷。異日取家世舊物。相人主圖教化。某將與天下之吏程功狀于政府。豈特區區今日論獄官才否乎。干浼威重。伏地待罪。不宣。某惶恐百拜。

答李裁造屯田書

阻侍師席。歲行一周。而一書之通。復不得繼。竊念孤生之迹。出自門下。雖日奉書。猶不足報恩獎之萬一。矧一書之不能繼哉。自顧怠惰。分從棄絕。而大賢之心。乃惓惓于賤子。夫行事之效者。其小惟百里之邑。然朝廷慎重此選。須舉乃用。若是某不能無望于執事也。恭惟執事文章事業。當代鮮儷。總外臺之計。歲行十周。輦運有經矣。財用有羨矣。事之敝蠹者。盡更張而剗去矣。執事之于利權。可謂成功矣。某不以今日求一邑之舉於執事。執事不置某于清舉之末。一旦國家以教化之柄授執事。則天下之士皆願挺鎔

矣。執事必將取其尤異者以備器使。某于彼時復何望哉。幸執事憫其困濡。一賜振拔。使某增寸祿以活微族。得民社以據素志。則生成之造不在他門矣。若才與器某烏足云。而齷齪謹廉。自信固明甚。豈復累大賢之門哉。干冒威重。俯伏待罪。不宣。某恐懼百拜。

上提刑太保書

某竊見今世之士。有一言自進于王公大人之前。必獲自銜之咎。而士亦以此自咎。某獨謂不然。其或憑藉貴高之地。附託左右之援。豈復自媒哉。挺然而進者。其必賤貧滯鬱。有志欲伸之士也。夫弟子之于師門。跡相與處也。言相與接也。術業之高下。志慮之遠邇。可較而知也。仲尼猶患不知。而曰。盍各言爾志。矧下士之見上官哉。羣而趨。默而出。位貌之隔。如天地之相邈。不言誰知其志哉。噫。士之志有二。公焉則建勳名。興利澤。爲天下萬世之休。私焉則享厚祿。活親族。爲一身之計。今賤爲九品。而曰某欲建勳名。興利澤。人必謂之狂癡僭妄。不諛而唾幸矣。安敢言公志哉。若一身之私志。豈得默默耶。於戲。銓選之吏。祿粟不足蓄數口。代者一至。則不復可得。不淪而蹈窮餓之壑者。幾希。逮一沾京秩。則祿給弗暫絕。可以活親族矣。然則由銓選而之京秩。無他也。惟薦舉而已。恭惟本朝重使臺之寄。付升黜之柄。自非貪墨弛曠。類可以伸所志。某吏執事。鷹下行二年矣。懷私志而覬公舉者。抑有日矣。今將代去。是敢冒自媒之咎。挺然自進其說。伏望執事哀憐而采收。使某一與慰薦之末。免擠窮餓之壑。滯鬱之志。獲伸于門下。則執事之進人。仲尼之用心也。意迫辭切。干犯威重。無任戰汗待罪之至。某百拜。

謝提刑盛學士書

某嚮典泗獄。得吏麾下。纔數月。獲見于左右。不踰再。雖策駑砥鈍。斬有以爲執事知。且冗微之跡疎。而奔走之日不甚久。勢不可得已。及官滿如京師。或有持執事薦士之目示某者。則某之名在焉。始疑中信。終而惕然。感以媿。何則。淮南之郡。隸使部者二十有四。其銓選之吏仕焉者。豈下數百人。彼才了一局。而用彙數器者。又豈少哉。若然。執事之門。望清舉者常數百。而執事歲舉不過二十人。必將錄其才稱而拔其尤異者。某獨泯于其間。安望捨衆人而舉某哉。設執事知獎之。猶待日月之久。何見取之遽哉。或者之傳似可疑也。徐而思之。執事以高文遠業。傑然爲三公後。是必收寒素。開至公。以增大無窮之體。某雖不佞。亦士之甚寒而求進之未已者。寧知不爲執事先隗之取乎。故疑去而感來。噫。古之報知己者。豈糜軀碎首而止耶。抑將忠君澤民。圖建勳利。爲受知之效。某之區區。竊所慕焉。若乃謹廉自持。特衆人之常守爾。不足爲執事道。戴負厚恩。重踰山岳。無任激切荷德之至。不宣。某再拜。

代人上李兵部書

知府兵部執事。某委質下吏。越在外邑。惟公事起居。乃得一至鈴下。才空跡疎。宜左右之所棄。忽賴執事聰明廓然。坐照千里。察嫌按姦。不以遠邇易視聽。故吏雖疎外。常若奔走于其間。以是某之區區。或爲執事之亮拔。始以萑苻微聚。輒寇邑境。雖上憑府威。悉力殄獲。而朝廷大制。考信州郡。須保委明甚。方議賞格。伏蒙執事錄下吏之纖效。斷然鑑其情僞。剡奏列上。謂同真狀。其苟粗拜一命。寸進一級。則天地之惠。

出朝廷而卵翼之。賜由執事也。自被奏以來。益勵操守。蹈冰臨谷。未踰其慎。庶幾副執事之獎爾。近有執技宵人。非意往愬。謂某雖市木當價而不時償直。雖考之著令。未越旬浹。而孤危之蹤不能無憂懼也。何則。一邑之民。或受枉于吏。自非刑虐誅掠。殆不可忍。其他自直于府君者。可無一二。今市文木而爲其所愬。當爾之時。夷齊可疑爲汙士。卓魯可疑爲暴吏。曷以自明哉。故終日惶惑。不知罪戾之所從。復蒙執事精明是非。外判終始。信察諒其無他。并容曲全。置而弗問。若是隸治下者。已三歲。知己之遇。未一報。而蒙庇于執事者。已至于再。雖被寬釋。愈于重責之爲媿。倘執事垂憫儒介。力畢大惠。不以一眚加擯斥。則翳桑結草。寧知不爲門下報耶。

上提刑司封書

某嘗病今銓選之吏。拙于爲治而巧于知己者。人十八九。平居不事事。一旦榮進之。欲激于內。不惟口之于言。而又筆之于書。冒上官之聽。曰某材且職。人不某知。使有志之士。恥混斯人之徒。不敢一言。卜知遇。矧敢以書哉。某隸執事麾下數月矣。言未嘗一發。而書未嘗一進者。正爲是爾。然事有不可以嘿者。因敢輒布左右。某初命泗獄掾使。臺外諸侯。不以某不材。舉以堪一邑。奏可。移浦江。而浦江地僻陋。前後爲令者。或以膏潤自利。一切務市恩。噤口不敢議威刑。民視官府如私家吏。易令如僚友。某始至。呼吏問某事。閱某簿。則癡視瞠對。如市人然。私自謂其弊不其矯。無以頓革。師民者宜身先。以故渴不妄飲。浦江水。俸民慢吏。弗率者以刑。頽波壞紀。力澄而躬緝。然後浦江之人。知令所以在治民。而民所以在奉令。未幾會

東陽缺宰州郡。誤以某爲可使。因俾承乏。而東陽地完戶殷。民狡喜訟。每更一新令。則必搆虛懷牒。盆入于庭下。以探令之能否。彼計苟行。則將接迹而來矣。某鈎得姦狀。數扶其不直者。此弊幾少息。然猶有以辭來決枉直者。日不下百數。朝與之辨。至昃僅能無留事。假攝方期月。遽遇執事臨按茲邑。其間管庫簿領。朞月以內者。固已躬治。自餘素弊。實未遑究。若乃民有叩行。麾自訴者。吏有守庫。緝不謹者。斷罪之失。輕兵器之不籍。罰金之差。厥數田訟之積。有日然。雖伏蒙執事明哲內照。仁恕外及。以其前之數事。率關舊令。朞月而變。聖賢猶難。優容橫貸。弗忍罵斥。其寧獨不媿于心哉。尙覬借階前容足之地。一吐其愚。又值執事兼程取道。前旌不留。益懼且歎。日竭駑力。供賤事。孜孜不敢少弛者。俯恐負于斯民。仰圖知于上臺爾。倘上臺遂以不職齒之。則愚事去矣。而又使車之按。婺歲或一往。浦江在婺爲窮僻。雖綿歲不一歷。今假他邑。幸而遇使車之臨。不得少進其說。某之區區。將訖不伸矣。恭惟執事文章器業。傑世不羣。天子以美祿養賢材。而朝廷推賢材者。歸執事。始先公以直諒稱當時。今搢紳議直諒者。歸執事。如執事可謂在朝爲名臣。在家爲名子矣。有志之士。孰不願出執事之門哉。某雖無似。竊亦覬願。重念某再試于禮部。得一第。得第垂十年。獲一邑。同時下科之人。籍朝闈。綴京秩者。不可勝計。某誠爲困且滯矣。雖曷時薦者。凡九人。而舉邑。越大半。本朝之格。絲銓。選陞京秩者。用五人。今闕其二。不瀝懇于執事之門。將誰憐乎。意迫言直。不覺輕僭。干凜威重。不任戰汗待罪之至。不宣。某再拜。

謝提刑司封書

某前日之貢書左右也。家人沮于內曰：若爲屬吏，不逢上官罵叱幸矣。乃敢別白是非耶？若將得罪于范公矣。僚友沮于外，如家人之言，亦曰：若將得罪于范公矣。某獨曰：不然。夫賢者樂與人辨是非，豈惡人自辨是非哉？事有因言而後白，豈有不言而自白哉？與其言而獲罪，不猶愈于不言而獲罪歟？遂決而不顧，不遠數百里，使人持書以聞。事未報，翻惶然甚于家人僚友之感。陰自訟曰：人言不從，其必得罪于公矣。旣而持書者還，則執事之賜教在焉。趨迎亟受，百拜以讀，則獎借之辭，燦乎如龍章之飾，堞壤勉勗之辭，溫乎如父師之詔。子弟恩假之辭，廓乎如山藪之包汙疾。然後僚友賀于外，家人賀于內，曰：公不汝罪而汝容，則公之恩天地不如曷爲公報哉？某曰：大焉澤民，小焉飾身而已矣。引領麾下，不勝感切之至。

上提刑司封書

提刑司封執事。某竊謂士生于今之世，反媿以今之士待己。乃曰：古之士人求爲知己，我惡肯求知于人哉？語介可也。適時則未也。殊不知古之士也，修而寡，今之士也，雜而衆。雜而衆，故賤；脩而寡，故貴。古之士或潛德不輝，朝廷闕之不能爲治。至有禮文交聘而不肯一起。州郡敦逼，乃起爲朝廷用者，不曰寡且貴歟？于斯之時，猶有老死巖谷而卒不聞當時者焉。矧今之士千百進，朝廷之治不加益，千百退，朝廷之治不加損。而又籍銓管者，見上官則蹉蹉焉而趨，帖帖焉而去。不曰衆且賤歟？當爾之時，尙曰我介而志古，我惡肯求知于人。雖然，人誰汝求耶？於戲，行己非艱，知己其艱哉！唐之士韓愈氏卓然其賢矣，猶曰髮禿齒豁不見知己，矧下于韓萬萬而復生今之世歟？不死不遇幸矣。何止髮禿齒豁而知己不見哉？某不

侯得邑最窮僻。雖守官奉職。不敢以僻自懈。奈何使車按部。多道旁縣。是徒有伸于知己之心。其路無絲自伸也。譬鬻貨者。羅列常市門。則近利而易售。苟挾而走窮巷。其良與僞無復自辨。惡望其見售于人也。某前日承乏東陽。幸一會使車之來。其亦挾貨窮巷而偶趨都市者歟。倘執事一顧而略售。則貨雖僞人必謂之良矣。或遇而不顧。顧而不售。復挾之歸窮巷。將委棄無日矣。尙安良僞之自別哉。恭惟執事道醇而器完。德高而業鉅。而又十四州郡吏榮悴之柄。當執事之手。某部吏之一者。執事挈而出汗塗之中。甚于反手之易。使髮未禿齒未豁。又獲大賢爲知己。與夫老死巖谷而卒不一遇者。榮悴相萬。則執事之賜山岳未重。某之貨將交願而競售焉。干浼威重。俯伏待罪。某百拜。

上運使工部書

竊謂匠石天下之工也。欲得天下之材而用之。而天下之材常少。間有焉或不爲匠石用者。豈匠石之心固遺之耶。抑材之生幸不幸繫焉耳。其幸而生平遠之地。匠石過焉。苟睨而斧之。則人謂其材必良材也。其不幸而生窮險之巖崖。雖拙工之目不以寓焉。矧匠石睨而且斧。是尤不可得已。縱其材堅拔完挺。人將以朽木齒之矣。夫士之仕于世也。何以異此。且上官之心。欲得部吏之賢而薦之。而部吏之賢常少。間有焉或不爲上官薦者。豈固遺之耶。亦仕之地幸不幸繫焉耳。其幸而處通都要邑。上官過焉。苟一顧而選取。則人必謂之才吏矣。其不幸而處陋僻之壤。求衆人之願不可得。矧上官之願且薦哉。雖其守通廉介特。人將以下吏齒之矣。浦江卽山爲邑。山險而不可車。谿斷而不可航。以是上臺之按部。雖曠歲不一

歷使才者居之。猶將泯默沈鬱而不自達。況不才者能自達乎。某于茲歲餘矣。雖勤民飭己。罔敢少懈。而迹孤能短。何所借譽。前日幸遇使車過境。得以伏謁道左。猶窮崖之木。邂逅匠石。其睨而斧之。有動于心哉。恭惟執事全德偉業。取重當世。上心所眷。將漕吳服。老姦宿豪。旣已誅鋤而屏絕矣。積弊巨蠶。旣已掃除而剗革矣。生民之利。已修建。中都之費。已充給。趣召嚴覲。期在旦暮。異日謀王體圖治本。其將取天下之才。爲明堂之用。雖材堪欒楹。執事其肯遺之耶。則某之區區願采于今日也。干浼威尊。伏地待罪。不宣。某百拜。

上知府少卿書

某竊謂無位以行道。無壽以守貴。無權以薦士。此丈夫之不足者。何則。雖志摩穹霄。業包經綸。乃飢吟圭衡。一命不享。道可行乎。其或冠纓峨峨。佩聲鏘如。方朱顏猶童。已肉飽螻蟻。貴可守乎。又若委身下僚。自辱塵泥。雖耳目英翹。祇若聾瞽。士可薦乎。是三者不可明矣。若乃位足以行吾道。壽足以守吾貴。權足以薦吾士。執事其人焉。恭惟執事挺不世之偉德。出三公之慶門。今殿邦東南。環地千里。吏自督郵而下。皆趨走以聽命。不曰有位乎。凜然秋霜。以肅強梗。煦然春陽。以曝困窮。執事之道旣行矣。年過六十。齒堅髮稠。人望儀采。盛逾未艾。不曰有壽乎。樂只愷悌。其錫難老。鼎司袞章。茲予青氈。旦夕取之以揚祖休。執事之貴可守矣。扶獎廉善。扶鋤姦賊。升絀之柄。我得以執。不曰有權乎。隸吾治者。厥邑惟七。準詔拔吏。歲常四人。今乎其時。士可薦矣。抑未知所薦之士。果何士也。某竊料之。夫良匠構廈。必度堅挺之材。彼脆而屈。

者何預斤斧。某迹卑地寒。復官窮山。治聲不長。薦口孰開。譬孤株生陋僻之壤。而匠石之足不到。日爲樵豎之所睨。不薪而灰幸矣。惡望斤斧之及哉。雖然。執柯局於近則已。必欲取材之周。則樂檀榱桶之用。寧以地而捨諸。某之微躬。敢借此諭。浼瀆台重。無任戰汗待罪之至。

代謝江西轉運程大卿寄詩書

大江之西。漕權爲劇。才者所處。乃有餘地。特抒佳句。遠將勤意。辭語警發。真得清助。諷吟數過。手不能置。感服之私。并深悃臆。不宣。某祇白。

代問候集賢相公樞密太尉手書

維春之暮。氣序暄甚。伏惟坐斷國論。台候萬福。企仰盛德。與日滋劇。某總帥于外。事有中覆。率賴成筭。以濟疎拙。惟知勉勵。庶塞寵寄。東望門宇。千里而遠。磨限符節。未繇瞻對。伏冀上爲眷倚。益護寢饋。不勝區區之禱。不宣。某再拜。

祠部集卷二十六

書

上通判屯田書

某竊以君子之所貴者道也。道者何。經天下。治國家。修身。誠意之大本也。堯舜之所以帝。禹湯文武之所
以王。周公孔子孟軻揚雄韓愈氏之所以爲聖賢。本此者也。其爲術重矣。今之士有挾之以求遇。彼當其
求者。見而爲之禮。蓋稀矣。禮之而知其所存。又稀矣。知其所存而遂取之。或無焉。有一士於此。恃王公之
薦以求之。其當其求者。禮焉不暇。履知焉不旋踵。取焉不問賢不肖。於戲。勢勝於道矣。若之何使天下之
大本不委而墜諸地。唯大人者爲不然。能重其所以輕。輕其所以重。彼以勢動。雖力逾千鈞。弗吾重也。彼
以道進。雖微如一羽。弗吾輕也。吾之所以輕重云者。有賢不肖之分焉。爾能之者。誰其見之。執事。恭惟執
事。文醇德完。學周孔孟韓之道。而至焉者也。某雖甚賤。其亦蹈其藩牆而未及者。若是與執事所趨之道
同矣。其不同而異者。位爾道內也。位外也。唯大人者。取其內不取其外。道苟我同。雖在斷御。猶將進之。矧
亦士其服者歟。以故。某之今日。不藉千鈞之力。直以一羽之微。求遇於門下者。知執事不能以勢動。某乃
得以道進爾。有諂於傍者曰。夫下吏之於上官。有貴賤之別。今子僭而同之。抑過矣。某應之曰。鳳之於鳥
德矣。彼羽而飛之。皆類也。麟之於獸。祥矣。彼跂而走者。皆類也。猶上官之於下吏。貴矣。彼士其服者。亦類

爾雖同何僭哉。請者復曰：凡薦子者五六人，今又懇懇於公之門，多見其不知止者。某謹應曰：夫獲寢於衆人，雖千百其辭，猶爲虛寵與過美。得孔子之一字，乃定某之區區，正爲此爾。於是請者翻然解，執事儻知而取之，使天下之士知道不爲勢勝者，其自執事始，干冒威重，無任戰汗待罪之至。

代萬表臣上魏公書

某竊以王公大人，垂念官屬之下者，必其人才業政術有足過人，與夫傑識妙畫於吾治有所補，或奔走左右，且歲月之久，是宜均戚休愛，若子姪無過也。前日執事之坐鎮全魏，而魏人服化，已舊一府十七縣之民，無有煽姦構詐，以干靜治者。訟事至庭下，聽無留斷，雖有傑識妙畫之士，以爲之官屬，於執事之治，何補？矧某才短而術疏者耶，而又備位幕府，纔數月，任奔走爲未久，若前之云者，咸無焉，而惻然垂執事之念者，徒以某頃爲監司所摺，文致其罪，鬱抑之氣，蟠結于胸中者累年矣。近輒一吐憤執事之前，言未出口，而憐憫之色，已見于容，此無他不欲匹夫一物之慊其中。伊尹之用心爾，今伏遇肆覲過闕，將力雪某之枉，如得滌濯其疵，復爲完人，則跼跼墜翼，再有青冥飛意，數年鬱結，一旦變爲和氣，今日以往，實執事更生之也。

上魏公書

方閣下慶歷相天子，而某六年以進士得第，嘗出造物之鑪，而未爲造物者所識，欲然乎其中，垂二十年矣。前日閣下鎮全魏，某爲縣令元城，始得以屬官進見，語未及竟，而許以國士，見愈數，而其遇每加厚，凡

士人之受知于人。其必有以取之也。某自視無有。閣下于某乎何取若。浮文曲學。固不起爲大臣道。奉法履潔。又士之常守。某所晝夜惕息。度無以當閣下之遇。方求爲真可知者。庶幾爲閣下報。已而閣下解魏印將行。且曰必繼辟某以從。審如是。復備閣下官屬。其期不數月。故臨別之容不甚戚戚。比聞閣下舍某而他取矣。其復吏于左右。未有期。感知而戀德。源源乎。復來乎胸中矣。屢欲一布其懇于下執事。竊以爲大臣新見天子。顧天子有大利害。與夫傑才潛德。或未爲國家用。必將精思而力言之矣。某雖苟布一書。閣下其暇省覽耶。近睹邸報。伏審陛辭有日。是敢少進其說。於戲。士之于知己。雖在數千百里外。常若造諸膝。雖榮悴戚休。寒暑事物萬變。而感知之心。獨在。豈偶失其望。少闕其庇。而其心輒易耶。某之區區。直若是爾哉。誠激語切。瀆浼台重。不勝戰汗。待罪之至。不宣。某惶恐百拜。

謝運使司勳書

閏三月二十二日。具位某。謹裁書百拜。運使司勳執事。某挾術甚短。顧其才不足施之高文大論之間。獨爲小詩以自喜。然爲之數十年。未嘗輒出以示人。非家藏瓦石。而私以爲珍也。蓋自視猶不可。矧求可於他人哉。前日獲侍坐。蒙道及鄙詩。且俾少錄。以來。因幡然以思。與其深藏之。而遂其短。寧若經作者之鑒。卽受嗤于作者。不猶愈獲譽於衆人。又後進者。執事于先達。則必祗慮考卜。以決可否。及其門。猶將前而復却。不敢挺然以進。爲先達者。未必果好之。今某不煩若之云云。而乃蒙見索。雖欲自匿。其得自匿耶。謹退而發舊藁。去其甚惡。而取其稍者。得百餘篇。輒錄以獻。恭惟執事。學充器博。操古道而行。今世凡六經

百氏之說。其關於治亂而足以扶教厚俗者。莫不囊括筭蓄。以措諸行事。又自陝而右。凡四軍二十八州。兵民事物之情。吏屬廉污勤怠之狀。與夫實邊贍國之術。莫不坐照而默計。顧執事所觀而省者。不小而大可知矣。前日之獻。是猶大樂在聽。而么絃促管。啾然作于金石。攢擊之間。豈足動賞音之耳哉。而又語浮意局。篇次不貫。俗書惡紙。殆非可以爲上官獻者。慙悻累日。謂將獲罪于左右。而執事方且誘激獎貸。賜之書以褒假之。噫。其激可勉也。其褒非敢當也。若乃上自三代。下暨歷世。風雅之作。罔不極論其淵源。使小子讀之。不待受教座下。而略聞詩要。敢不拜執事之賜。佩服盛德。不任感悚之至。不宣。某惶恐百拜。

上荆南知府鄭舍人書

某恐惶再拜。知府紫微舍人執事。去年詔舉宮中官。伏蒙執事首以某塞詔事。雖不允。論感等爾。何則。方執事謀於心而發之於薦也。不虞不中。適偶與事戾。成與否在某爲休戚。若執事之恩。固不繫乎成否也。曷某居京師。遊諸公之門。凡六年。或屢言以諾賤貧。他日苟有論薦人。誰子先。若斯言也。執事未嘗出諸口。某固無望于執事矣。重以執事負天下之望。天下之士。挾其所業而爭歸門下者。類不下數百。聞詔書初出。其有求於此舉也。袂相連而屢相接。方是時。獨某去門牆四百里之外。爲邑朔方。執事舍其門下日親而近者數百。而一疏遠之。是取不應其所力求。而與某之無求。使四方之觀邸報者。必以某賢于數百者。彼數百人者。亦未必不自疑。某賢乎其己也。不然。何舍彼而獨處也。某失於諸公之所嘗諾。乃得於執事之未嘗諾。又天下莫不知有執事。而莫知某也。一日區區之名。附薦書而遂以彰。則執事之賜。如何其

重也。某之重如何其光也。於戲。陷冗塗二十年矣。未嘗一日輒去學。力勤而道逾遠。尙不敢覬衆人之知。全乃辱知於執事。某今而後。審不隨俗吏泯沒者。特有執事之知在。若乃策其所未至。期自奮乎功名之塗。雖老而益壯。庶幾不忝前日之舉。使執事知某爲不繆。亦未敢在門下數百人後也。誠激辭切。伏俟罪斥。不宣。某惶恐百拜。

謝盧郎中舉縣令書

十二月日具位某謹百拜獻書。知郡郎中執事。某爲官屬數月。職在訊獄。自餘公議。一切不預。又執事爲治。非囚黨蔓衍。皆決之庭下。使獄官果才。其施設能幾。況某之不才而無所施設。於何求執事之知哉。縱齷齪能以廉自謹。猶待歲月而後見。又於何取信之速哉。昨日伏蒙執事不以某不佞。謂堪任一邑之政。遽以上聞。是執事知某不佞歲月之久。取人不求才節之兼。古君子之用心也。噫。寄之以民與土。百里之內。惟所休戚。彼一受賕。皆坐舉者。是國家授令之意。旣慎且重。其保任之責。不細而鉅可知矣。執事惜此舉。以進能者宜矣。今能遽然取某。以塞舉。則執事之賜。宜如何報。惟勉所不能濟。以素守之節。少答知己於萬一耳。無任載恩荷德之至。不宣。某惶恐百拜。

與荆南鄭舍人書

某初到魏。旣深鄙其土風。又日負洪河決溢之憂。圖所以脫去未能也。止得易此而之他。無不爲樂地。況以詩書爲職業。而無吏責于其間者。此正某平生所願爲。而不可得也。方是時。忽聞宮官之薦。不唯覬脫

此以去。復平生之所欲爲。以是喜躍俟命而不暇。自度夫不可爲人師也。已而報罷。茫然愈失乎所從。譬如陷深墜險者。有人焉。引綆而欲出諸危方。一施手而綆絕。其徬徨甚于未引綆之前者。知施手之難爲力。而出此之未有期也。自被薦一年半矣。蚤作而夜息。其心未嘗忘斯舉。獨無一言以達區區者。直以向兼數職。又上官交以管記見屬。每視牒訴簿領。纒暇且曠。蹙蹙作四六矣。實公私未嘗有少閒。矧某之德執事者。大非遽云。恠說之所能盡。又筆未落紙。而鬱鬱之氣。已蟠于毫端。使言不及竟。日復一日。不覺遂至于今也。愚言不誣。皎日所鑒。不宣。某再拜。

又

某竊聞荆渚爲天下遊觀之最。足以坐鎮而縱賞。一官之繫。恨不得從公以遊。然入輔大政。期在旦夕。豈能久與江山爲主人也。某再拜。

上提刑祠部書

提刑祠部執事。某爲執事屬吏。幾二年。以區區之跡。願收於門下者。踰一年矣。事久不遂。私自謂保任之責。在本朝爲最重。彼被舉者。一受賦。則舉者與之均罪。某事蹟猶未試。執事知某宜未熟。寧肯遽然薦之。其必博訪廣聽。俟可薦而薦焉。自視無纖缺。又有交譽旁贊者。然後執事之知特深。而薦某無疑矣。以特深之知。被無疑之薦。抑將倡於諸公。使薦之。又薦之。豈獨執事一薦而止也。無何。數日前。有來告某曰。有謗子於憲使范公者。曰。子之所爲。不逮於初。子宜辯。某對之曰。夫不逮於初者。非素然之謂也。若先潔而

後汚始勤而未怠。翻然易之之辭也。噫。不欲爲良吏則已。如欲爲之。必曰終身焉。惡在一歲再歲而易也。猶千里之遠。不求及則已。如欲及之。必極于千里而後止。惡在五十步百步。或半途而畫哉。始某之來浦江也。嚴一切之防。革積久之弊。政惟不得爲才吏。節唯恐少虧于古人。今日省昨日之所行。後月修前月之未至。豈暇易初耶。夫小人固有易常者。或爲士修飾以求爲大夫。得大夫而忘士之操。爲大夫修飾以求爲卿。得卿而脫大夫之守。某選人而求爲京官者也。設其心誠小人。獨不能勉強俟得京官而後易耶。奚若是之速也。雖謗言日永。范公必不聽。某何辯。旣而又有告者曰。有謗子于范公曰。尉所爲因循。而令縱之。且與之同波。子宜辯。某對曰。自某之來浦江也。聞尉有不善。則必苦言切責。未嘗絕于口。乃不傳某勝署門以召言尉過者。恐此言遂行。則陷名于好訐。以是外和其色而示同。內堅其節而自處。且尉方少年。初仕此任。無所立。猶有他任。某年旣踰壯。而又得第近一紀。若榮與悴在此舉爾。設尉所爲因循。烏肯縱而同之也。某在身無赫赫之譽。身外無強近之援。初掾泗舉者凡九人。今又得二人。是無他技。獨謹廉以得之也。雖然。彼十一人者。寧不傾耳以聽某之善否。今同郡而仕者不下三十人。某之不佞。守倅交薦。彼三十人者。寧不駐目以窺某之舉動。浦江雖僻陋。而強宗橫族。不啻數十戶。今皆束手不得聘。彼數十戶者。寧不張口以待言某之非。是雖欲爲不謹。獨不畏十一人之耳。三十人之目。數十戶之口哉。設謗言日來。范公必不聽。某何辯已。而自咎曰。以且聖而被流言。以參賢而遭投杼。况其下者乎。何恃而不辯。今夫薦京官者纔五人。而又其間又未知果用成某之跡者。獨望范公爾。萬一謗言之行。則愚望絕矣。安得

自默耶。因敢布前之云云。執事以爲然。則某之枉洒然無餘矣。如曰不然。願行麾一日。臨按遣左右家到而戶詢之。或千百人之言。有一與謗者合。則請暴某之罪。亟黜而速去之。以警類某者。果千百人言無一合謗者。則願呼謗者使前。叱而數之。然後收孤跡於薦書之上。俾知無根之謗。能惑于衆人。而不能爲大賢君子惑也。執事之美。不亦盛哉。意迫言直。冒瀆威重。不任戰汗待罪之至。

上運使盧工部書

運使工部執事。去年春。執事按部過婺。某得伏謁境上。伏蒙降車爲留。賜坐與語。問吾民之利疚。輒以某事某事對。言未卒而稱善隨之。且曰。還寫所言來。因謹寫一通以進。復親筆諭之曰。善。某退自喜。夫部吏之見上臺。有所問必立對。今乃賜坐與語。執事禮某爲過矣。而又部吏之欲以言徹上臺者。不爲少。皆鬱而不得通。今乃辱先問。言獲徹而千沮百詆者。亦甚衆。今乃辱稱善。執事知某爲深矣。已而自尤曰。禮過而知深。而遇不常得。不於此時以一言及身計。是果於自棄爾。因作詩一章。具道所以願舉之心。以獻。復蒙親筆曰。深悉乃意。以是家人賀於內。曰。盧公必薦汝。僚友賀于外。如家人之言。某亦私自賀。旣而事久不遂。繼獻以書。復不遂。於是向之賀者。反相唁曰。噫。豈有短子于公者耶。抑公將拔部吏之尤異。而不及子耶。不然。何遲遲而不薦耶。某曰。否。使謗舌之巧。惡能誣伯夷以貪。而毀柳下惠以濫哉。設拔吏必尤異。而執事歲取二十人。雖某甚愚極陋。獨不足塞二十人之數哉。偶未及某爾。以韓愈氏之賢。猶三上時相書。今書再上。而遽相唁。慮某亦過哉。矧識足以辨萬事之表。明足以照千里之遠。某之所爲。固已深詳而

密察以言乎考格。則尙少一歲爾。以言乎舉者。則尙缺一人爾。是玉成之德。猶有望于執事也。恭惟執事仁義充諸心。黜陟繫諸手。振某于汗塗之中。劇反掌之易。尙矜憐而成就之。使不爲家人僚友。則糜軀碎首。弗足論知己之報也。冒瀆威重。無任戰汗待罪之至。不宣。

賀發運金部賜進士出身書

伏觀邸報。主上以進士賜執事出身。大哉朝廷。此舉其有意于教化哉。昔成周以事言德三者。升造士之秀。進而官諸位。其養之有素。考之以實。故所得皆良材。今有司乃以聲病儷偶爲法度。進者又猝然而聚。苟能以曼辭麗句中程品。則決科第如拾芥。雖三代之文。有一不與法度合。棄不復顧。以是執事用高文大筆。嘗試於有司。而輒屈焉。亦曰。以言取人。其失之遠。今朝廷能知執事文章事業。所施者大。彼有司法度。烏足較其萬一。直以此科賜執事。天下有道之士。如執事者。知文章事業。能屈于有司。而朝廷不能屈。益高其爲人矣。噫。成周之制。稍行今日。則三代之士。有爲時而出者。某故曰。朝廷此舉。其有意于教化哉。延頸麾下。不任抃賀之至。不宣。

上運使王工部書

某竊嘗謂知人不以古君子之道。不足稱知人。爲人知不以古君子之道。不足稱知己。古之知人者。在盜囚徒隸。而知其賢。落魄困踬。而知其非常材。千百人譽之。不加重。千百人毀之。不加輕。爲人知者。以道自處而不苟。終始一節而不奪。雖榮悴萬變。而知己之分不移也。今知人者。或始德而終凶。或始收而終棄。

目顯榮者謂之賢。願卑賤者爲不肖。一常人譽之。唯恐知之不深焉。一常人毀之。唯恐黜之不早焉。求知于人者。松筠不足語其操。冰霜不足語其潔。惴惴焉。唯恐人之不己知。幸一知焉。則向之操反爲殆。向之潔反爲污。故改節首舉之弊興焉。然則孰爲然哉。蓋古之人以誠。今之人以不誠。噫。豈古之人皆誠。而今之人皆不誠哉。某之言主乎人。不主乎時。處今而行古之道。豈必不誠哉。在古而反。若今之爲。豈曰必誠哉。繫乎其人爾。恭以執事文章事業。與古賢並。知人之明有過焉者矣。若某之愚不似。豈宜以古知己之說于左右。蓋其他誠不足采也。若一節不變。自謂無愧色。是敢進說于大君子之前。若乃執事之全德具美。揭諸當世而甚白。故略而不講。浼瀆威重。伏地待罪。不宣。某惶恐百拜。

上河北都運元給事待制書

七月十五日。具官某。惶恐百拜。奏記都運給事待制某。四歷州縣。三任部屬。今茲一官。始飄然去北道千里之外。從辟西土。雖然。豈如他人朝離門牆。則蹤跡暮疏。蓋鄉里之愛。無有遠邇不移也。恭惟待制文章德業。致身法從。出入更履。聲光益懋。久勞于外。時論所鬱。行聞趣召。置帝左右。使晚生故吏。訖託鈞治。功名之塗。萬一自奮。庶幾知獎拔之公。不獨緣鄉里私愛而止也。庚伏在序。伏望爲國自壽。犬馬之戀。豈忘故軒。引領馳誠。曷勝愚悃。不宣。某惶恐百拜。

上提刑司封書

竊謂犬馬之爲畜賤矣。人所以芻豢而仁之者。以其有守警馳載之効爾。彼犬馬者。豈特糜糠飲秣。荷其

仁而自惰。亦欲展所効於人爾。設有犬焉。雖猶健趨。非韓獹之比。願其聲足以守警也。盜且至。不幸傷其吻。不能吠而齧焉。爲其主者。將叱而扶之歟。抑袞而哀之歟。噫。吻之傷。非犬之所欲然也。袞而哀之宜矣。設有馬焉。雖驍勝蹀躞。非驥駉之等。願其力足以馳載也。御且至。不幸蹠其足。不能負而馳焉。爲其主者。將鞭而毒之歟。抑芻而憐之歟。噫。足之蹠。非馬之所欲然也。芻而憐之宜矣。夫州縣之爲吏。冗且畢矣。上官所以拔用而恩之者。以其有奔命任事之勞爾。爲下吏者。豈特竊祿飽食。幸其恩而自安。亦欲伸寸勞於上官爾。不幸命適至。體適病。不能勉而從焉。爲上官者。將咎而斥之歟。抑撫而恩之歟。噫。體之病。非下吏之所欲然也。撫而恩之亦宜矣。某不佞。隸執事麾下。且歲餘。雖欲朝夕趨走。以愚自効。奈所守之邑。介在僻壤。其路無繇。而自進。前日伏會。越之疑獄。執事使某劾覆。而考察于時。負薪之疾。發于彌月。而又明不足決疑似之狀。智不足究是非之實。雖然。譬之犬馬。是亦効守警馳載之秋也。方將強起而行。悉意乃事。無何綿力弗逮。訖以病告。伏蒙執事。諒其懇迫。惻然開許。猶蹠足傷吻。雖主人知非其欲。然若鞭與叱。尙未能忘犬馬之憂也。意逼辭鄙。干冒威重。無任戰汗待罪之至。不宣。某惶恐百拜。

答董太傅書

某頓首。某所學失其原。方少壯時。不幸以辭賦得名於世。今雖老矣。猶將更爲強勉。以追捕厥初。以故遇博雅有道之君子。必喜與之遊。庶幾講論規勸。有得于萬一爾。今閣下之來。正適愚願。又以生事不足。汲汲有謀于人。凡某之有望閣下者。皆所未暇。何私懷之難耦。而講劄之益不易得耶。相見纔一二。閣下遽

以胸中所欲爲。傾盡於愚。略無毛髮閒外。直相知之速。而相期之甚重也。有可以出力。愚何憚而不力。昨日雨不能往。少頃當得拜誨言矣。

上提刑舍人書

某聞爲下者。心有所欲言。情有所未盡。必告於爲上者。酌其所以言。究其所未盡。以聽于下。故民有疾苦。必訴于州縣吏之廷。吏有沈鬱。必伸于部使者之前。州縣吏之廷去民近。可日往而訴也。部使者之前去吏遠。不可日往而伸也。可日往。則民見吏以爲常。不可日往。則吏見使者以爲非常之遇也。某官于窮山僻壤之邑。且二年矣。欲拜使者之威采。尙不可得。矧聽其誨言哉。聽其誨言。尙不可得。矧卜其獎願哉。是三者俱不可得。雖有絕人之治。不世之才。從何而自露。矧某之斷然無似。其抑塞滯滯。不爲上之取宜矣。前日聞使車臨境。土竦然奮袂。躍然出門。以爲得一拜威采。一聽誨言。一卜獎願。在此行矣。無何。積雨溪漲。乏航以渡。彷徨溪涘。仰天而呼曰。噫。豈天之欲某沈鬱不遂。固虐之耶。不然。何使車在境。而溪潦爲暴。絕其往見之路。若此之甚耶。已而自解曰。天徒能絕某之路。烏能絕某之筆哉。使某據區區之意於累紙之上。不猶愈一見一言之詳哉。是敢犯不測之誅。少布其愚。某之作此邑也。雖政無尤異。視古之良縣。令間或有慊色。其奉法飭己。較一時爲縣者。固未敢自議其先後也。今考限垂滿。而舉者猶未足。此正吏之沈鬱。宜就執事而伸之也。儻執事酌某之言。究某之情。而垂聽之。惻然哀其冗且滯。挈孤單之跡。一掛薦章之末。則某之沈鬱。洒然無餘矣。生成卵翼之惠。豈在他門哉。若乃執事之全德遠業。揭諸當世而甚白。

此則略而不講焉。干冒威重，俯伏待罪之至，不宣。某惶恐百拜。

上提刑祠部書

某聞有適萬里之塗者，跬而起，寸而進，所未徹者，數舍之速爾。不幸足力弛焉，裹糧置焉，得輿馬之代，兼宿之儲，則萬里可以徹。否則，喪前勞，死道邊，無日矣。與夫五十步而畫，或百步半塗而畫者，均焉爾。適有力者居傍，其家之富，不知其糧幾困，輿幾兩，馬幾駟也。目斯人之厄，將哀而救之歟？抑忍而遂其死歟？噫，苟無仇讎於斯人而欲其死者，其必假輿馬，貸裹糧，以濟其行也。某因銓選之塗，有日矣。其高非在天也，其險非在山也。陷穽滿眼，未見平地。行之數年，尙未能徹。然而本朝著令，繇縣令而遷京秩者，其考限必六載。其舉者必五人，某必六者，既五矣。必五者，既四矣。是猶萬里之適，所未至者數舍爾。知己尙缺其一，是亦足弛糧匱之厄也。捨執事將赴，訴何門哉？恭以執事雄剛偉卓，名重當世。而又一軍十四州部吏，升黜之柄，當執事之手。其勢非特有力者之比。不假輿馬，裹糧之救，而拔某污塗之中，置之霄衢之上。劇反掌之易，寧獨萬里而止也。第懼勿爲爾。是敢借前之云云，一布左右。儻執事哀憐而成就之，使不貽道邊羞，則翳桑結草，豈足爲門下報也。冒瀆威尊，伏地待罪，不宣。某惶恐百拜。

祠部集卷二十七

書

賀鄭毅夫內翰書

伏審就奉茂恩。八司內命。比傳睿選。始厭羣言。竊以翰林諸公。禁路元老。文有體要。代爲訓辭。凡詔書之諭。臣民或贊冊之除。將相惟廷中誥令之所出。雖海外幽荒之必聞。導宣上心。粲如星斗之揭。鼓動羣聽。肅若雷霆之馳。豈文章之獨難。抑論議之兼賴。恭惟內翰秉彝。惇大涵德。惇深學造。聖賢力踐。列科之回。賜量包公輔。蚤名未仕之臯夔。及出而冠天下之英翹。進以立朝端之風采。道誼時懋。聲光日新。掌王言者數年。追聖作於三代。適圖西掖之舊。更直北門之嚴。大筆足以寫造化之微情。密謀足以贊太平之偉績。居常被前席之間。威嚴最親。由此踐中階之尊。足跡相躡。聊演彌綸之大手。卽諧經國之初心。謨明四隣。宰制萬類。某聞命竊怵。銜恩未酬。懼泯功名。隨衆人而空老。第形歌詠。嘉君子之丁時。東望門牆。不勝竦躍。

賀王中丞充翰林學士書

伏審顯對明恩。榮書內命。朝倫胥慶。物議惟均。恭以某官。名世挺才。際天蘊識。懷直道以執中憲。履正德以儀庶工。白日貫誠。實高忠諒之結主。青雲隨少。便仰文章之致身。方開納諫之聰。遽屬演綸之手。訓詞

鼓動於天下。茲鬯辰猷。謨論參陪於禁中。益紆賢業。矧內相之要地。卽中台之便塗。南山之峻維瞻。徐膺徽册。淮水之流不竭。增衍清門。企躍并深。文陳非悉。

上益州趙寵圖書

伏審已卽便時。肇開尊府。兩川父老。淪肌浹髓。以識曩時之恩。千里士民。延頸拭目。以觀今日之政。盛德所底。私心竊懼。恭惟知府龍圖道誼可師。文學之老。以孝悌甚高之美行。起于鄉黨。而迄至四方之知。以忠純不倚之亮誠。信于朝廷。而遂爲多士之服。率謂蕃宣之寄。決非歲月可期。得賢使君。未足爲蜀人之賀。輔明天子。行當隨漢詔之歸。

代賀陳副樞書

伏審顯對制函。進陪宥省。出帝心之慎選。允天下之公言。伏惟慶慰。恭以某官。學造聖賢。器包公輔。早升華於近侍。寢服采於皇僚。危言正色。以立乎諫垣。密裨王體。碩畫周才。以總乎漕節。增羨邦財。方假尹於都畿。旋登賢於陪幄。屢形囊奏。懇請州麾。爰倚重於邊藩。復兼榮於祕殿。唯太原風物之古。領一道兵民之權。茂績休成。清衷簡在。會洪樞之虛位。被嚴詔以還朝。付之繁機。時乃舊物。有生相慶。知聖王之用人。至治可須。幸君子之得主。

賀新知邠州閻諫議書

竊審峻躋要秩。移守劇州。伏惟慶慰。代以某官。精識際天。偉才名世。蚤論撰於祕殿。旋翺翔於禁塗。風聲

有休。時望愈重。乃陟諫垣之長。以臨幽土之民。行布教條。復餘風於貴儉。卽聞詔召。輔新政以告猷。欣頌并深。文陳匪悉。

賀致仕趙少卿書

竊審懇列封章。許還印綬。冠名三少。追跡二疏。進退無虧。古今有幾。清議皎若。高風洒然。伏惟某官。挺才碩膚。函德渾厚。坐參國論。嘗俾萬化之調成。出布藩條。靡俟三公之入拜。致其君事以去。信矣老成之賢。側聽歸榮。祇增歆羨。

賀正上許州賈相公書

伏以歲歷闔端。兆二儀之載毓。春祺備舍。與萬寶以俱新。恭惟某官。勳濟王塗。器包民極。履正德以儀庶位。挾重計以尊本朝。宰廷三事之司。首調元化。宥省五兵之本。旋總繁幾。措邦體於旣平。隱廟謨而弗有。享崇高之極。而自均出處之致。斂康濟之大。而樂就蕃宣之勞。露公冕以觀風。坐訟堂而聽治。一相在外。思周伯之未歸。萬民俱瞻。願晉公之再入。遙臨開祚。參嚮純禧。莫前壽罍之稱。乃後慶函之獻。台光在望。愚抱焉依。

賀正與職官書

伏以天吏肇和王正。謹始稱漢觴而薦壽。欽堯歷以授時。恭惟某官。植操端方。賦才肅給。早傳家府之慶。暫屈幕廷之謀。屬獻歲之膺辰。期自天而集福。永言祝頌。曷究指云。

代回相州李太尉賀正書

歲功肇起。祗列於慶。函禮意相仍。嗣紆於榮。牘仰銜勤眷。第劇銘藏。恭惟某官。茂略濟時。純忠衛社。出臨藩閫。緊寬詔之奉行。進陟樞廷。佇壯猷之施設。伏望爲國自輔。副時所瞻。

二相賀正書

伏以春秋之一爲元。肇謹歲端之起。天地之交曰泰。遙觀物象之通。恭惟某官。業履崇高。智謀光大。慘舒萬物。躬調造化之均。翼戴一人。日入太平之域。維春祺之所嚮。與歲歷以咸新。某假守關中。馳誠門下。適阻壽觴之獻。曷勝頌牘之虔。

代王尙書賀富相公出鎮河陽書

伏審懇求便鎮。思解繁機。比奉俞音。誕膺徽冊。揭使旌而就道。露公冕以觀風。伏惟慶慰。恭以某官。業履崇高。智謀博大。更元猷於二府。被隆遇於兩朝。勳濟王塗。道光台路。君臣之有一德。入平泰階。文武之憲萬邦。出倡羣牧。請盟津之守寄。鬱巖石之民瞻。袞衣之留。周公難全西土之願。舟楫之命。商相行副巨川之求。

代元給事上河陽判府相公賀冬書

恭惟某官。山河間氣。社稷宗工。謨明二府之崇。登翼兩朝之盛。屢形露奏。斬解神機。太師維垣。倚重河喬之鎮。一相處外。增高巖石之瞻。陽德初升。天和參嚮。永保貴福。益康壽祺。某職總計臺。跡踈材館。莫從慶

列徒瀝頌言。

代上三司端明侍郎賀冬書

伏惟某官才包王佐道貫民彝名躋日月之高學破鬼神之奧擅中都之調度坐懋豐功揭四海之儀刑行膺徽册迎長云始介福攸同某跡繫河濱心馳門下適阻壽觴之獻第虔慶牘之修

代回諸郡賀冬書

寶典履長雲臺視朔復太陽於七日亞儀會於三朝恭惟順履令辰誕膺龐祉慶函未列珍札先貽感頌交深名言非悉

代元給事賀蔡舍人書

伏審入對王休進司帝制伏惟慶慰竊謂訓辭之任尤資體要之工導宣上心明如星斗之揭鼓動羣聽震若雷霆之馳唯時傑才乃稱華選恭以某官氣函渾厚道際醇深蚤勸學於宗藩久讎書於儒館出領江湖之寄歸瞻天日之光賢業素高主知逾重諫垣納誨方開當辰之聰禁掖代言遽屬演綸之手曷涯大用增忭丹衷

賀宋舍人書

恭以某官學優聖闡名重士林蚤踐列星之垣久提太史之筆繇螭頭之注錄陟鳳閣之凝嚴讀書五車極多聞於編簡掌誥三世增盛事於衣冠忭躍殊深文陳曷罄

賀韓舍人書

恭惟某官。性恬榮利。學造聖賢。朱邱裁戔。方綴應劉之賓客。紫垣演誥。遽歸蘇賈之文章。潤色皇猷。發揮素蘊。取鶴原之舊物。紹鳳閣之清門。時論所榮。朝游胥忭。

代賈魏公賀致政宋相公書

伏審懇列封章。斬還印綬。重違確請。旋發兪音。徵冊告廷。安車就第。進上公之極品。光信史之直書。高風凜然。當世仰止。恭以某官。重名照映。耆德精明。綠髮青雲。蚤冠士科之選。鴻樞黃閣。歷更台序之嚴。遽收富貴之身。以養壽康之福。偶一相之處乎外。得謝以歸。與二疏之嘆其賢。較美無媿。側聞盛事。增快丹衷。

賀致政范侍郎書

竊審拂衣榮路。脫屣禁林。高風可激於一時。逸軌絕攀於千載。某官文章大手。忠亮丹心。屢貢危言之誠。不虛內相之職。顯官厚祿。視如一羽之輕。盛德高名。坐若泰山之重。志確還於君事。年未及於禮經。邦家失賢。朝野興嘆。側聞勇退。增聳儒衷。

賀致政曾太傅侍中書

竊審確還君事。訖被宸俞。增峻品儀之尊。弗離進退之正。伏惟致政太傅侍中。際天傑識。許國純忠。蚤紓圭袞之偉謨。歷冠鈞樞之重任。建冊萬世。齊庸三朝。不居大勳。懇避元宰。勤勞逾記。乃心固在於王家。出處隨時。維翰遙臨於帥路。遽渴老成之燕見。方祗詔召以旋歸。驟爾引年。久而得謝。雖清衷之逾眷。似素

志之重遠。顯冊告廷。拜絕班於帝傅。安車就第。畢能事於人臣。將相兼榮。公卿增嘆。俛惟晚景。常與並遊。勇退先諧。懦懷內愧。

泛謝書

短才所賦。遠略尤疎。一隨從事之辟書。三入上公之幕府。用兵西夏。常參與於戎機。總帥北方。復專司於軍檄。甫諧就職。未暇馳音。豈圖謙矩之勤。首有慶函之辱。厚辭相假。雖非涼德之可當。重意所臨。敢不珍藏而自貴。

回相州傅待制書

審即便時。已班寬詔。何幸故鄉之父老。獲觀新政之神明。某官道際大醇。氣函間傑。經帷勸講。非帝王之道不陳。諫靈弼遠。以忠義之心自處。聊就更於治屏。行入贊於熙朝。欣頌并深。名言非悉。

回懷州呂大卿書

茲審涓辰。已諧視事。首貽榮牘。備寫謙懷。矧風力之素強。加治功之連最。再屈公卿之重。俯臨民俗之繁。佇善政之告成。卽寵章之增懋。永言欣頌。曷盡名云。

回真定陸待制書

竊審前騶。將之劇鎮。甫次都畿之近。首紆函訊之勤。承冒春暄。載蕃時祉。別京無事。誠病守之所宜。重客見臨。庶款言之可接。餘需瞻挹。併敘欣翹。

回知博州杜郎中寄詩書

北守別都兼綏北道。初膺重任。首枉長篇。載研大雅之餘風。真謂少陵之後裔。仍新紆於妙翰。尤取稱於佳章。不無溢美之過情。第用珍藏而爲好。

回權發遣棣州馬都官書

比藉長才。暫臨劇郡。旋承交印。累辱貽書。行入對於清光。佇前膺於渥寵。益希保衛。少副願言。

回洛州通判宋郎中書

比承交印。甫邇還臺。首枉珍函。多蒙盛意。矧治功之尤最。諒恩獎之加優。感頌尤深。諭言非悉。

回京西提刑康左藏書

久睽使節。滋渴於晤言。比總帥符。益疎於訊問。豈圖高誼。遠枉珍題。戢感尤深。諭言非悉。

回深州寶學士書

頃繇冗掾。得備屬官。趨走下風。每荷嚴顏之爲霽。違離數載。敢忘盛德之所蒙。起居之禮不脩。疎遠之蹤分絕。夫何容貸。弗爾瑕疵。首占教文。過形恩獎。踴然拜賜。益以懷慚。恭惟知郡學士。學際聖賢。器包公輔。坐安流瘵。矧利澤之宜民。入罄論思。行忠謨之致主。炎威云兆。時社載蕃。伏望上爲邦家。倍綏燕餼。

回洛州通判范純熙比部書

比緣天幸。行覲風期。別席未終。行騶亟引。方劇賢規之跂。遽蒙誨牘之貽。審履初炎。誕膺蕃祉。伏惟某官。

才猷庸敏。風績宏長。暫屈貳於藩條。行進承於邦選。永言感頌。曷究名言。

魏公回司馬內翰遠迎書

竊審虔承詔文。出按河役。屈禁局之清重。勤行道之阻修。甫次近圻。卽瞻前旆。首貽榮誨。增戢感悚。

回越州通判曾學士書

適懷清範。遽獲盛牋。粲然辭意之形。宛爾聲顏之接。會稽請去。暫虛嚴助之直廬。宣室歸來。行對漢文之前席。炎威寢劇。時祉載蕃。

集賢相公往西京問候書

伏審奉二宗之神御。云往別都。勤十舍之暑行。乃煩元老。緬相車之旣飭。扈真駕以載馳。宜有神明。陰懋福祉。伏惟某官。格天偉績。經世壯猷。蚤踐宰塗。協平王路。聖朝眷倚。矧久賴於謀謨。原廟妥綏。茲兩完於忠孝。益祈壽重。少慰依瞻。

問候集賢相公往西京還書

竊審寧神原廟。告大禮之熙成。復命明廷。慰上心之永慕。甫休道路。還宅廟堂。幾政多餘。善祥備舍。伏惟某官。格天丕業。經世元猷。謀謨歷罄於三朝。利澤徧孚於四國。唐虞之際。圖極治于無前。邠魏有聲。肩一心而永底。炎威在序。燕餼惟時。

回南京王宣徵書

竊審圖任宗工。保釐寰服。比詠吉日。肇布寬條。伏惟某官。經世壯猷。際天傑識。滄揚兩禁。歷事三朝。徽府
恩謀。重少煩於元老。別京均逸。聊兼拊於吾民。濬淮水之慶源。積商巖之素望。未煖居留之席。卽持入覲
之圭。登踐鼎司。協平輿議。慶函未列。榮牘先臨。感休并深。名言非悉。

又

自闕風徽。忽驚歲晏。雖政事已修之前跡。無所更爲。而音題或至於歷時。缺然不講。敢圖雅眷。特枉珍函。
兼審偃息。別都撫柔熾俗。神明所右。福祚其蕃。伏惟某官。勳濟王塗。望尊台路。政成五月。猶司留鑰之嚴。
册拜三篇。行秉宰鈞之要。益綏寢餼。少慰瞻祈。

回新富順監雷判官書

竊審特緣精學。亟拜茂恩。遂去家居。將參幕畫。側聞新命。增快宿心。伏惟某官。風度甚高。塵游不雜。心潛
藝苑。自成篆籀之一家。名在薦章。獨繼飄流於先世。遠躋此始。喜情可量。修慶未遑。占書猥及。永言感忭。
曷罄文陳。

回新知成都府陸龍圖書

審膺睿選。就拜恩章。領印綬於蜀門。遷圖書之禁閣。某官氣函渾厚。才貫幾深。屢更帥節之行。歷底治功
之懋。往綏遠俗。繫威惠之兼孚。入置近司。殆後先之相躡。未馳慶問。首枉珍題。感忭并懷。名言非諭。

回邠州閻諫議書

符守相望。每聽風聲之懋。函音逮及。特緣年契之深。審順履于歎炎。益茂迎于戩穀。矧惟舊德。克著壯猷。樂土勸耕。方爾陳書于七月。追鋒促召。靡須告政于三年。倍護燕興。前膺眷任。

回絳州宋舍人書

審卽便時。已頒寬詔。矧惟厚望。獨映近班。早懋淳修之聲。世傳該洽之學。垂光禁掖。未殫澤物之初心。布政善藩。聊輟演給之大手。甫溫坐席。當被詔函。遠枉書音。增銘感臆。

回西京李給事書

審被恩緝。出司留鑰。已班條教。首枉牋函。惟識度之深闊。加才猷之庸敏。優游延閣。矧侍從之久勞。偃息別都。適中和而自樂。佇甄新治。益峻褒草。

回濱州經略馮端明書

向者。府罷西方。道繇東里。會簿書之未暇。阻談席之相親。仰止高風。愬如終日。僅領故鄉之守紱。旋兼諸路之帥符。多病所緣。一書不講。詎謂禁塗之傑。首詰音尺之勤。賁飾過情。謙詞溢幅。矧惟俊德。夙簡睿心。眷薄伐之故區。實勁兵之要處。境控二敵。地繇百城。比煩細候。並護諸將。暫往宣於遠略。卽歸寘於近司。感頌并深。文陳奚悉。

回殿前郝太尉書

自蹊英概。頻領劇權。日圖綏御之經。坐曠寒暄之間。首紆訊尺。備戢謙懷。某官偉略沈雄。傑材超敏。早疏

榮於勇爵。旋拜寵於齋壇。入衛殿廷。提禁屯之紀律。行躋樞幄。陪近弼之謀謨。順履秋嚴。載蕃時祉。

回皇叔祖橫海太尉書

多病斬聞。誤恩治劇。日勤綏御。以先帥路之諸侯。坐歷暄涼。從企宗藩之元老。敢圖謙矩。遠枉音函。兼審順履。蕭辰。翁臻茨福。伏惟某官。籍尊天屬。望重王家。信厚夙成。衆仰翰蕃之重。寵靈益懋。早分節制之榮。倍衛燕興。永綏戩穀。

回蒲學士書

審奏書篇。旋登文館。惟聖神躬嚮於儒學。俾丞弼名言於爾知。曾是傑才。首當清舉。騁辭甚盛。占等絕優。不同無用之空文。可贊有爲之至治。方欽遠跡。遽覲長牋。欣佩兼懷。文陳非諱。

賀蔡副樞書

竊審寧朝經遠。陪幄登賢。成命旣行。羣言胥穆。伏惟某官。際天傑識。高世元猷。累年勞鎮於蕭關。小醜絕窺于漢壁。乃眷本兵之地。適圖制勝之才。參總神機。一歸睿選。卓然多算。方運留侯之籌。皎若成規。卽隨蕭相之畫。某適司留鑰。阻叩賓除。企忭並深。名言非悉。

賀路分駐泊張供備改正使書

蕭承宸綽顯正使名。側聽褒升。載深忭躍。伏惟路分供備。才推膚敏。氣稟純雄。襲慶名門。齊榮顯爵。蚤懋四方之壯志。暫提一道之勁兵。富貴自如。行發紆於遠略。公侯必復。坐追繼於先芬。感頌並深。指云奚悉。

賀焦總管書

就被宸綬。參提師律。矧北門之要地。迺朔野之會都。彈厭強鄰。方賴上公之遠略。訓齊銳卒。實首亞帥之傑才。成命旣行。羣言胥穆。俛惟儒品。將庇末光。未列慶函。首貽誨牘。永言感怍。曷盡敷云。

代王內翰上前兩府書

曩託大鈞。與書內命。無裨王體。奄遘親喪。銜哀苦塊之間。假活江湖之上。了無生意。絕貢音函。比至祥除。勉隨詔起。存幽愛之餘息。舊學逾荒。踐潤色之華塗。復來滋媿。惕然就職。迄此踰年。旋兼領於他司。得少陳於寸臆。迭懷恩紀。增跂台儀。伏惟順履春和。懋膺時祉。坐致邦猷之盛。百度其熙。出觀藩政之休。羣情猶鬱。行膺徵冊。還陟黃堂。

代賈魏公答徐州王綽龍圖書

伏審移疾自陳。露章得請。解臺端之要職。領藩守之便麾。鯁議嘉謨。雖進思之未足。長才遠用。抑臥理之有餘。甫飾行騶。遽占溫教。永言感戀。曷旣名云。

謝耀州雲陽知縣陳端祕書

伏蒙高誼。持貺華賡。賁飾過情。巽言溢幅。重惟盛禮之所屈。殆非鄙人之可常。伏以某官。器博以深。行醇而潔。小成一邑。已施惠而在民前。有諸公。卽文章而爲地。勉綏福履。行服恩榮。企頌並深。名云非悉。

代張龍圖謝二府書

井絡奧區。既就紆于守紱。河圖內閣。仍進直于禁聯。寵溢于涯。據非其地。惟本朝之講治。重全蜀之分廕。長材多擇于近班。撫衆要明于遠略。如某者賦資甚拙。應務尤疏。曾風力之不強。于事功而何有。洵揚三紀。無補萬分。頃乘單傳之行。嘗引兩川之漕。叶忠臣之馭。得少慕于昔賢。剖刺史之符。幸復臨于舊俗。而且江山雄勝。風土寬饒。班詔其間。叨榮爲甚。願乏致身之術。良階造物之私。此蓋伏遇某官甄品官匪。謨明王體。特屈朝言之重。俾膺邦選之華。亟委劇藩。載遷邇職。敢不博求利疚。勤布教條。安輯兵民。撫柔遐邇。覲績中和之詠。少酬鎔埴之恩。

代王尙書回兩制賀到任書

比解藩符。旋司宮鑰。纔休道路之勤。頓卽有詔條之奉。行曾謝懇之未敷。遽慶音之先墜。美辭賁飾之相假。厚誼謙懷之兩存。念素寡于猷爲。第久塵于侍從。絕毫毛之云補。驚齒髮之漸疎。止覲代歸。丐僻州而開放。曷圖居守。委近器以保釐。胡然邦選之誤。優得匪朝言之借重。揆能自愧。戢感逾深。伏惟翔步禁塗。日奉前旒之對。致身臺路。行應徽冊之延。銘頌并懷。文陳非諭。

回近上軍知州官員書

居守別京。坐班寬詔。初云視事。未逮馳音。敢謂高明。自存撝抑。重隣封之講好。飭記室以占書。爛然兼幅之盈。殊有美辭之溢。發函以感。置袖爲榮。伏惟望重本朝。寄隆巨屏。出觀民政。矧登治狀之優。入對王休。靡俟更書之滿。欽銘勒頌。并萃于懷。

回唐龍圖謝轉大龍知并州書

伏審并門印綬。延閣圖書。雙拜恩華。一均慶抃。伏惟某官。性餘忠諒。學有本元。危言朝犯于雷霆。高誼夕摩于星斗。不計身謀之進退。自全國體之重輕。流離江海之城。轉給舟車之運。換麟符于戎閫。遯趣諍臣之歸。領烏府之憲綱。方開真主之聽。會東藩之擇帥。倚遠略以勞賢。往提萬兵。坐制二敵。兒曹喜細侯之至。夾道拜迎。王命嘉申伯之功。匪朝褒賞。愧寸誠之未布。荷尺牘之光貽。感怍所叢。名言非悉。

謝文侍中答書

比貢單函。懼塵上竟。敢謂損鈞衡之絕禮。飭管記以嗣音。伏讀誨言。深藏感臆。恭以某官。山河間氣。社稷宗臣。早登台序之嚴。管宅宰司之冠。繫安危于天下。自任非輕。謨左右于廷中。上知逾重。遽析麟符之寄。往臨鶉首之封。擁方伯之旌旗。帶上公之印綬。付以西略。倚如長城。靡須五月之政成。復被三篇之冊拜。

到任謝二府書

別京要重。留鑰謹嚴。輒宣布于寬條。得撫柔于雅俗。茲爲厚幸。奚稱茂恩。伏念某。才可語中。識非經遠。自游揚于三紀。思少補于萬分。回爲朔野之極州。曾是中山之故地。兵皆素練。民復久寧。適丁無事之時。略諧綏御。比及終更之歲。訖享安閒。敢謂詔除。就膺居守。增以家鄉之秩。寵夫更道之行。致此假人。出于造物。此蓋伏遇某官。股肱一德。體貌兩朝。持循宰柄之公。登翊王塗之正。坯冶所暨。方圓畢成。贊行睿選之華。圖任從聯之舊。付之都會。倚以保釐。敢不祇訓兵韜。博求民隱。保閭閻之安堵。絕疆場之驚塵。上酬乾

造之仁。次答化鈞之賜。

回孫運判書

承被茂恩。出參外計。用才茲稱。爲慶良多。矧風力之素精。加治功之屢試。仍緊碩畫。貳山海之輸將。卽底顯庸。瞻京師之調度。遠貽書好。殊戢謙懷。

回賀安肅軍通判吳職方書

伏審歲課陟明。郎曹增秩。伏惟慶慰。恭惟某官。學探聖圃。名重士林。別乘雍容。聊貳軍城之治。祕文紉繹。行從儒館之游。豈茲序升。可稱賢業。首蒙書貺。第劇感悚。

代沈兵部回賀相州李太尉禮上書

伏審已卽便時。肇班寬詔。伏惟慶慰。恭以某官。傑才高邁。偉略沈雄。履親賢之所兼。享富貴而能守。詩書結客。莫非天下之英。弓劍絕人。固有山西之氣。繇廉車之茂秩。啓齊鉞之壯猷。出擁戎旆。環萬兵而開府。坐紆守紱。屏四國以爲蕃。寧閭制之久勞。卽殿廷之驟選。慶函未列。榮牘首臨。感忭并懷。文陳非諱。

代回謝三路安撫并知漣相等州答賀冬書

近以陽德初升。宜茂膺於蕃祉。書辭胥慶。輒祗率於常彝。煩管記之嗣音。損絨膝而答貺。仰欽謙矩。增戢感悚。恭以某官。名世偉才。禁塗碩德。觀風治屏。暫緊綏御之經。入覲嚴宸。行倚弼謨之略。

代王尙書謝二賢良書

伏審策當上心。名在優等。榮開賢躅。喜動儒林。竊以士固有極忠之言。而不逢欲治之主。抑自陳而曷繇。上渴聞至直之對。而不得非常之人。或後言之是悼。遭時以進。竭慮爲難。某官學際聖源。識該治體。能條教化之所阻。莫匪邦家之可行。隨詔以登。廣廷有可言之路。悉心以奮。大筆皆毋諱之辭。觀進說於此時。知立朝於異日。未遑修慶。首辱占書。感忭并深。名言曷旣。

代與李駙馬太尉賀冬書

在復之來七日。陽德其升。建子之貫三微。王心所慎。恭惟某官。氣鍾間傑。世襲重侯。自潛詩禮之精。不溺綺紈之習。茂仙枝於厲曲。增大清門。開主第於平陽。蚤光盛選。屬景長之啓候。惟時萬以叢休。某適領漕符。正遙賓閣。第馳慶牘。阻薦壽杯。

回謝接伴并遠迎書

伏審進承詔音。出迓鄰使。冒風霜之正凜。飭車馬以良勤。首貺書函。益銘謙矩。卽諧瞻晤。增劇欣翹。

代答提刑沈主客書

陽德初升。慶音首列。計方塵於齋几。遽嗣辱於誨函。禮意備形。感懷增劇。恭惟某官。風力強濟。才猷茂明。北道按章。固多於陰德。要塗被用。行籍於老成。欽頌并深。名言非悉。

代元給事回二賢良書

伏審隨詔造廷。竭忠奮筆。耀士倫而甚盛。躋策等之最高。竊以六科之擢異才。聖王憲祖宗之舊。三道之

陳大要。賢者條教化之原。伏惟某官。猷爲懋明。道誼充擴。親遘鴻圖之紹。首承清問之臨。正論危言。著厥篇而毋隱。遠謨重計。措諸世而可行。上當睿心。優入華選。側聆榮問。適總計文。曾未列於慶函。遽先紆於珍贖。并深愧怍。易究名言。

代賀新省副王郎中書

伏審就膺恩綽。進貳財閹。伏惟慶慰。恭以某官。名重本朝。才兼數器。洵領事權之要。累凝風績之優。華省握蘭。正郎垣之美秩。西州轉粟。懋使節之膺功。旋隨中詔之嚴。還任大農之劇。坐籌碩畫。佇仰給於京師。行服徽章。卽進參於侍從。側聞成命。竊怍丹衷。

賀新判都水監楊待制書

伏審顯對詔函。進升法從。兼膺茂渥。榮總劇權。伏惟慶慰。恭以某官。才貫幾深。器函剛實。親遘聖神之會。蚤紆賢業之光。董淮海之輸將。備圖碩畫。瞻京師之調度。方貳大農。風力其疑。智謀有裕。遽當容選。登踐華班。增峻官儀。直雲章於內閣。停成績用。統水利於庶邦。實允僉言。行膺柄任。某方棲暉庇。倍極欣愉。燕賀方深。蟻私曷罄。

上北京王尙書書

某東南孤生。左右寡援。向從鄉里之便仕。罕識朝廷之顯人。比爲令於河濱。始拜公於棨下。一見許以國士。從此知名。相遇踰于幕賓。特然加禮。以至奉清樽而侍飲。授華楮以聘辭。唯蒙恩紀之山邱。不知位貌。

之霄壤。方台光之下燭。邊辟命之西來。迓兵及門。征馬在道。色不忍去。言猶欲留。屈千騎以榮歸。加百壺而寵餞。命僚從以供都門之帳。假車乘以濟道塗之行。仁泱諸肌。感深以泣。載念官能之短。予無民政之長。訖由保全。乃免瘵曠。忽身居於幕府。駭跡遠于門牆。盛德未酬。寸心如結。恭惟留守安撫尙書元猷經世偉績光朝。領袖百工。聊掌別京之鑰。鑪錘萬物。卽持當國之鈞。俛惟單庸。迄望成就。報知恐後。敢效古人之所存。託庇雖遐。肯緣故吏而自外。

上運使盧工部書

某性得滯固。學迷本根。塌翼泥塗之中。抗心霄漢之上。無媒逢世。所持謹廉。以直投人。或逢嫌怒。彘從銓筭。補掾淮洲。于時使車按臨。未嘗虛月。民口臧否。易見鄙材。較諸孤宦之流。最辱上官之薦。今茲陋邑。越在窮山。雖牒訴究懷。時有一得。而衣冠過境。歲無幾何。尙安善治之間。以動當塗之聽。因竊念居雖獨必加乎慎。室雖暗猶不可欺。愈自操修。庶全世卒。迄茲再考。敢有貳心。豈謂伏遇運使工部。識度內融。聰明外照。視千里猶跬步之近。無一吏遁潔污之形。察知介懋。意欲采拔。齒牙纔啓。羽翼隨生。念微躬成就之期。在此舉爾。捨盛德挈提之力。更何門哉。況運使工部。夙簡上衷。甫成最狀。朝僉所屬。柄用其歸。行優詔之趣。還懼薦章之弗及。伏望曲矜滯滯。亟賜甄收。庶使垂成之蹤。免懷不滿之意。斯辰題品。儻一出于厚恩。異日埏鎔。願復依于巨造。捨是而往。未知所裁。

回都運孫待制書

游枉珍函。備形勤思。登車攬轡。承甫次于近封。輓粟飛芻。行總圖于碩畫。冒早春之餘凜。萃妙履之多休。良晤非遙。倍深欣企。

回賀秦州馬給事謝到任書

審卽便時。肇開于幕府。未馳慶問。首枉于牋函。惟望重于朝端。加任雄于閩外。兵民一道。緊綏御之大方。文武兼才。佇設施于遠略。罔須累日。亟底丕功。

回華州桑少卿書

自闕風規。已更月律。方阻晤言之接。俄欣音問之來。承履春和。益蕃時祉。甫告成于治績。行入對于恩章。餘覲珍頤。少符勤禱。

回延州郭宣徽書

自聞開府。嘗獲布書。喜條教之已頒。知兵民之有賴。旋紆珍牘。備寫謙懷。審順履于春和。固載蕃于時祉。伏惟某官。純忠許國。偉略絕人。綏帶邊藩。方坐籌于勝算。運樞陪幄。行入暢于元猷。益護燕輿。少符頌臆。

賀延州薛司勳書

恭惟運使司勳。才兼數器。望重本朝。自結主知。益紆賢業。付之西略。倚若長城。勳鼎待銘。罔無前之偉蹟。詔函趣覲。膺不次之徽恩。茂對令辰。載蕃景福。某心馳門下。跡繫幕中。徒虔慶牘之修。實阻壽杯之獻。

代魏公到任謝集賢僕射相公樞密司空侍中書

被遇三朝。躋榮二府。無補乾坤之造。但驚歲月之遷。矧冠宰塗。恐妨賢路。屢陳封奏。始解繁機。仍叨帥節之持。將耀里門之入。兩轡北去。未容翁子之還鄉。六轡西來。已繼召公之分陝。并護諸將。兼綏爾民。實謀謨之久勞。殆思慮之都耗。曷經遠略。可稱劇權。此蓋某官密啓睿心。力陳宰論。稱某忠藎之所守。苟有使令而弗辭。遂易守符。乃付兵要。上憑神聖之妙算。次賴鈞樞之偉謨。庶幾薄才。克濟大事。

上中丞諫議書

伏審就膺朝紱。進領臺綱。成命旣行。羣言惟允。恭以中丞諫議。器函剛實。才貫幾深。學到聖賢之歸。性兼忠義之守。諫垣審謬。職袞闕之彌縫。禁掖翺翔。寫綸言之溫厚。旋登憲府之長。獨立治朝之班。臺中之評。補聰明于真主。天下之望。聳風采于靜臣。企忭并深。文陳非悉。

謝渭州蔡待制書

往歲從知。踰年參畫。在平時之無事。猶曰匪才。方今日之用兵。復云何補。會上台之開府。總西路以議邊。勢難苟安。誼合引去。隨辟書之新選。矧自有于諸公。仍戎幙之舊居。但免爲于逐客。豈謂禁塗之元老。不遺冗路之孤生。特屈謙尊。過垂慶問。百拜伏讀。仰佳祝之所臨。一言賜褻。獲珍藏而何幸。

代魏公回趙參政書

藩條初布。嘗諧謝懇之敷。國論多餘。遠荷慶音之墜。厚辭溢美。隆禮過謙。惟參斷于萬幾。益順綏于百福。伏以某官。學優聖域。名重王朝。挺公中不倚之亮誠。履孝悌甚高之美行。貳洪鈞之宰制。未據真相之偉。

同部集 卷二十七

才。數。徵。冊。以。登。庸。行。畢。大。臣。之。能。事。倍。調。燕。鯨。少。副。瞻。祈。

祠部集卷二十八

書

代問候河北運張兵部書

帥府所總。遂成訊問之疎。使範且遙。第悵燕言之隔。惟輸將于北道。方贍給于中都。心計坐經。事功日懋。甫交春夏。未適寒暄。宜益護于寢興。卽前膺于進擢。永言瞻企。奚盡敷云。

代回張度支書

比以強敵玩塞。重師宿邊。爰咨近臣。俾護諸將。方安陽得守之後。甫爾北歸。以康定用兵之間。嘗參西略。命曰俞往。義何敢辭。竊自視短疎之阻。才相從論議之益。或上憑睿算。粗寧疆堠之釋騷。則再請鄉邦。稍覲病軀之休息。辱書云及。見意良勤。愧戢欽銘。兼深悃臆。

代回京西提刑徐郎中謝到任書

審卽便時。已臨重職。遠紆珍牘。備諗謙懷。矧風力之素強。加時名之兼劭。按章列郡。獄將底于無冤。翔步要塗。門佇符于必大。

回提刑康左藏書

比審涓辰。已諧視事。迴存勤意。首枉珍題。矧素著于能聲。復深懷于壯略。參按刑章之劇。佇登治狀之優。

欣佩并深。名言非悉。

代問候鄜州潘皇城鎮潼桑少卿書

向總帥符。每懷賢範。方悵晤言之隔。遽欣音問之來。春夏甫交。寢興良適。矧久凝于風績。行茂對于恩章。益覲珍調。少符勤禱。

代回徐州趙觀文問候書

向處近司。最叨至契。青雲當日。既得路以同升。黃閣此時。復請麾而繼去。眷言睽隔。積有寤思。檄書頗多。函訊遂缺。比惟妙履。益介履禴。伏以某官。勲懋三朝。道光一德。懇辭要路。暫收康濟之偉才。樂就東藩。自養壽臧之盛福。末由清晤。曷罄丹衷。

代回徐州趙觀文書

竊審屢陳封奏。始解政機。爰均佚于善藩。仍躋榮于秘殿。素懷茲適。清議逾高。伏惟某官。道際醇全。德函渾厚。十載台路。一心王家。舉至治于可行。避成功而不有。宰鈞咫尺。弗須徽冊之登。庸守紱優游。自喜黃堂之臥理。未修慶禮。先枉誨音。感忭并懷。名言非諛。

代回种作坊書

遠煩專价。垂致長牋。承謙矩之持循。列遜辭而刻責。佇觀後效。庸紹先芬。欽服尤深。諛言非悉。

代回南京李太尉問候書

向總帥符益疎賢範。比缺音函之奉。仰諮德宇之安。敢謂隆謙。遵先惠問。肇臨夏籥。增固生經。伏惟某官偉略冠時。純忠許國。慶傅相公之後。望重親賢之間。出布寬條。兼領別都之管鑰。行膺迅召。對司宥府之樞機。更冀珍頤。少符虔頌。

謝韓魏公書

今月五日。伏奉勅命。就充前件差遣者。大丞相之尊。矧出專于遠略。諸從事之後。乃容有于孱生。仕非所長。愧不勝數。如某者。下科二紀。孤宦四方。未爲造物之所知。已分委身于無用。向參戎于一道。甫備位於再葺。願吏課以曾無。于軍書而何有。忽聞邊釁之啓。亟賴廟謨之平。時煩上公。並護諸將。幕府諸彥。各懷所有而從行。江鄉餽儒。合謝不能而引去。弗爲逐客。已曰幸人。況辱薦章之留。更形褒字之寵。隨降俞旨。實緣重言。恭惟文武之兼資。當此兵民之大寄。凡塞外地形之險易。如探諸懷。每筆端疆事之指麾。不勞餘力。就有屬察之一得。曷裨精慮之萬分。夫何妄庸。亦被收采。此蓋伏遇判府經略。司徒侍中。以升黜天下士論之手。爲進退幕中賓從之心。聰明所臨。賢否俱判。察介愚之有守。發慰薦於無疑。敢不慷慨功名。激昂志氣。誓堅素節。圖報厚恩。舍此以還。未知所措。

答陝府知府祕監書

跡繫關中。心馳門下。自嗟仕路之晚輩。未識儒林之丈人。屢欲一書之上陳。率因多事而中廢。簡疎已甚。罪戾是期。敢圖恩容。迥出意料。首頌溫教。垂賚寒蹤。捧讀以還。感慚尤劇。仰惟舊德。夙懋壯猷。坐布寬條。

茲繼召公之聽訟。行追先烈。豈專邢晏之多才。伏望上爲邦家。精調寢饋。

代魏公問候青州歐陽尙書書

並游台路。繼領守符。道誼之尊。矧平生之所慕。晤言之隔。固終日以載思。順履煩炎。誕膺茂祉。狀惟某官。乾坤閒氣。社稷元勳。力辭幾政之繁。樂布教條之裕。功成不處。一州暫卷于經綸。治閒多餘。大筆時爭于造化。行謨王體。還慰民瞻。益護粹襟。前迎徽冊。

回礪州晁大卿書

竊審最狀告成。更書受代。扶老攜幼。莫挽鄧侯之來。進直納忠。將前文帝之問。伏惟知府大卿。器函渾厚。才貫幾深。蚤收時名。屢懋風蹟。藩條宣布。已副朝廷之長人。國論謨明。佇還家世之舊物。遠違芘賴。方劇攀瞻。首枉誨音。仰銜謙德。益調寢饋。前服寵休。感頌傾祈。不勝下懇。

回提舉李郎中書

竊審祥琴甫御。恩詔遂頒。實藉周才。復司重任。行棲餘庇。增怵丹衷。伏惟提舉郎中。望厚本朝。用兼數器。劇繁之委。中外以更。富國強兵。蚤講明于利術。飛芻輓粟。洵董按于邊儲。行底茂功。亟膺顯用。尙稽修慶。首辱賜書。感躍并懷。名言非諡。

上河陽富相公書

出刺劇州。遠彌于歲歷。坐䟽翹館。增跂于台躔。懼于上袞之威。遂缺單函之獻。伏惟布宣寬詔。偃息重藩。

陰有神明，來相福祚。恭惟某官，樞衡舊德，金石純誠。才兼文武之資，身繫安危之託。辭神幾之制勝，露公冕以觀風。太師維垣，均佚河喬之鎮。一相處外，增勞巖石之瞻。寒籥貫辰，生經迪吉。上副眷倚，益康壽祺。

與順安知軍王太觀崇儀書

向吏別都，獲依大幕。披肺腑而相照，均手足以逾親。方君侯改授于使名，而蒙鄙繼從于帥辟。朋簪一散，官路相望。北塞西州，邈焉異處。前車後乘，那得同游。朔風已寒，尊體無恙。恭惟辭才該敏，術業宏長。勳閥素高，有光華于國吏。軍城非久，卽振發于家聲。功名在前，富貴如拾。倍綏吉履，少副懇誠。

上樞密司徒侍中書

董輸將之大計，罔知經畫之所由。復侍從之舊聯，愈覺寵榮之爲重。竊以四方置使，三路難才。每至朝端之選掄，尤難河朔之付畀。蓋強敵限北，洪流貫中。金縉之所歲糜，菱楫之所時賦。連營數萬，餘卒旣廣。軍須縣地，三十六城仍繁。吏稍轉給，中費澄清。具員宜求兼能，以委重寄。如某者受性固滯，與時闊疎。曾乏器資之長，屢更事任之劇。財闕倅職，頃嘗左右于大農。漕節宣風，比歷東西之煩。使了無金穀之要術，絕底涓埃之細勞。更容短才，當此一道。靖言所自，良有由來。此蓋伏遇樞密司徒侍中，首贊神機，協宣宰論。進人欲勸其後，所以先錄匪功。與物不求其周，所以兼收片善。遂令鷲猥，訖冒龍光。敢不講圖利源，區序官品。罔有貳事，少酬大鈞。

代史館王相公答高麗王王徽書

使節造朝。專達嚮風之悃。台使備位。隨叨隆禮之辭。祗服謙懷。逾深感抱。伏惟某官器函剛實。材挺沈雄。弗蹈近規。自存遠識。詩書襲治。盛文雅于一方。琛裘輸勤。因寵榮于百世。春和所履。時社載蕃。瞻企所縈。敷陳匪悉。

又代參政馮諫議答高麗王書

斗隔天隅。日傾風問。遠沐音題之及。仍頒珍貢之餘。禮好兼隆。銘藏逾劇。伏惟某官傑才不世。精識絕人。面內本朝。自出勤恭之稟。身先一國。蚤聞禮義之興。倍順節宣。永綏福祚。其爲瞻頌。奚盡名言。

回知揚州玉壽朋職方書

嚮者清衷擇守。自付劇州。吉旦臨民。久開尊府。曾是慶音之緩。有如嚴譴之加。伏惟知府職方。名爲主知。才與時偶。歷荷寵寄。率收治功。甫息按章之車。未溫贊計之席。遽會朝廷之簡擢。往綏淮海之流離。曾未踰時。累聞速效。班條之日。已布仁擴惠以徠之。去貫之民。俄扶老攜幼而至者。行甄最狀。亟服異恩。首枉誨函。倍藏感臆。永言愧怍。曷盡敷云。

與相州僉判韓都官書

比蒙俞詔。得守故鄉。方少慰于初心。將前資于婉畫。甫懷章而就道。遽改帥以出關。事願兩違。晤言載隔。矧郎垣之碩彥。實王國之美才。卽聽褒升。倍祈輔毓。

代韓玉汝到任謝兩禁而下書

任劇非長。輒領漕臺之要部。投閒未幾。復躋延閣之近班。視職云初。尸榮是懼。竊惟朔野。實控強隣。軍須吏稍之仍繁。歲斂月支之僅足。且地賦之登有限。而河防之費不貲。所以此方尤先他路。董是外計。可容短才如某者。性迂以疎。器淺而陋。頃緣誤擢。嘗左右于大農。比復冒居。歷東西之煩使。終無利術。蔑建事功。矧中年多難之餘。當一道要司之總。愈云非據。良自爲容。幸遇某官曲揜。屏虛陰加獎與。助穆朝言之允。俾塵邦選之優。既竊過恩。兼還舊物。誓圖薄效。少答厚知。

問候新益州趙資政書

竊審就奉朝緡。再臨井絡。行前登于長道。首入覲于明廷。適冒秋嚴。載蕃時社。伏惟某官元猷經世。精識際天。挺忠純不倚之亮誠。篤孝悌甚高之美行。頃鎮全蜀。坐熙一方。遽被丁寧之詔音。竊比乖崖之治蹟。維時華夏。兼懷復慰于遠人。當代趙張。專美不容于前史。靡俟更書之及。卽聞舊德之圖。益養天倪。還謨王體。

回謝北京判府司徒侍中書

久依門牆。獨立幕府。裨補奚云于萬一。薦論以訖于再三。每蒙重言。隨改衆觀。父母能生。而不能成就。豈如盡卵翼之始終。王公或禮而莫或昭知。豈有洞肺肝之表裏。此由感臆之中出。無復僞詞之外文。直書悃悃。具述崖略。既寬苛禮之不至。又損達尊而弗居。飭管記以占寵褒之過辭。紆親翰以瀉恩勤之別諭。拜而伏讀。出誇僚友。以傳觀藏。以爲榮期。與子孫之相授。恭惟判府司徒侍中。德包衆美。澤在羣生。鍾鼎

不足鏤萬世之勳。未嘗挂口。圭袞可以肆三台之體。滋務抑躬。矧朝廷之倚方深。而海宇之瞻有在。行膺徽冊。復罔元猷。

回淮南西路提刑潘華國都官書

爰初詔還。本繼高賢之後。曾未陞見。已遷他局之間。不容循守於成規。是亦參差于幸會。汲水垂涸。淮舟亟行。叙違不假于一言。遂成輕別。馳想忽經。夫半歲中。抱沉疴。向蒙惠誨之過勤。職是報書之差緩。春暄所履。時社載蕃。仰惟傑才。休有令問。能兼數器。寧專刑獄之重難。勢非久居。別副朝廷之擢用。茲衆人之望實如此。非下交之心有獨然。願調燕興飲食之宜。庸慰禱頌瞻依之切。

回紫微李舍人書

竊審恩函賜命。詞掖登賢。伏惟慶慰。某官道貫醇深。器涵渾厚。比屬祥琴之御。遙從台節之趨。言動以書。威顏甚邇。落黃堂之試筆。豈特文章之工。上法座之奏篇。更臻訓誥之體。慶音未列。榮問首臨。媿竹交懷。名言非諭。

回蔡待制書

伏審廣屯戍守。始盛築于塞垣。甫訖工徒。爰垂褒于詔檢。建不拔之雄勢。出無疑之偉謀。不績旣成。宜被歎嘉之諭。片言何補。過形遜抑之辭。行議顯庸。益光大用。

回徐州知府趙尙書書

疎缺郵音。比苦舊疴之作。優游藩政。第勤盛德之思。順履秋炎。載蕃時祉。伏惟某官壯猷經世。偉業熙朝。重德以鎮世浮。至誠以矯物僞。宣風巨屏。方尊外牧之權。議道中台。行貳上公之舊。倍綏燕起。少副瞻祈。責重力疲。屬舊疴之間作。情勤禮厚。枉榮問之遐臨。矧惟近侍之光。暫布要藩之治。民風觀省。已洽于頌聲。王體謨明。佇膺于詔召。益綏燕餽。前對龍光。

代回慶州王給事晉州陸諫議成都府張龍圖書

代回兩府遠迎書

比者。斬解帥符。獲紆卿紱。囊封瀝懇。願從便道之行。名節垂音。趨赴明廷之覲。載驅征馭。甫次近圻。敢圖鼎席之崇。首枉鈞函之重。恩勤既渥。勞來仍周。仰止台光。喜接辭之有日。叢然愚悃。第戢感以無涯。

賀杭州胡觀文書

伏審已。即便時。肇頒寬詔。伏惟慶慰。恭以某官量函惇大。道際醇深。天下中庸。遙追于先烈。上前智略。蚤鬯于偉謀。體貌兩朝。股肱一德。斬解繁機之劇。請從便鎮之行。重遠左右之弼。臣乃付東南之都府。峻官儀于秘殿。兼領左魚。大榮觀于故鄉。迴踰駟馬。靡俟政成于五月。行膺冊拜于三篇。

回昌州張都官書

向者。某官擁麾劍外。取道關中。媿主禮之缺然。嘉賢規之觀止。睽違既久。瞻繫良深。遠首枉于珍函。審已班于寬詔。勉綏福履。行對恩章。感頌并懷。名言非諛。

問候吳副樞書

伏念假守關中。居有詔條之奉。馳心門下。坐疏竿牘之修。比審外除。甫當入覲。神明所右。福祚其蕃。恭以某官。惇大有容。直清不倚。富賢人之德業。貫夫子之文章。奮筆以對大廷。早摠珍策。飛綏而步青禁。寢服皇僚。方尹治于神畿。遠武謀于樞幄。股肱一德。體貌兩朝。銜卹家居。矧祥琴之旣御。揚休陞見。佇徵冊之所延。翼戴丕圖。緝熙盛化。得伸素志。允蹈昌言。

回崔直講書

比審庠序師儒。取德進以居其位。廟堂公相。推經明以薦諸朝。而某官學術精深。履行純茂。適當盛選。以式諸生。行將擴道。誼之淵源。極聖賢之旨趣。惇成善教。續履華塗。首覘長箋。增銘寸抱。

賀郭副樞書

伏審肇開幕府。總制邊藩。條詔所班。兵民胥悅。伏惟慶忭。恭以某官傑才高世。偉績熙朝。擁都統之旌旗。帶中樞之印綬。出護諸將。暫煩樽俎之籌。坐制小戎。行紀旂常之烈。某方糜守紱。阻叩賓闕。就慶列以無從。馳歡誠而第劇。

代回集賢相公書

始布詔條。繼馳牋牘。不謂郵程之緩。未塵几次之觀。念鼎席之久同。枉鈞函而首及。溫辭賁飾之相假。厚誼謙懷之兩存。仍審順履春寒。首調天緯。神明所右。福祚其蕃。伏惟某官社稷宗工。廟堂元老。得位行道。

擴經濟之初心。尊主庇民。嚮太平之偉績。倍祈自壽。永副具瞻。

代問候相州王祕監書

適提帥節。益阻賢規。眷言父母之邦。幸被神明之化。班春伊始。嚮福其蕃。伏惟某官才貫幾深。量涵夷遠。夙懋元龜之德。行聞大政之咨。倍保壽康。少符瞻禱。

代與相州都監魏文思書

比蒙朝綽。得守鄉邦。望鄴下之多賢。將親英槩。總關西之諸將。遽失初心。順履春寒。益臻時祉。更希精齋。以迓褒章。

回絳州薛司勳書

比聞移郡。遽辱占書。惟望重于外臺。固才兼于數器。竭籠財餽食之效。懋瞻國實邊之謀。行之累年。富有大計。忽假藩條之宣布。就煩疆事之處裁。然功名之間。雖古人而多忤。而得喪之際。惟賢者之能平。舊績甚彰。要塗行復。

回陝西都運孫待制書

審對恩函。就更使節。抗嚴旌而在道。已久屬封。枉珍牘以飛文。良銜重意。伏惟某官才猷煥發。業履精純。物望胥歸。帝心特簡。此暫煩于外計。行歸涉于近司。遐冒餘寒。倍綏妙履。卽諧晤揖。尤劇欣翹。

回晉州陸待制書

比承墜翰。審已班條。矧惟厚望。端朝傑才。高世入躋。延閣之要。出帥邊藩之雄。收經遠之壯猷。以臨一郡。報宜民之善政。豈俟三年。行被詔音。進參柄用。

代回北京王宮保書

始辭宰柄。避當路之妨賢。旋領守符。許故鄉之均佚。不圖乘障之吏。忽起開邊之師。遂改帥于關中。俾總戎于閩外。節制諸將。撫綏此民。第已布于寬條。曾未周于遠略。敢謂保釐之多暇。首煩管記之占書。禮意過勤。謙懷滋厚。不忘永好。尤劇中藏。

代王給事賀判府司徒侍中書

伏審懇避洪鈞。榮歸數里。剖麟符而作鎮。露貂冕以觀風。適揆剛辰。肇開尊府。伏惟慶慰。恭以某官誠明止性。忠亮一心。揭日月之貴名。協風雲之盛會。道光台路。勳濟王塗。二府洊更。已畢大臣之能事。三朝允賴。弗居真相之極功。力抗奏封。請還政柄。許辭尊于廊廟。聊均佚于鄉邦。駟馬云歸。拚蜀人之偉觀。百壺所餞。小韓奕之前詩。寧久袞衣之留。卽聞綈檢之召。復由外相入冠。上台某適守關中。方遙門下。阻陪慶列。第劇懽誠。

代賀集賢僕射相公書

伏審具告治廷。誕敷贊冊。進升揆路。增耀宰司。伏惟慶慰。恭以某官社稷宗工。山河間氣。久亞宰塗之序。力躋王路之平。崇賢黜姦。寬役均賦。底休功于甚盛。鬯偉績以無前。謨左右于廷中。三朝所賴。繫安危于

天下。一紀于茲。俾伊尹之保衡。近汾陽之書考。上台絕禮。已殫體貌之隆。左相極班。更益儀刑之重。某身疎材館。職繫州塵。趨慶莫遑。馳誠第切。

代上樞密太師侍中賀正書

伏以西京講物。允重三朝之辰。東國著經。實尊五始之月。恭以某官勳高盟府。道濟治朝。外鎮四夷。峻具瞻之尹石。同寅一德。永相比之台星。上日始和。繁禴備舍。第切壽康之祝。阻脩拜伏之儀。

賀二副樞書

恭惟某官際天傑識。經世元猷。總制五兵。參密謀于帷幄。發揮多算。重強勢于朝廷。順履王正。永綏天祿。某久棲台底。適領守符。就慶列以無從。瀝頌言而第劇。

賀河陽判府相公書

恭以某官鈞衡舊德。金石純誠。太師維垣。早調元于台鼎。一相處外。聊觀政于輔蕃。開祚膺期。對時納祉。某適膺守紱。阻奉壽杯。第瞻黃閣之嚴。曷罄丹函之祝。

賀三路帥書

恭惟某官任雄方面。道簡上心。兼制民兵。矧恩威之並著。外攘敵寇。固勳業之逾高。順履一元。載蕃百祿。企竇闕而且逸。薦壽舉以無從。

賀郭副樞書

恭惟某官傑才閎博。偉略沈雄。暫虛樞廷。實賴經謀之遠。都統帥路。行觀偉蹟之成。上日斯臨。茂祥攸介。某把麾茲土。望履無階。第虔慶牘之馳。莫遂壽杯之奉。

代回兩制以上賀書

領關中之通漕。曾乏寸勞。守劍外之劇州。遽叨寵寄。罔功自訟。匪報尤慙。惟是短才。屢更煩使。諸公並進。晚躋侍從之途。比歲再遷。驟直圖書之閣。復被蒙于渙渥。俾鎮撫于坤維。陳避勿從。爲容有自。此蓋某官力開公論。坐致官榮。遂使無庸之資。亦當不次之任。未據感臆。先墜慶音。愧戢並懷。文陳非諭。

代王龍圖上中丞書

向以詔條所布。風力不強。間抱舊疴。有愧昔人之臥理。親占溫教。過煩長者之憂思。積感殊深。布書差緩。恭以某官氣資方勁。業履淳修。足臨長于諍臣。爰疇咨于儁老。毅然正論。已聳臺中之評。沃乃清衷。行收天下之望。

上西京韓龍圖書

爰初王府。嘗備掾曹。止同衆人。粗了一職。敢謂去離於左右。尙蒙記憶于姓名。比從宦于關中。復拜公于檠下。不遺故吏之賤。俾廁大賓之筵。拜嘉再三。賜語良久。聿來帥幕。亦有軍需。論謝懇以稍裕。銘感懷而獨在。伏惟保釐居暇。福祚膺時。恭以留守龍圖。給事道德可師。勳業自任。垂光近侍。直延閣之圖書。倚重老成。掌別都之管鑰。行歸柄用。卽聽召還。

回省副吳工部書

審承詔綽登貳財閣。伏惟慶慰。恭以某官識遠量宏。文醇行潔。具青雲之賢器。覘絲字于書林。旋擁守麾。比持漕節。眷大農之經費。贍給邦家。實外計之委輸。淵源金穀。從來選造。尤曰難才。碩畫所圖。僉言惟允。卽雍容于法從。亟潤色于辰猷。未列慶函。首貽榮牘。永言感怍。曷究文陳。

九日與四路帥書

素籥貫辰。黃華輝節。阻奉登高之樂。第增懷遠之勞。恭惟某官經世偉才。濟時鉅業。出臨帥閫。暫資綏御之方。入覲王朝。行罄弼謨之蘊。霜稜倍厲。時祉載蕃。

祠部集卷二十九

書

代魏公賀兩府書

斗揭寅柄。帝乘震塗。尊五始以書元。風萬民而布治。伏以某官股肱王體。陶冶化工。輔累洽之休期。躋太平之極致。維春祺之所嚮。與歲歷之咸新。某方守北門。正遙東閣。茲阻壽杯之奉。第伸慶牘之虔。

賀密院書

春秋一元。本歲功之所起。天地交泰。驗卦氣之斯臨。伏以某官峻德謨明。聖辰感會。制樞廷之勝算。懋彝鼎之膺功。三朔始和。百祥備舍。某適司宮鑰。方遠門墉。阻薦壽祺。第深誠禱。

代趙待制賀張唐公侍讀書

伏審被綈檢之新渥。陟金華之近班。增峻官儀。允諧物論。恭以某官識致夷遠。材猷博通。蔑視貴高之塗。靜持恬尙之守。向淹回於儒館。旋感會於帝宸。詞掖代言。鼓動聖謨之奧。經帷進讀。發揮賢蘊之光。矧稽古之丁辰。方用文而輔治。適圖峻德。滋耀禁聯。某蚤辱厚知。側聞成命。永言欣躍。倍集悃悃。

賀樞密王侍郎書

伏審顯奉制函。榮躋宥省。邸音傳報。輿論愈諧。恭以某官學造本元。體凝簡厚。有鎮浮之德。以聳乎物望。

有經遠之業。以簡乎上心。懋服憲綱。言必關於國體。比書內命。辭每鬯於辰猷。會帷幄之虛員。慎樞機之制勝。方權綱總擘之際。睿選已明。正才傑同升之期。恩章不次。亟從內相。適置近司。太平可需。幸君子之得位。中外相慶。以聖王之用人。矧辱已知。倍深踴躍。

答澶州學士書

自去恩麻。嘗論感槩。曾牋牒之不繼。唯薄書之是供。跡日以疎。心固獨在。賴高明之所照。貸簡惰之可誅。親占教文。過形禮意。不遺下邑之賤。加惠上尊之餘。惕然汗顏。俯以拜祝。方春在序。於氣尙寒。仰惟福綏。益茂時祉。恭以某官。班條盛府。弗俟於終更。改命外臺。適圖於碩畫。不次之用。可立以須。庶令孤生。永有棲倚。

代成都趙龍圖謝雜學士及內制以上書

擢始寒生。寢階法從。誤中宸之簡拔。總北道之輸將。河旣安流。歲復小稔。第云煩使。曾罔寸勞。而一歲之間。再遷者禁職。數月之內。就領於帥藩。竊惟近侍之中。最在羣公之末。躡等以進。度才安任。願紱讓之弗從。信爲容之有自。此蓋伏遇某官。力開公論。靡卹人言。遂使無庸之姿。遽當不次之任。未摠感臆。先墜慶音。益知函貸之深。弗卽簡疏之棄。永言愧戢。曷盡名云。

謝待制以下及諸路帥府書

領使北陲。備官數月。曾乏事功之建。第循餽輓之常。蒙以菲才。擢於不次。付蜀門之劇鎮。加禁閣之崇聯。

遂列榮階。訖無允報。勉收愧汗。冒對恩章。方恐懼於煩言。益省循於愚分。踰涯已甚。取誚宜然。敢謂愛私。首貽慶問。溢美辭而滿幅。永嘉好以兼懷。戢感良深。文陳豈悉。

與交代韓端明書

比者就蒙渥渥。移守坤維。鎮劇地雄。俗繁物夥。有江山之控帶。兼民卒之撫綏。唯是短能曷知。遠略躡班。行而亟用。瀝悃幅以自陳。讓不獲從。媿無以釋。賴繼高賢之後。具存善政之宜。舊必告新。願備言於矩矱。小而任大。庶盡力以持循。已飭單車。卽登長道。揖風期而不遠。獲天幸以何多。恭以治功休成。謠頌騰洽。介圭入覲。行對巖廊之睟容。英袞暢謀。佇還家世之舊物。倍調燕餼。少副欣祈。

謝永興軍知府王龍圖書

幕府初開。謂必收於豪俊。辟書累上。終無異於孱庸。自應所知之求。莫如茲舉之確。旋叨成命。增悚懦衷。竊以陝服以西。雍都爲劇。師壓五路。兵雄萬屯。從來長人。得自選士。雖指麾一定。俱專委於文書。而綏御兩間。亦與聞於論議。參是機事。要惟傑才。若某甚愚。無他可采。驅馳州縣。唯薄書期會之是知。生長江湖。何車甲訓齊之曾試。乃冒從軍之選。殊乖責實之宜。非保任之使然。曷僥倖而及此。斯蓋伏遇知府安撫龍圖。誼無求備。請在必行。存心獎提。極力論置。始奏已光於疏賤。矧至再三。短能絕跂於高明。寧裨萬一。第堅素守。益考舊聞。侍經遠之談。使少知於方略。免陋儒之誚。期自奮於功名。庶幾立身。以報知己。過此以往。未知所裁。

與永興機宜張寺丞書

向從冗役。殊負宿心。遽應辟書。得赴知己。始被命而唯喜。旋省才而輒憂。第局惟近聞。安及遠略。儻陪堂上之密議。何所建明。猶賴幕中之並游。久已詳達。再慮及此。中懷釋然。矧惟高明。嘗辱雅素。促裝待發。將往庇於末光。稅駕就安。卽前咨於餘論。甫交春夏。未適暄寒。倍順節宣。少副依嚮。

上前通判張郎中書

某效官小材。爲邑大府。辱存鄉曲之愛。視若子姪之親。吏事缺踈。一切不問。公庥掩覆。二年于茲。適蒙據依。旋值代去。自嚴馭之還闕。苦孤禽之失枝。違離尙新。感戀如昨。恭惟某官。才猷膚敏。方格淳修。聖世淹回。衆起潛郎之歎。士林企竦。佇紓賢業之華。

代元給事賀判都水監楊待制諫議書

伏審進承恩綽。升踐嚴塗。邸報初傳。朝倫胥慶。恭以某官。傑才經世。精識際天。名重本朝。用兼數器。出提漕節。總山海之輸將。登貳財閫。瞻京師之調度。旋紓碩畫。愈動上知。奉十行之詔。除躋七諫之班列。知謀通裕。周水利於庶邦。法從凝嚴。直雲章於內閣。行光台序。入鬯辰猷。方庇末暉。側聞新命。永言竦怵。曷盡文陳。

代元給事回澶相瀛定等州禁煙問候書

葭律布和。桐華發秀。過形禮意。特損書音。恭惟某官。經世偉才。濟時鉅業。出臨治屏。聊布於寬條。入覲寧

朝行膺於大任。適丁火禁。益介春祺。

代答澶州李待制書

伏念去德尙新。瞻風方劇。敢圖高誼。特徇隆謙。飭管記以占音。走兵弁而垂貺。溫辭溢幅。厚荷兼懷。恭惟某官名重本朝。才周數器。蚤列諫垣之祕。仍躋延閣之華。出殿兵藩。緊治功之連最。入祗嚴召。行幾政之參聞。上爲廟朝。倍綏燕饒。

答諸郡知州書

葭律布和。桐華發秀。敢圖厚意。特枉珍題。願履令辰。具綏景福。行甄治狀。入對恩章。感頌所深。文陳奚悉。回賀懷州王大卿書

伏審顯承恩數。增峻官儀。伏惟慶慰。恭以某官當世傑才。爲時儻老。效治功於已試。懋風力以逾強。聽頌棠陰。載光循吏之目。升華棘位。適正名卿之班。未列慶函。首貽榮牘。永言感怍。曷究敷論。

回蘇史館書

試篇甫上。書殿旋登。迭聽審翊。倍增欽忭。竊以六科延特起之士。能直言者在選最高。三館育非常之才。爲太史者得名尤美。某官識際今古。學該聖賢。歷程有用之資。俱踐絕優之等。英聲已滿于天下。逸軌絕攀于士林。豈唯觀册府之書。以文章爲己任。必也濟治朝之美。發事業於他先。曾絃慶之未能。遽占書而首及。永言感愧。曷究文陳。

回孫侍講書

伏審拜命紫宸。解經朱邱。伏惟慶慰。聖人方嚮於儒學。敦教天支。賢者親承於詔書。進官王府。某官識探聖圖。名重士林。遽被僉諧。首當華選。應劉接武。方勸講於溫文。蘇晉飛聲。佇代言於制命。猥貽榮牘。良戢謙懷。

回郝太尉書

自總計臺居。有文移之冗。莫馳書舍。缺諮福履之安。特枉教音。益銘謙德。恭惟某官。忠勞許國。材武絕人。久試效於塞垣。累收名於勳冊。旋膺褒律。爰建將銜。統禁旅於殿巖。方深帝眷。本天兵於樞幄。行穆朝言。伏望上爲邦家。精調寢餼。

問候鄆州李太尉書

籠財北道。第日總於計文。引領東藩。遂坐疏於音尺。伏惟靜班寬詔。翁萃龐褱。恭以某官。偉略濟時。純忠許國。挺生勳戚之胄。傑出沈雄之才。旋建將銜。往臨帥閫。溪堂式宴。時宣樽俎之謀。海宇所瞻。行付樞機之任。伏望上爲邦社。精調寢興。

回永興王龍圖書

向從煩使。久去珍羣。方倚重於藩垣。遽占書於管記。美辭賁節之相假。厚誼謙懷之兩存。藏以爲榮。歆然戢感。伏惟班條有裕。介福其蕃。恭以某官。業履純明。氣質方勁。蚤列諫垣之祕。旋升延閣之華。撫一道之

兵民暫勤西略。贊萬幾於神聖。行鬯偉謨。伏望順序自持。副時所企。

回史館蘇學士書

伏審給札禁局。飛綏祕館。騫騰此始。欽忭逾深。竊以在先皇之朝。舉極諫。而得中殊選者無幾。直太史之筆。用試言。而遂登此職者尤稀。某官抱偉特之傑才。蓄閎深之精學。高視當世。前無占人。奉對以條。安危治亂之原。策名第一。析理以論。進退邪正之體。占等最優。既已仰致身之功名。行將觀報主之美政。未容敘慶。首辱貽書。感愧并懷。名言非諛。

與總管通判而下書

叨承辟命。誤玷恩章。會大帥之臨藩。兼資綬御。引短才而入幕。奚補聰明。矧江海之陋儒。暗風雲之壯略。第從知己。祇負慙顏。賴盛府之多賢。論兵有素。容孤生之竊幸。備位其間。已促輕裝。有涯伏謁。永言跂忭。曷盡名云。

與諸官書

濫膺辟書。獲從幕府。所愧枵然之質。將追賢者之游。竊天幸以良多。接風期而甚邇。永言欣企。無論悃誠。別沈少卿書

向者爲邑河濱。寄身節下。伏蒙某官寬部官之禮數。厚國士之恩憐。唯時銘心。何日忘德。逮賤子從知於幕府。會明公被召於京師。念失據依。思論感戀。門有迓吏。勢不得以久留。路逢還鷲。業已圖於一見。旋聞

大水驟瀆近畿。頗惑道塗之言。遂從舟楫之便。參差素願。悵快愚衷。惟萬事之博通。固一時之傑出。當朝廷之大用。非公而誰。爲邦國以自持。茲某所禱。

代趙待制謝延州程宣徵書

伏蒙某官特賜答教。并以覽先祖廬江集尊篇垂示者。大雅與觀。曷深作者之意。遺篇增耀。足慰孝孫之心。恭惟某官。社稷宗工。山河間氣。宣風外闡。縣地數州。乃乘坐鎮之餘。能適行吟之興。暢彌高之嘉句。發既往之幽光。以某先祖微命。恰占當時弗偶。卷生前之事業。一肆於詩。借歿後之聲名。特抒厥詠。兼傳副本。遠貺孤生。猶韓吏部之序楊公。得匪貴人之存志。元相國之遇嗣業。愛其大父之爲文。庶揚野史之前芳。永與楹書而共祕。欽銘欣幸。奚盡名言。

賀唐密學授左諫議權御史中丞書

竊審就膺朝紱。進領臺綱。伏惟慶慰。恭以某官。才貫幾深。器函剛實。性兼忠義之守。學到聖賢之歸。危言朝忤於九天。清議名喧于四海。要官厚祿。視如一羽之輕。大節高名。坐若泰山之重。屯夷殊致。明哲惟鈞。罷籠朔野之財。未煖河間之席。亟召登于憲府。仍臨長于諫垣。臺中之評。行開英主之聽。天下之望。復聳諍臣之風。矧玷雅游。倍欣成命。

代馮當世問候定州王尙書書

阻庇末光。逖瞻頓德。以官能之疎短。當尹治之浩穰。舉爲寸慮之勞。坐致尺書之廢。伏惟樂班寬詔。靜鎮

要邦陰有神明。來相禧福。恭以某官。識凝簡厚。才貫幾深。偉業發揮于朝端。高文鼓動于天下。屯夷殊致。明哲惟均。居峻官儀。踐中臺之八座。出宣帥略。領全趙之十城。行奉召音。進光册拜。伏望上爲宗社。精調燕興。

代賈魏公與中書賀冬書

一陽出地。萬寶乘時。漸萌發毓之仁。宜展履長之慶。伏以某官。位尊台路。勳濟王塗。對日月之休明。變陰陽而順正。適開令序。誕擁蕃禧。方守別州。正疏翹館。莫前爲壽。第劇馳誠。

代馮內翰答洋州蔡郎中書

伏審治功第最。褒典陟明。遠正積星之聯。益光守土之寄。慶音未講。誨牘茲先。篤雅眷以逾勤。戢丹悰而增劇。善邦敷化。方撫于遐疇。寒籥貫辰。倍綏于妙履。

與北京諸官書

某拙直少機。闊疎爲治。越再葺而遂去。訖大庇之焉。依旋從辟于關中。第馳誠于門下。秋炎尙熾。時祉載蕃。仰惟賢業之光。已登最狀。側聽上恩之懋。亟服華章。瞻頌感銘。并深下懇。

答諸縣等賀到任書

某素昧戎機。繆參帥畫。纔備員于幕府。稽論謝于牋函。首墜書辭。過形禮意。謙勤良甚。愧荷并深。

與王廷評太祝書

向者尙書開府。小子字民。會榮侍于親闈。幸屢登于賓閣。歷觀子舍之賢哲。罕出君家之弟昆。從辟西來。馳誠北望。秋炎尙熾。時社載蕃。矧素蘊之甚充。計華塗之可跂。倍綏寢味。少副瞻祈。

代王樂道龍圖賀延州陸待制書

審卽便時。已開尊府。伏惟慶慰。恭以某官。性惟忠亮。學有本元。爨桂管之須才。分竹符而領帥。兼祕殿之論撰。重要蕃之撫綏。谿會服馴。嶺表寧輯。旋進升于延閣。仍出護於塞垣。賴罇俎之前籌。付之遠略。寬朝廷之西顧。倚若長城。教令肇宜。兵民胥悅。莫遑就慶。第劇馳誠。

代河北都運趙待制上照文僕射相公賀正書

春秋之一爲元。肇謹歲端之起。天地之交曰泰。適觀萬物之通。恭惟照文僕射相公。六德謨明。千齡感會。位劇宰塗之冠。體隆尹石之瞻。勳力盛而弗居。懇斬身退。詔旨嚴而竟起。愈使道光。上日斯臨。茂祥攸介。某心馳翹館。跡繁外臺。邈無拜伏之階。第切壽祺之禱。

賀集賢相公書

恭惟集賢相公。秉國大鈞。代天元緯。彌縫袞職之闕。調序鼎司之和。堯舜吾君。拱揖九筵之上。伊周諸已。儀刑萬笏之前。開祚膺期。對時納祉。某適提漕節。阻薦壽觴。第瞻黃閣之嚴。曷罄丹函之祝。

賀參政歐陽侍郎書

恭惟參政侍郎。學際聖賢。量包公輔。文章飾至治之體。忠諒簡上方之心。百度咸新。少見武公之效。萬幾

參斷。尙淹真相之才。維日三元。具時百福。某籠財北道。望履高門。徒虔慶牘之馳。尙阻壽杯之獻。

賀參政趙侍郎書

恭惟參政侍郎。朱絃純音。清廟偉器。蚤貳中階之論道。適毗上德之持盈。坐底斯民。游大庭赫胥之世。力躋至治。復開元貞觀之風。三朔始和。百祥備舍。某久棲台庇。方總和權。就慶列以無從。瀝頌言而第劇。

回兩制兩省及皇親節度防團刺史書

比者。得守故鄉。冀安病質。請從便道。屢私悃之上陳。訖被溫書。許清光之入對。適臨近甸。首枉珍函。親德範以非遙。懷感悚而兼劇。

回省府館閣書

比者。祇從召節。遐飭朝鑾。將入覲於朝廷。適前臨於近服。敢圖臺閣之範。遠枉牋函之音。展悟有涯。欣銘滋劇。

回陳樞密書

竊審入對清朝。還登陪幄。載光睿選。允穆朝言。伏惟某官。莊重自持。直清不倚。蚤與神機之議。屢從帥節之行。居然偉謀。伏有勝算。往綏一道。雖所繫之非輕。坐制五兵。在僉諧而尤重。自聞新命。適抱舊疴。旋易地以云東。愧布書之獨後。首紆誨翰。增戢感悚。

回滑州鈐轄王宮苑書

故鄉乞守。方幸便安。重客假塗。比諧展覲。旋成睽隔。殊極傾馳。承已總於兵鈴。遽首貽于函訊。適臨窮臘。益保粹襟。感祝并懷。文陳非諭。

回北京王宣徽書

故鄉得守。方自適於初心。全魏撫封。忽相傳於輿議。豈伊綏御之要。可屬衰疲之餘。矧未奉於誤恩。猶少安於鄙抱。慶音遽至。已曲紱於交承。禮意雖勤。敢豫聞於惠貺。第深愧感。奚盡名言。

回青州歐陽觀文書

伏審就易東藩。肇開尊府。曾慶音之未講。遽榮問之先臨。祇服謙懷。增銘感臆。恭以某官。際天蘊識。名世生才。學造聖賢之歸。性兼忠義之守。更謀謨於二府。懇避政幾之煩。卷康濟於一州。洊拜條詔之裕。矧元猷之尙壯。宜舊德之是圖。僅聞五月之政成。行被三篇之冊拜。

回北京王宣徽書

比者叨被恩繙。與司留鑰。曾是久勞之後。懼非劇任之宜。然善政有條。敢斬於必告。而知才相繼。靡俟於更爲。伏惟某官。道貫將明。器函康濟。早懋元猷之壯。累煩遠略之宣。召節促歸。矧上心之傾佇。政鈞圖舊。行王體之謨明。卽遂瞻承。倍深欣頌。

回集賢相公書

自遠台符。遙新年籥。布書不數。慮浼於高明。佔教遠臨。過形於眷與。兼審坐論大政。舉集蕃膺。伏惟某官。

一德壯猷。三朝元老。才兼文武之術。身繫安危之機。伊尹倚衡。矧早謨於王體。汾陽書考。庶永慰於民瞻。願加調護之經。以養崇高之福。

代元厚之回賀趙團練書

竊審給札程文。拜恩增秩。天倫繼美。朝論推榮。伏惟某官。望厚宗藩。學探聖闡。弗流富貴之習。自服詩書之勤。遠以名聞。旋從試可。卽環尹之舊列。如團練之要班。經蘊旣摠。官榮此始。比緣考藝。茲辱貽賤。感恩并深。敷云匪悉。

代魏公回陳龍圖問候書

比者。總帥路以分符。來臨本鎮。會使車之隨詔。歸赴近班。未遂晤言。遂成離別。方企賢規之粹。遠貽書舍之音。蚤羽翼於東朝。行股肱於元后。炎威云兆。時祉載蕃。益護寢興。少符瞻頌。

問候昭文相公書

帥路獲兼。實託大鈞之庇。台躔在望。阻瞻上袞之光。燭暑貫辰。政幾宅慮。神明所祐。福祚其蕃。伏惟某官。道德宗工。儀型元老。盟府早傳於偉蹟。宰庭多守於前規。比深當宁之知。還踐阿衡之舊。首調萬化。方鑿商相之和羹。躬迓百祥。更願留侯之彊飯。上符帝倚。下慰民瞻。

回韓刑部書

比者。外計擇使。方來董于輸將。小戎款誠。遠往煩于慰納。甫休行役。良適燕興。惟望重于本朝。復才兼于

數器。卽膺顯用。以紹先芬。

回經略司勾當劉郎中書

比喜還轅。方接幕中之教。未溫坐席。遽從塞上之行。清範載遙。珍函遠及。益欽勤意。良戢鄙懷。

回慶州王給事書

自當帥領。遽歷於炎涼。遐企賢規。弗忘於朝夕。遠紆勤問。備載高情。惟近侍之垂光。行嚴宸之促召。益綏燕寢。茂對龍光。

京西運使范司封問候書

比者。外臺甚邇。喜時奉於賢規。中詔遙來。遽就更於使節。自聞新命。屬抱舊疴。悵餞別之不遑。積攀瞻而尤劇。倍綏寢味。前對褒升。

回慶成知軍書

專介之來。長牋爲覲。以軍榜之初廢。謂使領之下遷。利疚備論。感銘第劇。適臨炎酷。倍衛燕興。

代回河中府蔡學士書

紉書懷槩。竊幸後先之相望。典禮班條。旋成內外之異處。茲劇賢規之企。遽承誨牘之貽。審履歆炎。載蕃禋社。伏惟某官。學優聖闡。名重士林。才識兼長。方提太史之筆。事功俱最。聊剖諸侯之符。行被詔音。進光法從。益綏燕起。少慰瞻馳。

代魏公回北京王宣徽書

竊審介圭以覲。方入見於清光。留鑰所司。仍重煩於舊德。承還大府。已布寬條。伏惟某官。才貫幾深。體凝簡重。粵從神聖之臨御。未識公台之表儀。暫被召歸。數更進對。嗟相見之晚。已美于壯猷。知非常之賢。行聞于大用。甫煖保釐之席。卽參造化之機。首枉音題。良深感臆。

回河北都運陳龍圖書

竊審進加禁職。出總漕符。視事云初。滕書首及。矧惟厚望。獨映近班。直內閣之圖書。董外臺之金穀。侃然賢者之正論。早嘗羽翼于東朝。簡在聖人之淵衷。行置股肱之上笏。豈伊轉給。可盡猷爲。益護寢興。少符欣頌。

回鄭州龍圖李侍郎書

審卽便時。已開盛府。首紆榮問。備戢謙懷。伏惟某官。經世壯猷。端朝儻老。備紓賢業。益重主知。直延閣之圖書。遙光禁職。宣輔蕃之條教。肇懋風聲。倍冀自持。行膺大用。

答趙州通判韓虞部書

賢範阻遙。條逾于半稔。軍書鞅掌。遂缺于單函。何偉度之崇謙。枉盛辭而垂賁。兼承妙履。誕擁蕃禧。伏惟通判虞部。器識純明。材猷膚敏。關決善蕃之治。已懋風聲。延登要路之游。尤光世德。永言欽頌。奚盡名言。

回新梓路運使韓少卿書

審承恩詔。出令計籌。邦選旣行。朝言惟允。矧兼才于數器。比贊畫於中畿。績以凝時。名逾列郡。行引東川之漕。仰瞻大農之財。佇經費之旣充。卽褒章之增懋。首紆榮問。良戢厚情。

回邠州閻諫議書

叨榮累紀。愧無遠業。以濟時圖。報一端竊效前人之引類。矧惟耆德。嘗陟從聯。淹徊守麾。沈抑賢器。加舊職之未復。輒露章而有聞。何謙矩之自持。枉誨函而多謝。佇膺大任。倍冀珍頤。感頌并深。名言非悉。

回韓刑部書

會遇關中。曾晤言之未足。淹徊塞上。已晦朔之載周。夫何雅意之存。屢有珍函之及。寇集納款。行復命于本朝。使節增光。亟躋榮于要路。秋炎尙熾。時祉其蕃。益護燕興。少符傾頌。

回判侍郭待制判銓孫待制書

總帥路之劇權。脩更累月。邈禁塗之碩德。增跂高風。何雅意之迴存。枉珍函而遠及。矧惟賢業。親會聖辰。陟降近班。聊承于願問。發揮深蘊。行與于謀謨。素籥兆涼。粹襟迪吉。

回本路監司書

多病之餘。久叨塵于任重。寬恩所假。方偃息于故鄉。逮奉更書。俾司留鑰。懇辭雖確。成命弗回。矧惟守紱之紆。適在史臺之庇。敢圖謙矩。首枉慶函。愧荷良深。名言非悉。

回滑州蔡待制書

自縮故鄉之紱。寢闕晤言。每開順驛之筒。必紆訊問。何雅懷之逾厚。知高誼之迴存。審履春寒。載蕃時祖。矧惟帥節。久駐邊藩。緊遠略之勤宣。已豐功之茂建。召音行被。大任攸歸。益護寢興。少符傾頌。

到任謝集賢及樞相樞使書

向辭宰柄。旋董戎旃。因累牘之自陳。始懷章而得請。仕宦云歸于桑梓。歲時獲展于松楸。殊適初心。尤爲私幸。久勞之體。如痛定而後思。多病之軀。合力窮而則止。尙期滿歲。少息餘生。遽移全魏之居留。遂奪清漳之臥理。寬條所布。僅能勉導于上恩。遠略未明。何以率先于帥路。胡然冒處。抑有由來。此蓋某官密啓容心。力陳宰論。以二邊之要。固嘗備於使令。而四履之封。因許兼於綏御。庶殫薄効。更賴偉謨。

回都運副劉待制書

伏審顯對恩章。榮躋法從。計文兼總。輿論僉諧。某官方格淳修。才猷膚敏。比陟諫垣之峻。旋提節漕之雄。內閣登賢。久穆端朝之選。外臺倚重。暫籠朔野之財。未列慶音。首紆珍牘。其爲感愧。曷盡名言。

代回新知府待制書

竊審顯承明詔。就領便藩。荷盛意之隆謙。累勤辭而垂貺。某官氣函渾厚。道具粹醇。學該經緯之大原。論極安危之至要。經帷勸講。早垂近侍之光。鈴閣班條。尙屈真儒之蘊。某比塵累牘。得守故鄉。雖居匪久。安敢忘於必葺。而事有未盡。當俟於更張。

與王宣徽書

叨被制函。俾司留鑰。莫辭成命。爰促輕裝。征馭載馳。祇赴別都之劇。近郊甫次。首蒙珍贖之貽。荷禮意之尤隆。懷感悚而倍切。

回恩州知府劉留後書

頃從諸生。已服盛德。聞道先後。固爵齒之迥殊。效官東西。曾聲顏之未接。敢謂過存謙矩。首枉誨音。伏讀載周中藏。尤劇恭惟。知府留後。氣函剛實。才貫幾深。復辟危言。早建安危之策。總戎遠略。晚章文武之資。矧久出於簾車。行進升於樞幄。春和云半。時社載蕃。伏望上爲廟朝。倍綏燕餼。

與益路提轉書

比者竊冒恩書。亟遷禁職。罷籠財於北道。俾班詔於西州。唯是罔功。併茲假寵。引守章而自媿。幸使範之焉依。已治輕裝。將叱疾驅之馭。有諧清晤。庶降旣見之心。欣企兼常。名云非諭。

代趙成都到任謝兩府書

分蜀門之印綬。已玷恩章。直延閣之圖書。仍叨禁職。據非其地。寵溢於涯。竊惟天下之奧區。無若坤維之劇部。兵民兼制。政事倍繁。遠略弗明。重任安寄。如某者。跡起寒士。世無顯人。敢爲身謀。以欺日月之照。嘗有言責。輒犯雷霆之威。繼被遇於兩朝。亟升華於近著。諸公同列。最曰晚躋。一歲再遷。遂當顯用。罷輸將於北道。俾綏撫於西州。寸勞未收。環視增媿。都乏致身之術。率繫造物之私。此蓋伏遇某官。助平王塗。借重國論。致淺疏之近器。領險阨之名藩。敢不勤宣詔條。力究利病。雅俗俾歸於坐鎮。少布上恩。用人雖取。

於後來。庶逃物論。覲續中和之詠。兼酬銘植之仁。

上賈侍中書

爰初冗官。固管託于洪鈞。訖至近聯。曾未瞻于上袞。比司通漕。久舍別都。獲天幸以何多。拜台儀而甚數。廓至誠而相接。忘絕禮之自居。移守蜀門。去離材館。飭嚴駟而臨餞。特借道路之光。扞大句以寵行。永爲篋衍之祕。雜然感戀。萃厥悃悰。恭惟某官。業履崇高。智謀光大。更文武之二柄。洞安危之大機。書功旗常。留範廊廟。適均勞佚。暫寄重于師垣。久馭儀刑。行召還于公位。

代賈魏公移許州謝政府書

誕頒明制。祇被茂恩。付渙水之印章。還魏都之筦鑰。飭躬趨而將命。俾手舞以知榮。某親會聖辰。早塵台序。旋業文武之二柄。曷究安危之大機。總一道之兵民。第勤遠略。上三年之課最。曾罔寸勞。自視晚齡。久當重鎮。游披懇牘。斬守便藩。獲遂請麾之誠。良由造物之賜。此蓋伏遇某官。鴻猷華國。巨業代天。因密啓於宸衷。致俯從於人欲。挺銘所及。銘鏤無忘。

回王尙書書

祇承俞詔。獲改便藩。乃屈高明。繼掌離宮之鑰。具存摛抑。首騰記室之牋。政有俟於更張。誼無煩于必告。卽馳輕傳。阻伺前旌。企佩井深。敷論罔旣。

回謝兩府親王使相遠近書

詔移輔郡。叨遂于私。誠道出神。都獲修于嚴覲。特屈崇高之禮。首紆勞來之音。戢感良勤。指言非悉。

上知德州張仲巽屯田書

少游諸某公。蚤服盛德。自嗟仕路之晚輩。未識儒林之丈人。比沿臺牒之行。與考郡廉之藝。去取有所未至。曷裨賢太守勸駕之勤。進退于此不遑。遽蒙下執事虛襟之禮。既飲食以將懽恩之厚。又車馬以爲惠顧之光。已而旋歸。復爾臨餞。賜善誨俾知守職之繩墨。授雄文以示立言之範模。遠離尙新。感戀如昨。霜稜逾厲。氣宇增和。恭以知郡屯田。行高古人。名重當世。治狀第一。矧風績之其凝。召音以三佇恩章之茲及。伏望爲國自壽。副時所瞻。

代上王尙書書

某仙籍後陳。名附青雲之久。仕塗累紀。願垂素髮之多。引愚分以甚明。冒人知而安可。向當遠宦。免就冗司。委吏仲尼之所爲。詎輕倉庾之氏。歸志孟軻之所有。祇恐田園之蕪。未能決去以拂衣。尙爾投閒而志食。所繫官局。將庇台光。比例奉於公函。敢少論於私悃。伏蒙損崇高之位勢。曲軫寒蹤。厚媮薄之時風。親占溫教。悚然伏讀。謹以榮藏。恭惟某官。奧學入聖賢之微。貴名揭日月之上。華要之選。翺翔欲周。八座劇班。聊掌別都之鑰。三篇休命。行調真宰之鈞。俛惟衰遲。永有棲倚。

上提刑王郎中書

伏審清衷簡在明旨。召還。謂使旆之卽南。躬當前賀。致公函之缺上。顏有餘慙。仰恃優容。少寬誅斥。恭惟

權府提刑郎中器資渾厚術業宏長奧學入聖賢之微清風承公相之後官聲所至物論皆歸適當容哲之臨朝不限賢才於累日按章朔野民適底於無冤參計甘泉財行聞於有羨俛惟冗宦方備屬官雖欣君子之得時第恨孤生之失庇

回鄆州郭宣徵書

近審懇避中樞往綏東土云初開府卽辱貽書迨此發函已聞易鎮遂稽布謝尤劇愧懷伏惟某官勳濟王家序先古路傳汾陽之將略提汶上之帥符坐席未溫遽改邊藩之寄寇巢爰殄復歸陪嚙之嚴銘頌并深諭言奚悉

回諸道轉運及諸官賀判相州書

自辭宰柄旋領守符畫錦云歸幾遂鄉邦之樂夕烽有警遽分疆場之憂比獲慶音已當帥職佩詞情之兼厚輸悃幅以稍稽感愧并深名言奚悉

回運使范司封書

審奉恩緝就漕更節未諧修慶猥辱騰書伏惟某官世濟大忠氣函間傑適按刑章之重甫臨陝服之交調兵食于四方遵圖碩畫改使權于中道靡聽固辭聊藉輸將之才卽登要劇之任

賀延州郭宣徵書

伏審見吏民已班條教長城之倚衆議所均伏惟某官偉略沉雄傑才英邁向輟神機之貳出當師路之

先殆疆事之告成。被詔音而入覲。確然請郡。溪堂之坐未安。復此臨海邊宇之情。尙鬱行平小醜。還奏丕功。垂光旂常。制勝帷幄。

回秦州馬給事書

西師所總。方圖綏御之宜。重客初來。未盡將迎之禮。睽違尙邈。企仰殊深。何過篤于謙懷。仍曲存于雅意。猶屬道塗之勞頓。已形牋牘之勤拳。展讀載周。感慙兼劇。佇聞開府。續獲馳書。順履春寒。益蕃時祉。

回并州王端明問候書

自違風則。遙改歲端。方疆事之是經。曾郵音之未至。猥先流問。祇益愧懷。惟文武之兼資。本公台之餘慶。勤宣遠略。屢易左符。矧薄伐之故區。實勁兵之要處。境控二敵。地綿百城。暫煩細侯。往護諸將。已聽威聲之著行。甄治迹之優。倍綏燕興。前服光寵。

回賀提刑趙司封書

審膺中詔。就領外臺。伏惟慶慰。某官術業淳深。器資端勁。商於出守。益懋于風聲。陝石按章。未充于時望。行圖睿譔之舊。亟還論思之班。首枉書音。尤增感臆。

回閣待制賀轉給事書

祇奉綈函。驟登瑣闥。實罔功而被寵。固匪服以抱慙。曾是短才。訖無善狀。同時並進。最日晚躋。一歲再遷。不由顯效。此蓋伏遇某官。褒華所借。言味有加。致此泛恩。及于屏品。尙未敷于感臆。乃前墜于慶音。愧戢

并深。名言非悉。

代張景言回諸處賀書

自叨煩使。汔此彌年。在餽運之非常。于事功而何有。被誤恩于乾造。付劇鎮于坤維。并假寵光。仍遷禁職。尋啓還而弗聽。曾論謝之未遑。首墜慶音。備形禮意。勤辭溢幅。厚飾過情。感愧并深。名言非悉。

與交代趙龍圖書

就蒙中詔。移領西州。兩川之衢。百賈所會。中外兼制。兵民實繁。顧惟短才。安有遠略。賴同升之先職。嘗並貳于大農。今茲守符。復繼賢躅。固論契之莫厚。容乞靈之有繇。舊必告新。覬詳聞于善術。守而弗失。當謹奉于前規。再被十行之書。將驅九折之馭。風期甚邇。天幸何多。恭以遠撫毗黎。休成治績。高名大節。早取重于端朝。正論元猷。行入毗于新政。倍綏燕起。少副欣祈。

回同州趙大監書

伏審進膺中詔。出領左符。條教初班。吏民胥悅。伏惟慶慰。恭以知郡大監。端朝雋老。經世偉才。風績蔚昭。乎吏師。時名早動于人主。官儀茲峻。兼治于尙方。人瘼所求。遙臨于東郡。靡需報政。行聽召還。曾是單蹤。方繁巨庇。未修慶問。先枉誨音。愧悚欣銘。無諭卑悃。





33
14
1897

祠部集六




成 集 書 叢

編 初

者 編 主
五 雲 王

行 發 館 書 印 務 商



祠 部 集
(六)



3 0649 7717 0

強 至 撰

祠部集卷三十

書

賀樞密相公書

按璣衡而考度。維斗建寅。揭象魏以班常。俾民觀治。恭惟樞密相公。助高盟府。道濟治朝。才兼文武之資。身繫安危之重。樞廷制勝。以坐鎮于四方。宸扆仰成。茲奮熙于百度。維春祺之所嚮。與歲歷以咸新。某職總計臺。跡疏材館。徒切壽康之祝。阻脩謁對之儀。

賀樞密太尉書

恭惟樞密太尉。元龜先識。隆棟巨材。日宣九德之常。坐制五兵之本。廟謀密勿。已躋天下之安。邦禮論思。愈祕省中之語。遙臨元朔。翁受蕃禧。某總計使臺。馳誠賓庶。瞻風滋劇。介壽無階。

賀省主蔡給事書


蒼靈布序。華歲閏端。肇二氣之泰通。資百昌之咸遂。恭惟首主給事。才包王佐。道貫民彝。名躋日月之高。學破鬼神之奧。躋中都之調度。坐懋豐功。渴四海之儀刑。行膺徽冊。發春茲始。介福攸同。某蚤託下風。適提外計。徒敍誠於竿牘。阻馳慶於庸門。

賀省副郭郎中書

083
112
2:1898

祠部集 卷三十

四四一



恭惟省副郎中薦紳碩望經世偉才蚤登要路之華時名甚盛進貳甘泉之掌風績其凝五始遙臨百祥攸召莫遑爲壽第劇馳誠

賀省副王郎中書

恭惟省副郎中惠和秉哲通裕標才武職大農兼正列星之位升華近著靡需累日之期順履王正永綏天祿瞻祈并切鋪述奚殫

賀省副兵部書

恭惟省副兵部蚤紆賢業親造聖辰進位五兵兼造財閭之劇疇庸六典卽登法從之嚴順履一元載蕃百福莫前脩慶第切馳誠

賀中丞唐諫議書

恭惟中丞諫議體凝方重學貫本元危言嘗犯於雷霆直氣欲摩於星斗一誠獻納愈爲朝論之高萬事脩明遙底臺網之正始和戒旦茂祉對時某素被重知適膺煩使茲阻壽觴之奉曷勝頌牘之虔

賀郡牧龍圖呂侍郎書

恭惟郡牧龍圖侍郎玉璜茂閎金欽慶枝親逢聖神之期自底功名之會文昌貴秩矧兼延閣之華法從邇聯暨屈劇司之委遙臨元朔益介純禱某總計河濱馳誠門下永言企頌曷盡敷論

賀判都水兼龍圖韓給事書

恭惟判監龍圖給事。世推人傑。道覺民靈。步瑣闥之榮班。直珍圖之延閣。智謀有裕。緊臨長於水官。績用其成。行對休於天子。維時開祚。與國均休。某久去朝聯。方提漕節。莫前爲壽。敢後馳誠。

賀新推官書

茲者某官。茂對宸緝。榮從賓幄。願短才之有望。幸婉畫之焉依。方列慶音。遽貽珍牘。俟諧瞻揖。併述欣銘。

答監稅李學士書

伏念向繇幸會。獲際光儀。鎮軼計簿之勞。絕攀臺閣之軌。封壤雖密。絨膝幾稀。伏惟闕掌多餘。神明自復。恭以某官。道先民覺。才爲世生。由妙年而取甲科。不累日而致清貫。書林擢職。誠允公言。利局冗察。固非久次。廢容秩滿。行被詔還。

代賀監司書

伏以華歲履端。蒼靈布序。審璿璣而考度。揭象魏以頒常。恭以某官。康濟懋勤。融明迪哲。入膺宸綽。出領使麾。方首祚之丁辰。逮屬城而蒙福。永言慶忭。曷任下情。

代賀諸官書

伏以蒼靈布序。華歲履端。揭象魏以頒常。審璿璣而考度。恭以某官。早紆賢業。茂著官能。屬首祚之膺辰。固自天而集慶。永言瞻頌。曷究敷宣。

代賀呂度支改兵部糾察在京刑獄書

伏審顯膺鴻渥。榮改清郎。矧辱已知。倍增距躍。恭以某官。搢紳碩望。當軸慶宗。親會穆清之辰。累更繁劇之任。進夏卿之秩。方啓於榮途。悉君子之心。以繩於庶獄。佇歸柄任。少副輿言。伏望上爲闕廷。精調寢饋。與鄉中親知書。

某一塵科籍。久偃鄉閭。制除調官。闕滿之局。率繫仁庇。備歷亨衢。銜恩固深。論感非悉。旋營職之鮮暇。致拜音之後時。恭惟願履新陽。誕迎景福。江關千里。已遠於高賢。塵土三年。遂淪於俗吏。未諧諮覲。第極傾翹。

上通判元太博知縣葉太博書

昨者。久偃鄉邦。屢登牆宇。素昧業官之術。多所乞靈。每由請見之閒。未嘗無誨。泊遠從於吏役。俄越去于公廡。日戶鞭扑之冗。不覺音滕之曠。絕仰惟德履。坐擁休祺。恭以某官。道具粹醇。器函剛實。曲臺掌故。未愜於輿言。片紙垂褒。佇歸于柄任。俛維屏懦。鎮託甄題。伏望上爲邦朝。益綏寢饋。永言瞻頌。曷究指云。

問候府推張都官書

自阻賢規。曠馳書舍。屬寒威之方厲。諒時祉之載蕃。伏惟某官。名重儒林。學優聖域。關決都畿之政。聊藉治才。延登經緯之華。行膺睿選。餘祈自厚。少副勤瞻。

代問候發運主客書

近者。伏值駕言屬封。道出賤土。幸階守紱之職。屢叩賓閔之嚴。使車還轅。倏爾踰月。官簿堆案。缺然寓音。

伏惟順履新陽。誕迎景福。幹濟多裕。神明頓遠。恭以某官。文章世家。忠諒許國。不由累日之久。力取顯官之榮。上知素明。自結益固。然外臺分寄。誠鬱於具瞻。而中展須賢。行聞於爰立。

代上持服魏諫議書

某自叨朝寄。出領州麾。聿有詔條之奉行。寢焉音問之稀闊。仰惟孝履。俯順禮經。恭以某官。元精所生。盛德之後。躋諫署之祕列。將漕臺之重權。中外游揚。屯夷一貫。方隆帝辰之眷。遽遘親堂之悲。頗鬱與瞻。尙淹冊拜。矧萬鍾及養。足少抑於哀摧。儻細札奪情。可兩全于忠孝。伏望上爲邦社。精調寢興。

代問候發運主客書

近日。伏值出按厨部。俯經賤封。繇天幸之使然。獲風期之觀止。去德未幾。嗇神諒佳。鎮鞅簿書之煩。絕疎竿牘之問。仰跂標範。第勞悃悵。伏望上爲邦朝。精調寢餼。永言瞻溯。曷罄敷云。

代上持服魏郎中書

某逖阻朝遊。鎮糜郡事。曠奉聲問。仰諮燕興。恭以某官。才貫幾深。量函夷雅。親逢真聖之運。早踐列星之垣。方不世以懋勳。遽終天之遘戚。然德雖欲報。靡極於孝思。矧忠亦可移。庶全於禮制。

上和州余郎中書

近列慶函。繼紆誨牘。倍聆德履。舉集休祺。恭以某官。植操端方。秉心純亮。紫垣應宿。早歷於清郎。秀野班春。聊熙於雅俗。行膺宸選。少慰人言。伏望上爲邦朝。精調寢餼。

上通判太博書

近獲布音。嗣蒙古教。伏審贊行藩政。坐擁天祺。恭以某官。親會泰辰。游揚美仕。曲臺進秩。矧故事之素明。別乘亞恭。猶清議之未允。佇歸柄任。方協輿言。

與海州倅書

出承吏乏。阻備賓榮。當淮洲器冗之衝。有官簿沈迷之慮。營職無狀。貢書不時。恭以某官。文章世家。忠諒許國。副車貳政。尙鬱於賢圖。細札須才。行膺於帝簡。

上糾察呂兵部書

近日。嘗貢賤賤。計塵几席。惟按治之多暇。固尊生之有經。恭以某官。當軸令枝。薦紳碩德。早被上心之簡。總詳庶獄之繁。踐往訓之哀矜。莫非慎察。體至仁之欽恤。多所平反。矧陰施之已隆。諒寵褒之非晚。

上審刑李屯田書

鎮糜郡事。逖阻朝游。曠敍暄涼。仰諮寢味。恭以某官。道先民覺。氣秀人靈。早顏頡于仕途。尙淹延於郎署。虔共職事。慎審刑章。抵罪之氓。賴盡心而蒙惠。舞文之吏。皆束手而憚威。矧治狀之有成。加聰聞之甚邇。行甄善課。驟陟清班。

答本州都曹書

自去故棲。向從遠宦。豈圖謙眷。特損音題。恭以某官。植操端方。賦才肅給。勾稽一郡。適藉於幹能。第課三

年行膺於寵擢。永言感頌。曷究指云。

答朱判官書

某自把守麾。曠馳書舍。豈圖高誼。先枉長牋。伏以某官。名世標才。際天蘊識。泛蓮之幕。夙表著於能名。恭梓之邦。洽聽聞於政迹。行甄善最。驟陟清途。永邇傾祈。曷殫崖略。

本縣孫長官書

言念自分符竹。久去鄉枌。舊業一塵。幸棲於仁政。順郵百舍。遽損於誨音。紬玩載周。銘藏無斁。矧夙凝於治狀。固上格於聰聞。行迓寵升。倍祈珍攝。永言感頌。曷盡文陳。

代答滁州監稅李學士書

言念竊居藩守。幸邇風猷。如隣洪河。日所蒙潤。不遠數舍。缺然寓音。豈意謙摛。猥貽勤教。暫屈才於利局。行還職於書林。庶順生經。以須詔召。傾祈感篆。匪諭名言。

代上濠州呂學士書

某叨紆守紱。密接侯封。斗疎順驛之馳。日企餘光之及。仰惟坐鎮。俯順生經。恭以某官。文章冠時。纓冕奕世。早躋閨籍之華貫。復列書林之貴遊。鈴閣班條。寧容於滿歲。鋒車祇召。行在於匪朝。

代上糾察呂兵部書

某向廢州守。逖阻朝遊。雖順翼之數通。願高風之負逸。仰傾德宇。鎮役勞襟。恭以某官。天鍾粹純。世濟勳

業。上方倚注。允得民獄之平。時所企瞻。知爲相門之後。行旌善最。峻陟清途。伏望上爲邦家。精調寢饋。

代上發運待制主客書

某自邈崇麾。倏經累月。阻奉音郵之間。仰諮德宇之安。恭以某官。器函淳深。術蘊經濟。以外計浩穰之委。暫掌于吏權。矧中宸眷倚之隆。行當於柄任。

代上提刑郎中書

某近貢音騰。仰詢韻宇。惟按治之多暇。因尊生之有經。恭以某官。親遘泰辰。游揚美仕。提綱庶獄。絕吏手之舞文。嚴課中宸。竚上心之嘉績。伏望上爲邦社。精調宴興。靜言翹挹。曷究指云。

代答丁舍人書

郡卑地要。術短事繁。阻奉音函。遽頒教幅。受而伏讀。藏以爲榮。仍審燕興。舉臻禧福。恭以某官。學造聖際。行爲士宗。親逢盛期。獨映華貫。然禁塗載筆。曷究澤民之爲。而台袞輔謀。佇觀行事之效。

代答祕監書

嚮領外麾。遙瞻上笏。豈圖恩獎。首占教文。伏讀以還。兢慚靡措。恭以某官。懿文表世。亮節在庭。中外游揚。明哲一致。台衡著德。方渴於老成。仙室需才。寧容於歲滿。

代上徐舍人書

伏審光奉宸緝。榮持使柄。伏惟慶慰。國家以外臺至重。列郡攸儀。澄序庶官。以判白於賢否。總領大計。以

供億於經常。僉謀所同。明哲惟允。恭以某官。業術精奧。方格淳修。臺閣清塗。聊抑翺翔之勢。金穀重寄。適緊幹濟之才。行被詔音。驟還柄任。

上昌樂縣官書

近觀風期。過承禮遇。旋經違異。頗極傾依。到郡少閒。致書差緩。餘祈清裔。以迓寵恩。感頌之私。文陳匪悉。

代上上省邵金部書

伏自拜命宸廷。貳權計省。官簿紛委。使郵絕疎。曠敝暄涼。仰諮燕起。恭以某官。方格修整。業履該明。解麾通漕之臺。遽甄最狀。亞職甘泉之府。允屬時才。矧心計之素明。加聰聞之甚邇。行疇幹濟。亟步近嚴。

代謝知州書

近者。祇被宸緝。奉安親樞。暫還素里。數覲清塵。備蒙主禮之優。過篤朋從之好。旋違德宇。適抵治封。方休道路之勤勞。卽有詔條之宣布。傾賢惟日。裁寄後時。矧風績之其凝。佇恩意之不次。尙遙晤對。倍冀遵頤。

答仇員外書

早綴下科。寢階冗列。備聞高誼之日久。願見盛德而跡疎。近布勤倦之辭。倍摠傾嚮之意。兢畏太甚。舛誤有之。妄指趨廷之賢。謂爲同籍之契。陰須嚴斥。絕覲好音。賴長者優容之深。出小生意料之外。懇諄其誨。矜恕以情。置書袖中。永以爲佩。負荆門下。勢所未能。恭以某官。名高士林。學造聖圃。平時沈俊。領民籍官簿之繁。疇昔著篇。極國體人事之大。行膺褒陟。倍保燕興。感頌怔忡。曷殫崖略。

代賀范大資移鎮書

某以孤生，嘗棲大庇，亟蒙教育之賜，有警懦屏之姿，尋遠遠於師牆，鎮奔馳於吏牒，緒言不及，夙習幾還，賴天不棄，愚賢方易鎮，復幸使麾之屬，適當官次之依，善政所施，可日聞於矩矱，短才無狀，庶訖託於生成，恭以某官，鉅業熙邦，雄文表世，出平亂略，入總繁機，挺金石之純誠，尊股肱之一體，輟從祕殿，往領巨邦，已躋雅俗之安，靡俟更書之滿，朝端英袞，行被於登庸，天下蒼生，一歸於陶冶，畢宗臣之能事，光信史之直書，瞻頌傾依，曷殫崖略。

代謝柳侍讀書

特紆公幹，垂貺鈞函，俯親小國之隣，曲損大臣之體，拜而伏讀，藏以爲榮，恭惟臨撫善藩，綏寧泰宇，伏以某官，民靈先覺，王佐偉才，以文章取甲科，以忠誼結明主，華要之選，翺翔殆周，厭預玉堂之游，出領銅符之寄，諸侯之府，矧坐鎮之彌年，上相之廷，行登庸於匪日。

代答劉龍圖書

近塵愚悃，上浼台光，豈謂損體貌之達尊，錫丁寧之勤誨，惕焉拜賜，藏以爲榮，恭以某官，迪操直清，秉心忠諒，公論加重，主知甚明，尙淹當軸之才，聊寄尹京之任，王都億萬之口，翕頌政聲，相階比兩之躔，行膺册拜。

代上文相公書

託身播物之鈞。生成有素。延首翹材之館。景仰無涯。日爲吏簿之勞。時闕公函之奉。伏惟變調元絳。集受純禱。恭以某官道著將明。量函夷雅。秉尹躬之一德。會舜旦之重華。雲龍協期。圭袞旌德。丹青教化。蔚爲百辟之師。富壽幅員。靡失一夫之所。太平之業。夙夜以基。

代上向少卿書

伏審祇函詔音。榮解使領。孤危晚景。遠遠巨庥。藐如嬰兒。驟奪慈母。叢若疲馬。止思故軒。遐企恩暉。第零感涕。承使旌之就道。阻信服之把麾。敍戀莫前。馳想良極。恭以某官摺紳碩德。當軸慶枝。幹厚利於邦家。已殫幹略。暢偉謀於圭袞。行被寵恩。

代上文相公書

用人惟舊。鈞宰焉依。亞外諸侯之塵。鎮嬰俗狀。瞻大丞相之府。阻拜台光。伏惟密贊萬機。翕膺諸福。恭以某官清廟偉器。朱紘正聲。伊尹以道覺民靈。山甫以職裨袞闕。結帝辰之隆眷。踐公槐之絕班。熙然吾氓。登躋仁壽之域。致我真主。拱揖勳華之隆。百辟所儀。四海共賴。

代答呂郎中書

近者。伏值某官。駕言于藩。道出茲土。獲風期之觀止。蓋天幸之使然。展奉良疎。緬懷甚覲。豈圖高誼。先枉珍函。何其賁飾之多。無乃謙摛之過。兼聆近履。舉集龐禩。班教善藩。行摠於素蘊。拜嘉褒詔。佇陟於清塗。

代答陳太博書

伏審解麾炎服。假道淮邦。惕戕候之未能。遑郵音之首及。俛惟弱植。嘗預同升。茲天幸之使然。將風期之觀止。拜塵有自。引領增勞。恭以某官家世名才。朝闈碩彥。曲臺進秩。矧故事之素明。片紙垂褒。諒茂恩之行集。併須瞻拂。以訖悃悰。

代答荆南知府齊學士書

伏審茂對恩函。榮躋仙局。伏惟慶慰。竊以國家興敝祕館。延登偉才。特優承學之賢。乃建載言之職。其應華選。允屬名儒。恭惟某官。學造聖微。識探經奧。大筆擅淵雲之妙。卓富於高文。當年飛終賈之聲。早光於上第。對休辰而逢吉。揚顯仕以開榮。參計財閭。茂明經畫。宣風漕節。多所澄清。邁升史席之華。兼領守麾之寄。矧洞庭之樂土。惟荆渚之雄藩。民物素佳。江山尤勝。優游郡閣。足詠中和之篇。陟降王塗。行歸侍從之列。某側聞新命。竊忭寸襟。惕賀牘之未馳。遑誨音之首及。永言感躍。曷究指云。

代問候海州知州書

近被臺移。遠承官乏。企仁侯之幕下。時戀恩暉。供冗職於淮壖。日馳俗狀。門牆且邈。戕牒弗時。伏惟鎮撫善藩。綏寧泰宇。恭以某官。郎垣碩德。王國偉才。領麾滄海之城。豈容滿歲。奏課甘泉之府。行擢茂功。

回徐州通判都官書

向者。某官久偃鄉邦。屢親標矩。同心相得。喜接高賢之遊。交臂分攜。鎮供冗吏之役。奔走道路。淹回歲時。馳塵想而彌深。奉幽絳而久缺。豈謂弗爾遐棄。兩貽好音。惠愛逾周。雅素皆在。仍審貳藩之暇。益臻素履。

之和海沂泰康。已騰於輿頌。緜紙迅召。行陟於嚴塗。

回慶成軍高郎中書

伏審紫詔承恩。紛闈正位。伏惟慶慰。恭惟知軍郎中。才猷蔚劭。術業修明。刺史承流。方登於最狀。郎官應宿。遠服於華章。軍壘班條。連上頻年之最。星垣進秩。載光列省之文。首覬音函。第增感慰。

與商州閻修撰書

審擇剛辰。已班寬詔。卽商於之便郡。脫炎服之修塗。章懷近買臣之鄉。失馬誠塞翁之福。而況屯夷殊致。明哲惟均。想宣化之多餘。因養恬而增粹。行膺迅召。還陟嚴塗。

代回史祕校書

文試有司。業精諸彥。光外臺之舉首。大華閣之慶餘。垂祝長綫。益欽高矩。卽收名於上第。當得意於青春。餘冀自持。以須大到。

回慶州鈐轄梁文思書

參領戎輅。往臨邊劇。喜獲賢規之接。願慙主禮之疎。旋審涓辰。已諧視事。首紆榮翰。增戢鄙懷。方外圍之倚才。佇中朝之紀績。餘祈厚愛。以對華褒。

上亳州宋內翰書

恭以某官。學際天淵。名重纓綸。早陪乙夜之覽。允極千秋之榮。謂翔步玉塗。未殫行事之效。而班條侯屏。

少見澤民之爲。順履慶辰。具膺景福。宅上台而乘軸。諒在匪朝。祝南山而奉觴。莫遑爲壽。永言瞻頌。曷究名言。

上揚州錢侍讀書

恭以某官。元精所生。盛德之後。紹該洽之先業。陟廉良之茂科。華要洵揚。聲光愈綽。密侍鈞衡之覽。遽厭晨趨。樂從露冕之遊。已凝風績。靡容秩滿。行被詔還。屬亞歲之膺辰。固自天之集慶。某按封茲限。爲壽莫前。瞻禱所深。名言非諭。

上江寧府皇甫諫議書

恭以某官。莊重自居。直清不倚。間關數紀。出入兩朝。寔隆法座之知。峻陟諫垣之祕。典刑在事。方倚老成之資。藩翰于宣。遽布中和之治。順迎令序。誕擁龐視。瞻頌所陳。名言非究。

上杭州呂舍人書

恭以某官。道具粹醇。體凝方重。早躋仙籍之甲選。久陟禁林之貴游。英袞之暢。偉謀尙淹大任。畫錦之過。故里聊請使麾。某適按部封。正遙牆宇。祝南山而爲壽。莫遂前趨。託兼幅以貢音。曷涯下悃。

上運使工部書

恭以某官。王國美才。郎垣碩德。荷續旒之隆眷。方倚兼能。領金穀之要司。尙淹致遠。行疇最狀。驟陟嚴塗。順履令辰。誕膺景福。某按封茲限。爲壽莫前。瞻禱所叢。名言非諭。

上發運大諫書

恭以某官夙鍾間氣親遭熙辰翺翔要路之華聳動薦紳之望以至兼諫署之嚴密總漕臺之劇繁給食中都暫繫於心計秉鈞上笏行被於詔音屬亞歲之膺辰固自天之集慶某久違賓次往按刑章爲壽莫前瞻風茲劇

回梁文思書

一別河濱歎離羣之久矣相逢關右幸道舊以懽然旋復睽遠方深企嚮遽貽書好益固襟期伏惟某官才武絕人忠勤許國適領兵鈴之要行收邊閫之功倍順節宣少符瞻禱

上察院書

恭以某官文爲國華道先民覺雍和朝弁之貴暉映士林之光佐邦漕之劇司適資心計兼臺綱之要秩允稱恩章行旌幹濟之能驟置凝嚴之列順迎令序誕擁純禱爲壽莫遑瞻風徒切

代回江東轉運張學士書

自阻風期倏彌年所沈迷官簿常若少閒臨按屬封曾無虛月因廣牋函之奉仰諮燕餼之安豈謂眷存首貽音諭伏審坐籌大計翕萃繁禱恭以某官行潔道醇才宏業鉅外臺劇使頻成第課之優東觀昔游已復載言之選蓋上心之圖舊行恩數之疇庸領漕節之輸將諒非久次踐王塗之嚴密進服徽章

代答曹州孫祠部書

官部按疆日傾盛德。客車假道時剽美聲。思清晤以未遑。遵珍題之首及仰銜嘉祝。第繫鄙衷。恭以某官。方格淳修。才猷廣敏。紫垣列宿。蚤踐於清郎。綠野班春。聊蘇於雅俗。行圖風績。增晉褒章。

代賀亳州皇甫諫議書

伏審光膺細札。移甸巨邦。審即便辰。已開尊府。伏惟慶慰。恭以某官。行推高爽。道具粹醇。親逢宸扆之知。蚤陟諫垣之祕。游凝風績。頻易守麾。唯亳社之名區。實淮壖之重鎮。暫繫耆德。以布寬條。熊軾班春。豈容於秩滿。鳳書申命。行被於詔還。

代問候文相公移鎮書

伏審卓馬還朝。朱轡赴鎮。已離邦於日下。將假道於淮邊。饒鼓沸川。特雄方面之勢。冠蓋溢路。願識相君之威。矧叨簪紱之聯。嘗託鈞衡之造。日傾台旆。增企愚襟。伏惟順履。蕭辰誕迎。茨福恭惟某官。民靈先覺。王佐偉才。咸會帝宸。綢繆公路。畫一之歌。既作。休有成規。太平之策略。行。遯臻至治。暢袞謀於已試。收廟略而弗居。出甸陪京。靡遑滿歲。旋膺徽冊。易鎮要藩。行將宣布寬條。撫柔雅俗。坐席未煖。亟五月之政成。詔書誕頒。復三篇之冊拜。俛惟疏冗。訖望埏陶。

代回舒州柳龍圖書

比塵使局。獲邇侯封。徒然燕語之傾。缺爾牋修之奉。豈圖高誼。首占珍題。情在遠而逾親。禮由謙而益厚。兼審坐班寬詔。舉萃繁禧。恭以某官。才貫幾深。器函剛實。對休辰而逢吉。揚顯仕以垂光。冠卿列於禮司。

登禁聯於延閣。圭符假守。聊鎮於善藩。鈞軸須賢。行祇於迅召。

代上并州梁相公書

伏念自領小麾。久從遐徼。門牆萬里。敢忘塊北之仁。寒燠一音。不徹崇高之聽。台光在望。愚悃增勞。寒籥丁辰。善藩觀政。神明所相。福祚其蕃。恭以某官。社稷元臣。山河間氣。樞廷宥密。早暢於廟謨。宰席凝嚴。深裨於國體。前班漢詔。出殿并門。屈大丞相之威尊。總外諸侯之節制。兒童迎迓。競喜細侯之來。姦黨散逃。率歸廣漢之治。行圖偉蹟。還宅上台。

代上許州賈侍中書

爰初還臺。以迄補郡。台光在望。曾無數舍之遙。俗狀增勞。都缺單函之獻。第負芒而引媿。難擢髮以論愆。竊繫上宰之量。洪未識下僚之禮。廢伏惟坐班。藩政參嚮天和。恭以某官。業履崇高。智謀廣大。抱誠明之正性。秉忠諒之一心。早簡帝衷。首謀王體。師尹當國。有具瞻之民。阿衡代天。無不被之德。以至疇咨舊德。登冠鴻樞。珍策立成。遠人坐至。帷幄以肅。京師其尊。位長百工。允極宗臣之貴。柄更二府。弗收造物之功。懇列壤封。請臨宸服。對宸緡之均逸。露公冕以觀風。居外弗異于中。斂大以施于小。行膺徽冊。復圖文武之才。還乘元鈞。寢造邦家之福。

代都運張待制與宣撫郭樞密遠迎書

伏審出佈恩德。近違威顏。前蘇甫臨。列城增企。冒霜稜之初凜。萃時社以載蕃。恭惟某官。偉略沉雄。傑才

高邁。冒襲汾陽之慶。神傳圯上之符。方倚壯猷。以籌多算。會小戎之玩境。煩近弼以臨邊。制勝幄中。未煖鴻樞之席。宣威閫外。遠揚都統之旗。行懋丕功。坐寬西顧。某漕文所繫。郊候無期。欣跂并深。名云非悉。

代王龍圖問候省主韓侍郎書

自去朝游。遂叨州守。當兵民之綏御。亦既踰年。凡使客之往來。曾無虛日。居有寬條之所布。間爲多病之相乘。雖勤向德誼之心。不忘朝夕。而仰諮福履之禮。曠敝寒暄。方涉冬嚴。諒蕃時祉。伏惟某官。才包王佐。道貫民彝。名躋日月之高。學破神鬼之奧。瞻中都之調度。坐懋豐功。揭海宇之儀型。行膺教冊。

與郭樞密遠迎書

比貢音函。當徹高明之視。適丁寒籥。仰惟跋履之勤。兼審嚴騁。甫臨近境。行瞻台範。增企鄙懷。伏惟某官。鉅業茂明。傑才宏遠。本兵之地。輟帷幄之前籌。奉詔以行。寬朝廷之西顧。餘留迎謁。併敝欣翹。

代張待制與宣撫郭樞密遠迎書

伏審前旌。甫臨近境。卽躬郊候。增聽車音。仰遐冒于霜稜。固載蕃于時祉。伏惟某官。偉謨經世。丕績熙朝。制勝中樞。聊輟神機之助。宣威西徼。行開廟算之平。進謁有階。翹瞻尤劇。

答鳳翔黃元禮察推書

向緣厚幸。得奉賢規。曾乏少閒。遂疎主禮。睽違未幾。瞻嚮殊深。遽損音題。過存愛意。屬霜稜之倍厲。固時祉之載蕃。伏惟察推廷評。方格淳修。才猷膚敏。寧久煩於婉畫。行前對于華恩。順序自持。副愚所禱。

賀滄守沈修撰書

伏審就鎮劇藩兼榮祕殿肇開尊府肅布寬條伏惟慶慰恭以某官厚望端朝傑才高世包經謀于術內富羣籍于胸中瞻給京師方轉漕臺之粟慰安黎庶旋分師閩之符重通儒之操修當太史之論撰行祗嚴詔寢服皇僚

賀王周二侍講書

伏審內閣升華禁筵勸講側聞成命竊怵丹惊伏惟某官名世挺才際天蘊識不由汲引自逢真主之知旋取顯榮漸見通儒之效比進升于書殿亟入侍于經帷上方嚮文適資稽古之力行矣登用遂適當今之宜列慶稍稽負慙良劇

與慶州機宜曾節推書

自闕高風條經累月比辱音函之貺殊欽禮意之勤旋苦舊疴稽修報牘方講邊防之節制諒煩幕府之文書益保粹襟行膺茂渥

回提刑少卿書

比者建旆舊雍總節全秦運帷幄之前籌曷明遠略寬朝廷之西顧第竭寸心方休道路之勤卽有詔條之奉未遑敘悃先辱占書感愧并深名言非悉

回慶州王給事渭州蔡待制書

誤蒙上旨。出總西師。初見吏民。甫班條教。久荷謀謨之責。寢篤精力之疲。尙繫邊閫之帥才。協圖大事。庶副朝廷之聖寄。共底成功。曾書禮之未修。遽慶音之首及。并深感愧。奚盡名云。

回河中府呂修撰書

比辭冢任。旋付劇權。剖分陝之守符。總全秦之帥節。下車視事。方祇布于詔條。記室占書。遽遠形于禮意。永言感篆。奚盡名云。

賀判府宣徽太尉書

恭惟判府宣徽太尉。大忠奕世。偉業熙朝。參制五兵。輟樞廷之勝算。并護諸將。領邊閫之劇權。進揚徽猷。增峻台序。疆場無事。行底于丕功。旂常有銘。愈光于前烈。某心馳門下。跡繫幕中。第修慶牘之虔。茲阻壽杯之獻。

回賀耀州冀郎中書

伏審比誼。穀旦肇布寬條。伏惟慶慰。本朝愛民。數郡擇守。維華原之重地。實陝服之劇州。氓編旣繁。訟牒亦衆。其當師帥之選。宜屬公明之材。恭以知郡郎中。識際幾深。器函端實。自底時名之重。游揚風績之優。剖符此方。寧需于滿歲。趨召不次。祇在于匪朝。曾慶禮之未修。遽誨音之首及。永言感忭。曷盡文陳。

賀渭州蔡待制書

恭惟知府經略待制。偉才經世。厚望端朝。出觀邊閫之風。進列禁塗之籍。適宣遠略。益懋壯猷。坐布藩條。

兼兵民之緩御。行參國論。陪承弼之謀謨。茂對令辰。載蕃景福。某心馳門下。跡繫幕中。徒虔慶牘之修。茲阻壽杯之獻。

祠部集卷三十一

書

賀昭文相公書

竊審圖任眞賢。進升上宰。挺銛所及。慶慰維鈞。伏惟某官。函德淳深。秉彝惇大。嚮元猷于台路。懋偉績于王家。萬化經懷。多識廟堂之故事。羣生順理。久躋區宇于大安。素望日充。清衷愈簡。首寧天緯。就專尹氏之秉鈞。永翊帝圖。當邁汾陽之書考。格太平之極致。殫康濟之初心。成命旣行。私誠竊忭。

賀集賢相公書

竊審顯膺徽冊。對掌洪鈞。廊廟登賢。寰區均慶。伏惟某官。器函剛實。識貫幾深。才猷兼濟于百爲。智略可酬于萬變。制兵樞幄。方運留侯之籌。論道宰庭。遽隨蕭相之畫。矧云賢業。夙簡睿心。君臣一德之所同。古無與擬。禮樂百年而後作。今也其時。行嚮偉謨。亟躋極治。側聞新命。增忭丹悰。

賀富相公判西京書

竊審屢抗囊封。懇辭宰柄。輟中階之諭道。委近輔以優賢。素志獨諧。清風逾遠。伏惟某官。誠明正性。忠亮一心。久于社稷之宣勞。數以翰垣而均佚。復歸冢席。比符周尹之具瞻。曾未朞年。連謝留侯之多病。上方急治。倚以嚮謀。諒綠誠請之堅。遂許老成之去。鎮安雅俗。暫茲爲福于一方。寤寐宗工。更覲蒙休于四海。

仰高第劇展慶無從。

問候劉待制書

近者使旆之東。客亭云別。冒風霜之初勁。歷道路以載勤。俯稅征車。諒完秦宇。睽遠未久。企仰尤深。宅兆奉安。良增于永慕。朝廷倚任。倍冀于自持。瞻禱并懷。名言非諭。

回提舉郎中書

竊審專倚周才。共經外計。就膺邦選。出按邊儲。伏惟某官。學造聖源。識通治體。已試財闈之效。屈從守紱之行。清議未安。休聲愈劭。賢業可兼于數器。惟所設施。兵須肯責于一端。別當簡擢。冒霜稜之初厲。擁時社以載蕃。敘慶尙稽。占書云及其爲感怍。奚究名言。

回韓內翰書

審膺恩綽。登踐禁扃。內相得人。衆賢胥賀。某官性恬榮利。學造淵源。翬羽翼于東朝。旋表儀于近侍。進以直玉堂之祕。足罄忠規。繇此調金鼎之和。始符公議。聊藉演綸之大手。卽據澤物之初心。未列慶函。首紆榮牘。永言感怍。曷盡名云。

回邢州狄閣使書

審卽便時。已班寬詔。宿官茲限。馳慶無從。伏惟某官。偉略沈雄。傑才膚敏。蚤膺世選。寢服使名。壯歲專城。更邁昔賢之盛事。元功仗節。行追先烈之英風。卽聽召還。靡需報政。首紆誨牘。仰佩謙懷。

回衛州周郎中書

審即便時。肇班新治。未逾期月。已浹歡謠。伏惟某官。望厚周行。才兼數器。十年禁局。備紆風力之強。千里輔藩。聊布政條之裕。行膺迅召。函陟要塗。未列慶函。首紆誨牘。永言感怍。奚罄悃悰。謹奉書陳賀兼謝。

回提舉承旨端明王侍郎修實錄畢轉官書

竊審國史終篇。春官進秩。真儒之效。多士所榮。恭以某官。序冠禁塗。職尊祕殿。早以文章之大手。簡于神聖之淵衷。會仁廟之一朝。載信書于百世。編年幾易。實資才識之長。奏御甫成。訖被龍光之懋。稽修慶問。首枉珍函。感怍并深。名言非悉。

回昭文相公賀冬書

天陽云復。已慶問之先馳。台座且遙。猶鄙誠之未徹。敢謂自存謙矩。垂貺音函。荷禮意之過隆。寫感悰而增劇。伏惟某官。山河間氣。社稷宗工。代天工而調化。茲鬯辰猷。對日景之履長。茂膺純祉。載深慶怍。曷罄敷云。

回南京王宣徽書

自闕風徽。忽驚歲晏。雖政事已修之前跡。無所更爲。而音題或至于歷時。闕然不講。敢圖雅眷。特枉珍函。兼審偃息別都。撫柔嫩俗。神明所右。福祚其蕃。伏惟某官。勳濟王塗。望尊台路。政成五月。猶司留鑰之嚴。册拜三篇。行秉宰鈞之要。益綏寢饋。少慰瞻祈。

回成都府陸龍圖書

審卽便時。肇班寬詔。治行千里。歡浹兩川。某官風績宏長。器資剛實。歷紓賢業。獨簡睿心。識延閣之河圖。殿會藩于井絡。撫柔遠俗。行聞最狀之成。延拜近司。靡候更書之滿。尙稽脩慶。首辱占音。感懌并懷。文陳非諭。

回昭文相公書

元朔更新。嘗首馳于慶問。上台存舊。乃交貺于音函。仰謙矩之過隆。寫感懷而增劇。伏惟某官。道光宰路。勳濟王塗。極治是經。元猷益壯。首運化鈞之妙。寅代天王。遙臨歲歷之端。竄膺時祉。

回趙參政書

泰通云始。嘗先布于慶音。謙德所存。亦交垂于榮問。載欽禮意。增戢感綜。伏惟某官。道具大醇。氣函間傑。參斷萬幾之化。措世旣安。遙臨三朔之辰。對時協吉。

回侍講呂惠卿學士書

審拜異恩。兼升美職。經帷勸講。書殿校文。陳睿選于一時。壯儒林之偉觀。某官傑才高爽。明智該宏。潛心自得。于聖微。操術動居于物表。雖文章已任。已博極于羣書。而事業躬行。當亟躋于顯用。長牋垂貺。丹慊增銘。

回樞密侍郎書

久總帥符。實託鴻樞之庇。第瞻台坐。良疎尺牘之音。首枉誨函。自存謙矩。兼審坐籌勝算。舉集蕃禧。伏惟某官。才貫幾深。德含簡厚。蚤重端朝之望。向煩陪幄之謀。兵本已摻。底方隅于無事。帝心所注。佇廊廟之有聲。益護燕興。少符企頌。

回陝西運使陳學士書

審對宸緝。出持使節。矧惟茂器。蚤履清塗。弗專事于空言。欲兼施于行事。虛承明之直舍。果被僉言。領全陝之計文。暫圖碩畫。勢非久次。歸置近班。遠枉書音。增銘感臆。

回彭城知縣太博書

審對明恩。亟遷美秩。未脩慶問。先枉誨音。伏惟某官。雅量淳夷。傑才膚敏。庇身大邑。尙屈高賢之資。掌故曲臺。有開榮路之漸。永言感頌。奚盡名言。

問候亳州判府富相公書

頃聯政柄。實依盛德之末光。今闕台符。尤切下情之勤嚮。貢音不數。負愧兼深。比惟偃息善藩。綏將泰宇。伏以某官。行參古烈。道冠時宗。挺然金石之純誠。休有鼎鐘之偉績。脫宰鈞而弗顧。自養崇高。心王室以無忘。孰爲內外。矧屬寧朝之急治。行從元老。以諮謀。伏望益調燕興。仰副眷倚。

回越州通判曾學士書

居留少暇。衰病相仍。缺馳書舍之音。增企儒林之範。遠紆榮問。備戢高情。矧術業之表時。號文章之貫古。

優游法從。潤色辰猷。茲茂器之所宜。非別車之可屈。行祗嚴召。倍冀珍頤。

回賀參政韓侍郎書

伏審輟武神樞。就開幾政。羣言久穆。竊忭惟均。伏惟某官。函德淳深。秉彝惇大。才兼文武之術。識照安危之機。本五兵以鎮四方。比參陪幄之制勝。財百工而調萬化。旋贊宰鈞之鬯謀。世選有光。容心所賴。曾慶函之未列。遽榮問之先臨。欣感并懷。名言非諭。

回荆南知府元龍圖侍郎書

向圖綏御。兼撫列城之師。寢閣晤言。永懷延閣之老。過形盛意。遠貺珍函。矧惟聳望端朝。垂光近侍。藩條坐布。議者謂先于一州。國論入聞。行矣當抵于二府。益調燕餽。少副傾祈。

賀呂副樞書

寵膺明制。進貳鴻樞。矧辱已知。倍深距躍。恭以某官。誠明正性。忠亮一心。早被華纓。旋升顯服。久懋猷爲之盛。洵揚事任之煩。撫全蜀之提封。遙綏遠俗。司大農之經費。方瞻中都。會宥省之虛員。擢傑才而登選。物論惟允。神機所參。矧玉璫之慶宗。有金鉉之舊物。坐籌勝算。佇光賢業之施行。副具瞻以踵相門之烈。

又

伏審顯承明制。升貳鴻樞。伏惟慶慰。恭以某官。天資偉謨。世濟盛德。蚤進更于臚仕。旋登踐于皇僚。歷宣外榮。休有茂績。比領大農之計。獨當真主之知。會帷幄之虛員。慎樞機之制勝。方權綱總擘之際。親覈臣

鄰正賢傑彙征之期。擢參宥密。曾是相門之傑。矧爲國器之華。佇聞英袞之元猷。以紹青氈之舊烈。永言企忭。奚盡指名。

代回王尙書書

審卽便時。已班寬詔。方依鄰庇。增忭襟襟。伏惟某官。世濟忠勤。天資英果。蚤陟廉車之貴。旋增將鉞之雄。奕葉重侯。茂華宗于隴右。擁麾方伯。襲勝氣于山西。眷銅雀之故邦。付玉麟之新命。肇開尊府。並建高牙。緩帶輕裘。茲適偃藩之樂。昔繻今袴。行騰載路之謠。佇報政成。復光冊拜。

答便糶旬都官書

伏審大計倚才。朔陞按糶。適聞新命。頗愜丹襟。備形禮意之勤。首枉書辭之貺。矧郎垣之間傑。行被選求。豈兵食之常須。可煩施設。

答瀛州吳待制重九書

素籥貫辰。黃華應節。阻奉登高之樂。遽貽修慶之音。恭以某官。親會聖期。早躋法從。邊關倚重。暫煩綏御之才。國典疇庸。行罄弼謨之蘊。

代元給事回知兗州鞠學士書

總漕符之煩使。寸慮日勞。企書殿之清流。尺絨坐曠。敢期謙矩。首祝音函。審素籥之貫辰。保粹襟而迪吉。伏惟某官。器函剛實。識際幾深。久輟紬書之才。累彰行事之效。守麾易地。殿鄒魯之巨藩。民頌載塗。蹈襲

黃之遐躅。行祇迅召。歸映近班。

回河陰提舉贊運王比部書

久去近班。再司北漕。唯是輸將之冗。缺然音問之修。首枉書辭。良欽禮意。伏惟某官。郎垣碩彥。王國偉才。督舟運之萬艘。方圖碩畫。助邦須於一道。行奏膚功。霜氣比嚴。天和參嚮。

回新知邢州成少卿書

伏審顯奉宸緝。榮紆守紱。前旌在道。俯邇于治。封兼幅貽音。過形于禮意。良勤冒涉。益固福綏。恭惟某官。當世傑才。爲時雋老。絲風力之強濟。增治功之懋明。九寺名卿。寔登于貴重。萬家燉俗。行賴于撫柔。

回永興司馬端明書

審擇剛辰。已開尊府。兼百城之師帥。撫一道之兵民。恭以某官。名世真儒。禁塗碩德。不患寵榮之苟失。一以愛君。自全忠誼之所存。挺然許國。眷咸秦之奧壤。邇統略之故鄉。方茲垂組。以班春。更過懷章之歸日。封部安薦饑之俗。聊布上恩。朝廷思直道之言。卽還大用。首紆誨牘。增戢感悰。

回濱州張郎中書

肅卽剛辰。肇臨雅俗。環封千里。歡頌一辭。伏惟某官。風績宏長。才猷膚敏。奉行條教。暫專瀕海之城。趨走召音。行覲中天之闕。未修慶問。先枉誨函。感忭并深。名言奚悉。謹奉書陳賀。兼謝。

回青州趙資政書

移殿鉅邦。肇開尊府。提封所暨。歡頌維均。伏惟某官。經世元猷。際天傑識。孝悌甚高之美行。早取重于朝廷。忠純不倚之亮誠。比同寅於廊廟。適遂偃藩之樂。未容坐席之安。亟被宸緝。旋更帥節。東海賜履。聊藉百城之表儀。南山具瞻。行副萬寓之傾屬。尙稽慶問。首枉誨音。咸喜并懷。名言非諭。

回鄧州韓相公書

暫輟政鈞。適臨治屏。詔條云布。福祚其蕃。伏惟某官。勳濟王塗。道包民極。稟山河之間氣。挺金石之純誠。參斷萬幾。蚤仰追于先烈。協恭一德。旋昭冠于中階。方注意以綏邊。實鞠躬以扞患。未殫遠業。俄屈更藩。小醜尙存。實夙宵之所憤。大忠自信。奚出處之能移。一方雖被于仁風。四海奈思于霖雨。淑旂啓路。聊煩觀政之行。英袞熙朝。卽復調元之舊。羣心所企。衆論維均。暑氣尙煩。台光正阻。伏望上爲邦社。精調寢興。

再任謝史館諸公及樞密侍郎書

向沐朝恩。初還鄉守。適更清漳之臥理。遽以全魏之居留。事物之來。實兼他郡之數倍。精神欲耗。勉及流年之再周。抗章願息于衰疲。易地少圖于閒曠。乃推異數。殊失初心。西雍節旄。幸獲辭于新命。北門管籥。猶仍撫于舊封。愚分粗安。厚恩有自。此蓋某官力陳宰論。密啓睿衷。誤寵不居。俾自全于所守。殘軀可退。未卽置于無庸。重寄復當。餘生奚補。

賀曾侍中判永興軍書

竊審進被明緝。往開尊府。抗使旌而就道。露公冕以觀風。成命旣行。羣言胥穆。伏惟某官。鈞衡舊德。金石

純誠才兼文武之資。身繫安危之託。留範廊廟。書功旂常。閒館優游。方養崇高之福。屬城節制。遙圖綏御之經。撫鶉首之巨封。賴貂冠之元老。雖曰長城之所倚。豈容坐席之少安。列郡後迎。行見晉公之再入。中階登冠。復歸周尹之具瞻。慶忭尤深。名言非悉。

回謝曾侍中賀加恩再任書

某稟生多病。假守再替。庶少息于殘軀。遂懇求于閒郡。乃蒙過寵。殊戾本心。亟更帥節之新。不易留符之舊。上恩誠篤。愚分未安。數拜封章。始許追還于優渥。再司管鑰。訖令強策于衰疲。敢圖衰路之並游。首枉鈞函而垂慶。辱賚飾之相假。識謙懷之所存。待命累旬。報書差晚。載惟弱植。常懼疾顛。全退處于無庸。得自全于所守。容心誤獎。猶未棄于餘生。宰論借優。俾尙叨于重寄。誓殫絲力。少答厚知。

代上楚兵部書

就膺嚴詔。趣覲清光。屬部百城。舉懷戀結。學宮一介。尤失據依。旋審簡圖。碩畫之長。登貳大農之劇。涓辰視事。順序養和。恭惟某官。望重本朝。才兼數器。游揚中外之選。並懋事功之成。造膝危言。曾無議論之阿。世致身要路。獨有猷爲之濟時。比更西道之使符。尋調北方之兵食。甫安坐席。俄被溫書。筵財省之浩煩。諒非久次。置禁塗之清切。行副輿言。俛惟材器之疎。晚陟門闌之峻。一見許與。固已殊于衆人。首垂薦論。益難酬于厚德。唯祈大用。訖託孤蹤。伏望上爲廟朝。精調寢饋。

回保州王駙驥書

涓辰其吉。布治云初。千里環封。一辭均慶。伏惟某官。才兼文武。學造聖賢。繇甲科以踐郎垣。遽投定遠之筆。適丁時而提將鉞。佇拜淮陰之壇。願是一麾。決非久次。慶函未列。榮誨首貽。感佩并懷。文陳奚諱。

回諸新恩學士書

竊審落筆禁局。袖書藏室。英廟盛崇文之選。詔近弼以舉知。聖朝謹先志之承。從新書而試可。某官學術該洽。材猷懋明。隨問納忠。策條當世之所急。按題析理。論發諸儒之未明。固非一日之空言。要在異時之行事。飛步儒館。垂光士林。首覲長旄。過形盛意。永言感懌。奚盡指云。

回瀛州安撫龍圖書

留都假守。曾密接于風聲。記室占書。辱過形於禮意。矧惟厚望。獨映近班。要劇游揚。猷爲益懋。領帥符于一道。兼撫兵民。對宸詔之十行。佇陪丞弼。炎威方熾。時祉載蕃。企頌感銘。并深悃臆。

回渭州經略待制諫議書

一。睽賢範。俄洊歷于炎涼。各領帥符。遂相望于西北。首貽尺牘。增戢寸襟。矧德問之推高。賴威聲而經遠。關外之制。已坐懾于戎心。廷中之謨。行入裨于王體。益綏燕起。少副傾祈。

回北京通判高駕部書

顯奉細書。榮升別乘。側聞成命。竊忭丹衷。伏惟通判駕部。經世偉才。端朝碩望。關決名都之治。豈盡設施。延登要路之華。乃云宜稱。載惟厚幸。將庇末光。首枉音函。備形謙槩。其爲感慰。奚究名云。

賀宮使司空侍中書

伏審累抗奏封。懇辭幾政。適增台序之峻。茂對恩章之隆。禮冊誕敷。朝紳胥忭。伏惟某官。格天偉業。宰物元功。秉心不回。應變無滯。君陳之謀。猷后德。歷更三朝。公旦之勤勞。王家遠過一紀。忠至竭力。功成退身。何有鈞衡。遂還印綬。進班宏父之位。領使列真之居。灑然清風。惟高懷之甫適。仰止元老。恐靜退之難常。就慶莫遑。馳情第切。

賀吳副樞書

竊審茂對上恩。榮膺右府。君子得行其道。衆人相賀于朝。伏惟某官。鉅業適時。傑才周物。蚤紆素蘊。寢服皇僚。主計大農。方底京師之贍。給代言中禁。甫追典誥之坦明。更賴猷爲。旋升宥密。五兵之本。參運留侯之籌。萬化所調。行隨蕭相之畫。側聞顯命。增忭鄙懷。

回判銓記注陳述古學士書

謁告上前。暫閣載言之筆。問安親側。適拜登慶之堂。遐冒霜稜。載蕃時祉。首紆榮檢。備戢謙懷。矧近侍之凝嚴。加中銓之要劇。難遂晨昏之養。卽瞻咫尺之顏。益冀自持。行膺大任。

賀南京留守王宣徽生日書

良月輔周。凝乾坤之正氣。元精所萃。毓社稷之宗工。伏惟某官。業履崇高。智謀光大。留符居守。雖知出處之均。宰柄登庸。實稽中外之望。方冬云孟。生德維時。俾壽而臧。聊次詩人之頌。式宴且喜。阻持賀客之觴。

瞻禱并懷。名言奚悉。

回新運使楚兵部書

審膺邦選。就領漕符。維外臺鈞號于劇煩。而北道倍勞于運給。矧望著本朝之重。以才兼數器之周。需心計之有餘。暫繫碩畫。豫邊須于有備。行底丕功。首枉誨函。過形謙槩。愧慶音之未列。戢感臆以逾深。

回延州經略郭宣徵書

留符所守。已再見于歲陰。治屏且遙。第增思于台範。特紆榮牘。備戢謙懷。兼審靜制一方。翕臻百福。伏惟某官。智謀宏博。識度沈雄。蚤暢徽猷。久宣遠略。禦戎闔外。繫坐振于威聲。制勝幄中。卽進司于宥密。益綏燕起。少副瞻祈。

問候陝西宣撫韓參政書

宣導詔音。煩宗工之西撫。發施廟算。俾強敵之外攘。遐歷關河。良勤車馬。神明所祐。福祚載蕃。伏惟某官。經世元猷。際天傑識。方圖新于百度。會有警于一方。台席暫虛。往總裁于疆事。寇巢卽殄。還登進于冢司。伏冀上爲邦家。益綏寢饋。

回新鄆州邵資政書

守北門之留鑰。洊歷暄涼。企東里之治封。曠諮燕起。旋聞易鎮。仍缺馳書。荷厚德之隆謙。枉珍函而垂賁。審丁寒籥。增迪粹襟。伏惟某官。才貫幾深。器函簡厚。懸貳樞廷之密祕。屢更督府之雄威。兼撫兵民。未暇

溪堂之式宴。復參承弼。卽符海寓之具瞻。伏望上爲邦家。益調寢饋。

回郭宣徵書

竊審視公袞之絕班。就膺異數。仍帥符之重寄。坐鎮雄藩。伏惟某官。經遠偉謀。濟時明略。寬朝廷之西顧。輟帷幄之前籌。疆事久勞。繫外平于戎索。詔音垂及。行入總于神機。旋錄膚功。亟加顯命。未繇修慶。首辱占書。感愧并懷。名言非諭。

回判大理寺崔司勳書

復來北道。介立羣居。拙直無機。都與時情之異嚮。據依有地。獨蒙賢者之重知。旋闊高風。遙經累月。敍戀未伸于尺紙。馳誠常結于寸襟。敢謂隆謙。猥先賜教。復此臥疴之有日。職茲修報之不時。尙緊恩憐。特以情恕。伏惟某官。才兼數器。望厚本朝。陰德固多。曷涯于顯用。容心所簡。益懋于華章。願履春陽。載蕃時祉。更祈珍重。少副瞻依。

代魏公回曾子宣學士書

竊審發蘊治朝。垂光書殿。家聲繼美。士論稱榮。伏惟某官。偉業濟時。醇文貫道。疾陋儒之無補。唯事空言。會真主之有爲。自圖實效。讎譌文于簡冊。講長利于家邦。兼屬周才。良階顯用。未諧修慶。首辱占書。愧怍并懷。名言非諭。

回賢良呂屯田書

審策危言。旋躋異等。士林聳勸。賢業增光。伏惟某官。方格淳修。器資夷遠。智周事物之變。學際天人之交。落筆大庭。悉指時而無隱。奏篇中扆。皆措世于可行。豈繁褒陟之恩。能稱詳延之實。卽聞顯用。少副輿言。首貺長牋。深銘丹臆。

回越州通判曾學士書

二氣交泰。百家寢亨。茂對歲端。亶應時祉。恭以某官。學探聖際。文醇古初。頡頏嚴塗。久積士林之望。徘徊別乘。尙深賢器之藏。年籥更新。召函垂至。首紆慶問。倍戢感悰。

代魏公問候集賢相公書

向司留籥。獲庇宰鈞。比緣輔弼之勞神。遂至寒暄之違俗。慮煩省覽。曠牋牘之間安。旋稔善平。與邦家而均慶。伏惟某官。器函剛實。道貫幾深。昭安危之大方。更文武之二柄。謀謨廊廟。曾勿失於蕭規。利澤幅員。實具瞻於尹石。伏望倍綏燕餽。仰副倚毗。

回呂舍人書

審對制函。榮升詞掖。矧惟鉅業。獨映本朝。凜然臺中之風。休有天下之望。籠財北道。頗違澤物之初心。落筆西垣。遽屬演綸之大手。追坦明於三代。掩深厚於二京。聊鬯壯猷。可量顯用。永言慶忭。奚盡文陳。

回林學士書

審對恩函。旋登書殿。矧大猷之高世。繇遠業之傳家。是正譎文。甫訖羽陵之蠶簡。校讎祕館。茲云王氏之

青氈物論所榮。霄程可測。特存高誼。垂貺長牋。喜切感銘。兼深鄙抱。

回賀省主吳內翰書

審膺制檢。就陟禁局。曾未列於慶函。遽首貽于珍牘。矧以傑才高世。厚望端朝。邇儒學之淵源。稱辰猷之潤色。元昆舊物。繼書綸綍之溫辭。多士美談。曾耀衣冠之盛事。况大農之要地。實近輔之便塗。行服茂恩。進聞幾政。

賀賈魏公還節罷侍中仍舊左僕射加大觀文書

伏審懇列封章。蘄還節鉞。愈恩易地。徽册告廷。進升祕殿之華。臨長中臺之劇。伏惟慶慰。恭以某官。樞衡舊德。金石純誠。才兼文武之資。身繫安危之託。留範廊廟。書功旂常。比均北道之久勞。得請陪京之舊治。抗雙旌而入覲。方倚老成。辭六轡之啓行。邊形露奏。自養崇高之福。益敦恬尙之風。左相絕班。仍表儀於列辟。文昌要地。便咨訪于元猷。企林井深。敷論非悉。

賀陳副樞書

入奉恩縉。進升倍幄。伏惟慶慰。恭以某官。才包王佐。勳濟聖時。蚤歷華塗。旋躋顯服。比讓鴻樞之亞。出宣遠略之勤。二敵以寧。鬯威聲于邊閩。五兵所制。著雅望于本朝。遽趣介圭之還。復參宥省之舊。行膺册拜。乃副輿瞻。

與機宜安厚卿著作書

就被辟書。屈從幕府。兵民一道。聊煩樽俎之謀。賓主相歡。應適詩書之願。矧收名於異等。卽飛步於嚴塗。得庇末光。尤深竊忭。

代元給事答成都府趙龍圖書

籠財北道。轉粟中都。顧無煩使之長。賴在高賢之後。尙容竊幸。可踵成規。甫舍征車。未馳謝幅。懽然禮意之相厚。首以誨音。而遠貽審布寬條。靖綏遐服。神明所相。福祚其蕃。恭以某官。美行甚高。至誠自信。升諫垣。以開忠亮之蘊。總漕節。以見輸將之才。直內閣之圖書。帶西州之印綬。兵民兼制。政任實繁。坐鎮有餘。惠浹兩川之舊。召還可待。治幾五月之成。柄任云歸。輿言所協。

回并州唐龍圖書

解麾南服。總計北陲。方休道路之勤。卽董舟車之運。稽郵音而講好。煩記室之占書。仰戢謙懷。中藏感臆。恭以某官。誠明正性。忠亮一心。蚤被華纓。寔升顯服。擊邪扶正。自全國體之重。輕執憲班條。不計身謀之進退。適繫遠略。云殿劇藩。維薄伐之故區。實勁兵之要處。境控二敵。地綿百城。暫煩細侯。往護諸將。矧威聲之素著。加治迹之頻行。優奏膺功。入敷休命。

代魏公回曾舍人書

審對制函。進升禁掖。訓辭鼓天下之聽。詔命見聖人之心。維時代言。僉曰宜職。某官道結真主。學通先王。盛際親逢。於有爲。貴名自取。於不次。兼提數局。奄有羣才之所長。屢抗至言。力齊衆論之不一。聊屬演綸。

之手。未殫澤物之心。勢匪久居。議當大用。適叨封國之假守。側聽治朝之得賢。未列慶音。首紆榮誨。永言感愧。奚盡文陳。

上杭州知府沈諫議書

頃者。爲令屬封。託公餘庇。一以恩私之煦。曾何位貌之論。常獲坐隅之進趨。不知縣道之疎冗。幕府連從於西北。門闌復阻於東南。積是朝夕係仰之誠。缺然寒暄起居之間。蓋術業不長於他政。唯管記見役於上官。欲爲一書。翻苦少暇。抑中年精力之有限。非盛德須臾之敢忘。尙靳高明。或貸罪戾。恭惟知府大諫。道德之老。朝野所宗。才究百爲之長。識通萬事之變。游揚中外。並建事功。時論愈歸。風績時懋。二浙會府。矧在歷居之已勞。七人近班。不應補外之宜久。行祇嚴詔。入輔寧朝。俛惟孤生。尤切勤禱。雖躬被善化。阻預鄉人之閒。而口頌壯猷。肯居國士之後。風霜正凜。旌檠方遙。上爲邦家。倍綏寢饋。

代魏公回宋次道諫議書

宮符久領。居常多病而少閒。函訊每來。滋用負慙而懷感。方歲律之逾盡。惟生經之粹安。某官才貫幾深。德含簡厚。蚤進升於法從。比臨長於諫工。博極羣書。多識朝廷之故事。參聞大政。行追家世之先芬。益護燕興。少符傾祝。

回新恩通判賀郎中書

竊審顯承宸恩。榮貳尹政。曾未單函之脩慶。遽先累幅之惠音。祇服謙懷。增銘感臆。伏惟通判郎中。秉彝

簡厚操術精深。淹回不歎於郎潛。恬約自高於物論。名都劇治。暫勞關決之才。要路華章。行懋延登之寵。春期將半。時社載蕃。瞻頌感藏。不勝下懇。

回劉道叔祕校書

曾是晚生。獲親盛德。忘年相厚。契緣出於士科。聞道固先。禮止容於兄事。遠離幾月。倏忽中春。伏惟心游六經。躬享百祿。未暇一書之敘。戀違煩累。驛以寄聲。方真主之急賢。矧宿儒之抱道。行聞延訪。起備諮詢。瞻頌感藏。并深下悃。

代魏公回發運羅少卿問候書

留符所守。使範且遙。敢圖雅愛之存。遽有珍題之貺。兼承近履。參嚮蕃禱。惟望重於本朝。矧才周於數器。久煩碩畫。總山海之輸將。屢懋丕功。瞻邦家之供億。行祇明詔。歸踐嚴塗。感頌并深。名言非悉。

與二府書

向勞重任。遂乞餘生。得守故鄉。甫安坐席。一奪清漳之臥治。再叨全魏之居留。矧惟北門。實控朔野。素號多事。罕常少休。黽勉三年。智與力而俱困。支離四體。疾乘衰而屢攻。苟復徘徊。則將顛隕。載念朝廷之極寵。莫如將相之兼榮。曾是罔功。久茲空食。慮役坐戕於神觀。量盈陰懼於鬼誅。所以涪露封章。仰干旒扆。懇還旌節。願易麾符。愚衷雖堅。睿聽猶隔。自非四近之協助。曷使兩端之畢諧。顯勞合被於褒嘉。公累遂諧於滿滌。未容贊善。先辱惠音。行聞九寺之進承。續具一書而修慶。永言感怵。曷盡名云。

回破州晁大卿書

不聞餘教。第驚日月之屢更。常跂下風。闕敝寒暄而上達。簡惰若是。擯遺乃宜。敢圖損卿老之達尊。眷卹曹之晚進。首貽勤誨。備戢謙懷。仍審順履。春和載蕃。時祉伏惟。知郡大卿。德函渾厚。識貫幾深。沛然風力之有餘。底厥事功之甚懋。清門濟美。矧追迹于先芬。嚴詔趣歸。行垂光于近著。

代魏公賀富相公致仕書

竊審顯册告廷。安車就第。兼榮將相。增快公卿。素志一時。清風萬世。伏惟某官。德尊台路。勛在王朝。忠亮丹誠。屯夷共貫。頻年避位。鬯謀未及於道行。晚歲偃藩。知止漸圖于身退。遽舍臯夔之偉績。遂諧箕穎之初心。宏父進班。聖君優老。動清洛之喜色。追香山之舊游。某早庇末光。比聞成命。激儒衷而竊慕。愧勇退之云先。企忭并深。名言非悉。

代王龍圖賀郭宣撫書

伏審上注睿意。出宣詔音。惟時列城。咸企前纛。伏惟慶慰。恭以某官。傑才高世。偉略絕人。襲忠誼于世芬。洞機鈴於兵要。比自廉車之貴。亟躋宥府之嚴。方繫壯猷。曾未累月。會小戎之玩塞。資厚望以臨藩。繇密勿之廷中。往籌多算。專慰安於闔外。坐制一方。佇銘鐘鼎之勳。增重邦家之望。水行貫序。時祉叢休。

代王樂道龍圖回環慶副總管張團練書

伏審延獎膚功。就膺寵命。增使名之峻秩。貳帥路之劇權。未列慶函。首貽珍贖。往乘邊障。方倚於傑才。出

擁戎旛。卽光於美拜。永言忻感。實倍常驩。

上北京通判兩郎中書

嚮者。備員屬邑。託庇副車。官書期會之間。未嘗檢察。公事起居之際。爲霽威嚴。訖由恩臨。得以理去。逮從事于幕府。益馳戀於門牆。素簫兆涼。粹襟迪吉。恭惟通判郎中。才兼數器。名重本朝。貳尹治於別京。已登最狀。擴賢謨於要路。行懋休功。伏望上爲邦家。精調寢饋。

代與蘄州呂兵部和州傅戶部書

向此爲州。遂有米鹽之細務。居維企德。實疎竿牘之常儀。自履冬嚴。諒蕃時祉。伏惟某官。心惟忠誼。學有本原。危言朝忤於九天。清議夕傳於四海。要官美職。視如一羽之輕。大節高名。坐若泰山之重。暫分符於淮右。行趣召於朝端。左右嘉謨。旦夕顯用。伏望爲國自厚。副時所瞻。

代張待制回鄭學士書

伏審上方給筆。甫程試可之篇。麗正讎書。遽踐入優之等。騫翔茲始。欽忭逾深。惟儒館之盛游。實治朝之華選。豈特文章之諸彥。於爾爲羣。由來公相之貴人。此塗所出。某官學探聖闡。名重士林。鼓挾庭之雄辭。中入彀之上第。綠髮方壯。矧致身之自高。青雲在前。信舉足之可到。尙稽馳慶。首辱貽書。魏荷并懷。文陳非諭。

代王龍圖賀王待制書

竊審就奉制函。總提使節。伏惟慶慰。恭以某官。用兼數器。望重本朝。才猷懋明。風力強濟。間引兩川之漕。旋貳大農之籌。贖給中都。翦翔內閣。遙圖藩寄。允穆朝言。剖北道之帥符。甫溫坐席。餽西方之兵食。遽趣行臺。佇碩畫之少施。卽膺功之茂建。續須大用。訖副輿言。

上二相公書

某遠賂本疎。忝寄忽驚於彌歲。舊疴間作。貢書遂至於曠時。仰兼度之有容。顧下誠之自愧。伏惟謨明王體。翼戴帝圖。一德同寅。百祥胥祐。恭以某官。器包民極。道濟王塗。挾重計以尊本朝。履正德以儀庶位。稷契諸己。唐虞吾君。崇賢絀姦。興利革弊。講猷爲之未詔。舉教化於可行。廟堂之間。日修輔相之能事。鐘鼎之上。行紀太平之極功。聳動搢紳。光華典冊。凝嚴貫序。變理經懷。倍保崇高。仰符眷倚。

上郭樞密書

伏審樞廷虛位。陞城遠顏。出宣布于上恩。行節制於諸將。適臨寒籥。遐履征塗。陰有神明。來相福祚。恭惟某官。略包英遠。氣挺沈雄。襲祖烈於汾陽。授兵符於圯上。才不世出。名爲主知。方借前籌。參制壘中之勝。復資多算。聊爲塞外之行。諒敵寇之望風。懾威聲而遁跡。某適廩州守。佇展郊迎。欣企并深。文陳非悉。

賀王觀察仲儀書

竊審易祕殿之禁聯。就廉車之寵秩。仍更劇鎮。并服華恩。伏惟慶慰。恭以某官。經世壯猷。端朝雋老。揭聲光于白日。享富貴于青春。大公相之高門。早紓鉅業。撫兵民于西徼。方懋膚功。以文武之兼才。遠班聯之

易地解平涼之舊紱。換成德之新符。佇繇蕃闡之雄。歸秉鈞樞之重。永言欣頌。曷盡名云。

賀陳蔡二提刑書

伏審顯對恩函。就更使部。側聞成命。竊怵丹悰。伏惟某官。識際幾深。量函夷雅。擴長才于仕路。藹偉望于
郎垣。奉詔中宸。體睿心之欽恤。按章列郡。多陰德之平反。行登踐于嚴塗。寢發舒于遠業。永言欣頌。曷盡
文陳。

祠部集卷三十二

書

壽聖節人使三幅書

左番大使

誕聖膺期。方祝岡陵之壽。協鄰遣使。遙觀原隰之華。遐冒冬嚴。益蕃時祉。

左番副使

流虹紀節。會聖歷之開祥。乘驛相儀。亞使壇而修慶。載惟妙履。茂擁厖休。

右番大使

祥繞電樞。紀書王之首月。命虔星傳。赴誕聖之先期。載惟跋履之勤。益介綏將之祉。

右番副使

國壽開兆。紀千齡之震夙。使才登武。動六轡之輝華。順履隆寒。亶膺多福。

又

左番大使

比者。電樞紀瑞。行臨誕節之良。星傳增華。來奉慶儀之好。仰惟妙履。參萃繁禔。

左番副使

比者、國壽有開、鄰歡胥講、適屆流虹之節、適勤飛驛之行、順履冬嚴、載蕃時祉、

右番大使

比者、華渚發祥、紀聖期之震夙、寶鄰講好、飭使傳以馳驅、遐冒隆寒、倍綏吉履、

右番副使

比者、誕聖膺期、睦鄰講好、參使軺而戾止、奉信節以勤斯、征轡甫休、粹襟滋鬯、

同天節國信三幅書

左番大使

虹渚發祥、臨聖期之載誕、星軺講好、飭使傳以遐驅、適冒時暘、愈完氣宇、

左番副使

繞樞紀瑞、符誕聖之初辰、將幣相儀、奉協鄰之雅好、適臨近服、滋鬯粹襟、

右番大使

千秋紀節、適符祝嘏之期、四牡戒行、爰奉張旛之聘、載惟匪薄、諒協釐祥、

右番副使

乘詩首月、出震初辰、肅將信幣之來、參示使原之寵、載勤長道、聿集繁禧、

與賀同天節人使三幅書

左番大使

里社發祥舉罄岡陵之祝。輶車將命。遙勤原隰之行。適冒時暘。諒安福履。

左番副使

國壽有開。符聖期之載夙。鄰歡胥講。持使節以偕來。將事云初。綏祺無爽。

右番大使

火行在候。符誕聖之初辰。星傳戒行。奉睦鄰之重好。征驂甫舍。秦宇惟寧。

右番副使

流虹紀節。會聖歷之開祥。乘驛戒行。亞使旌而相禮。適臨近服。滋鬯粹襟。

代邵興宗賀正旦人使三幅書

皇太后大使

某啓。伏以歲時云始。肆儀會於三朝。原隰其華。通懽恩於二國。載馳嚴馭。甫戾近圻。屬寒籥之貫辰。諒粹襟之迪吉。

皇太后副使

玉瑄肇和。方慶歲功之起。寶鄰修睦。乃勤使驛之來。多歷郵程。比臨畿次。神明所相。福祚其蕃。

皇帝大使

幹旋斗位。會王歲之開端。修講鄰權。寵使華而將命。冒風霜之餘凜。驅駢傳以少休。增固生經。茂迎時福。五始遙臨。百嘉滋鬯。爰講邦家之好。以均天地之休。禮意交伸。使才登選。征駢遐御。良多跋履之勞。寰服甫臨。益介綏將之祉。

皇帝副使

排食

遐冒霜稜。肅馳星傳。已次神畿之近。竊循主道之常。敢羞庖餐。以勞車從。不腆之禮。有慙在顏。攀遠

奉幣成儀。啓塗復命。願官居之有守。躬祖席以無階。少駐行暉。暢塵禮具。

代留守侍中契丹賀正旦人使三幅書

左番大使

玉璫肇和。謹王春之此始。寶鄰修睦。嚴使節之斯來。星傳載驅。天祺參嚮。

左番副使

歲歷更端。春祺備合。協鄰講好。交修禮意之勤。將幣相儀。登貳使華之選。迓寒云冒。福祚其蕃。

右番大使

比者、邦家相慶。甫王歲之闔端。原隰其華。緊使才而將命。載歷關河之邈。豈無車馬之勤。審次近圻。實應多福。

右番副使

天地發春。邦家均慶。榮命使旌之出。肅將信幣之來。矧寒籥之貫辰。諒粹襟之迪吉。

代王尙書契丹賀正旦人使三幅書

左番大使

蒼震發春。行講三朝之會。皇華將命。來通二國之歡。甫舍征驂。益綏泰宇。

左番副使

適新正歲。開天地之大生。登貳使才。奉邦家之相慶。適臨寒籥。滋鬯粹襟。

右番大使

王春講始。仰新璿運之觀。使節講和。增固寶隣之好。隆寒云冒。純福其蕃。

右番副使

華歲闔端。具慶儀而有舊。寶鄰修睦。筵使節以斯來。六轡載馳。百祥備舍。

代滕元發北使三幅書

皇太后大使

某啓。伏以吹律宣和。方謹歲時之始。協鄰講好。恩同天地之休。爰寵使華。交伸禮意。載歷關河之邈。竊惟車騎之勞。願氣自持。與時迪吉。

皇太后副使

歲歷更端。春祺備合。惟使車之修睦。與鄰國以交懽。星傳載驅。適持於信節。霜稜尙厲。益固於粹襟。

皇帝大使

蒼震發春。行講三朝之會。皇華將命。來通二國之懽。冒霜序以勤斯。聽車音之戾止。仰惟妙履。參萃繁禱。

皇帝副使

王春謹始。遙新璿運之觀。使驛講和。益固寶鄰之契。適增華於原隰。行稱慶於軒墀。霜氣餘嚴。天和參嚮。

代馮內翰北朝賀登寶位人使三幅書

皇太后大使

炎運紹休。肇御天飛之極。皇華奉慶。遙虔星駕之行。甫次近畿。亶膺多福。

皇太后副使

伏審遠持信節。恭致慶函。驅星傳以少勤。冒火旻之餘燧。燕興並適。福祚其蕃。

皇帝大使

闢聖膺圖。中天卽阼。邦家相慶。增修鄰好之深。原隰其華。遂曜使才之美。甫臻寰服。滋鬯粹襟。

皇帝副使

聖統續寧。使旌修慶。載歷關河之邈。深惟車馬之勞。兼冒秋炎。諒綏時祉。

代魏公賀昭文相公書

伏審進膺顯冊。復乘洪鈞。廊廟登賢。寰區均慶。伏惟某官。山河間氣。社稷宗工。挾重計以翊本朝。履正德以儀庶位。措今師古。早摠珍策於可行。尊主澤民。久鬯偉謨於已試。向辭幾政之要。洵布教條之寬。願西土之具瞻。遙歸師尹。煩東山之強起。實爲蒼生。行宣經濟之元猷。坐格太平之極致。某側聞成命。竊忭丹衷。

賀王參政書

竊審茂對制恩。參聞幾務。君子得行其道。衆賢相慶於朝。伏惟某官。函德淳深。秉彝惇大。體溫辭而書命。三代之風可還。對清問以傳經。一時之論無苟。天下之望蚤名。未仕之臯夔。廷中之謨。暫貳有聲之邴魏。側聞睿簡。增忭鄙懷。

上相州傅待制書

比參戎幕。未逾匝月之期。再頒軍書。復應上臺之辟。審開尊府。道在別都。旣不能備一日之使令。得稱故吏於門下。又不獲釋累年之願望。略聞餘論於坐隅。遐企末光。增深懇抱。伏惟某官。景包公輔。學際聖賢。廣譽令名。仰若泰山之重。危言珍策。措諸四海之安。蚤臨長於諫垣。旋出觀於治屏。上心圖治。矧聞獻納。

之前規。中詔趣歸。當鬯經綸之偉業。春韶過半。時社載蕃。願爲國家。精調寢饋。

代魏公回劉郎中書

比總帥符。益疏賢範。宣本朝之利澤。方究寸懷。枉順驛之飛文。過形厚意。矧惟鉅業。夙簡淵衷。佇馬政之有成。被龍光於不次。餘惟輔衛。少副願言。

回趙參政書

比領守符。兼提帥路。纔奉行於寬詔。卽論謝於單函。國論多餘。郵旨繼及。過形賁飾。增重常彝。惟參斷於萬幾。諒翕膺乎百福。伏惟某官。端朝碩望。經世元猷。天下表儀。仰淵騫之德行。廷中事業。贊邴魏之謀謨。益保粹襟。行膺徵冊。

回王宣徵書

比緣病質。丐領僻州。帥路別都。遽蒙于委寄。守符留鑰。遂忝于交承。賴善政之有條。容鄙才之循跡。尙期必告得盡所聞。

又

造馳卓馬之朝。入赴蒼龍之闕。方懷盛德。稽布尺書。恐前墜于誨音。第中藏于感臆。伏惟某官。道包衆美。氣稟元精。出入三朝。備紓于賢業。東西二府。行慰于民瞻。伏望上爲邦家。益綏寢饋。

代馮內翰回廣州余尙書書

伏審被明詔之溫辭。陟中臺之貴秩。官儀益峻。物論僉榮。敢圖自損。達尊首貽寵教。仰服謙懷之厚。第竊感臆之深。恭惟某官。道德宗工。文章雋老。才周數器。名重本朝。危言早動于丹墀。偉蹟近光于銅柱。兼倚遠略。暫提南海之要封。若咨升庸。當簡曲江之舊德。伏望上爲邦社。精綏燕興。

代王內翰上賈梁二相書

某擢始孤生。躡躋近侍。與材散木。繫化匠之爲容。獲器寒金。繇宰鈞之所鑄。旋冒複門之華選。寢疏翹館之盛游。居企台儀。間勞禁職。曾缺音函之獻。莫諮德宇之寧。伏惟靜鎮會都。樂班寬詔。神明所右。福祉其蕃。恭以某官。識交天人。誠貫日月。帶上公之印綬。擁方伯之旌旗。威行列城。令肅外閫。身任安危之重。遠俗猶聞。才通文武之兼。萬邦以憲。雖袞衣願封於東邑。欲留周公。而舟楫能濟於巨川。當用商相。行膺徽册。還秉元鈞。

上程宣徽書

阻拜台符。履環歲歷。實首承於內命。且兼領於他司。問裁詔誥之餘。旋汨簿書之冗。單函不講。盛德焉依。竊恃誤知之深。尙寬苛禮之廢。伏惟坐觀藩政。翕受天祺。恭以某官。道具將明。體凝簡厚。抱廟堂之偉業。挺金石之純誠。武政鈞樞。少見大臣之能事。班條屏翰。未收真相之極功。矧徽省之名區。卽宰塗之便道。節趨非晚。柄任其時。忭躍維深。文陳曷罄。

上王定州君貺張南京安道錢秦州子飛書

逖阻珍羣。屢遷華序。思綸言之對掌。深慕昔游。玷詔旨之首承。實虧時望。牽禁局之職業。事官府之文移。寸慮日勞。尺書坐曠。仰惟妙履。參嚮龐禱。恭以某官忠諒一心。誠明正性。高文典冊。以甲乎科等。危言至論。以根夫治經。潤色辰猷。蚤摠不世之蘊。謨明王體。久具有生之瞻。旋析左符。遙臨巨屏。矧講求于新治。方諮納于嘉謀。靡須五月之政成。卽被三篇之冊拜。

上唐龍圖子方書

伏惟總臨大計。誕擁繁禧。恭以某官名世標才。際天蘊識。蚤紓賢業。自結主知。開正論于諫垣。峻榮班于延閣。時議加重。風聲有休。董北道之輸將。暫煩碩畫。瞻中都之供億。佇報膚功。行奉詔音。驟歸柄任。

與吳仲庶孫次公王至之張文裕書

久闊朝游。載瞻賢範。禁塗視草。適居侍從之勞。訟舍坐棠。諒樂中和之職。伏惟某官當世雋老。爲時聞人。猷謀可師。德業甚懋。總列城于一道。節制攸歸。嚴督府之萬兵。恩威並暢。行祇迅召。益衛粹襟。

與李西臺書

躡職禁局。久違德宇。伏惟踐文昌之貴秩。樂素里之平居。益介康祺。彌餘逸韻。恭以某官得氣間傑。爲時老成。識達聖賢之歸。言該名理之要。柏臺留務。遂清尙以優游。李蹊慶宗。襲餘芬之止足。倍慎高年之養。行光大政之諮。

問候郝殿前書

總帥西來。百爲所繫。懷賢東望。千里而遙。馳誠則深。布問差緩。矧惟雄略。夙簡容心。節旄蚤進于榮班。陛戟久提于禁旅。行膺徵冊。入贊鴻樞。益護燕輿。庶符瞻頌。

回懷州傅待制書

承臨便郡。已布寬條。高誼迴存。珍函首及。矧惟厚望。早服近班。筆下極言。嘗論治亂之體。禁中勸講。久格聖人之聰。諒坐席之甫溫。卽鋒車之趣召。

問候渭州蔡待制書

帥符所守。願燕語之莫同。使驛之來。反函封之相繼。比惟福履。誕擁龐禎。緩帶輕裘。坐銷邊鄙之警。長轡遠御。益重朝廷之威。更冀珍頤。別膺寵數。

回新夔州路提刑李少卿書

竊審被命中宸。按章左蜀。首貽尺牘。增戢寸襟。矧厚望之端朝。加傑才之經世。躋榮卿寺。久懋於風聲。擢職使臺。行光於時論。

回呂省副書

審承召節。進貳財闈。解守紱以還朝。抗使旌而就道。嘉謨造膝。行入對於清光。賢業致身。期坐追於先烈。沐音函之敍別。企德範以馳誠。益護寢興。少符瞻頌。

回諸處知州寒食問候書

木行貫序。火禁丁辰。首枉書辭。備形禮意。矧惟治績。洽著懽謠。佳節遙臨。蕃禱參嚮。其爲感頌。曷盡名云。

回蘇省副書

向遇北轅。克襄大事。函封叙慰。醪醴致勤。茲粗變于常儀。辱繼形于榮誨。兼審載馳歸鞅。復洩財闈。順展春韶。益蕃時祉。行膺大用。倍冀精頤。

回楊四廂書

向承高誼。遠枉盛牋。論志意之欲爲。願言辭之甚壯。知是仁者之有勇。可使懦夫之聞風。間又相規。正如所願。其爲欽感。尤劇銘藏。

回郭宣徵禁煙問候書

木行貫序。火禁丁辰。首枉誨音。備形禮意。伏惟某官。位光台路。勳在王家。龍虎兵韜。自坐籌于方略。貔貅將士。皆遠服于威名。臨履春和。益蕃時祉。

代回王介甫內翰書

入相三朝。坐彌一紀。以有限之才。而應無窮之務。豈惟精力之已疲。以嘗試之身。而妨未用之賢。抑亦寵榮之太久。懇陳軒陛。得守鄉邦。功名弗居。惟慙往昔之趣。進退粗得。偶合至賢之心。喜素節之獲全。枉盛辭而益美。適來總帥。遂緩布書。旋承違樂職之高懷。屬演綸之大手。前席論議。密簡聖人之衷。本朝文章。行追典誥之體。春暄未過。福履自持。

代回新知虢州田大卿書

比承高誼。特貺長牋。據經世之遠謀。條禦邊之上策。析文武爲二道。旣破拘儒之談。講兵戎之大機。有裨陋識之見。不時布謝。惟日懷慚。春序過中。生經增裕。更加精蓄。以對寵褒。

賀提刑雷左藏書

審承恩詔。出按刑章。矧風績之久凝。加時名之素著。首膺邦選。允穆朝言。佇聞庶獄之平反。庸副上心之欽恤。下車視事。列郡瞻風。欣忭攸深。敷云非悉。

代問候趙參政韓副樞邵副樞書

遙來總帥。訖此踰時。乏文武之兼資。統兵民于諸道。內收已竭之慮。外役久勞之軀。殆無少閒。遂缺通問。伏惟某官。德函惇大。才貫幾深。經世有爲。擴初心于康濟。致君以道。嚮偉蹟于太平。行膺徽冊之光。以副薦紳之屬。春韶云暮。時祉載蕃。益保燕興。少符瞻頌。

賀北京王宣徽書

竊審誕膺制冊。增峻台儀。成命旣行。羣言允穆。伏惟某官。器函惇大。道貫淳深。早更要路之遊。徧歷禁塗之選。司別都之管鑰。再倚保釐。秉二府之鈞樞。久稽登用。聊褒崇夫偉業。緊宣鬯于徽猷。行拜命于三篇。以圖寧于萬化。永言忭頌。曷究悃悃。

答賀慶陽李水部機宜書

竊審遠赴辟書。比臨戎幕。高材所處。大府之光。伏惟機宜水部。識度淳深。性資夷曠。屢遠藩鎮之薦。自樂邱園之居。誼難退身。起爲知己。兵民胥賴。喜婉畫之必從。賓主相懽。計成功之可底。行疇顯效。進服華章。忭頌并深。名言非悉。

回河陰提舉輦運杜比部書

伏審顯膺明命。榮領劇司。未列慶函。首貽誨牘。欣服謙矩。增銘感悚。伏惟提舉比部。風力素強。時才兼懋。董河防于一道。方賴底功。按舟運之萬艘。遠更重寄。行旌顯效。進服華章。欣頌并深。文陳非悉。

回賀吳舍人書

審被制函。進升詞掖。矧惟厚望。蚤映端朝。重潤色于辰猷。首延登于俊德。文章獨擅。榮司綸綍之言。伯仲相望。增盛衣冠之事。其爲欣慰。奚盡敷云。

代回相州謝祕監謝到任書

審即便時。已班寬詔。矧惟耆德。早懋風猷。望所舍之甘棠。阻觀新政。喜故鄉之喬木。亦被深仁。首墜誨音。增銘感臆。

代回絳州薛郎中謝到任書

竊審涓辰其吉。布治云初。曾慶問之未修。遽榮絨之首及。矧惟風力。卓建事功。卷百城澄按之才。就一郡撫柔之寄。寧久班于寬詔。當必復于要權。感頌并懷。名言非諭。

代回前知魏州李大卿謝得替書

辱紆累幅。承解左符。行路遮留。感惜仁侯之去。還朝進對。佇敷明主之休。矧治最之告成。卽恩章之增寵。勉加導衛。庸慰攀祈。

祠部集卷三十三

策問

試京兆府學生策問八道

問。讓者天下之美道。所以息伎心而長廉節也。處夫上者或爲之先。在下者陰從以效。今公卿大臣間。且受一命焉。暮必讓。讓至于三四不聽。則必就噫。果可讓也。奚三四而遂止。雖百十猶爲之。必聽焉而後已。其不可讓而讓也。是率天下以僞也。其從而效者皆僞道也。望伎心之息。廉節之長。難矣乎。今之讓可行耶。不可。

問。肉刑之刑慘也。後世憫其體膚之斷而去之。然罪有大于髡黥者。遂無等以處置。一加而至于死。於戲。斷者誠不可續。較死不猶近輕乎。若是變肉刑之慘。而反重之。豈法之得。就慘與重。奚適而可。

問。記曰。君子行禮。不求變俗。夫不求變俗。固也。俗固有媿惡。又可概而不之變乎。如是。則固簡者得藉以爲說。觀惡俗而恬不一變焉。將驅其俗以就吾禮。又慮夫安于故習。有不得已而就焉者。非中心樂而成變也。君子之于禮。如何爲可行。願以聞其說。

問。戰危事也。雖械變百出。或鮮克以濟。方長勺之役。曹劌問莊公何以戰。公曰。小大之獄。雖不能察。必以情。劌曰。可以一戰。噫。矢石旣接。敵者在望。驅生人而就死地。而曰我察獄能以情。可使之一戰必克乎。劌

之言、偶取于當時耶。遂可以爲後世用兵之術耶。

問。昔者洚水氾濫。蛇龍交人之跡。禹導而行。諸地中。然後九州以濬。而中國得以食。河自金隄之役興。其故道遷。而橫流肆者。後世不絕。今瀕河之地。或種不得下。有旣耕殆穫。而隨被水害者。無虛歲。欲順其性。而從其所自流。則有毀城壞畝之患。將堅其防以禦之。然水行地上。不決則溢。未見其可禦也。講河策者。必有長利。

問。孟子對齊宣王。以爲明堂者。王者之堂。欲行王政。則勿毀噫。聖人之君世。其道德仁義。凡可以爲治者。莫不講。饑、寡、孤、獨。莫不皆有養。雖無是堂。王政可勿行乎。苟偃然自得于九重之上。弗講其所以獨治之具。而施仁弗先。夫四者。又可以行王政乎。若是王政之行否。果繫一堂之存毀乎。否也。旣曰。王者之堂矣。于齊焉。得有諸。軻之旨。安在。諸君試辨之。

問。書稱鯀陞洪水。汨陳其五行。帝乃震怒。弗畀洪範九疇。乃錫禹噫。天高乎在上。將覩其赫然震威。以怒鯀。又諄諄然有所命。以錫禹耶。不然。豈箕子之言過耶。抑禹得九疇。其取以治水者。果何法耶。及夫決天下之水。而注之海。然後任九州之士。以定貢。彼八州者。先田後賦。莫不皆有貢。而冀獨反是。何耶。

問。夫子曰。吾四十而不惑。孟子曰。四十不動心。有以異乎。苟無以異也。是二者。聖賢少時。何不能。必待四十而後可。孟子以爲顏淵具體而微。且淵也。短命。是未嘗至四十也。苟不至夫子之年。已不惑。則過聖人遠已。烏在其微也。若猶未也。旣未能無惑。其于聖人之道。有不足者矣。烏在其能具體也。諸君爲辨之。

試德州進士策問二道

問。儒苟名。則己必欲蹈其實。而不心乎治亂之原。未見其能儒也。自古皆有治。亦莫不有亂。治亂之來。非天降地出。直根夫君臣得失之歸爾。若二帝三王之盛。有治而無亂。不待講而白。孤秦五季。又無足道者。繇漢以迄于唐。其君有欲治之君。而無治臣。或臣得矣。而君失之于上。與夫君臣一德。號爲至治之極者。此宜就諸君以考也。其歷代史籍之載。各按往古以對。庶覩儒者之用心。

問。鹽于海。利爲最巨。欲利一于上。而絕下之侵也。故防峻而網逾密。自竊鬻私販之弊興。而愚民俱入于罪。甚者或轉而爲盜。至制梃以殺捕。間入死法而不知止。何利之誘人也如是。議者欲天下通行而商焉。則又官之所得。纔關市之算爾。是刑罰可省而利入或無幾。噫。通行傷官。禁止害私。害私滋刑。傷官耗利。若之何其可也。

頌

上文相公生辰頌

某蓋聞昔在宗周。則有若申甫鍾神喬嶽。而克宣四方之澤。粵惟炎漢。則有若蕭相儲精大昴。而終底第一之功。皇天眷宋。思佑真主。和正之氣。上不爲景星慶雲。殊尤之祉。下不在靈芝屈軼。中華河汾。是生王佐。公翁受純粹。宜爲誠明。入則暢袞謀。裨王體。以躋君子堯舜。出則布上恩。厚民德。以措世于仁壽。方將施澤于無垠。較功于無前。區區周漢之佐。不足爲公議也。惟月孟冬。日僅盈數。實公載誕之辰。謹獻頌以

爲壽曰。

月十爲陽。日九爲良。河汾之鄉。于時發祥。是生我公。德完道充。文乎深厚。志乎粹忠。出殄強敵。入登元輔。甘雨早歲。和氣綿宇。誕辰爰臨。幅員一心。祈公之壽。松筠千尋。

銘

鐵漏壺銘

注之涓涓。弗舍晝夜。節數之正。差不容罅。作于熙寧。庚戌孟夏。

序

盧君字序

古之人有所志且戒。或寓文銘器以自謹。有時而泯也。豈若名在己。稱于口而終身焉。名不徒立。具見君子之志。善哉盧君之名正臣也。其志于忠者歟。然正之施不一。有諫諍之正焉。有論議之正焉。有容色之正焉。有進退之正焉。諫諍之正。過中則失亢。論議之正。過中則傷泥。容色之正。過中則太剛。進退之正。過中則近僻。若是不得中之助。亦不足云也。故名既定。朋友之間。又爲字以稱道。使聞而知所表焉。予于盧君則友也。字君予職。請字曰中甫。君方屈才佐一邑。他日立朝廷。事人主。使人稱之曰。盧某正人也。則君之名不虛命。又曰。正而且得中。則予之字不虛表。中甫其勉之。皇祐三年正月十二日。餘杭強某序。

吳三班字序

致政宮師杜公。昔爲樞密使。今三班吳君。嘗給事府。其謹廉敏惠。能自得公意。故未嘗以吏視君。間因侍側。命之名曰希遠。公旨必曰。功名事業在希其遠者。而不以近器期君也。今諱字于蒙。請字曰伯強。何則。適千里者。在足力之強爾。否則。跬步不能到。君子之于遠業。亦曰自強而已矣。皇祐五年六月二十四日。友生強某序。

送監征錢宗哲序

人心之仁。均有也。然而不能者。利奪之爾。關征之吏。探囊發篋。索人之隱。其心豈素不仁哉。蓋曰。賞格誘之爾。今有司之令主關征者。月校季比。歲終會其課。視前歲之增減。以爲殿最。課增有厚賞。惟恐搜隱之不至。仁何預我哉。浦陽在婺爲窮山。商旅之過婺者。多道旁邑。故關征之官常病歲課。益張其防。伺人之來。間有一觸者。則必傾囊倒篋。算緡而去。譬夫設機待獸。中則不釋。故商旅益不來。常歲之課益不登。獨錢君宗哲之莅是局。其術大抵本仁誼。且曰。籠商之術。在寬不在急。急則吏與商爲表裏。將寡取其賄。而私縱之。寬則商喜輸官。而吏無以爲私計。宗哲持是術。凡商旅之過者。必裁減其數而征之。繇是皆願出其塗。而常歲之課愈登羨。四方之商率稱宗哲爲材官。又浦陽俗善織。凡補吏者。指此邑爲膏潤。其空橐而來盈裝而歸者。前後或相繼。獨宗哲解官去。家儲無擔石。吏負而隨者。皆先世賜書與父祖誥軸。一邑之民。愈以宗哲爲廉吏。宗哲嘗語予。我高祖挈東南之籍歸天子。始有功王室。厥後用直言登科選者。一門凡三人。故家聲大于當世。今我階蔭籍。列冗官。苟使規規歲課。覲賞格之及。寧獨愧吾門。抑豈不貽仁

誼之差耶。故學不喜章句。仕不圖苟進。惴惴焉。唯弗紹家世之烈爲懼。以是宗哲能文。善詩。卓然有遠器。噫。能言宗哲之材。而不能知其廉者。四方之商也。能知其廉而不能知其文者。一邑之民也。知材與廉而復能知其有文且仁者。予也。于其行。并取行商居民之誦以爲序云。至和乙未三月十一日。浦江令強某幾聖題。

劉君仙尉字序

世治安。則士得伸其蘊而見貴于時。自古奇偉士。或遭世不幸。避寇干戈之際。窮死巖谷之下。而其蘊竟不得伸者衆矣。宋興垂百載。天下號無事。東南之民不識兵革。西北貢享不絕于廷。士遭此時。真治安矣。劉君生綺紈家。旣得爲太平之臣。而名復以世安命。君是名得其實矣。今一命尉武川。武川邑小事簡。固宜以學問自力。異日效古人乘輅上書。一伸于當時。不徒爲江安之士矣。請以伸之爲君字。苟名與字兩得其實。則得不爲虛矣。劉君其勉之。至和二年三月二十七日。浦江令強某序。

送嚴公裕序

每天下詔貢士。而吾鄉應者不下二百人。其選而升禮部者。十二人而已。吾友公裕嘗預焉。旣而十二人者。偕試于禮部。禮部總天下貢士之籍。其數纔三千餘。其選而進于天子者。不下七百餘。公裕弗預焉。議者曰。十五而取一焉。公裕得之。五取一焉。公裕乃失之。豈其命耶。不然。何得于寡取。而失之多取也。爲公裕父母兄弟者。亦曰命。朋友于公裕者。亦曰命。公裕亦自感于其命而已耳。昔有習舟者。往來絕大江。未

管或失也。一旦猝與風濤遇，篙亂楫橫，既覆厥載，歸而嘆曰：自吾汎大江，而吾舟未嘗危也。今特爲風濤之困爾，豈吾術未至耶？毀楫折篙，不復習舟事。客有笑于傍曰：夫操舟患不工爾，苟工焉，則之江之河之巨海，無不利。寧有利于安流，而敗于驚波哉？子弗汝咎，而尤風濤。今而後吾將見子不能舟斷港，寧復大江之能絕乎？于是舟者釋然悟，再拜爲客謝。治篙整楫，畢力于舟事，期于工而止焉。予與公裕別十年矣。今歲詔罷貢士，而公裕自婺過予，道所爲學，則猝然其正矣。出所爲文，則煜然其富矣。殆非予昔別之公裕，然獨所謂取名之術者，若將易而不爲焉。未幾告歸，因語之曰：士患業不精，業苟精，卽于鄉于禮部于天子之廷，何試而不可。安有工于其鄉，而拙于禮部哉？今公裕一訥而弛，其亦尤風濤而毀篙楫者歟。寧知無竊笑于傍者，公裕亦幡然悟，再拜爲吾謝而去。

送邵秀才序

予官泗，四方之學者與其州之士，凡遇予，不言其他，而輒及賦。彼果不能其他，而惟賦之知，固不足怪。苟略其他而止，予以知賦，其待人既薄，而自處必不厚。而予之于賦，豈好爲而求其能，且工哉？偶作而偶能爾。始用此進取，既得之，方捨而專六經之微，鉤聖言之深，發而爲文章，行而爲事業。所謂賦者，烏復置吾齒牙哉？譬嘗爲盜者，今旣爲良民，有人道向時之爲，必頸漲而赤，惡人之訐也。秀才邵君自楚及門，贖予以書，其間多易，春秋發明聖人之道，無一及前之云者。待人旣厚，其自處果不薄。今還楚，有待予若前者，一爲予辯之。

送向祕丞序

民不見治。其原在州縣之情分。州者曰。縣吾統。事無便不利。檄一下。責縣之必從。縣者曰。縣自有政。檄如予何。事不問當否。一切欲遠州。故州病勢削。縣患氣沮。上下交相戾。而民不得見治。儻州可行。縣曰。必不可。行。縣曰。是。州曰。非。州忘其勢。縣抑其氣。唯其當而從焉。則上下交相通。而治可見。一賢一否。不能獨治。州縣俱賢焉。而後治。今范公鎮青社。向侯爲屬縣。范公屈廊廟之尊。就一郡。固不識州之所以謂勢也。向侯以台輔之後。領一邑。固不識縣之所以謂氣也。而又向侯志古力學。處事有本末。得天下之賢而事之。范公斂大施小。獲奇材爲官屬。州縣之情。將合如符節。青之民其見大治。豈止上下相通而已哉。

純甫仙尉正性齋序

室以齋名。無他也。蓋居之者內焉諸心。外焉諸身。藏焉爲萬慮。行焉爲萬事。無不潔齋而居之也。苟身黷于貨。心溺于僞。慮發而不端。事立而不正。獨泰然以居。是有齋名而無齋實矣。純甫名家子。一命尉此邑。因卽署東舊宇。葺以爲齋。六經置諸前。羣史列左右。純甫日居其間。取詩之無邪以秉心。禮樂之中和以治身。易之精微以端慮。春秋之斷以行事。書之洪範以蹈中。其考諸往古。則姦邪雖死。我得以筆誅。忠骨雖朽。我景其遺烈。是無愧于齋實矣。顧其名猶缺。且謔于予。予曰。夫身末也。心本也。性之于心。又本也。性正則心正。心正則其身與事無不正也。宜以正姓名君齋。若乃苟華棖桷。苟積圖史。動靜不由于正。則非子所以名齋之意也。

考德集序

熙寧八年六月甲寅。魏國忠獻韓公薨。訃聞。皇帝震悼。追榮送終。皆軼舊典。既葬。親爲製文刻石以褒大之。所以哀寵之意甚厚。自朝廷三事大夫以及四方閭巷之士。婦人孺子知公名。莫不歎息。相與感動顏色。而公所素厚者。則皆匍匐會哭于其堂。或不得往。則瞻望歔歔。寓使人以祭。將葬。又皆爲詩以抒其衷。于是其孤戴上之施。且榮。卿士大夫之能盡于公也。既類次上賜錄而爲集。又哀卿士大夫所爲文詩。以屬公之故吏。強某而序之。謹名其集曰考德。而言曰。宋興四世。仁宗以恭儉慈仁。繼承于上。而公以碩德偉望。感會于下。君臣一心。遂被顧託。建萬世之利。定二帝之策。而社稷以尊。人神有主。此其功業與日月並明。與天地並久。雖前世願命大臣。載在冊書。磊落駿偉者。不能過也。若夫結髮從事。以暨白首。出入將相。垂四十年。深謀遠識。動中機會。忠厚樂易。人化其德。寬而有制。剛而無虐。小心大度。夷險一節。卒能佐佑三后。格于皇天。有勳于王。有功于國。有庸在民。此則前世願命大臣。有不能及也。至于功大而志愈虛。位高而身愈降。多財而愈貧。既老而愈壯。則又合于伊尹之不以寵利居成功。周公之不驕吝。孔子之年彌高而德彌劭。可謂有始有卒者也。公之德業。誅于太常。著在史官。金石有銘。旂常有紀。宜其暴耀震顯。傳于無窮。而某又以爲考德于斯集者。蓋公所最著者。固已溢于人之耳目。至于微言片善。雖一介之寡。有學士大夫終身弗能及者。而公則具有焉。然不可以一言盡也。是集作者非一人。述者非一辭。合而觀之。巨細悉備。後世窺公之全者。繇斯文以求之。不爲無補。則名曰考德。其有不可者乎。公之門人多一時。

豪傑之士。而其孤乃獨以此屬于某。豈以某從公爲最久。識公行事爲最詳。而某亦貪于頌述功德。以稱公始終待遇之意。故輒忘其材之淺陋。言之樸鄙。以爲之序。

跋

跋大名縣主簿石亢之東齋卷後

亢之治平間與予令尉元城者也。于是吾兩人者交甚好。其相從未嘗一日不懽也。久之予辟京兆。後亢之喪其親以去。相望千百里之外。竊以爲他時縱得游。豈復如前日之數也。熙寧己酉春。予隨司徒魏國公府來魏。居無何。亢之亦主簿大名。以吾兩人者如逸羽驚鱗。東西奔走。復相逢於茂林滄海。乃其所不意爾。知必散易。得而偶聚之爲難也。故情愈以好。而游愈以密。一日亢之徹腐屋。敞新構。揭以爲東齋。家藏圖史。左右而前後。疎窗淨榻。據依而坐。臥蔭有翠柏之景。濯有小池之流。亢之且不得而獨有。復與予共於此。每幕府無事。未嘗輒舍此以不來也。亢之修潔明俊。自其祖而上二世。連執大政。能俛首州縣。不知其貴家子也。於戲。使亢之而出于先世方盛之時。其附而游也。必苟取勢利。諂言媚道。或因以驕其志氣。寧若今日爲亢之者。無可附之勢。可希之利耶。凡予之相從也。亦曰無所苟而來。正言直道。更益而迭進。則吾兩人共樂于一齋之中。豈不裕如也。

記

漣水軍監轉般鹽倉題名記

海利鹽最爲巨。故法有禁私煮。欲利一于公。而防民之牟也。雖食者必市于官。矧敢商焉。若是官鹽之通流。不可一日而息也。漣水轉般倉受四場之鹽。其石常二十餘萬。以支下淮數州之用。苟出納不謹。則吏得以乘慢。而攘取于其間。般運不時。則民闕其用。而公家之利亦乏。然倉興歷二十有九年。監官凡十有九人。至則能究吏弊。以謹出納。足公利。以時般運。而數州之用。未嘗一日闕者。何耶。蓋官舉于省。則所得皆材吏。歲滿有賞格。人人思懋力爾。殿省丞張公繇鹽局。權泗倅。某爲獄官。間以獄事詣公。因從容語倉事。且曰。予與同職供奉官和侯議。欲第其官之名氏。而誌諸壁。子其爲我記之。某不敢讓。謹記云。年月日具位某題。

湖州德清縣覺華寺藏經記

吾聞聖人之書曰經。苟孟而下不預焉。經常也。蓋言彌天地。亘萬世。可常行之爾。然則經之稱尊矣。而諸佛之書。無小大統名曰經。其尊抑甚矣。吾聖人之書。其言修身誠意。經國家治天下之術備矣。惟賢者能知其說。彼愚者投其書。墜諸地。雖千百過之。孰肯一援手以置安處。謂其無益于己也。佛之書。窮死生。論報應。其言曰。今世修某善。來世享某福。今世作某惡。來世獲某罪。其書在前。雖甚愚不敢褻視。必稽首而對之。口不漱不誦。手不盥不執。謂其能罪福于己也。凡數口之家。數家之聚。未有不蓄其書而奉焉。矧浮屠之舍哉。湖州德清縣覺華寺佛之徒曰昭序。自落髮已能悚然服其師之教。既尸寺事。又能募錢若干緡。購其書若干卷。爲髹函鈿軸以華之。復嚴一室。其所謂藏者類而聚焉。故觀者益信嚮。誦者益精進。逮

訖事以記屬予。予嘉佛之書能信千百歲。今昭序復能尊其師之書。使益信于人。是爲其徒有力于師矣。遂爲記云。至和二年三月二十六日記。

湯陰縣思賢堂記

龍圖閣直學士會稽陸公。嘗爲令湯陰。公去愛留。久而民思。思公不得見。輒寓其情于物。凡過公昔所居堂。必徘徊想像。若有所戀而不能去。今令張漸伯。因民之所慕。榜其堂曰思賢。去年公解常山帥節。移鎮全蜀。過故治邑。邑民歡呼焚香。夾道爭拜馬首。噫。公之不爲邑久矣。雖有餘風遺愛在民耳目。其歡迎而望拜者。未必盡當時之人。猶喜公若是。使其人盡嘗親被公惠。與其方去邑之時。其喜若思。宜如何也。公爲詩以道邑民之勤。漸伯並刊諸石。始公能以善政使民思。今漸伯能名堂以慰民之所以思。民之思止于迹。漸伯能思公所以爲賢而履其實。苟去而他日過此。安知不能使湯陰人如望陸公于前日也。陸公字介夫。名誥。熙寧三年四月初六日記。

重建左藏庫記

大名河北之要處。爲官府。必高臺巨楹相望。以稱別都之雄。又其聚人也廣。其養兵也衆。金繒泉布之蓄。與夫每歲十七縣常賦之入。海輸而山委。所謂左藏庫者。宜壯而嚴。乃旁雜吏舍。偪隘衙門之側。嘗比舍火。延燎幾殆。今司徒侍中魏國公。居守封國。會主藏吏。白狀願得更造。因按有羨數者。兵幾何。官所自有者。材幾何。曰。兵足吾使。材足吾用。可不賦吾民。而辦吾事矣。一日條所宜改作之狀。請于朝。報可。遂易其

故處而新之。匠出于心，巧隨于目。崇庳廣袤之勢，無一不中度。四無附居，闕爽軒豁，出納之令，不戒自謹。受藏于內者，得以安置如律，而左藏庫屹然雄視一府，非他屋可並。凡爲楹百一十有七，始作于熙寧二年十月丙申，訖工于三年三月丙午。在城巡檢魏繼宗實董役事，奉行規制，無尺寸不如指者。初，河朔饑，天子處公北門，以四路三十四州之人全屬公撫民，歲稔爰及興作，爲政信有先後哉。方公坐廟堂時，聞天下某事有未便，或人以爲便而事未舉，雖去京師數千百里之外，必立罷而卽行之。矧是庫旣在公宇下，又始當騁馭六藝出入往來之道，目擊其陋，且非所宜處，其圖新而修舊，去彼而就此也，宜慮之已熟。况主吏有請，所以庫成居諸役之先，公特爲字二十門，揭一字，有倫有訓，有司成誦，足以爲官箴云。公以本末俾某書，屢辭不獲聽，故書。熙寧三年四月十一日。

記惡

癸巳歲，予待次吳江親舍，客有過邑下者，動眉睫，搖脣舌，其類則人也。承臺省名朝籍，其貴則士也，卽而見之，彼方餽鮮鱗，以恣大嚼，頂烏紗而曳華袍，極笑言以談時事，將枉道以興賈販。徐而睨之，獨布其帶，若有喪者，叩其端，則曰：親柩在南，今將往矣。噫，聞喪之禮，見星則奔，乃枉道以興賈販，三年不見齒，古之達禮，乃笑言以談時事，衰裳厭冠，孝子之服，乃頂紗而曳袍，七日水漿不入于口，乃餽鱗而恣嚼，今蚩蠶之氓，有一以非孝抵罪，爲吏者必瞑目而怒，扶之唯恐不加毒，戮之唯恐不加嚴，若之何使斯人之徒坐廳事，以風細民，不殿親而肯效幸矣。尙安張國家孝治之本哉。將置之以不孝之刑乎，則予非立朝

者將讓之以名教之罪乎。則禽犢不知愧。第陰憤而默誅。作記惡云。

舉詞

判官舉詞

本官行實吏資。爲衆推與。自主幕畫。舉有所長。觀其政能。無施不可。

推官舉詞

本官精明謹廉。敏于從事。他日采用。必有可觀。

代王龍圖舉李國博詞

伏觀郡人國子博士李庠。操守堅正。博極墳史。塵游不雜。風度自遠。孝友行誼。推高鄉黨。屢辟藩臣。幕府邊事。尤所通曉。與之論議。實有深識。亦旣倦仕。方退里閭。急才之際。庠不可失。

考詞

盱眙周尉忻第二考詞

夫志大而位卑者。謂小官不足效。往往職從而弛。前件官位以文進。道爲位屈。官修而職舉。其志何患不伸哉。政成再葺。直書無愧。

招信馬主簿第一考詞

夫已嘗爲之。而使治其所嘗爲者。疾苦必知焉。前件官列于搢紳。深悉民事。故主簿于一邑。而一邑之民

賴焉。改雖暮月，已足稱能吏。

臨淮李縣尉第三考詞

官無巨細，材患不塞。職瀕河之地，寇賊多有。尉無他爲，捕寇其職。前件官悉力乃事，寇亦衰滅。三載書績，于職無愧焉。

王司戶第一考詞

戶掾之職甚卑，而其事不得專視。糾之與奪，以爲可否。雖有過不至大咎，前件官欲善其職而小累焉。勉哉自力，以圖後效。其考可書中中。

杜主簿第三考詞

前件官勾稽一邑，告政三年，成績可嘉。直書無愧，其考可書中中。

聶司法第一考詞

法之大原，緣情而度中。及弊者去之，或刻而奸深，或寬而務出。前件官舉得中道，可謂能吏。效局一載，無愧直書。其考可書中中。

盱眙周縣令第一考詞

夫與民親而其責備者，無若爲邑。積日累資之制行，而昏懦貪墨者得以進。故民殃而政弛，朝廷患其然。間下新格，須舉乃用。前件官由舉得邑，悉力于政，其歲成效。其往孰量哉。其考可書中中。

馬主簿第二考詞

前件官佐令再歲情與民通。冤枉疾苦。必卽而告。其考可書中中。

招信馬主簿第三考詞

夫主簿之于邑。唯才者能究政之是非。與令議可否。其次不越。勾稽簿書。足以保無過。前件官椽邑三載。訖無敗事。秩滿而去。弗愧直書。其考可書中中。

推官第一考詞

前件官操履純潔。識度沈遠。自賓幕席。密有嘉畫。不求聞于人。而薦者交許。其材也歟。政已及暮。直書無愧。

盱眙周縣令第二考詞

百里之邑。有民與社。民之休戚。繫令之才否。前件官爲邑再歲。究心乃事。職修民豫。無愧直書。其考可書中中。

牒詞

賈繹充堂長牒詞

稽于衆。求學行完懋。而可以爲諸生長者。咸以前件人爲言。迺詢羣議。以補斯職。其勉力以贊學者。益副諸生之所望。

楊祖益充學錄牒詞

學錄于一學之士無不與。凡齒于生員者。又得以佐學官而教諭之。其責甚重。不可委非其人。前件人經明學充。行信鄉里。而諸生比名合議。請補斯職。爰稽衆言。俾錄學事。

李常充學計牒詞

學計主出納用度。其職近于有司。雖然。非得樸茂廉實之士。則職墮而弊生。前件人性潔文敏。衆謂可委。他日從政。其肯忽有司之守乎。

劉大雅充典客牒詞

前件人學術該敏。儀矩修飾。賓客之事。可使主之。噫。赤也立朝。聖門所取。雖在庠序。其可忽諸。

王新轉孔目官牒詞

前件人能法而吏。庀司有年。茲以序升。良允衆議。勉幹乃職。以圖厥終。

秦恭等補官牒詞

前件人廉以飭己。勤以服事。出入公府。能底無過。歲月既久。茲用序遷。宜勉爾勞。以圖成效。

祠部集卷三十四

祝文

皇帝登寶位告諸廟祝文

荷慶基之託。踐皇極之尊。祇率先猷。敢忘遺命。用孚神聽。其體予衷。並薦吉蠲。遙來顯享。

南郊禮畢祭神祝文

謹以清酌庶羞之奠。致祭于某神。國家以上帝訖饗。人神均慶。凡在祭典。徧秩明祀。神其歆承。以對詔意。尙饗。

明堂前祭告千里內諸神祠祝文

國家嗣講聖享。禮物具庀。辛月維吉。將展熙事。預孚神聽。宜有以相之。尙饗。

扁鵲神應公廟挂牌祭告祝文

神以醫妙前世。實爲後世之賴。天下之言脈者。必稽焉。昔我文考。日嘉遺功。追進公爵。肆朕纘極。不敢怠先帝之命令。新厥廟榜。而致祠于神。聿來歆承。永孚庀于後人。尙饗。

泗洲龍王祝文

告于某神曰。惟泗介淮汴之間。以爲州。今二水交激。幾圯城堞。勢進不已。則州民之命。未可保也。刺史憂

民之憂以告神。神職在水事。宜察刺史之憂以爲民之福。使水平堵。廟食無愧。尙饗。

代祭水平王祝文

告于某神之靈曰。農訖力于剛畝。苗未暇穫而雨久不止。疲農之力。殆敗于垂成。則國之租稅與神之享。祝將無以供給。神食此土。見民之急而必加救焉。使陰霾廓然。農得以斂穫。永永廟食。宜無愧也。伏惟尙饗。

代王龍圖祈雪文

歲云窮紀。氣則長暘。願宿麥之待滋。恐新年之作癘。農憂于野。緣旱暵之相仍。神食此方。宜戚休之與共。矧曰聰明之德。實參造化之權。願乘臘天。速降時雪。啓田疇之有望。銷疫疹于將然。豈專神休。兼塞尹責。尙饗。

祭文

贈司徒兼侍中龐籍祭文

惟靈以耆德碩望。爲時宗臣。嘉猷偉謨。實相先帝。還印綬以去其位。賜几杖以休于家。進退大方。始終一節。吁嗟故老。不及體貌于生前。稽案舊章。猶得哀榮于歿後。葬事云邁。奠饌爰傾。爾其歆承。體厥嘉悼。尙饗。

贈侍中許懷德祭文

贈侍中許某之靈。嗚呼。唯左右臣衛。嘗一日勤王家。及其死也。猶悼以恤。矧有自踐行伍。迄統禁旅。終始恭庠。垂五十年。予思乃勤。莫此爲久。今祖爾殯。特深朕悲。尙饗。

淑妃董氏贈祭文

故淑妃董氏。以柔明之範。爲後庭之率。以靜端之性。謹中閨之承。允執婦順。參基王化。聿懷內助。曷忘永悼。猶有形管。可鑑徽蹟。故夫四妃之號。亞后之寵。所以極哀榮之典。而且慰吾懿主之悲也。爾其歆承。祇我休命。尙饗。

祭潘太保文

惟靈資略。沈毅爲時。虎臣久次環衛。終始一節。某頃與公子嘗聯官局。今邑境之內。攢柩在焉。取緣子契。以致薄奠。伏惟尙饗。

祭青州劉元瑜待制文

學有淵源。志存寥廓。憲府橫飛。霜秋一鷲。正論所繫。姦邪膽落。其佐大農。慮精器博。金穀坐計。毫釐較若。屢典劇州。憲平俗樂。聿來帥青。自有方略。勸其民人。載勤耕鑿。束其吏兵。無敢驕矜。惟厥仕官。淹速誰度。始驟中綏。終止延閣。用不及竟。舟藏夜壑。青人哭之。聲動城郭。士林之嗟。才豐報約。追惟昔游。慈恩宴醑。三紀于茲。年契所託。迸淚朔風。寄哀冥漠。庶幾歆承。亦有肴酌。

祭左藏韓則順文

往來塞土。協濟疆事。暑行遇疾。遂報不起。子幼室遠。孤魂異地。後事之責。庶幾盡力。瀝酒以告。其無有憾。尙饗。

祭文學陸先生文

維年月日具官某謹以清酌庶羞之奠。恭祭于杭州文學陸先生之靈。某辱先生諸孤命。輒以不工之銘。汗先生墓石。道盛德衆。有所漏而不盡紀。縱紀之。又才弱辭俚。將不能暢其美于無窮。而取貴于後世。是未足爲先生報。而適足負先生也。某始以少年出窮巷。無知而禮之者。先生一見。獨忘其齒之尊。納以爲上客。日規月誘。其後意未有一日而不繼前時者。旣而某得薦于鄉。得第于廷。州以掾于獄。縣以令于民。莫不夫受先生教。而歸拜先生賜也。前年來京師。先生飲以別。徹酒把袂。眷眷有不忍分之色。今某官此。而先生死且葬矣。不得泣送先生之柩。見其入于土中。某之恨何時可已耶。尙饗。

代馮內翰祭田樞密文

天放生公。其必爲時。道德之積。仁義之持。不遐公年。乃奪其施。人事可悼。天理可疑。公未入官。曠懷萬世。孰成于泊。孰敗于弊。涵養閎肆。奚發科制。人始知公。志在康濟。帝嘉奏篇。策公臨軒。筆應大問。江河倒源。講始見木。飛弊至根。人又如公。不獨有志。而且有言。華纓長裾。陟降清禁。言必允蹈。重亦自任。正論所激。諛口隨噤。四海之歎。利澤未浸。乃使三司。乃副樞使。兵哺邦蓄。旣富不匱。民足戎贍。仍縮不肆。匪唯志言。又驗行事。行乘大鈞。峨冠中階。以公取之。如探諸懷。寒暑之診。生理有乖。霖雨弗作。樞躔竟埋。人之悲公。

正以不相。若某之悲。夫豈有童。姻好之末。矧託無狀。瀝酒紱哀。庶公來饗。

代王尙書祭賈魏公文

初公以教師太學生。其後以經術講禁中。始知公道德文學之蘊。充然其闕以茂也。已而長臺府。登皇僚。秉鈞制樞。而百工以職。四裔以寧。又知公經濟輔弼之業。自任乎其重而有餘裕也。公之去魏。某實承其後。聞三撫魏人。而一煦以恩。魏人德公。若赤子之愛慈父母。計至之日。塗驚巷嗟。或老幼信持以泣。然後益知公恭己施人。其佐天下之大。而臨夫千里之內。其政之所施。得民心若此。其固也。嗚呼。起儒服至台。衰始終無一毫失道。公其賢矣乎。出入將相餘二十年。六換節旄而卒。公享大國。勇骨強體。幾以壽終。公其具福而無憾矣乎。其所以南望而致哀一奠者。徒以爲國惜老成人。而且慰魏國之悲。公爾尙饗。

代祭范資政文

惟公先識遠業。發于天資。再命京寺。言高位卑。書抵相府。琅琅厥詞。謂治先急。育材練師。位晚自得。言十九施。飛綏諫聯。鋤姦救疵。作尹京邑。權豪沮衰。讒口狺狺。構成駭機。公足一蹈。顛跋弗支。朝爲大尹。暮從小摩。旁顧驚惋。公甘若飴。既黜而寤。詔旨趣歸。西戎寇邊。兵要執持。朝廷議才。曰公是宜。敵聞公名。膽縮魂飛。相戒以退。無干公威。凱歌言還。參貳衰司。欲主堯舜。期身皇夔。功業未竟。太平始基。

代祭張密學文

嗚呼。厥有木焉。材堪棟梁。而他室是用。不克構乎明堂。與夫賢人器。包經綸。而官止近侍。不及乘乎大鈞。

可同悲而其辛。噫。明堂之不構。豈木之陋。實掄材之弗偶。大鈞之不秉。豈賢之病。實有生之弗慶。惟公業履純正。材謀偉奇。鼎司袞章。陰實與公期。宜而弗爲。其命也歟。俛惟孱弱。姻婭是託。泣遡西風。餽疏酒薄。聊一薦于由衷。慨哲人之不作。尙饗。

祭俞戶曹文

嗚呼。懷姦顯榮。而端善梗闕。不仁永年。而仁反天奪。嗟嗟叔微。而止于斯。若壽與夭。其偶然歟。將籍已素定。而不一可移。魂也莫詰。孰平予悲。頃愚與君。同旅京國。予負宿狂。奏書自直。事久不報。相視以惻。旣而洒然喜動君色。春風鮮鮮。遊騎並鞭。秋月娟娟。飲帽對偏。君朝顧我。我暮君邊。一日少闊。怒如經年。富者遠貧。奚啻避寇。君獨親我。忘己之富。寒饑水火。將蹈而就。緊君出力。援手以救。始君調官。版掾赤城。君出銓門。予賀以迎。廣文鄭虔。有唐先生。猶昔官此。實爲君榮。未幾東下。我送于野。餞壺欲傾。別淚盈把。躊躇道傍。意不忍捨。都門獨歸。淒然匹馬。南望寫懷。兩寓音書。曾未我答。君繼中虛。賀客旋踵。弔賓在廬。哀樂反覆。止于月餘。訃音初聞。駭怛幾絕。厚德未酬。胡然永訣。殮不哭棺。殯不臨穴。一櫬寢門。心焉寸折。將誠以奠。寄哀以辭。嗚呼叔微。知乎不知。尙饗。

祭崔郎中文

嗚呼。一府衣冠。莫盛北門。君實貳尹。質厚氣渾。羣起終議。言寡出口。靜固宜壽。胡然獨否。服金餌石。結憤蓄懟。發而爲疽。往往在背。云胡不然而有斯疾。以迄不處。公莫之詰。不鄙謂予。可以託孤。予受所託。罔有

弗孚。瀝酒敍哀。魂知已乎。尙饗。

祭致政薛郎中文

嗚呼。德業涵演。氣質渾厚。百未一施。竟虛其有。視如涕唾。省郎州守。時弗我用。矧曰冠綬。褫之以歸。日縱杯酒。人琴俱亡。已則不朽。君有仲氏。母卹于後。尙饗。

代祭安國夫人文

嗚呼。夫人之生。慶門淑質。於赫元宰。曰嬪其室。婉婉其從。祇祇其慄。爲婦伊何。祭職不失。爲母伊何。德均以壹。爵從夫尊。克成厥家。大國斯封。象服載華。被躬者翟。飾首者珈。間朝中宮。前導後遮。命婦孔羣。班莫我差。遭疾素秋。游神紫霞。露濕銘旆。風淒葬笳。宗族號送。爰百其車。奠筵相望。道途咨嗟。生榮沒盛。魂其知耶。伏惟尙饗。

祭齊郡君文

惟靈稟生德門。靜柔令慈。作配君子。母婦是師。貴而從天。顯封是宜。象服魚軒。庶永壺彝。如何奄忽。遂隕淑姿。樽酒肴蕝。侑哀以辭。魂克不昧。其願歆之。尙饗。

行狀

龍圖閣直學士、朝散大夫、給事中、充同羣牧使兼知審官東院、權發遣開封府事、上柱國、隴西郡開國侯、食邑一千二百戶、食實封四百戶、賜紫金魚袋李公行狀。

曾祖守澄。任開封府襄邑縣尉。祖珣。贈殿中丞。父陟。尚書屯田員外郎。累贈吏部尚書。公諱中師。字君錫。姓李氏。其先博平人。後徙魏之內黃。又徙京師。今爲京師人。公幼孤。能自刻苦。過成童。已與鄉貢。旣冠。中景祐元年進士第。類得補幕職。便母夫人邊氏養。俛就廣德軍廣德縣主簿。爲令者鄙。一縣賴公以治。居無何。以母喪去官。服除。用制置發運使舉。以真州軍事判官。監蘄州蘄口鎮都鹽倉。課上。改大理寺丞。知開封府鄆陵縣。會歲旱。詔案苗免租。其佐不問可否。一切欲免。公曰。被旱有淺深。奈何一切免也。止蠲其可免者。民憤且率衆訴。府反劾公。公鈎得倡者。卽致之罪。由是民吏率服。而尹亦以此知公才也。已而辟公管勾本府檢校庫。宰相薦公文章。召試入等。充集賢校理。判太常院。又判登聞鼓院。遷殿中丞。提點府界諸縣鎮。賜緋魚袋。又遷太常博士。時屬邑多盜。吏不時獲。公爲設方略。躬自督捕。而盜悉就縛。朝廷議加一官。以賞公勞。公辭曰。此提點職耳。冒賞可耶。遂已。入三司爲度支判官。大享明堂恩。轉祠部員外郎。淮南轉運使。改刑部員外郎。復爲判官。度支。遷兵部員外郎。使契丹還。授河東轉運使。面賜三品章服。改二部郎中。召拜三司度支副使。遷刑部。英宗卽位。又遷兵部。尋除天章閣待制。陝西都轉運使。改諫議大夫。始至。兵食不卒歲。公駭因籌所以轉給。及去。知澶州。而陝部之蓄。已足支數年矣。澶常北使往來之道。乃城庫不壯。公曰。此不足以自衛。且無以夸鄰國。遂增築斥舊。加甃城其上。時出按役。城成。莫不如古制。後北使過。果驚顧發問。接伴以非在設備。特體勢適然。爲對。北使亦稱善。歲滿。入判吏部流內銓三班院。又判太府寺。今上卽位。遷給事中。京東歉。往安撫一路。使還。留守西京。先是洛吏恬于慢令。官逋省帳。至

有十數歲未追而不發者。公至，卽追而立發之。無一敢緩者。歲率三進牡丹。又府例以百花名會。然花費一出民間。每進花。及會作。花價必翔貴。民苦歲市。公亟奏罷之。會亦尋廢。入判都水監。權發遣三司。朝廷以公治洛有素。且因洛人之請。特除龍圖閣直學士。復守西京。初。洛中旱。開府日。雨輒大作。都人喜。目其雨曰隨車。一日。甘露降園亭。取而食之。如蜜。寮佐議以瑞聞。公曰。歲穰物和。民不受敵。乃瑞也。此何足道。于是議者慙而止。適辛亥役法下。公善究立法本意。卽推行之。最爲天下先。而天下之行新法者。亦莫不以河南爲準。公前後守洛。歲輒大稔。旣去。或旱。曠風。隨起。爲政務先惠愛。故所至必治。而其去必見思也。召歸。充羣牧使。兼知審官東院。久之。開封尹以事出境。命公權領府事。早作聽斷。日過中。已庭無留訟。未幾感疾。疾且革。猶條未決事。以屬幕府。翌日。遂終羣牧之正寢。熙寧八年閏四月十四日也。享年六十一。公屢試要劇。無一不修舉。大用謂在朝夕。及其死也。物論尤爲公惜。公性仁。氣溫。平居與人言。唯恐忤物。及當官處事。苟一決于心。雖羣議勞撻不動也。卽有可聽。隨改不吝。若勤職奉法。不以一毫私己。特出于天性爾。初。陳丞相執中居守南都。公年妙韻爽。一見公于學。卽許以遠到。及讀公所業。復以早成期公。他日卒用丞相薦。得帖職。後果至近侍。丞相薨。始不得美諡。公力爭于朝。遂改諡恭。君子以丞相能知人。公爲能報知己也。公博學善屬文。復喜言當世事。仁宗朝嘗著十三策。號曰裨治以進。天子以爲善。降璽書。褒諭。後朝廷有所更爲。往往多如所論者。長于歌詩。頃使契丹。往還得詩百篇。當時殆爲絕唱。凡著文集。奏議五十卷。藏于家。未始輕出示人。故人亦罕有見者。筆札尤妙。得徐浩體。濟以清勁。遂自成一家。孝。

子之得銘先墓者。獲公書石。始以爲慰。幸公累階朝散大夫。上柱國。開國隴西爵侯。食邑一千二百戶。食實封四百戶。初娶劉氏。再娶呂氏。封延安郡君。故相中國文靖公之孫。翰林侍讀學士諱公綽之女。相成以法度。蓋有內助焉。生一男。持正。太常寺奉禮郎。亡女一尙幼。餘皆嫁良士。真州軍州推官羅浹。殿中丞張規。同州朝邑縣令張宰。大理寺丞晏元靖。光祿寺丞呂之問。國子博士陳世修。其婿也。卜以今年五月某日。葬公衛州新鄉縣貴德鄉戒海里。合劉氏之穴。某實佐公羣牧。因得狀。公歷官行事。以獻。能文宗公求銘公墓云。謹狀。

祠部集卷三十五

墓誌銘

桂州司法參軍贈太子中允葉公墓銘

君諱某字杲卿。姓葉氏。世爲杭州錢塘人。曾祖諱某。避亂唐季。故名不載。仕牒。及錢氏王吳越。祖諱某。父諱某。始受僞爵。後吳越以國歸京師。凡陪臣之從行者。皆受命于朝。獨其父中道以事辭歸。不得命。已而自悼曰。吾悔其可追耶。當擇吾兒之秀。使應舉覓官。他日吾家有天子命士。與身得均耳。君生而穎拔。遂讀書。成父志。凡三試開封府進士。而考官率以高等處君。訖用嘗試御前恩。授鄭州長史。後司法桂州參軍。慶歷六年十月二十八日。以疾卒。官所年五十九。方君之在桂。有閩人吳謐死。象州武化縣令謐妻挈二女欲歸閩。至桂。而其妻又死。時本道轉運使杜公祀。在君父子間爲知己。哀吳無所歸。欲妻君二子。君曰。爲子娶婦。豈勢利之取而舍孤窮耶。從之。人以爲義家。故饒財。諸弟用之殆盡。且求異籍。君喟然曰。家道至此。繇吾不能取厚祿以聚親族。汝曹何咎耶。惟汝欲其寬厚多此類。師事郡人林先生逋。先生篤翰。爲當時二絕。君盡得其妙。天禧末年。錢塘有巨石浮于江。太守異之。卽問先生。此何祥也。未有以對。先生以問君。乃按譙子五行志以應。曰。其爲萬乘之憂乎。未幾真宗棄天下。於是益服君多聞。而始知譙子之志爲奇書。君早以經術自任。晚傳其學於二子。二子者。昌言。祕書丞。昌齡。尙書屯田員外郎。同年取進士。

第皆有學行政術。知名士林間。次子先登朝。始用祀明堂。恩贈君光祿寺丞。累至太子中允。君配宋氏。封萬年縣太君。三女長適漳州判官周彭。次適常州司理參軍晁端仁。季適邵武縣尉徐簡。孫君初與英宗同諱。沒後凡若干年。追改今諱。二子於某同年生也。既卜以某年月日葬君錢塘縣履泰鄉北山之原。因以銘屬。其銘曰。

有寶於此。積勤蓄久。三出以鬻。不豐厥售。衆人之得。君獨無有。維其不偶。是以有後。

尙書都官郎中盧君墓誌銘

皇祐二年冬十一月十九日。將葬。贈尙書都官郎中諱諮于淮州昌樂縣長壽鄉鳳林里祖塋之庚地。公子泗守比部郎中某。召屬吏司理參軍強某語之曰。吾父世淮人。累以明經舉鄉里不第。因太息曰。士之仕也。欲行道。其進也。欲及時。吾時過矣。吾道不行矣。寧若教吾子以成吾志。乃授予以經。不復言仕進。間常語予曰。夫經豈空言哉。居者守以治其身。仕者傳以行于事。吾止得治身之效。而不及行事之深切。汝齒尚幼。汝學不已。二者俱享焉。予懼不能成吾父之志。故夙夜強學以自勉。一舉而中第。比予登朝而吾父死矣。始用郊祀。恩贈爲大理評事。累贈至今官。卒時年五十三。人皆謂善有餘而壽不足。今也將葬。子其爲我銘之。某再拜曰。唯。銘曰。

公生孔艱。宜伸而蟠。志卒乃完。子榮公官。公宅旣安。公後其蕃。

尙書虞部郎中曾府君夫人廣陵縣君朱氏墓誌銘

皇祐五年春。晉江曾公諱濬。由殿中丞知蘇州吳江縣。是年冬十有一月八日。喪其夫人廣陵縣君。天長朱氏。夫人于某爲外姑。既哭。夫人于其官舍。明年春。公遣二子奉其喪。往窆杭州之天竺山。某又得相其終事。後十三年。殿丞爲虞部郎中。卒知光州。卜以某年月日葬鄭州之新鄭。二子者。復遷夫人之柩。自杭來合葬。夫人之考。諱巽。嘗擢眞宗朝高第。後爲兵部侍郎。贈某官。夫人生而其父已顯。又極爲其親之所愛。目所習見者。盡富貴也。身所常享者。盡豐佚也。入門事舅姑。能左右不懈。歲時賓祭。必嚴服潔具。不敢後諸婦。若素歷艱難。然方其夫在州縣。而食客常滿坐。用一不給。輒陰嚮奩中所有而辦之。其享之而退者。無不腆之語。入而其夫無不足之色。若慣處匱約。然弗煩傅姆之教。而女功善。不失上下之懽。而家道得。皆天性之所自有也。二子者。用其世父丞相堯國公蔭。孝綽。今爲光祿寺丞。孝總。太常寺太祝。女三人。某其最長。培。次嫁衛尉寺丞王謚。次嫁殿中丞杜譔。于其葬也。某又得銘。其墓曰。嗟。夫人性慈祥。式母婦宜壽域。四十四奄云亡。先旅葬于南方。後踰紀合夫藏。

汝南周氏夫人墓誌銘

夫人餘杭周氏女。二十嫁郡人朱有安。入門主饋。上下相慶。翁姑曰能孝。我僮媪曰能仁。我閨房雍雍。樂得賢婦。朱氏素貧約。夫人治生頗力。家用是豐。給生男四人。宗顏、宗孟、宗閔。皆富而有守。其一曰仲琪。爲比邱有律行。女三人。長適姚宗雅。次並幼。夫人年五十六。至和二年十一月二十一日。以疾終。靜柔淑祥。性酷嚮佛。朝不茹葷。逮瞑弗變。遺命諸子。嚮險中所有。以飯浮屠。其眞所爲好善者歟。將以明年三月二

十一日。窆履泰鄉顯明寺之山圃。諸孤來乞銘。因銘曰。
夫哭順婦。子號慈母。弗衍厥齡。而德有裕。

將仕郎守杭州文學參軍陸先生墓誌銘

嘉祐六年夏四月丁巳。先生陸氏卒。其子求古。章、革、覃、有方。逢休。將以其年十月己酉。合其母夫人蔡氏履泰鄉龍井村之封以葬。六孝子者聚泣以議。吾父蓄道淳德。生七十有六年。其蘊不得久施于時。死矣。獨世之大夫與鄉人之口有傳焉。且吾父誼應銘。其習于父子間。而應以文字銘吾父者。宜莫如強君。以書來求銘。某因得次以銘。先生諱滋。字元象。歲方童。已自如成人。通毛鄭二詩。易。春秋。旣冠。以文辭試鄉舉。一鬻其業。而售有司。母且病不行。後三年復在選。察母面有難別色。先生亦絕口不忍出別語。已而自決。夫仕不獨爲時亦爲親。苟感吾親。而去得仕。如勿仕。吾何爲行哉。時故相陳公堯佐使兩浙。雅待先生厚。手十餘書以遺之。曰。行矣。持此足以遊公卿。先生謝不受。公亦不能強。自是頽然自得。顧天地間無足介吾慮者。惟一肆其意于書。不復言進取。凡聖經賢史九流。百家僻異之說。無不讀。或引以答客問。必章解句析。卒不差一字。問者退輒服。以爲終年讀書。不如與陸先生一日語。尤嗜風雅。日哦樹石間。有以家事關先生者。急麾之使去。曰。吾方作詩。無溷我。皇祐四年詔錄先朝遺士。搢紳縫掖合百餘。以狀白府。請用先生。塞詔。府上之朝。得杭州文學。先生捧告喜。自以不出屋廬間。天子就官我。又獲掾于父母之邦。抑幸矣。歲時隨州吏趨公府。或憫焉。先生曰。此迹爾。惡屈吾心哉。嘗治居材且具矣。其隣有以侵我地。給之。

者。先生第笑與語。吾忍取券以白汝妄邪。卽爲之縮材。其寬厚多此類。與故人飲。必諧調笑歌。賓主各盡。驢若將樂之不厭然。及賓去。席撤。復以嚴自處。里俗襲吳越僞禮。其甚者至僭惡不可聽。先生爲援典制。家矯而戶正之。此敝遂革。平生所著詩、賦、文、論、書、誌、合二十卷。自就學。至垂沒。目未嘗去書。若先生可謂好古。信道。終始自篤。而不變者歟。大王父諱超。以功爲錢氏衢州刺史。王父諱紹。父諱承祖。皆不仕。女二人。皆有歸。銘曰。

嗚呼先生。養璞自少。成而珪璋。訖自能照。唯是羣籍。我考其要。矯革僞禮。俾道非肖。于時獨行。追古同調。元龜云亡。人哭人弔。濟濟有子。德罔弗紹。於後其門。當大有耀。

安府君妻趙夫人墓誌銘

嘉祐六年十二月九日。大理寺丞知開封府右軍巡判官安君。旣喪其母夫人趙氏于官舍。將以明年四月某日。還葬其州之吳縣靈巖鄉吳山某原。以狀與疏託銘于某曰。不孝不能致封號之榮于父母之存。今死且葬。若婦儀母規。又將泯而不克紀。是重不孝之恨于已窮。君忍不銘吾母耶。某又何可辭。夫人蘇州人。三世無仕者。幼孤。隨母嫁張氏。遂假氏以張。旣長。歸安府君。入門盡婦道。舅姑喜。嘗語之曰。今若善事我。他日當得賢子婦。以爲若幸。已而長子及婚。里人有甚貧者。願以其弟之孤女爲配。府君詳未決。慨然曰。彼欲以遺孤託吾兒。納婦必勢賫耶。第娶無易。府君于是不能奪。已而其婦果賢。卒如舅姑言。府君始娶陳氏。夫人繼之。凡子男三人。夫人出者。長寺丞君也。次翰。早死。次沆。應進士舉。女四人。其三出夫人。

而夫人概視之。雖習于安氏者。不知孰爲孰出也。享年六十八。以病卒。某常愛寺丞君。常官不屈倚。而剛介謹廉。以自持。亦夫人內教云。銘曰。

我勤姑嫜。夙夜左右。男女我戒。以順以守。刻此銘辭。以式母婦。

朝奉郎守尙書虞部郎中上輕車都尉賜緋魚袋曾府君墓誌銘。

曾氏得姓最遠。其族散在四方。未聞有顯者。由泉州晉江之曾諱某。始以文學取進士高第。久之。脩撰集賢殿。復有子。今丞相僕射充國公。能世科第。既貴。得追贈三代。故自曾大父諱某。逮脩撰累至太師。中書令兼尙書令。又命豫楚二國以公其祖父。于是曾氏遂大顯。公諱公望。字武仲。丞相之弟。楚國公第五子。用父任補大廟齋郎。嘗一試進士。不中。曰。安能事此。求合耶。遂勉調州縣。後數年。主明之鄞縣簿。是時朝廷用兵西方。詔舉材吏。可爲縣令關中者。或薦公可任。卽拜衛尉寺丞。知華之渭南縣。由寺丞入。遷至虞部郎中。由渭南歷僉書寧海奉國兩軍節度觀察判官事。去持楚國太夫人喪。服除。知舒州桐城。改蘇州吳江縣。知忠州。通判江州。遷光州。以卒。公夔蓄智慮。視天下事無難者。僅縷出罅見。措之行事。人固以爲不可及。渭南豪家置磴。以擅水利。歲旱一勾。不以與人。公至。卽破磴渠水。使得與衆共。凡溉民田千頃。杭州江堤壞。水勢極悍。一州恐。當立辦堤役。諸從事莫可與者。太守以屬公。卽白下諸縣調丁夫。至則富陽人欲亡役。據衆。公鈎得唱者。摔致之罪。衆懼且力。堤亟成。有詔褒諭。忠州民負官鹽十七萬。有破產不足以償者。或負者死。至子孫。猶償不釋。公奏罷之。仁宗朝寬卹諸道民力。遣公江西。多稱上旨。治平二年。淮

蔡饑。公適爲光州。流民間仁政。日饒其境。募富家出倉實以食之。人活數百萬。煦窮卹弱。一郡視公猶父母。明年正月二十一日。以疾卒于官。凡闔封之人。與旁郡之饑民。食于光者。哭數日不絕聲。嗚呼。公仁若此。而壽止五十七。官不過一州守。豈其命耶。其臨下氣嚴色厲。若觸之立蹈于咎。而中實寬然以恕。與人交。誠至誼篤。滋久不壞。雖甚愛物。彼挈之以去。不問。又天性強記。文字一經目。輒終身不忘。好談前史事。歷歷如指掌。善刑名書。或問某事。若是法何如。曰。某事應某法。聞者服其精。嘗著軍政備覽二十七篇。撫諸家兵法爲之說。觀其方略。三軍可將。凡材之可用世者。卒不一施。其可悲也已。娶朱氏。封廣陵縣君。兵部侍郎贈某官巽之女。靜柔淑明。先君十三年卒。子男三人。孝綽。光祿寺丞。孝總。太常寺太祝。孝縉。太廟齋郎。女六人。長適某。次適衛尉寺丞王懋。次適殿中丞杜譔。餘尙幼。公之在吳江。夫人卒焉。遂葬杭州之天竺山。及公葬有日。孝綽與其仲弟遷夫人之柩自杭至。乃以某年某月某日。合葬鄭州新鄭之某原。銘曰。

公初起家。父蔭是承。中則已致。乃終有稱。公在郡縣。害寢利興。豪奪爾破。衆搖爾懲。釋其負逋。如解急繩。哺厥飢口。數不可勝。惠于民人。義于友朋。裕其在已。需然自增。強其在天。則莫我能。亶有餘祉。後人是膺。

贈衛尉卿梁公夫人李氏墓誌銘

戶部侍郎梁公諱某之冢婦。衛尉卿諱某之夫人。姓李氏。其考諱著。有寵。眞宗朝至濠州刺史。緣藩邸之舊。前後賜予甚渥。家以富盛。夫人年十六歸梁氏。方是時。侍郎議審刑院。及其季舒國公在翰林爲學士。

合處京師。族大用絀。夫人入門。能服勞。履約如素習然。事舅姑。終日無惰容。撫諸子。人莫知爲嫡庶者。衛尉愛客樂施。每鬻奩中物以佐之。其來而享之于外者。人稱所欲入。而其夫不見不足之色。率不知費自奩中出也。衛尉喪。不衣采食董。以此終身焉。一日感疾。語諸子曰。七十人壽罕至者。矧吾年又加二。吾死何憾。獨乃父有志無命。不克大耀以死。吾所慊然者。如有待于後。汝曹其勉諸。語訖不起。嘉祐五年六月九日也。夫人喜釋氏書。且深探其理。能頽然委順。不惑于死生之際。豈非效歟。夫貴封永安。上黨二縣君。後以子改封贊皇縣太君。子男八人。曰訪。湖州德清縣令。卒于官。曰詠。今爲太子中舍人。致仕。曰詢。今爲尚書比部員外郎。曰彥。世今爲廣安軍岳池縣令。曰誦。曰諮。並郊社齋郎。曰諷。梧州司理參軍。曰翊。鄆州壽張縣尉。皆早卒。女九人。長嫁試將作監主簿李貫之。次嫁尚書屯田員外郎王衛。次嫁進士郭宗道。次嫁右班殿直張侗。次嫁進士武孜。餘未嫁早卒。熙寧四年九月甲午。葬夫人鄆州須城縣登庸鄉調鼎里。望南山之南原。祔衛尉卿之兆。銘曰。

來儀大家。雖離其鳴。仰肅俯順。婦道以成。宜爾君子。卒至正卿。盛服文軒。始從夫榮。子籍在朝。顯封載更。壺則不外。有聞維聲。孰曰男子。獨後有名。請視銘章。以較重輕。

太常少卿楊公夫人福昌縣君王氏墓誌銘

太常少卿楊公諱某之子。曰元崇。元忠將葬母夫人福昌縣君王氏于某縣某鄉其原。合太常公之兆。以某聯姻。聞夫人宜最詳。願有銘諸壙。噫。某故聞其賢矣。方其歸楊氏也。太常蓋嘗娶謝氏生二女矣。夫人

視之如己出。比夫人二男生。其愛行男女間。未能有以毫髮窺厚薄者。後女嫁。至謁廬中。所有贍費。且王氏故顯。祖樸。贈中書令。父球。任尙書兵部員外郎。夫人獨能忘貴驕之習。奉其夫以禮。入門主饋。無一日輒懈。太常卒登州。護其喪以歸。非臨哭與祭。未嘗不勉子于學。以故二子皆有文。元崇前大名府內黃縣尉。元忠太廟齋郎。某始見夫人于堂上。環立而左右者。無一有惰容。旣知其得家節也。及其亡而往奠。婦媵皆哭盡哀。知其能以仁逮下也。夫人達佛理。故死無怛惻。樂施與。故斂無餘服。得不謂賢也歟。享年六十三。熙寧四年十二月甲子以疾卒。其葬以明年三月某日。其封君福昌也。繇太常登朝用郊祀恩云。銘曰。

權大名府朝城縣主簿陳君墓誌銘

君諱肱。字叔良。洪州武寧陳氏子。生而偉嚴。貌似仲尼。衆目爲陳夫子。然其中亦自信不苟。讀書務通大義。其爲文贍而有制。舉進士。中皇祐元年第。釋褐鄂州江夏縣尉。遭母喪去職。服除。主簿之懷寧縣簿。又司法大寧監。未滿去持父喪。旣又權寧國軍節度推官。後補安州雲夢縣令。未赴而縣廢。改大名府朝城主簿。缺。君曰。是亦爲祿。乃紉其資以就。久之。留守韓魏公知其賢。本道都轉運使。繼以事諉君。且交稱君爲才。未及薦。熙寧四年春。役夫漳河。君部役河上。四月朔得疾以歸。經三日遂卒。享年五十三。貧未克舉葬。權窆浮屠舍。後四年長子頌扶其柩歸。以某年月日葬君先塋之次。大略君爲吏敏于舉職。其行己廉。

于目進其在寧國也。是州之寄倉蕪湖者。于出納爲最劇。監司之委主吏。常艱其選。凡前後兩屬君。一切務去宿弊而斛有餘數。其在江夏也。歲凶多盜。君捕無遺類。掾曹忌其功。悉從未減。故盜得不死。賞典亦從而殺。或不平之。君曰。捕盜尉職爾。必欲害彼以利我。豈吾心哉。于是忌者聞以愧。初君之主簿懷寧也。考試黃州進士。得今太子中允孫公素。賁程文。讀之喜。卽擢爲第一。明年公素登進士甲科。且名在第八。後籍籍爲聞人。于是人莫不以識鑒推君。而君亦以此自負。公素報君甚厚。君死卹其家。以其弟員娶君之孤女。後君之所以得歸葬其鄉。皆公素力也。君子知言。可謂無負矣。然士大夫猶爲惜者。獨無位與年不及少紓其蘊耳。君曾祖諱某。祖諱某。父諱某。皆不仕。娶余氏生二男。曰碩。砥。一女。孫氏婦也。銘曰。嗟夫。君命孰使。莫或行輒。此止用慊心術足已。得一賢享衆美。貽後慶在二子。宅新宮安故里。嗟夫。君茲已矣。

行狀

尙書司門員外郎李君墓誌遺事記

尙書司門員外郎李君旣葬之明年。其嗣子鎬。自雍以書至京師。謂余曰。先君之葬。端明王公實銘其墓。當時遺其可書者數事。鎬食不下咽者亦旣一年矣。今得盡書之以碣諸墓。遂使先烈不泯于後。鎬無愧爲人子矣。乃從而爲之書。君初監密州稅。一日。同職爲大商所給。閱貨不以實。將稍隱其數以曲減征算。君固執不可。不聽。遂往白州守。時蔡文忠公守密。特多君而沮其同職者。復器以爲能吏。由是知名。一郡

無敢以少年視君。後爲縣崑山。有監酒楚豫者。貧甚。能以廉自處。君憐之。先是縣圭田。獨酒官無有。君議斥己田百畝。主簿尉各半之。以割隸酒官。莫不以君議爲當。至今爲例不改。嘗與尉同得僞印。尉圖免遠官。願獨以爲己。獲君一聽。尉便訖不復自言。後州守柳公植。轉運使葉公清。臣聞之。交稱斯二事。皆刻己以與人。亦常情之難能者。鄭文肅公爲杭守。辟君幕府。州事多所倚辦。公移雍。而代者宿望于公。輒鉤摭公短。同幕吏有雅不爲鄭禮者。請索公庫副歷。以尋其隙。代者悅。明日果索副本。君曰。庫有正歷。奚用副爲。前此毀之矣。代者無所得。旣而歎曰。天休雖去。此幕中猶有人焉。吾無能爲已。復從辟京兆。謁丞相呂文靖公于都下。見之喜。意將用君。未幾且坐事。方是時。朝廷專以文法升絀天下士。一跌遂不復振。君明果有餘。而智慮無不足者。遇事無問難易。而一切敢爲。使君而得至于今之時。棄瑕以錄可用之才。挾術舒蘊。馳騁從事于其間。其進而取功名也。未易可度。嗚呼死矣。豈其命歟。君諱某。字景仁。若世次。閔閱。行治。則具王公銘序云。熙寧六年十月十七日。



編主五雲王

編初成集書叢

集 部 祠
册 六

中華民國二十四年十二月初版

撰 者 強 至

發 行 人 王 雲 五
上海河南路

印 刷 所 商 務 印 書 館
上海河南路

發 行 所 商 務 印 書 館
上海及各埠

• O 六三三四

美

校



3
4
1898